

Siunnersuummut nassuiaatit

Nassuiaatit nalinginnaasut

1. Aallaqqaasiut

Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq, kingusinnerusukkut allannguutilik, atulersinneqarnerminili Kalaallit Nunaanni inissianik attartornermut tunngasunut attartornermi pissutsinut pingaarnertigut inatsisitigut tunngavimusimavoq.

Peqqussut 2005-imili arlaleriarluni allanngortinneqartarsimavoq inissiaqarnermut tunngasuni ineriartornermut malittarisassat tulluarsarniarlugit aamma erseqqissaanissamut aaqqiinissamullu pisariaqartitsinerit akueriniarlugit. Allannguutit ilaatigut ineqarnermut akiliutinik akiliinermut, sulisunut inissiat nalinginnaasumik inissiatut attartorneqartussatut tiguneqarnerinut, uumasuuteqarnermut, attartortup toqunerani attartorneqartup tiguneqarneranut kiisalu oqoqarsimasut inissiat attartorneqartartut nalunaarsornerinut tunngasuusimapput.

Allannguisaqaattaartuarnerit kingunerisimavaat inatsisitigut tunngaviusup ilaannakuusutut isikkoqalersimanera, ataatsimullu allanneqarnissaanik malittarisassallu nutarterneqarnissaanik piviusumik pisariaqartitsisoqalersimalluni.

Siunnersuummi matumani siunertaq tassaavoq inatsisartut peqqussutaata atuuttup ataatsimoorumik Inatsisartut inatsisaannik taarserneqarnissaa, manna tikillugu tunngaviusumik pingaarutilinnik ingerlatitsiinnartoq, kisiannili piviusunut atuuttunut, ullumikkut inissiat ilusaannut tulluarsarneqarsimasoq aamma pisortat attartortitsisarneranni aqqissugaanikkut allannguuteqartoq.

Siunnersuutip kingunerisaanik pingaarnertigut attartortup attartortitsisullu akornanni pingaarnertigut atassuteqarnerat ingerlateqqinneqarpoq aammalu aalajangersakkat ataatsimoorinneqarlutik erseqqissarneqarlutillu, taamaalilluni inatsit paasiuminarnerusutut ullutsinnullu naleqqunnerusutut isikkoqalerluni.

Taamaattoq siunnersuutip kingunerisaanik ataasiakkaatigut iluarsiisoqarpoq, ilanngullugu namminersortut inissiaataanni attartortittakkani inuit attartortut aaqqiagiinngissutaasut aalajangersimasut ineqarneq pillugu maalaaruteqartarfimmut suliakkiussisinnaanerat kiisalu inissiani pisortanit pigineqartuni pilersaarutaasumik piffissakkaartumik aserfallatsaaliuineq (PPA) pillugu maleruagassat, atuutsinneqalerlutik.

2. Tunuliaqutaq siunertarlu

Inatsisartut peqqussutaat atuuttoq piffissami ineqarnermut tunngasut annerusumik Namminersorlutik Oqartussanit kommuniniillu piginnittut aqunneqarallarmata kisimiillutillu attartortit-sisuugallarmata suliarineqarsimavoq. Kalaallit Nunaanni Namminersorlutik Oqartussat 2009-mi pilersinneqarmatali namminersorlutik oqartussanit kommuninillu pigineqartut inissiaatile-qatigiiffiit, tassunga ilanngullugit Illuutileqatigiiffik Illuut A/S kommuninilu inissiaatileqati-giiffiit, pisortat inissianik pilersuisutut aqqissugaanerata annertuumik allannorsimavoq.

Tamanna inatsisit piginnittuunikkut aqutsinikkullu pissutsinut piviusunut tulluarsaanissannik pisariaqartitsilersimavoq, tassunga ilanngullugu inatsisip atuuffiata erseqqissarneqarnera aamma inissiat attartortittakkat Namminersorlutik Oqartussanit imaluunniit kommunimit toqqaannartumik pigineqartut kiisalu inissiat attartortittakkat ingerlatseqatigiiffinnit imaluun-niit inatsisitigut nammineertunit allanit, matumani ilanngullugit pisortanit pigineqartut inissi-aatileqatigiiffiit, pigineqartut akornanni immikkoortitsineq.

Siunnersuutip 2005-imili akuerineqarsimasut allannguutissatut siunnersuuterpassuit aamma malittarisassanut ataatsimoortunut oqaatsinullu, taaguutinut aqqissugaananillu nutarsaal-luni katersorpai, taamaalilluni inatsit siunissami Kalaallit Nunaanni attartornermut tunngasut pillugit immikkoortutut tamakkiinerusumillu tunngavissiisutut atorneqarsinnaalerluni.

Piareersarneqarneranut atatillugu pingaartinneqarsimavoq attartorneq pillugu inatsisip attar-tortunut, attartortitsisunut pisortanilu oqartussanut ajornanngitsumik atorneqarsinnaanissaa, kiisalu inatsit pisariittumik aqutsineq assigiaartumillu inatsisitigut suleriaaseqarnermut ikor-fartuissalluni, kiisalu pilersaarutaasumik piffissakkaartumik aserfallatsaaliineq pisortat attar-tortittagaanni maleruagassat ersarinnerusut

3. Siunnersuummi immikkoortut pingaarnertit

3.1 Inatsisip atuuttut

Inatsisissatut siunnersuut pingaarnertigut malittarisassanik atuuttunik ingerlatitseqqippoq, kisiannili aamma pingaarutilinnik allannguutinik, erseqqissaanernik kiisalu immikkoortuni aalajangersimasuni malittarisassalioriaatsip allanngortinneqarneranik imaqlarluni.

Tamatuma saniatigut siunnersuutip kingunerisaanik Inatsisartut peqqussutaanni atuuttumi malittarisassat sukumiisut arlallit Inatsisartut inatsisaanni toqqaannartumik ingerlateqqin-neqassanngillat, paarlaallugillu Naalakkersuisunit malittarisassatigut aalajangersarneqarnis-saat siunnersuutigineqarluni. Tamanna ilaatigut inissianik innersuussinermut, utaqquisut allat-torsimaffiitut, isumaginninnermi inissianik innersuussinermut, sulisunut inissianut, najugaqartut sinniisaannut kiisalu atuinissamut pisinnaatitaaffiup allanut ikaarsaartinneranut malittarisassanut tunngavoq.

3.2. Siunnersuutip imarisai

a) Inatsisartut inatsisaata pissusianik allannguneq

Inatsisissatut siunnersuutip inatsisartut peqqussutaat atorunnaarsippaa taannalu Inatsisartut inatsisaannik taarserlugu. Inatsisartut Naalakkersuisullu akornanni piginnaatitaaffiit agguarnerisigut pingaaruteqartunik allannguisoqanngilaq, ikaarsaariarnerulli namminersorlutik oqartusani aaqqissuussinerup atuuttup inatsisilioriaatsillu nutaajunerusut naapertorlugit nutarterineq qulakkeerneqarluni.

b) Oqaatsinik ilusaanillu nutarterineq

Inatsit oqaatsitigut aaqqissugaanerusumillu misissorneqarsimavoq. Aalajangersakkat siunnersusukkut assigiinngiiaartutut pisoqalisimasutullu inissisimasut paasinarnersinnissaat siunertaralugu allatut oqaasertalerneqarput. Paragraffit arlallit allatut normulersorneqarput, aamma aaqqissugaaneratigut oqaatsitigullu annikitsunik allannguisoqarluni.

c) Atuuffia inissiallu attartortittakkat immikkoortinneqarnerat

Allannguuteqanngitsumik siunnersuutigineqarpoq, attartortoq inuuppat, Inatsisartut inatsisaat illumik inimillu aalajangersimasumik najugaqarfissatut attartornermut, attartukkanik attartortitseqqinneq ilanngullugu atuutissasoq, attartortoq inuttut namminiussuseqarpat.

Siunnersuut inatsisit atuuttut ingerlateqqinnerannik imaqarpoq, peqqussut taamaallaat attartornermut pissutsinut attartortoq inuttut namminiussuseqartillugu atuummat.

d) Ineqarnermut akiliutip akilerneqarnera il.il.

Piffissaq akiliiffiusussaq pillugu aalajangersagaq 2021-mi allannguutissatut siunnersuummiit ingerlateqqinneqarpoq, taanna malillugu ineqarnermut akiliut, imeq kiassarnerlu akiliinermut tunngasoq qaammat sioqqullugu qaammammi ullormi aningaaseriviup ammaffiani kinggullermi akilerneqassalluni.

Siunnersuummi peqatigisaanik attartortup akiliinissamut pisussaaffii erseqqissarneqarput, tasunga ilanngullugit najugaqartumut naatsorsuutit aammalu aningaasat allat attartornermut isumaqatigiissut naapertorlugu akileqquneqartut piffissaq eqqorlugu akilerneqartassasut. Najugaqartumut naatsorsuutit ilaatigut pisussaaffinnik eqquutitsinnginneq, inissiamut imaluunniit illuummut ajoqusiineq, aserorterineq, mianersuaalliorluni atuneq, immikkut ittumik eqqiaaneq, torersaaneq, matuersaatinik imaluunniit parnaarsaatinik taarsersuineq kiisalu matunik, igalaanik imaluunniit pequtunik iluarsaassineq imaluunniit taarsersuineq pissutigalugit uppenarsarneqarsinnaasunik aningaasartuutitut tunngasinnaapput.

Siunnersuummi aamma erseqqissarneqarpoq najugaqartumut naatsorsuutitik aammalu akiliinissamut pisussaaffinnik allanik piffissami akiliiffiusussami akilerneqarsimanngitsunik akiliinngitsoorneq, piumasaqaatit allat naammassineqarsimappata, attartornermut isumaqatigiissutip atorunnaarsinneqarneranut tunngaviusinnaasoq. Siunertaq tassaavoq akiliinngitsoornermik malitseqartitsinermi ersarissumik inatsisitigut tunngavissaqarnissaq siumullu naatsorsuutigineqarsinnaassuseqarnissarlu.

Siunnersuutip aamma Namminersorlutik Oqartussat kommunillu inissiaataanni attartortit-takkani ineqarnermut akiliutitut, imermut imaluunniit kiassarnermut akiligassanut kinguaat-toorutitut naafferartumik akilersuinissamik aaqqissuussineq pillugu malittarisassanik imaqa-rpoq. Malittarisassani aalajangersarneqarpoq qaqugukkut attartortoq naafferartumik akilersuin-issamik aaqqissuussinermut pisinnaatitaaffeqarnersoq aammalu qaqugukkut taamatut pisin-naatitaaffeqarsinnaannginnersoq.

e) Uumasuuteqarneq

Uumasuuteqarneq pillugu malittarisassat, kingullermik inatsisikkut nr. 29, 2019-imeersukkut ingerlatiinnarneqarput. Namminersorlutik Oqartussat kommunillu inissiaataanni attartortit-takkani uumasuuteqarneq aallaaviatigut akuerisaavoq. Attartortitsisulli aalajangiisinnaavoq, uumasuuteqarneq akuerisaassanngitsaq. Aalajangiineq uumasuutitut aalajangersimasunut, in-issianut aalajangersimasunut imaluunniit illunut aalajangersimasunut atuussinnaavoq.

f) Ineqarneq pillugu Maalaaruteqartarfik

Ineqarneq pillugu Maalaaruteqartarfiup piginnaatitaanera, kingullermik inatsisikkut nr. 13, 2022-meersukkut allanngortinneqartup, aaqqissuisuniit tulluarsarneqarluni ingerlateqqin-neqarpoq. Inissiani pisortat imaluunniit ingerlatseqatigiiffiit pisortanit aalajangiisumik sunni-uteqartuni attartortitsisusuni attartortup attartortitsisullu akornanni isumaqatigiinnginnerit Maalaaruteqartarfiup sulisuliasinnaavai aammalu tamatumani inatsimmi aalajangersakkat malinneqarpata, namminersortut inissiaataanni attartortittakkani aaqqiagiinngissutigineqartut aalajangersimasut inunnit naammagittaalliutigineqarneri suliasinnaalissallugit.

g) Pilersaarutaasumik piffissakkaartumik aserfallatsaaliineq (PPA) Namminersorlutik Oqartussat kiisalu kommunit inissiaataanni attartortittakkani

Pilersaarutaasumik piffissakkaartumik aserfallatsaaliinissamut Namminersorlutik Oqartussat kiisalu kommunit inissiaataanni attartortittakkani aningaasanik piginnittut qitiusumi ile-qqaarneqarsinnaanerat erseqqissarneqarpoq, aningaasallu inissiaqarfiusunut tamarmiusunut sivisunerpaamik atatitsisinnaaneq pillugu siunertamut naapertuuttumik atorineqassallutik toqqammaviussalluni nutarterinissamut pilersaarutit ingerlaavartumik nutarterneqartut.

h) Immikkut aaqqissuisuniit allannguinerit

Aalajangersakkat arlallit, siusinnerusukkut nalunaarutiniissimasut, inatsisip immikkoor-tuunera annertusiniarlugu taannalu paasiuminarnerulersinniarlugu inatsimmut ilaatinneqaler-simapput.

i) Tupamik pujortarneq

Siunnersuut inissiani attartortittakkani tupamik pujortarneq pillugu malittarisassanik nutaanik imaqarpoq. Siunnersuutigineqarpoq attartorneqartumi tupamik pujortarneq aatsaat attartortit-sisup allakkatigut akuersineratigut pisinnaassasoq. Siunertaq ilaatigut tassaavoq pujortarnerup kingunerisaanik iluarsaassinermut aningaasartuutit annikillisinneqarnissaat aammalu attartor-

tunut maanna najugaqartunut siunissamilu najugaqartussanut illup iluani silaannaap peqqin-nartuunissaata qulakkeerneqarnissaa.

Tupamik pujortarnissamut inerteqqummik unioqqutitsineq pissutsit malillugit siunnersuummi attartornermik taamaatitsinermut imaluunniit atorunnaarsitsinermut tunngaviusinnaavoq.

j) Attartortup toqunerani pisunilu allani atuinissamut pisinnaatitaaffiup ikaarsaartinnera Siunnersuutip attartortup toqunerani atuinissamut pisinnaatitaaffiup ikaarsaartinnera pillugu malittarisassat allanngortippai. Apparisaq, inooqatigisap aammalu meeqqat inersimasut an-gerlarsimaffimmi najugaqartut attartornermut isersinnaanerata pillugu malittarisassat atuuttut sukumiisut Inatsisartut inatsisaanni toqqaannartumik ingerlateqqinneqassanngillat. Taarsiullugu atuinissamut pisinnaatitaaffiup ikaarsaartinnera pillugu malittarisassanik erseqqinnerusunik aalajangersaanissamut Naalakkersuisut piginnaatinneqarnissaat siunnersuutigineqarpoq. Siunertaq tassaavoq attartortup toqunerani kina attartornermik tiguisinnaan-ersoq aammalu tamanna piumasaqaatit suut tunngavigalugit pisinnaanersoq ataatsimoortumik eqaattumillu malittarisassiuunneqarsinnaassasoq. Siunnersuutip aamma pisuni allani atuinissamut pisinnaatitaaffiup ikaarsaartinnera pillugu malittarisassat atuuttut sukumiisut, ilaatigut attartortitseqqinnermi, aappariinnerup, nalunaar-sukkamik aappariinnerup imaluunniit inooqatigiinnerup atorunnaarnerani, Inatsisartut inat-sisaanni toqqaannartumik ingerlateqqinneqannginnissaat kinguneraa. Taakku taarsiullugu Naalakkersuisunit malittarisassatigut aalajangersarneqarnissaat siunnersuutigineqarpoq. Malittarisassanik aalajangersaanermi ilaatigut meeqqat nammineersinnaanngitsut eqqarsaati-gineqassapput kiisalu inooqatigiinnerup atorunnaarneranut nakuuserneq, matumani tarnikkut nakuuserneq, imaluunniit pinerluttulerinnermi inatsimmi pineqartunut ilaasut allat innarliinerit tunngavigineqarsimanersut eqqarsaatigineqassalluni.

k) Sulisunut inissiat

Siunnersuutip sulisunut inissiat pillugit malittarisassat allanngortippai. Malittarisassaq atuut-toq, attartortup ukiuni kingullerni tallimani sulisunut inissiamik najugaqarsimasup sulisunut inissiamik maanna najukkaminik nalinginnaasumik inissiatut attartortittakkatut tiguisinnaat-itaanera pillugu, Inatsisartut inatsisaanni toqqaannartumik ingerlateqqinneqassanngilaq. Taamatuttaaq nalinginnaasumik inissiamik attartortittakkamik neqeroorfigineqarnermut atatil-lugu aammalu pensioneqalernermi sulisunut inissiamik tigusineq pillugu malittarisassat atuut-tut sukumiisut toqqaannartumik ingerlateqqinneqassanngillat. Taarsiullugu sulisunut inissiamik innersuunneqarsimasumik nalinginnaasumik inissiatut attar-tortittakkatut tiguisinnaaneq piumasaqaatillu pillugit malittarisassanik aalajangersaanissamut Naalakkersuisut piginnaatinneqarnissaat siunnersuutigineqarpoq. Siunnersuutip aamma sulisunut inissianik attartornermik taamaatitsineq pillugu malittarisassanik imaqarpoq, il-anngullugu atorfeqarnerup atorunnaarnerata kingunerisaanik sulisup sulisunut inissiamut pisinnaatitaaffiata atorunnaarnera.

l) Innersuussineq, utaqqisut allattorsimaffii aamma isumaginninnermi inissianik inner-suussineq

Siunnersuutip Namminersorlutik Oqartussat kommunillu inissiaataannik attartortittakkanik innersuussinermut malittarisassalioriaaseq allanngortippaa. Innersuussinermi tulleriiaarneq, inissianut utaqqisut allattorsimaffii, nuukkusullutik qinnuteqartut, isumaginninnermi inissianik innersuussineq, annaasaqarnissamut qularnaveeqqusiineq kiisalu ineqarnermut akiliummik, qularnaveeqqusiisummik il.il. akiliineq pillugit malittarisassat sukumiisut arlallit Inatsisartut inatsisaanni toqqaannartumik ingerlateqqinneqassanngillat.

Taarsiullugu Namminersorlutik Oqartussat kommunillu inissiaataannik attartortittakkanik immikkoortitsineq, immikkut atugassanngortitsineq aamma innersuussineq pillugit malittarisassanik aalajangersaanissamut Naalakkersuisut piginnaatinneqarnissaat siunnersuutigineqarpoq, ilanngullugit akiliutit, inoqutigiit isertitaat tunngavigalugit inissianik atorineqanngitsunik agguaneq, inissarsiorlut immikkoortui, inissianut utaqqisut allattorsimaffii, annaasaqarnissamut qularnaveeqqusiineq aamma isumaginninnermi inissianik innersuussineq pillugit malittarisassat.

m) Najugaqartut sinniisui

Siunnersuutip Namminersorlutik Oqartussat kommunillu inissiaataanni attartortittakkani najugaqartut oqartussaaqataanerat pillugu malittarisassat allanngortippai. Inissiaqarfiit, immikkoortortaqaqarfinni siulersuisut aammalu taakku sulinerat pillugit malittarisassat atuuttut sukumiisut Inatsisartut inatsisaanni toqqaannartumik ingerlateqqinneqassanngillat.

Taarsiullugu Namminersorlutik Oqartussat kommunillu inissiaataanni attartortittakkani ingerlatsivinni ataasiakkaani najugaqartut sinniisaannik qinersineq taakkulu sulinerat pillugu malittarisassanik aalajangersaanissamut Naalakkersuisut piginnaatinneqarnissaat siunnersuutigineqarpoq.

n) Attartortup attartukkaminik allannguisinnaatitaanera

Siunnersuutip Namminersorlutik Oqartussat kommunillu inissiaataanni attartortittakkani attartortup allannguissamut, suliaqarnissamut pitsanngorsaanissamullu periarfissai pillugit malittarisassat allanngortippai. Malittarisassat atuuttut malillugit attartortoq attartortitsisup akuersineratigut pitsanngorsaanernik il.il. aalajangersarneqartunik suliaqarsinnaavoq aammalu nuunnermini aningaasartuutit uppersarnarneqartut pillugit aningaasatigut taarsiiffigineqarsinnaalluni.

Siunnersuut malillugu attartortoq aallaaviatigut attartukkami allannguisinnaanngilaq imaluunniit attartukkap iluani, qaavani silataaniluunniit suliaqarsinnaanani imaluunniit pitsanngorsaaninaani. Inerteqqummut attartortup illup iluani aserfallatsaaliinera ilaatinneqanngilaq, isumaginninnermilu inatsisit naapertorlugit ikiuutit pillugit malittarisassat iluarsillugit ingerlateqqinneqarlutik.

4. Pisortanut aningaasaqarnikkut allaffissornikkullu sunniutissat

Inatsisissatut siunnersuut pisortanut aningaasaqarnikkut annertunerusumik sunniuteqassangat ineqanngilaq. Tassani pineqarput teknikikkut oqaasertaatigullu nutarterineq kiisalu inatsisit ataatsimut allanneqarneri, siunnersuulli aamma immikkoortuni aalajangersimasuni pingaarutilinnik allannguutinik aammalu malittarisassalioriaatsip allanngortinneqarneranik imaqaqpoq.

Ingerlatsinermi periutsinut atuuttunut ingerlatseqatigiiffiillu ilusaannut atuuttumut tullu-arsaanerup kingunerisaanik allaffissornikkut oqilisaassisoqarlunilu Namminersorlutik Oqartussat, kommunit pisortanillu pigineqartut inissiatileqatigiiffiit akornanni akisussaaffiit agguarnerini erseqqinnerulersitsisoqassaaq.

Paasissutissiiniarnermi atulersitsiniarnermilu sulianut atatillugu aningaasartuutaasinnaasut aningaasaliissutit pioreersut iluini akilerneqassapput.

5. Inuussutissarsiutinik ingerlataqartunut aningaasatigut allaffissornikkullu sunniutisat

Siunnersuut aningaasaqarnikkut imaluunniit allaffissornikkut inuussutissarsiortunut anner-tuumik sunniuteqassanganneqanngilaq. Siunnersuulli namminersortuni pigineqartuni inuit attartortut isumaqatigiinngissutit assigiinngitsut Ineqarnerneq pillugu maalaaruteqartarfim-mut, maalaarsinnaanermik ammaanneqassapput. Tamanna killilimmik allaffissornikkut nam-minersorlutik attartortitsisartunut suliassanik pilersitsisinnaavoq, maalaarutiniq suliaqarnermi soorlu paasissutissanik tunniussineq kiisalu uppersaatinik.

Namminersorlutik attartortitsisartut ineqarnermut akiliummik aalajangersaasarnerat, aserfal-latsaaliisarnerat, attartornermik taamaatitsineq atorunnaarsitsisarnerlu ingerlatiinnarneqarput.

Namminersorlutik attartortitsisartunut ineqarnermut akiliummik aalajangersaaneq, aserfallat-saaliuineq, attartornermik taamaatitsineq aamma atorunnaarsitsineq pillugit malittarisassat pingaarnerusutigut allannguuteqartinnagit ingerlateqqinneqarput, taamaattoq siunnersuummi allannguutit erseqqissaanerillu malillugit.

6. Avatangiisinut, pinngortitamut inuillu peqqissuunissaannut sunniutissat

Avatangiisinut, pinngortitamut inuillu peqqissusiannut siunnersuut toqqaannartumik sunni-uteqassanngilaq. Siunnersuummi inissiani attartortittakkani tupamik pujortarneq pillugu malittarisassat illup iluani silaannarmut taamaalillutillu inuit peqqissuunissaannut pitsaasumik sunniuteqarsinnaapput. Sunniutaasulli annertuutut nalilerneqanngillat.

7. Inuit pisinnaatitaaffii kiisalu innuttaasunut kingunerisassat

Siunnersuut nutaanik imaluunniit annertuumik innuttaasut pisinnaatitaaffiitut ajornerulersitsi-tut, inatsik atuuttumiik akuliunnerusutut nalilerneqanngilaq.

Attartornermik taamaatitsineq aamma atorunnaarsitsineq pillugit malittarisassat attartortunut inatsisitigut isumannaatsuunissamut qulakkeerinninnerit atuuttut pingaarnertigut ingerlat-eqqippaat.

Siunnersuut nalilerneqarpoq naapertuuttoq, pisinnaatitaaffimmut ajoquserneqarnani nam-mineq inuunerup ingerlassinnaaneranut kiisalu angerlarsimaffeqarsinnaanermut immikkoor-

toq 8 Inuit Pisinnaatitaaffii pillugit Europami Isumaqatigiisummi. Siunnersuut aamma nalilerneqarpoq inuit pisinnaatitaaffiit allanik apeqqutinik pilersitsinngittoq.

8. Nunani allani attaveqarnernut nunallu immikkoortuini politikkimut sunniutaasussat kiisalu sunniutaasussat allat

Naliliisoqarpoq inatsisissamut siunnersuut Kalaallit Nunaata nunani allani attaveqarnerinut nunanilu tamalaani pisussaaffiit sunniuteqassanngitsoq. Aammattaaq naliliisoqarpoq siunnersuut allatigut annertuunik sunniuteqassanngitsoq.

9. Tusarniaaneq

Siunnersuut piffissami ulloq 6. marts 2026 aallarnerfigalugu ullup 3. april 2026 nal. 12.00 tungaanut Naalakkersuisut tusarniaanermut nittartagaanni tamanut ammasumik tusarniaassutigineqarpoq.

Peqatigisaanik siunnersuut oqartussanut, kattuffinnut soqutiginnittunullu allanut attuumassutilinnut tusarniaassutigalugu nassiunneqarpoq, ilanngullugit Naalakkersuisoqarfiit, kommunit, ineqarnermut suliasaqqarfiit pisortani namminersortunilu ingerlatsisut kiisalu aningaasalersuinerneqarpoq.

Ilaatigut Greenland Airports A/S-imit, INI A/S-imit, Iserit A/S-imit, IMAK-imit, SIK-imit, Inu:it Bolig A/S-imit, Qarsoq Tegnestue-mit, Grønlandsbanken-imit, Avannaata Kommunit, Sulisitsisunit, TK-Group A/S-imit, Kalaallit Nunaanni Politiit aamma BDO-mit tusarniaanermut akissuteqaat tiguneqarpoq.

Isumaginninnermut, Suliffeqarnermut Nunamullu Namminermut Naalakkersuisoqarfik, Finansstilsynet amma Nukissiorfiit nalunaaruteqarput siunnersuummut oqaaseqaatissaqaratik.

Tusarniaanermut akissuteqaatini tiguneqartuni pingaarnertigut ilaatigut siunnersuutit atuuffissai ukkatarineqarsimapput, ilanngullugu suliffeqarfiit attartortut pineqarnissaat, ineqarnermut akiliutit aalajangersarneqartarnera pillugu maleruagassat aamma attartornermut akiliut aningaasartuutit aalajangigaasoq, sulisunut inissiat aamma utaqqiisaasumik inissiisarneq kiisalu allaffissornikkut aningaasaqarnikkullu sunniutaasussat.

Tusarniaanermut akissuteqaatit misissorneqarput aammalu siunnersuutit suliarineqarnerata ingerlaqqinnerani ilaatinneqarlutik. Tusarniaaneq pingaartumik siunnersuutit atuuffianik allanngortitsinissamut pissutissaqalersitsivoq. Tusarniaanermut siunnersuummi Inatsisartut inatsisaata attartornermut pissutsinut attartortoq inatsisitigut nammineertut inissisimasooq aamma ilaatinneqarnissaa siunnersuutigineqarpoq. Tusarniaanerup kingorna siunnersuut allanngortinneqarpoq, taamaalilluni atuuffia Inatsisartut peqqussutaanni atuuttumi tunngaviumik malittarisassaqqarnermut naapertuutillerluni, malittarisassat taamaallaat attartortoq inuttut namminiussuseqartillugu atuullutik. Attartornermut pissutsit attartortoq inatsisitigut nammineertut inissisimappat taamaalillutik aallaaviatigut Inatsisartut inatsisaata atuuffiata avataaniissapput.

Tamatuma saniatigut tusarniaaneq namminersortut inissiaataanni attartortittakkani ineqarnermut akiliutip naatsorsorneqartarnera, Namminersorlutik Oqartussat kommunillu inissiaataanni attartortittakkani missingersuutit naatsorsuutillu, sulisunut inissiat utaqqiisaasumillu illusimatitsineq kiisalu akiliinissamut pisussaaffiit aamma Ineqarneq pillugu Maalaaruteqartarfiup piginnaatitaanera pillugit aalajangersakkanik allannguinnissamut erseqqissaanissamullu pissutis-saqalersitsivoq.

Inatsisissatut siunnersuummi aalajangersakkanut ataasiakkaanut nassuiaatit

§ 1-imut

Imm. 1-imut

Inatsisip atuuffia aalajangersakkami aalajangersarneqarpoq Inatsisartullu inatsisaat illunik il-lunilu ineeqqanik inigisassanik attartortitsinermut, attartukkanik attartortitseqqinneq ilanngul-lugu atuuttoq allanneqarluni, attartortoq inuttut namminiussuseqarpat. Siunertaq tassaavoq malittarisassat najugaqarfissanik attartortitsinermut ataatsimoortumik malittarisassanik pilersitsinissaq, attartortup attartorneqartoq aalajangersimasumik najugaqarfigippagu.

Inatsisip atuuffiata avataaniipput illumik illumilu ineeqqanik utaqqiisaasumik attartortitsineq, attartortoq attartorneqartumi aalajangersimasumik najugaqanngippat. Tamanna asser-suutigalugu pineqarlutik ileqqusumik siniffittut ullaakkorsiorfittullu aamma hotellit, motellit vandrehjemmillu aqqutigalugit ineeqqat attartorneqartunik unnuisarfinnik attartornerit. In-eeqqamik inissiamilluunniit attartornermut atasumik piffissami sivisunerusumi imaluunniit piffissamut killiligaanngitsumut attartorneq ingerlanneqarpat attartorneqartoq aallaaviatigut siunnersuummut ilaassaaq, attartorneqartoq aalajangersimasumik najugaqarfittut atorneqarpat. Taamaappat attartortitsisoq pisussaavoq attartorneqartoq attartortumut aalajangersimasumik najugaqarfittut atorneqannginnera uppersarsassallugu. Taamaalilluni pingaartinneqarpoq siunnersuutip saneqqunneqarsinnaannginnera aamma najugaqarfissanik attartortitsinermi malittarisassaliornermut iluaqutaalluni attartortorlu illersorneqarluni.

Taaguut " illu inilu aalajangersimasumik najugaqarfissaq" suli siammasissumik paasineqas-saaq tassaallutik inissiat immikkoortut kiisalu ineeqqat ataasiakkaat, taakku aalajangersi-masumik najugaqarfittut atorneqarpata. "Illu illumilu ineeqqat inigisassat" isumaqarput naju-gassatut ilusilikkatut ilisimaneqartut soorlu illut quleriiaat, illut uiguleriiaat, illut ataqatigiiaat, ilaqtariinnut illuliat, illut affarleriit, ineqarfinni ininik, ineeqqani inissianilu ininik attar-tortitsinerit inatsisissatut siunnersuummi pineqarput. Aasarsiortarfinnik attartortitsineq peqqussummi ilaatinneqanngilaq, tamatumani aasarsiortarfittut taaneqartoq attartortup ulloq unnuarlu najugarisaa pingaarnaq pineqanngippat. Umiatsiat angerlarsimaffiit attartortinneqar-tarnerat inatsisissatut siunnersuummi pineqanngilaq, uani pineqarmat pigisat aalaakkaasut, nuutsinneqarsinnaangitsullu.

Attartortitsineq nalinginnaasumik sulinngiffeqarnermut imaluunniit sukisaarsarnermut siuner-taqarnerisooq aalajangiinnermi ilaatigut attartornerup sivisussusaa nalilersuinnermi ilaatinneqas-saaq, nalinginnaasumik sulinngiffeqarneq sapaatip akunnerini 6-8-niit sivisunerusarneq ajormat.

Sivikitsumik attartortitsineq siunnersuummi maleruagassani atuutsinneqarsinnaavoq, taamaammat pingaaruteqarpoq attartortitsinermi siunertaata nalilersornissaa. Asser-

suutigalugu sulinermit atatillugu allamut inissinneqarneq pillugu attartortitsineq inatsisip iluaniissinnaavoq, attartortoq attartukkami aalajangersimasumik najugaqarpat.

Inatsimmi aamma assersuutigalugu ilaavoq attartorneq pillugu isumaqatigiissut, inuit arlallit ineeqqamik ataatsimik amerlanernilluunniit attartortut attartorneqartorlu attartortut piffissani assigiinngitsuni suliffeqarnerisa malitsigisaanik nikittaallutik attartorneqartumik atuillutik. Illumik illumilu inimik atuinerit suulluunniit atuisumut aningaasatigut akeqartut pinngitsoor- atik attartornermut tunngasuunngillat. Taamaalilluni piginneqatigiilluni inissiat aamma inis- siat pigisat, ataatsimoorlunilu najugaqarfii assigiinngitsut, atuisunit pigineqartut attartorner- mut pissutsinik taaguutip avataaniipput. Inissiat taamatut ittut akerlianik piginnittumit im- aluunniit atuinissamut pisinnaatitaasumit attartortinneqarpata tamanna attartornertut isigineqassaaq, inatsisissatut siunnersuutip atuuffiata iluaniittoq.

Attartorneq tassaavoq akiliilluni atuneq. Atukkiinerit, sivikitsumik paarsineq, nakkutiginnin- neq assigisaallu, assersuutigalugu aningaasat takussutissatut atorlugit attartorneq siunner- suutip atuuffissaata avataaniipput. Pequtinik imaluunniit inissiamut atasunik allanik attar- torneq pillugu isumaqatigiissut assersuutigalugu eqaarsaarnermi atortut, qarasaasiat, umiatsi- aaqqat qamuteralaalluunniit inatsisissatut siunnersuummit malittarisassaqaartinneqanngillat. Atortunik imaluunniit pequtinik attartorneq pineqartunut taakkununga aalajangersimasumik atuinissamik imaluunniit attartornissamik isumaqatigiissummit aquneqassaaq, apeqquataatin- nagu atortup immikkut attartorneqarnerisq imaluunniit inissiamik attartornermut atatillugu at- tartorneqarnerisq.

Imm. 2-mut

Attartorneq pillugu isumaqatigiissut tamakkiisumik ilaannakuusumilluunniit aningaasaanngit- sunik, assersuutigalugu inuussutissanik, sulinermit imaluunniit paarlaasseqatigiinnissamik isumaqatigiissutinik akilersorneqaraluarpulluunniit siunnersuutip atorneqarnera aalajanger- sakkami erseqqissarneqarpoq.

Siunnersuut aamma inissiaq ilaannakuusumik najugaqarfiunngitsumut allamut atorneqaralu- arpalluunniit, assersuutigalugu inuussutissarsiummut annikinnerusumik atuuppoq, attartortoq inuttut namminiussuseqarpat. Attartorneqartut akuleriit, attartorneq pillugu isumaqatigiis- summi ataatsimi init najugaqarfittut kiisalu najugaqarfiunngitsutut soorlu inuussutissarsium- mut attartortinneqarneri inatsisissatut siunnersuutip atuuffiata iluaniipput, taamatullu najugaqarfiusutut attartornertut isigineqarlutik. Akerlianilli inuussutissarsiornermut attartu- gassaviit siunnersuutip atuuffiata avataaniipput. Siunertaq tassaavoq nalinginnaasuunngit- sumik isumaqatigiissuteqarnikkut imaluunniit inissiap akuleriissillugu atorneqarneratigut inat- sisissatut siunnersuutip illersuineq pillugu malittarisassaasa avaqqunneqannginnissaasa qulak- keerneqarnissaa.

Imm. 3-mut

Siunnersuummi Namminersorlutik Oqartussat kommunillu inissiaataasa attartortittakkat aamma namminersortunit pigineqartut inissiat attartortittakkat akornanni immikkoortitsineq erseqqissarneqarpoq. Attartorneq pillugu inatsit malillugu Namminersorlutik Oqartussat kommunillu inissiaataattut attartortittakkatut paasineqassapput inissiat attartortittakkat Namminersorlutik Oqartussanit imaluunniit kommunimit toqqaannartumik pigineqartut.

Inissiaq attartortittagaq Namminersorlutik Oqartussanit imaluunniit kommunimit inatsisitigut toqqaannartumik pigineqarnersoq pingaartinneqarpoq. Tamanna assersuutigalugu Kalaallit Nunaanni Eqqartuussivimmi piginnittuunermut nalunaarsukkat imaluunniit illumut attartortittakkamut pisortanit akuersissutit, soorlu nunaminertamik atugassiinermut, sanaartornissamut, atorneqalernissamut akuersissutit imaluunniit illup normua tunngavigalugit aalajangerneqarsinnaavoq.

Inissiat attartortittakkat assersuutigalugu Ejendomsaktieselskabet Illuut A/S-imit, Iserit A/S-imit aamma Avannaa Development A/S-imit pigineqartut attartorneq pillugu inatsit malillugu namminersortunit pigineqartutut inissiatut attartortittakkatut isigineqarput.

§ 2-mut

Inatsisitigut allatigut immikkut malittarisassaqaartinneqartunut attartorneqartunut inatsisip atuutinnginnera aalajangersakkami aalajangersarneqarpoq, tassunga ilanngullugit allaffis-sornikkut najoqqutassat piviusutigullu inatsisit allat malitsigisaannik.

Assersuutigalugu ilinniartut ineqarfii, utoqqarnut inissiat imaluunniit sullissivinnut inissiat, immikkut ittumik inatsisit attartorneq pillugit malittarisassanik imaqartut. Taamaalluni assersuutigalugu atorfimmud atatillugu inissiat aamma eqqarsaatigineqarlutik, tassani najugaqartussaataitaneq atuulluni.

Namminersorlutik Oqartussat kommunillu attartortittagaanniit inissianik aalajangersimasunik Naalakkersuisut kommunalbestyrelsillu tigusisinnaanerak aalajangersakkami aalajangersarneqarpoq, taamaalluni inatsit atorneqarnani. Inuinnarnut inatsisit tunngavigalugit aaqqissugaasunit ingerlatseqatigiiffinit pigineqartunut inissianut attartugassanut aalajangersagaq atorneqanngilaq, naak ingerlatseqatigiiffiit tamakkiisumik ilaannakuusumilluunniit Namminersorlutik Oqartussani kommuniniillu pigineqaraluartut.

Tunngaviup aamma inissiat immikkuullarissut immikkoortinnissaannut periarfissiivoq, assersuutigalugu atorfimmud atatillugu inissiat, inissiat isumaginninnermi siunertanut atorneqartut imaluunniit utaqqiisaasumik illusimatitsiviit. Ilaatinneqannginneri aalajangiinnermi erseqqissarneqarsimassapput uppersarsaateqarlutillu. Inissianut taakkununga immikkoortinneqarsimasunut Naalakkersuisut aamma kommunalbestyrelsi innersuussisussaataapput kikkunnullok innersuussisoqassanersoq piumasaqaatillu suut tunngavigineqassanersut aalajangiiffigalugu.

§ 3-mut

Imm. 1-imut

Inatsit malillugu attartortup pisinnaatitaaffii nalunaarsugaanissamut piumasaqaateqarnani kimulluunniit atuuttuunera aalajangersakkami aalajangersarneqarpoq. Inatsit malillugu attartortup pisinnaatitaaffii attartortup kingusinnerusukkut isumaqatigiisummik pissarsiffianut eqqartuussivikkullu malersuisuisut akiligassaqarfinnut pitsaasumik illersorneqarput.

Pisinnaatitaaffiit illersorneqartut ilaatigut tassaapput attartornermi annertuallaamik akiliisimanerit utertillugit akilerneqarnissaannut piumasaqaat, unioqqutitsisumik akissarsiat utertillugit akilerneqarneri aamma atuinnermut annertuallaamik akiliigallarsimanerit utertillugit akilerneqarneri.

Tamanna aamma attartorneq pillugu siumoortumik akiliisimanissaq, aallaqqaatitut akiliutit, qularnaveeqqusiissutit assigisaaluunniit pillugit isumaqatigiissutitut atuuppoq, aningaasat taakku katillugit ukiup affaa sinnerlugu attartornermit annertunerunngippata. Siunertaq tassaavoq illumik piginnittumit nutaamiit piumasaqaateqarnermut attartortup illersugaanissaa aamma nalunaarsugaanermik allattuiffimmi nalunaarsugaanissamut piumasaqaateqartoqarnani. Akerlianilli attartortup piumasaqaatigalugu attartorneq pillugu inatsimmi pisinnaatitaaffinniit malersorneqannginnissaq imaluunniit oqaaseqatigiit aappaanni aningaasat eqqaaneqartut sinnerlugit piumasaqaatit ilaanatik.

Imm. 2-mut

Imm. 2 attartortup piumasaqaataa piginnittumut nutaamut inatsisitigut sunniuteqalernissaanut eqqartuussivimmi suliami atuuttuulernissaa pillugu piffissaliineq pillugu malittarisassamik imaqarpoq. Piffissaliussaq tassaavoq attartorneqartup naaneraniit ukioq ataaseq. Piginnittut nikinnerini inatsisitigut isumannaatsuuneq siumullu naatsorsorneqarsinnaanerini aalajangersagaq siunertaqarpoq siusinnerusukkullu piginnissimasumut piumasaqaatit piffissamut killeqanngitsumut atuutsinneqarsinnaannginneri qulakkeerlugu.

Inissiaq tunniunneqarsimanngippat, attartorneqartup naaneraniit ukioq ataaseq qaangiutisnagu attartortup piginnittumut suliamik qaqitsisimassanngilaq, kisianni pisoqalisimanerani malittarisassat nalinginnaasut aamma iliuuseqannginneq pillugu malittarisassat atuutissallutik. Suliati ineqarneq pillugu maalaaruteqartarfinnut suliassanngortinnissaannut piffissaliussat pillugit inatsimmi § 69-mut allatigut innersuussisoqarpoq.

Suliassanngortitsineq piffissami suliassanngortitsineri piginnittuusumut atuutsinneqassaaq. Suliaq tunniussinissaq sioqqullugu siusinnerusumi piginnittumut suliassanngortinneqareersimappat ukiup ataatsip piffissaliussap qaangiutinnginnissaa pinngitsoortinniarlugu attartortitsisumut nutaamut attartortoq taamaalilluni suliassanngortitsissanngilaq. Tunniussineq Kalaallit Nunaanni Eqqartuussivimmi nalunaarsorneqarsimanngippat suliassanngortitsineq inisiamik piginnittuatut nalunaarsorneqarsimasumut sammitinneqarsinnaavoq, attartortoq piginnittut nikinneri aamma piginnittoq nutaaq attartortitsisorlu pillugit allakkatigut nalunaarummik tigusaqarsimanngippat.

Isumaqatigiinngissummik suliaqarnissamut ineqarneq pillugu maalaaruteqartarfik piginnaat-inneqarpat maalaaruteqarnikkut piffissaliussaq kipitinneqassaaq.

Imm. 3-mut

Ingerlateqqitanik pisinnaatitaaffeqarnerit pillugu isumaqatigiissutit nalunaarsuinermi allattuif-fiup inissiaq pillugu quppernermi nalunaarsorneqarnissaannut aalajangersagaq attartortumut periarfissiivoq - assersuutigalugu taamaatinneqarsinnaannginneri imaluunniit tunineqarsinnaannginneri pillugit isumaqatigiissutit.

Eqqartuussiviit sulinerat pillugu inatsimmi tassungalu atasuni allaffissornikkut najoqqutassiat qaqugukkulluunniit atuuttut naapertorlugit nalunaarsuineq pissaaq. Nalunaarsuinerup kingunerisaanik inissiamik pissarsisimasoq eqqartuussivikkullu malersuisut akiligassaqarfiit taamatut immikkut psinnaatitaaffimmut ilisimannissimassappat imaluunniit ilisimannittariaqaralutik. Immikkut isumaqatigiissutit imai, nalinginnaasumik attartornermi inatsisitigut malit-tarisassat nalinginnaasut qaangerlugit atuuttut piffissallu uppersarsarneqarnera aalajanger-sakkami qulakkeerneqarpoq taamaalillunilu isumaqatigiisummik pissarsisimasut eqqar-tuussivikkullu malersuisut akiligassaqarfiit pitsaasumik isumaqarlutik atuutsissinnaanngilaat.

Attartortitsisunik allanilluunniit pisinnaatitaaffeqartunik allamik isumaqatigiissuteqartoqarsi-manngippat ingerlateqqitanik pisinnaatitaaffeqarneq pillugu isumaqatigiissut isumaqatigiis-summut piffissamilu nalunaarsorneqarnerani sapinngisamik pitsaanerpaamik salliutitsisuup-put. Imm. 3-mili erseqqissarneqarpoq immikkut isumaqatigiissutit qaqugukkulluunniit pisort-ani taarsigassarsiat kiisalu qularnaveeqqusiinikkut pisussaaffiit allat nammatassallu, isumaqa-tigiissutip isumaqatigiissutiginerani nalunaarsorneqarsimasut sapinngisamik annertuner-paamik ataqpineqassasut.

Pisortani taarsigassarsiatut isigineqarput taarsigassarsiat Naalagaaffimmiit, Namminersorlutik Oqartussanit imaluunniit kommuniniit imaluunniit pisortat qularnaveeqqusiinerisigut illuum-mik qularnaveeqqusiilluni taarsigassarsiniartarfinni taarsigassarsiarineqartut. Pisortani taarsigassarsianut ilaanngillat pisortat qularnaveeqqusiinatik imaluunniit tapersersuinatik il-luummik qularnaveeqqusiilluni taarsigassarsiniartarfiit.

§ 4-mut

Imm. 1-imut

Inatsisip attartortumut iluaqutaasumik allanit allanngortinneqarsinnaannginnera aalajanger-sakkami aalajangersarneqarpoq. Pingaarnertut malitassaq tassaavoq inatsimmi aalajanger-sakkat attartortumut ajoqusiisumik isumaqatigiissuteqarnikkut saneqqunneqarsinnaanngim-mata, inatsimmi aalajangersakkani ataasiakkaani tamatumunnga erseqqissumik tunngavis-siisoqarsimanngippat, assersuutigalugu takuuk qularnaveeqqutit pillugit § 26, imm. 1, attar-tornerup akilernerneqarneranut piffissaq pillugu § 27, imm. 2, illup iluani aserfallatsaaliineq pil-

lugu § 34, inuinnaat attartortitsineranni allannguutit pillugit § 42, atorunnaarsitsinermik kaleriuteqarnerup sivitsorneqarnera pillugu § 52, imm. 2 aamma piffissami killeqartumi attartorneq pillugu isumaqatigiissutini atorunnaarsitsisinnaanginneq pillugu § 53, imm. 1.

Inatsimmi atatiinnarniarneqartut minnerpaamik pisinnaatitaaffinnik sanngiillisitsinissamut pi-umasaqaatinut attartortup illersugaanera aalajangersakkami qulakkeerneqarpoq.

Peqatigisaanillu isumaqatigiissummi illuatungeriinnut aalajangersagaq erseqqissaalluni inatsisitigullu tunngavik pillugu nalunartoqarneranut akiuiniarluni.

§ 5-imut

Imm. 1-imut

Inatsit utaqqiisaasumik illusimatitsinernut aamma Naalagaaffimmi, Namminersorlutik Oqartussani kommuninilu atorfeqartunut utaqqiisaasumik allatut illusimatinneqartunut atuutinngitsoq aalajangersakkami aalajangersarneqarpoq. Siunertaq tassaavoq nalinginnaasumik attartornermi inatsisitigut malittarisassat utaqqiisaasumik inissiatigut aaqqiisarnerniit immikkoortinneqarnissaat, amerlanertigut attartornivittut isikkoqarneq ajortut, kisiannili atorfinitsitsinermut sulinermilu pissutsinut atasuusartut.

Taamaalilluni ilaatitsinnginneq Naalagaaffimmi, Namminersorlutik Oqartussani kommuninilu sulisunik inissiisarnermut killilerneqarpoq. Inissiisarnerit allat aallaaviatigut Inatsisartut inatsisaanni pineqartunut ilaassapput, ilanngullugu inissiinerit ingerlatseqatigiiffinnit Namminersorlutik Oqartussanit pigineqartunit, ingerlatseqatigiiffinnit kommuninit pigineqartunit aammalu sulisitsisunit namminersorlutik aaqquissuussisimasunit atugassiissutigineqartut, attartorneq pillugu isumaqatigiissut inummut inuttut namminiussuseqartumut attartortinneqaraangat.

Utaqqiisaasumik inissiisoqarsimanersoq imaluunniit allatut utaqqiisaasutut ilusilimmik inissiisoqarsimanersoq nalilersuineri ilaatigut inissiinerup siunertaa, taassuma atorfeqarnermut tunngasunut atasuunera, taassumalu sivisussusissaatut naatsorsuutigineqartoq pingaartinneqarsinnaapput. Assersuutigalugu atorfinni aallartinnermut atatillugu inissiineq, utaqqiisaasumik suliffiup allanngornera, suliniummi sulilerneq, paarlakaannermut aaqquissuussineq imaluunniit napparsimaneq pissutigalugu nalinginnaasumik suliffiup avataaniikkalarneq, aalajangersakkami pineqartunut ilaapput.

Inissiineq qanoq issutsini malillugu utaqqiisaasutut aammalu sulinermut attuumassutilittut isigineqartariaqarnersoq imaluunniit nalinginnaasumik attartorneq Inatsisartut inatsisaanni pineqartunut ilaasoq pissusiviusuni pineqarnersoq, ataatsimoortumik naliliinissaq aalajangiisuusaaq.

Imm. 2-mut

Inissianik eqqaaneqartunik ingerlatsineq aqutsinerlu pillugit malittarisassanik Naalakkersuisut aalajangersaasinnaanernut aalajangersakkakut piginnaatinneqarput, tassunga ilanngullugit innersuussineq, atorunnaarsitsineq akiliinerlu pillugit malittarisassat. Peqatigisaanik utaqqiisaasumik illusimatitsineq pillugu isumaqatigiissutitut naleqqiullugu isumaqatigiissutini ataatsimoortuni pisariaqartutigit eqaallisaavoq. Utaqqiisaasumik allatigullu utaqqiisaasumik illusimatitsineq pillugu assigiiaartunik eqqaatsunillu sinaakkutinik aalajangersaasinnaanermut tunngavik qulakkeerivoq, sukkasuumik ajornanngitsumillu allaffis-sornikkut pisariitsuunissamik pisariaqartitsinerlutik naapertuuttoq peqatigisaanillu isumaqatigiissutini illuatungeriinnut paasinartumik pilersitsilluni aamma immikkut inissiatigit aaqqiinernut taakkununga inatsisitigit tunngaviit pillugit nalornissuteqarneq illuatungilerlugu.

§ 6-imut

Imm. 1-imut

Pisortani Digitalimik Allakkerineq pillugit Inatsisartut inatsisaat naapertorlugu inatsit naapertorlugu nalunaarutit digitalikkut tunniunneqarsinnaaneri aalajangersakkami aalajangersarneqarpoq. Taamaalluni innuttaasut pisortanilu oqartussat akornanni attaveqatigiinneq pillugu nalinginnaasumik digitalinngorsaalluni aaqqissuussinerlutik malittarisassat tullu-arsarneqarlutik. Aalajangersakkami taamaqataani inuinaat attartortitsisut attartortullu ilaatinneqassapput, taakku aaqqissuussinerlutik ilaatinneqalerpata.

Pisortani Digitalimik Allakkerineq atorneqarsinnaanngippat, digitalikkut allakkerivik, nalinginnaasumik allakkanik nassiussisarneq, emaili kiisalu najukkami allakkanik tunniussisarneq atorneqarsinnaapput. Attartorneq pillugu isumaqatigiissummi, assersuutigalugu inatsit naapertorlugu nalunaarutit mailikkut tunniunneqartassat isumaqatigiissutigineqarsinnaavoq aamma illuatungeriit mailikkut najugai allanneqarlutik.

Illuatungeriit, Pisortani Digitalimik Allakkerinerlutik ilaatinneqanngitsut, taamaattoq nalunaarutit tigusissannut pisussaaffilerneqarsinnaanngillat Pisortani Digitalimik Allakkerineq aqutigalugu. Taamatut pisoqarnerani inatsisitigit isumannaatsumik allatigit nalunaarutit nassiunneqassapput, assersuutigalugu allakkatigit imaluunniit isumaqatigiissut malillugu emailikkut.

§ 7-imut

Imm. 1-imut

Attartorneq pillugu isumaqatigiissut kalaallisut danskisullu allaqqasumi naqitam Naalakkersuisut akuerisaanni isumaqatigiissutigineqassasoq aalajangersakkami aalajangersarneqarpoq. Siunertaq tassaavoq isumaqatigiissutini piumasaqaatit assigiiaarnissaasa paasiuminartuunissaasalu qulakkeerneqarnissaa assigiissarneqarsimasunillu atuinerup siuarsarnissaa, imarisaa nassuiarnerilu pillugit isumaqatigiinngissinnaanerit pitsaaliorniarlugit.

Inissianut assigiinngitsunut attartorneq pillugu isumaqatigiissutini assigiiaartunik Naalakkersuisut suliaqassapput, soorlu ilaqutariinnut arlariinnut illut, ilaqutariinnut ataatsinut illut, pisortanit pigineqartut inissiat attartortittakkat kiisalu inuinnarnit inissiat attartortittakkat.

Attartorneq pillugu isumaqatigiissutit ataasiakkaat kalaallisut danskisullu allassimassapput, tassa oqaatsit marluullutik akuerisaanissamut tunngaviummata. Piumasaqaatip attartortup attartorneq pillugu isumaqatigiissummik kalaallisut danskisullu allassimasumik tigusaqarnissaa ikorfartorpaa. Attartorneq pillugu isumaqatigiissummik akuerisaasimasumik illuatungeriit immersuinissaat pillugu piumasaqaateqanngilaq, tassunga ilanngullugu isumaqatigiissummi piumasaqaatit ilassutaasut danskisut kalaallisullu allassimanissaat.

Isumaqatigiissummi piumasaqaatit, attartortup pisinnaatitaaffiini annikilliliisut, atuuttuussappata erseqqissumik allanneqarsimassapput. Taamaalilluni attartortup illersugaanera illuatungeriinnullu erseqqissuunera qulakkeerneqassaaq.

Imm. 2-mut

Immersugassat akuerisaanngitsut atorneqarnerisa malitsigisaanik inatsisitigut sunniutaasut aalajangersakkami allanneqarput. Immersugassat akuerisaanngitsut atorneqarpata attartortup ikinnerusunik pisinnaatitaaffeqarnera imaluunniit inatsit malillugu annertunerusunik pisinnaatitaaffeqarnera atuuttussamik isumaqatigiissutigineqarsinnaanngilaq. Attartorneq pillugu isumaqatigiissummi aalajangersakkat, attartortumut ikinnerusunik pisinnaatitaaffeqartitsisut imaluunniit inatsit malillugu annertunerusunik pisinnaatitaaffeqartitsisut atuuttuusinnaanngilat. Aalajangersakkat attartortunut amerlanerusunik pisinnaatitaaffiliisut imaluunniit pisussaaffiliisut allanngortinneqarnatik sulit atorneqarput.

§ 8-imut

Imm. 1-imut

Inissarsiortut inissiaq pillugu attartornissaq pillugu isumaqatigiissuteqarnissaannut atasumik naammaginangitsunut piumasaqaatinut qulakkeerneqarnissaat aalajangersakkami qulakkeerneqarpoq. Najugaqarfissanik attartortitsinermi aamma taamatut ittuni paarlaannermi imaluunniit innersuussinermi malittarisassaq atorneqarpoq. Inerteqqussut nalinginnaasumik inummumut attartortukkap atorneqarnissaanut pisinnaatitaaffeqartumut atuuppoq. Attartortitsisup innersuussisulluunniit saniatigut aamma attartortoq paarlaassinissamut pisinnaatitaaffeqarpoq imaluunniit itigartitsinissamut pisinnaatitaaffeqarpoq.

Attartornermi, innersuussinermi paarlaassinermiluunniit akissarsiaqarnissaq imaluunniit piumasaqaateqarnissaq akuerisaanngilaq. Uppernarsaanissaq taamaalilluni oqinnerulersinneqarpoq attartortitsisup akiliiummik tigusereernera aalajangersakkamut akерlioreerluni. Illuatungeriit arlaat sorleq akiliuteqarnissaq pillugu suliniuteqarsimanersoq taamaattumik apeqqutaanngilaq.

Attartortup akiliummik akiliinissaa pillugu piumasaqaammik attartortitsisup saqqummiussin-era aamma ilaatinneqarpoq, tassanilu apeqqutaanani attartortoq ilumut akiliummik akiliisi-manersoq.

Aalajangersagaq attartorneq pillugu isumaqatigiissutip isumaqatigiissutigineqarneranut atavog aallaaviatigullu kingorna isumaqatigiissutitut tunngasuunani. Taamaalilluni akiliteqarnermut assersuusiortoqarsinnaanngilaq, attartornermi pissutsit atuunnissaannut akilerneqarnissamut attartortoq akiliteqassasoq kingornatigut isumaqatigiissutigineqarpat.

Taamaattorli attartukkap saniatigut kingusinnerusukkut akiliinissaaq pillugu piumasaqaatit, attartornermi pissutsit isumaqatigiissutigineqarnerani isumaqatigiissutaasut, malittarisassamut ilaatinneqarput.

Pingaaruteqartoq taamaalilluni tassaavoq akiliteqarnissaaq pillugu isumaqatigiissut attartorneq pillugu isumaqatigiissutip isumaqatigiissutigineqarnissaa sioqqullugu imaluunniit naalaani kingornaniluunniit isumaqatigiissutigineqarsimanersoq aalajangiisussaavoq. Malittarisassaaq tassaavoq attartorneq pillugu isumaqatigiissutip isumaqatigiissutigineqarnera sioqqullugu imaluunniit isumaqatigiissutigineqarneranut atatillugu akiliteqarnermi attartortup illersugaalluinnarnera.

Aalajangersagaq aamma najugaqarfissamut paarlaassinermi attartortumut nutaamut illersuivoq, attartortitsisoq imaluunniit attartortoq anisoq akiliisuunersoq apeqqutaanani.

Tamanna inissianut kiisalu ineeqqanut ataasiakkaanut atuuppoq. Aamma taamaappoq attartortumut nutaanut tunniussinermi imaluunniit iliuuseqarsinnaatitaanerup inoqutigiinni ilaasortamut allamut imaluunniit siusinnerusukkut aapparimasamut tunniunnerani attartortukkap nanginnerani.

Akiliummik tigusinissamut imaluunniit piumasaqaateqarnissamut aalajangersakkami inerteqqussut aallaaviatigut pisuni akiliteqaaqqinngiffiusuni, kisianni akiliineq akiliteqaaqqinnermut erseqqissumik naapertuutinnginnerani tamakkiinngitsumik akiliteqaaqqilluni akiliinernut aamma atuuppoq. Siunertaq tassaavoq isertuussilluni akiliteqarnerit pillugit isumaqatigiissuteqarnissanut qulakkeerinissaaq.

Attartorneqartoq pillugu isumaqatigiissummut atassuteqaanngitsumik attartortoq allatigut eqqartuussivikkut iliuuseqarnissaa attartortitsisup piumasaqaatigisinnaanngilaa. Siunertaq tassaavoq attartorneq pillugu isumaqatigiissummut nalinginnaasumik atasumik naammaginangitsumillu attartortup suliamut akiliummik akiliteqarneratigut akiliteqarnissamut inerteqqussummut avaqqutaarinissap pinngitsoortinnissaa. Tassani pineqarpoq akiliut, attartortitsisup piumasaqaatigalugu assersuutigalugu pequtinik pigisallu nuunneqarsinnaasut saniatigut pisisoqarneratigut attartorsinnaanerup aatsaat anguneqarsinnaanera.

Naliliinermi pingaaruteqarluinnartoq tassaavoq eqqartuussivimmi suliamut attartorneq pillugu isumaqatigiissutip atassuteqannginnera, pisunilu taakkunani akiliut akilerneqarsimasoq akileeqqissinermut naapertuunnersoq pingaaruteqanngitsoorani. Pigisamut nuunneqarsinnaasumut akimik naapertuulluinnartumik attartortitsisoq piumasaqarpat, kisiannili taassum-innga attartortoq pisissasoq, akiliuteqarneq sulii pineqarpoq.

Eqqartuussivikkut atorsinnaasunngortussamik aalajangiinerup inatsisinut naapertuunneranut tunngaviusoq tassaavoq pineqartumik attartornermut nalinginnaasumut naammaginnartuunera.

Attartortup assersuutigalugu inissiamik attartornermut atatillugu attartortitsisup angallataa nuannaariut pisiarippagu, tamanna attartortitsisup imaluunniit siusinnerusukku attartortup inissiami pequtaanit pisineraniit aallaaviatigut nalinginnaasuunnginneruvoq.

Akiliuteqarnissamut inerteqqussummik unioqutitsinermi eqqartuussivikkut sunniutaa tassaavoq piumasaqaatip atuuttuusinnaannginnera, akilerneqarsimasullu ullormit akiliiffiusussamiit ernialersorlugit utertillugit akilerneqartussaallutik.

Imm. 2-mut

Inuussutissarsiornermut taamaallaat attartorneqartut inatsimmut ilaatinneqanngillat. Imm. 2 taamaattumik attartorneqartunut akuleriinnut atuuppoq, inissiaq attartorneqartoq aamma niuermik ingerlatsiviusinnaasoq.

Niuernermik tunniussinermi akissarsiat suulluunniit tutsuiginassusermut akiliutaapput, tassungu ilanngullugu niuertarfiup inissisimaffia pisisartuulu. Pequtinik, quersuarmit tunik pisinerit attartornerlu pillugu isumaqatigiissummi piumasaqaatit aamma ilaapput.

Tunniussineq pillugu akiliutip akilerneqarnissaanut attartortup nutaap niuertarfimmik ingerlatsinissamut pisinnaatitaaffimmik iluaquteqarnissaa tunngaviusussaangilaq.

Pingaaruteqartoq tassaavoq attartorneqartut akuleriit pineqarneri, attartortoq nutaaq niuertarfimmik ingerlatsinissamut pisinnaatitaaffeqarluni.

Niuertarfimmik ingerlatsiviusimanngitsumi imaluunniit niuertarfiup atorunnaarsimasutut isigineqarsinnaanerani tutsuiginassutsimut akiliinissaq piumasaqaatigineqarpat tamanna imm. 1-imut akerliuvoq. Tutsuiginarnermut akiliuteqarnissamik piumasaqaateqarneq piviusuusi-naavoq aamma allamut tunisinermi tunniussisup angusarisinnaasaanut akimut naapertuutissaluni.

Niuertarfik pillugu attartortup akissarsiaa tiguneqartunut naleqqiullugu annertuumik tulluann-gippat unioqutitsisumik akiliuteqarneq pineqarsimassaaq. Siunertaq tassaavoq attartorneqar-

tuni akuleriinni najugaqarfiusumut immikkoortumut isertortumik akiliummik attartortup akiliuteqannginnissaanut illersorneqarnissaa.

Imm. 3-mut

Unioqqutitsisumik aningaasat tiguneqarsimasut utertillugit akilernerneqarnissaat attartortumit pi-umasarineqarsinnaapput ullormi akiliiffiusussami akiliinngitsoornermi pillaatitut erniaritit-amut naapertuuttumik tapeqartillugit.

Attartorneqartoq pillugu attartortitsisumit piumasarineqarpat attartortoq eqqartuussivikkut atorsinnaasunngortussamik aalajangiinermik allamik isumaqatigiissuteqassasoq, eqqartuussivikkut sunniutaa tassaavoq piomasagaatip atuussinnaannginnera.

Eqqartuussivikkut atorsinnaasunngortussamik aalajangiineq taamaalilluni utertinneqassaaq, tamatumalu malitsigisaanik aningaasat akilernerneqarsimasut tamarmik utertillugit akilernerqas-sallutik sippulimmik akigititaasimasut kisiat pinnagu. Akiliuteqaqqissimaneq aamma utertinneqassaaq.

Imm. 4-mut

Imm. 1-imi isertortumik akiliuteqartitsinissamut inerteqqummik unioqqutitsineq akiliisitsinertalimmik pineqaatissiissutaasinnaavoq. Suliffeqarfiit pinerluttulerinermi inatsimmi kapitali 5-imi suliffeqarfiit pinerluttulerinermi inatsisitigut akisussaanerat pillugu maleruagassat malillugit akiliisinneqarnissamut akisussaatinneqarsinnaapput.

§ 9-imut

Imm. 1-imut

Inissiat attartortittakkat atorneqanngitsut attartortitsisumit innersuunneqarsinnaaneri aalajangersakkami erseqqissarneqarpoq, inatsimmi atuuttumi sinaakkusiussat iluanni inissarsiortut kikkut attartugassamut atorneqanngitsumut innersuunneqassanersut nammineq aalajangersinnaallugu.

§ 10-imut

Imm. 1-imut

Namminersorlutik Oqartussat kommunillu inissiaataasa attartortittakkat inissarsiortunut immikkoortinneqarnissai, immikkut atugassanngortinneri innersuunneqarnerilu pillugit malittarisassanik Naalakkersuisut aalajangersaasinnaanannik aalajangersagaq piginnaatitsivoq. Tunngavimmut ilaapput akiliutit, utaqqisut allattorsimaffii, inissarsiortut qanoq ittueneri naapertorlugit agguarneqarneri, inoqutiginni akissarsiat malillugit agguarnerit pillugit malittarisassat. Assersuutigalugu inissianik attartortittakkanik aalajangersimasunut atugas-sanngortitsisarneq pillugu maleruagassanut atatillugu, attartukkamut atasumik annaasaqarnissamut qularnaveeqqusiineq pillugu maleruagassat aalajangersarneqarsinnaapput.

Namminersorlutik Oqartussat kommunillu inissiaataannik attartortittakkanik eqaatsumik peqatigisaanillu assigiaartumik paasiuminartumillu aqutsinissaq aamma inissiaqarfinni attartortittakkani ineriartorneq politikikkullu pingaarnersiunerit naapertorlugit malittarisassat tuluarsarnissaat aalajangersakkami qulakkeerneqarpoq.

Tamanna pillugu maannakkut inissianik attartorneq pillugu Inatsisartut peqqussutaanni atuutumi aamma Illuutinik najugaqarfissatut attartortitsisarneq pillugu Namminersornerullutik Oqartussat nalunaarutaat nr. 12, 23. april 2008-meersukkut malittarisassat aalajangersarneqarsimapput.

Aalajangersakkami taamaallaat inissiat attartortittakkat Namminersorlutik Oqartussanit imaluunniit kommunimit toqqaannartumik pigineqartut pineqartunut ilaapput. Taamaattumik inissiat attartortittakkat ingerlatseqatigiiffinnit imaluunniit inatsisitigut nammineertunit allanit pigineqartut aalajangersakkami pineqartunut ilaangillat. Tamanna atuuppoq, ingerlatseqatigiiffik imaluunniit inatsisitigut nammineertoq Namminersorlutik Oqartussanit imaluunniit kommunimit tamakkiisumik ilaannakuusumilluunniit pigineqaraluarpalluunniit. Inissiat attartortittakkat ingerlatseqatigiiffinnit imaluunniit inatsisitigut nammineertunit taamaattunit pigineqartut Inatsisartut inatsisaat naapertorlugu namminersortunit pigineqartutut inissiatut attartortittakkatut isigineqarput.

Aalajangiisuusooq tassaavoq inissiamik attartortittakkamik kina piginnittuunersoq. Inissiaq attartortittagaq Namminersorlutik Oqartussanit imaluunniit kommunimit toqqaannartumik pigineqarpat aalajangersakkami pineqartunut ilaavoq. Inissiarli ingerlatseqatigiiffimmit imaluunniit inatsisitigut nammineertumit allanit pigineqarpat aalajangersakkami pineqartunut ilaangilaq. Tamanna aamma atuuppoq ingerlatseqatigiiffik pisortanit pigineqaraluarpalluunniit.

Inissiaq Namminersorlutik Oqartussat imaluunniit kommuni sinnerlugit ingerlatseqatigiiffimmit imaluunniit aqutsisumit avataaneersumit aqunneqarnera kisimi piginnittuunermut allanngortitsinngilaq.

Imm. 2-mut

Namminersorlutik Oqartussat kommunillu inissiaataasa attartortittakkat isumaginninnermi inissaqartitsinissanut innersuussinerit pillugit malittarisassanik Naalakkersuisut alajangersaasinnaapput tassungalu ilanngullugit kommunip annaasaqarneranut qularnaveeqqutit ineqarnermullu akiliutit, qularnaveeqqusiissut pillugit malittarisassat.

Tunngavik pissutigalugu isumaginninnermi inissiaqarnikkut ajornartorsiuteqartunik ikiuisunik aaqqissuussinernik pilersitsisoqarsinnaalerpoq peqatigisaanillu attartortitsisumut ingerlatsiviusunullu aningaasaqarnikkut annaasaqaataasinnaasut annikillillugit.

Isumaginninnermi inissiaqarnikkut suliniutinik ingerlatsiviusussatut kissaatigineqartuni attartortitsisup ingerlatsiviillu kommunillu akornanni suleqatigiinnissamut malittarisassaq tunngavissiivoq.

§ 11-mut

Imm. 1-imut

Namminersorlutik Oqartussani atorfeqartunut inissianik immikkoortitsineq, innersuussineq atorunnaarsitsinerlu kommunillu inissiamut innersuussisussaataitanerat pillugit malittarisassanik Naalakkersuisut aalajangersaasinnaannut aalajangersagaq piginnaatitsivoq. Siunertaq tassaavoq sulisunut inissianik aqutsineq pillugu malittarisassat ataqatigiinnissaannut tunngavissamik pilersitsinissaq, taamaalilluni sulisunut inissianik innersuussineq atorunnaarsitsinerlu assigiaartumik siumullu naatsorsuutigineqarsinnaasumik ingerlalerluni.

Tassunga ilanngullugu sulisunut inissiamik innersuunneqarsimasumik tigusinissamik atorfillit pisussaaffeqarnerat pillugu malittarisassanik aamma sulisunut inissiamik innersuunneqarsimasumik tigusinissamik itigartitsinerup inatsisitigut sunniuteqarnera pillugu malittarisassanik aalajangersaanissamut Naalakkersuisut piginnaatinneqarlutik.

Tamanna pillugu maannakkut inissianik attartorneq pillugu Inatsisartut peqqussutaanni atuutumi aamma Illuutinik najugaqarfissatut attartortitsisarneq pillugu Namminersornerullutik Oqartussat nalunaarutaat nr. 12, 23. april 2008-meersukkut malittarisassat aalajangersarneqarsimapput.

Imm. 2-mut

Sulisunut inissiap innersuussaasimasup inissiatut nalinginnaasumik attartugassatut tiguneqarnissaa pillugu periarfissaqarneq piumasaqaatillu pillugit malittarisassanik Naalakkersuisut aalajangersaasinnaapput.

Sulisunut ataasiakkaanut eqqarsaatiginninnermik oqimaatigiissitsisumik aamma inissiamik innersuunneqarnissamik pisinnaatitaaffeqarlutik atorfinitsitat sulisoriinnarnissaannut eqqarsaatiginnittumik suliffeqarfinnut ilaatigut nuttarsinnaanermik eqqarsaatiginnittumik malittarisassanik Naalakkersuisut aalajangersaasinnaapput. Aammattaaq nalinginnaasumik inissiamut attartortittakkamut utaqqisarnerup najugaqarfimmit najugaqarfimmut allanngorsinnaanera eqqarsaatiginnittoqarsinnaalluni. Nalinginnaasumik inissiatut attartugassatut sulisunut inissiamik tigusisinnaaneq najugaqarfinni ataasiakkaani nalinginnaasumik inissianut attartortittakkanut utaqqisarnermut naammaginartumik naleqqiunneqarsimassaaq.

§ 12-imut

Imm. 1-imut

Sulisunut inissiamik innersuunneqarnissamut pisinnaatitaaffeqartunut atorfeqartunut inissi-

anik innersuussineq pillugu danskit naalagaaffiat sinnerlugu Naalagaaffiup Sinniisoqarfianik Naalakkersuisut isumaqatigiissuteqarsinnaanerannik aalajangersagaq piginnaatitsivoq. Inissiaqarfinnik Namminersorlutik Oqartussat tiguserinut atatillugu Namminersorlutik Oqartussat naalagaaffimmik isumaqatigiissuteqarsimanerannik naammassinninnissamut piginnaatitsineq iluaqutaavoq.

Imm. 2-mut

Inissiap pissarsiariniarneraniit kingusinnerpaamik qaammatit pingasut kingorna inissiamik neqeroorfigineqarnissaat anguniarneqarpoq. Inissiat attartortittakkat atorneqanngitsut amerlassusaat maannakkorpiaq pisariaqartitsinermut naapertuutinnigppat piffissaq utaqqiffiusoq sivitsorsinnaavoq.

Imm. 3-mut

Inissiamik innersuunneqarnissamut pisinnaatitaaffeqartunut naalagaaffimmi atorfeqartunut inissianik innersuussinermut inissianik aalajangersimasumik amerlassusilinnik Naalakkersuisut immikkoortitsinissamut piginnaatinneqarput. Inissiat immikkoortinneqarsimasut amerlassusaa inissisimaffiilu Naalagaaffiup Sinniisoqarfiata oqaloqatigereenera tunuliaqutaralugu Naalakkersuisunit aalajangersarneqassaaq. Inissiat immikkoortinneqarsimasut atorneqanngitsut nalinginnaasumik inissianut utaqqisuni inissarsiortunut innersuussisoqassanngilaq. Inissiamik innersuunneqarnissamik pisinnaatitaaffeqartunut naalagaaffimmi atorfeqartunut inissianik innersuussinerup nalinginnaasumik inissianut utaqqisut allattorsimaffiannut sunniuteqannginnissaa piginnaatitsineq iluaqutaasinnaavoq.

Imm. 4-mut

Naalagaaffiup sullissiviini sulisut aqutsisuusut pisortanut inissianik innersuussinermi sallitinneqanngillat. Sullissivinni taakkunani sulisunut aqutsisunut pisortanut inissianut innersuussinissamut aalajangersimasumik isumaqatigiissuteqarnikkut Naalakkersuisut innersuussinnaapput. Immikkut atorfinnut atasunik inissianik pisariaqartitsineq akueriniarlugu aalajangersagaq Naalakkersuisunut piginnaatitsivoq.

§ 13-imut

Imm. 1-imut

Inatsisartuni taassumalu ataani sullissivinni sulisunut inissianik innersuussinissaq pillugu Naalakkersuisut Inatsisartunik isumaqatigiissuteqarsinnaanerannik aalajangersagaq piginnaatitsivoq.

Imm. 2-mut

Inatsisartuni taassumalu ataani sullissivinni sulisunut inissianik innersuunneqarsinnaasunut inissianik innersuussinermut atorneqarsinnaasunik inissianik aalajangersimasunik amerlassusilinnik immikkoortitsinissamut Naalakkersuisut piginnaatinneqarput. Inissiat immikkoortinneqarsimasut amerlassusaa inissisimaffiilu Inatsisartut oqaloqatigineqarnerat tunuli-

aqutaralugu Naalakkersuisunit aalajangersarneqassaaq. Inissiat immikkoortinneqarsimasut atorneqanngitsut nalinginnaasumik inissianut utaqqisuni inissarsiortunut innersuussisoqas-sanngilaq. Inissiamik innersuunneqarnissamik pisinnaatitaaffeqartunut Inatsisartuni taakkulu ataanni sullissivinni atorfeqartunut inissianik innersuussinerup nalinginnaasumik inissianut utaqqisut allattorsimaffiannut sunniuteqannginnissaa piginnaatitsineq iluaqutaasinnaavoq.

Imm. 3-mut

Inatsisartuni taassumalu ataani sullissivinni sulisutut aqutsisut pisortanut inissianut innersuunneqarnissamut salliutinneqanngillat. Sulisunut aqutsisunut pisortanut inissianut innersuussinissamut aalajangersimasumik isumaqatigiissuteqarnikkut Naalakkersuisut innersuussisinnaapput. Immikkut atorfinnut atasunik inissianik pisariaqartitsineq akueriniarlugu aalajangersagaq Naalakkersuisunut piginnaatitsivoq.

Imm. 4-mut

Inatsisartuni taassumalu ataani sullissivinni inissiamik innersuunneqarnissamut pisinnaatitaaffeqartunut sulisunut inissiat § 11 naapertorlugu aalajangersarneqartut malittarisassat malillugit innersuunneqassapput.

§ 14-imut

Imm. 1-imut

Inissiat attartortittakkat ingerlatsivinnut ataasiakkaanut agguarneqarneri pillugit Namminersorlutik Oqartussat kommunillu aalajangiisinnaanerat aalajangersakkami aalajangersarneqarpoq. Siunertaq tassaavoq ingerlatsivinni aningaasartuutit tunngavigalugit ingerlatsinermi aqutsinikkut aningaasaqarnikkullu tunngavissamik pilersitsinissaq, taamaalilluni isertitat aningaasartuutillu imminnut malissinnaallutik immikkoortillugillu aqunneqarsinnaallutik. Ingerlatsivinni agguaaq Namminersorlutik Oqartussanit kommuninilu aalajangerneqassaaq.

Inatsisartut inatsisaanni inissiat attartortittakkat sorliit ingerlatsivimmut ataatsimut ilaatinneqarsinnaanersut pillugit sukumiinerusunik piumasaqaateqartoqanngilaq. Taamaattumik ingerlatsivik inissianik attartortittakkanik ukiui, qanoq issusii, sumiinneri, aqqissugaaneri teknikikkullu pitsaassusii assigiinngitsut ataatsimoortillugit pilersinneqarsinnaavoq. Ingerlatsivinnut agguaaq Namminersorlutik Oqartussat imaluunniit kommunalbestyrelsip aalajangiineratigut pissaaq, ilaatigut allaffissornikkut, nunami sumiiffiitigut, ingerlatsinermi aningaasaqarnikkut imaluunniit aserfallatsaaliinikkut eqqarsaatiginninnerit tunngavigalugit.

Aalajangersakkami Namminersorlutik Oqartussat kommunillu inissiaataat attartortittakkat kisimik pineqartunut ilaapput. Inissiar-suarnik namminersorlutik attartortitsisartut pineqartunut ilaatinneqanngillat. Tamanna inissiaatileqatigiiffinnut pisortanit pigineqartunut, namminersortunut inatsisit tunngavigalugit aqqissuussaasunut, aammattaaq atuuppoq.

Imm. 2-mut

Ingerlatsivinnut ataasiakkaanut tamanut ingerlatsinermi missingersuutini ingerlatsinermilu naatsorsuutini ukioq ilivitsumik malinnittumik suliaqartoqassaaq. Ingerlatsivinnut ataasiakkaanut kaaviiartitat oqimaaqatigiissinneri suliarineqassanngillat. Ingerlatsiviit ataasiakkaat inissiaataannik attartortittakkanik ingerlaavartumik siunissamiluunniit aserfallatsaaliinissamut ingerlatsivinni ataasiakkaani ileqqaartoqarsinnaanngilaq. Aserfallatsaaliinermut ileqqaarneq qitiusumi piginnittuni ingerlanneqassaaq aamma Namminersorlutik Oqartussat kiisalu kommunit inissiaataannik attartortittakkanik ingerlatsivinni ataasiakkaani Namminersorlutik Oqartussanit kommuniniillu pilersinneqartuni aserfallatsaaliinernut atugassalutik.

Ingerlatsinermut missingersuutini isertitassatut aningaasartuutissatullu naatsorsuutigineqartut ilanngunneqassapput. Attartorneqannginneranni annaasassatut naatsorsuutigineqartut nalinginnaasumillu aserfallatsaaliuineq, ingerlatsivinni ataasiakkaani akilerneqartariaqartut, aammattaaq eqqarsaatigineqassapput.

Erseqqissumik allassimavoq ingerlatsivinnut ataasiakkaanut naatsorsuutit kukkunersiorneqassanngitsut. Siunertaq tassaavoq allaffissornerup oqilisarneqarnissaa naatsorsuutillu piginnittuni suliaassanngorlugit katersorneqarnerisa aallunneqarnerisa qulakkeerneqarnissaa, takuuk inatsimmi § 15.

Sumiiffinni ingerlatsivinnik ataasiakkaanik aningaasatigut aqutsinissamut sinaakkutissanik aalajangersagaq pilersitsivoq, peqatigisaanillu isigalugu Namminersorlutik Oqartussat kommuniluni inissiani attartortittakkani ukiumut nalunaarusiortoqassalluni kaaviiartitanik oqimaaqatigiissitsisoqartarluni.

§ 15-imut

Imm. 1-imut

Namminersorlutik Oqartussat aamma kommunit ataasiakkaat inissiaataannut attartortittakkanut tamarmiusunut ataatsimoortumik ingerlatsinermut missingersuutit aamma ingerlatsinermut naatsorsuutit kiisalu ukiumoortumik nalunaarusiaq ataatsimoortoq oqimaaqatigiissitsinertalik suliarineqassapput. Ukiumoortumik nalunaarusiaq tamarmiusoq attartortitsisup imaluunniit allaffissornikkut aqutsisup kukkunersiuisuanit avataaneersumit misissorneqassapput.

Namminersorlutik Oqartussat aamma kommunit ataasiakkaat inissiaataannut attartortittakkanut ukiumoortumik nalunaarusiaq nalinginnaasumik naatsorsuusiornermut tunngaviusunut maleruagassanullu siunnersuummi § 15, imm. 3 naapertorlugu aalajangersarneqartunut naapertuuttumik suliarineqassaaq.

Aalajangersakkami siunniussaq tassaavoq pingaarnertigut aningaasatigut nakkutilliinerup qulakkeerneqarnissaa, peqatigisaanillu ingerlatsivinni ingerlatsinermut aningaasartuutit ingerlatsinermilu naatsorsuutit suliffiup iluani aqutsinermi sakkutut atorneqarlutik.

Imm. 2-mut

Ukiumoortumik nalunaarusiami oqimaaqatigiissitsinermi aserfallatsaaliinermut immikkoortitat tamarmiusut takuneqarsinnaanissaat imm. 2-mi aalajangersarneqarpoq. Siunertaq tassaavoq pilersaarutaasumik aserfallatsaaliuinissamut aningaasatigut ileqqaarutit takuneqarsinnaalernissaat, takuuuk § 19, taamaalillunilu ukiumut nalunaarutip aserfallatsaaliinisamullu pilersaarusiornerit akornanni ammasumik pissuseqarneq ataqatigiittoqarneralu pilersinneqarluni. Immikkoortitat ingerlaavartumik ukiumut nalunaarutit ilaatut misiligarneqarsinnaassapput, tassungalu ilanngullugu nalikilliliisoqarlunilu aserfallatsaaliinissamut pilersaarutit nutarterneqarlutik.

Imm. 3-mut

Aalajangersakkami Naalakkersuisut aningaasaliissutinik allaffissornikkut aqutsineq, ingerlatsinermut missingersuusiorneq, ingerlatsinermut naatsorsuutinik saqqummiussisarneq, ukiumoortumik nalunaarusiamik ilusilersuineq suliarinninnerlu kiisalu avataaneersumik kukkunerisuiisup misissuina pillugit maleruagassanik aalajangersaanissamut piginnaatinneqarput.

Piginnaatitsinermut ilaatigut ilaapput Namminersorlutik Oqartussat aamma kommunit ataasiakkaat inissiaataannut attartortittakkanut ataatsimoortumik ingerlatsinermut missingersuutit, ingerlatsinermut naatsorsuutit aamma ukiumoortumik nalunaarusiat qanoq suliarineqarlutillu saqqummiunneqarnissaa pillugit malittarisassat, tassunga ilanngullugit oqimaaqatigiissitsineq aamma aserfallatsaaliinermut immikkoortitat naatsorsorneqarnerat pillugit malittarisassat.

Aalajangersagaq § 14 naapertorlugu ingerlatsivinni ataasiakkaani naatsorsuutit kukkunerisorneqannginnerannut ataqatigiissillugu isigineqassaaq, avataaneersumillu misissuineq taarsiullugu § 15 naapertorlugu ukiumoortumik nalunaarusiamut ataatsimoortumut atatinneqarluni.

Aalajangersakkap siunertaraa Namminersorlutik Oqartussat kommunillu inissiaataannut attartortittakkanut ataatsimoortumik aningaasatigut aqutsinerup, naatsorsuusiornep aammalu ukiumoortumik nalunaarusiornermi tunngavissat ersarissut ataatsimoortullu qulakkeerneqarnissaat.

§ 16-imut

Imm. 1-imut

Aalajangersakkami aalajangersarneqarpoq, Naalakkersuisut kommunalbestyrelsillu aserfal-

latsaaliuinnermut aningaasassat illuartitat atorneqarnissaat pillugu aalajangiinissamut piginnaatitaasut. Tamatuma kingunerisaanik aalajangiisinnaatitaaneq Naalakkersuisuni kommunalbestyrelsinilu inissisimavoq, inissianik allaffissornikkut aqutsisuni imaluunniit ingerlatsivigineqartumi najugaqartut aallartitaanni inissisimanani. Aningaasat aserfallatsaaliuinnermut pilersaarutitut pingaarnernut aammalu Namminersorlutik Oqartussat inissiaataanni kommunillu inissiaataanni aserfallatsaaliuinnermut pingaarnersiuiinnermut naapertuuttumik atorneqarnissaat, aalajangersakkami tunngavissinneqarpoq.

Namminersorlutik Oqartussat inissiaataanni attartortittakkani ileqqaakkat Namminersorlutik Oqartussat inissiaataannik attartortittakkanik aserfallatsaaliuinnermut atorneqassapput. Naalakkersuisut inissianik attartortittakkanik piginnittut, aserfallatsaaliuinnermut ileqqaakkat atorneqarnissaat pillugu aalajangiisussaapput pingaarnersiuisussaallutillu.

Ileqqaakkat kommunini inissiani attartortittakkani ataasiakkaani ileqqaarneqartut, kommunit inissiaataannik attartortittakkanik ataasiakkaanik aserfallatsaaliuinnermut atorneqassapput. Kommunit ataasiakkaat inissianik attartortittakkanik piginnittut aserfallatsaaliuinnermut ileqqaakkat atorneqarnissaat pillugu aalajangiisussaapput pingaarnersiuisussaallutillu.

Imm. 2-mut

Aningaasat immikkoortinneqarsimasut aserfallatsaaliinnermut atorneqarnissaat erseqqissumik aalajangersarneqarpoq. Siunertaq tassaavoq aningaasat ileqqaarneqarsimasut siunertamut immikkoortinneqarsimajuarnissaat aamma ingerlatsivinni ingerlatsinermi amigartoorutitut siunertanulluunniit allanut matussutissatut atorneqannginnissaat. Namminersorlutik Oqartussani kommuninilu inissiani attartortittakkani aningaasaqarnikkut piujuartitsinissamut aalajangersagaq iluaqutaavoq aamma pilersaarutaasumik piffissakkaartumik aserfallatsaaliinissaq pillugu tunngavimmut ikorfartuilluni.

§ 17-imut

Imm. 1-imut

Ingerlatsivinni ataasiakkaani najugaqartut sinniisui pillugit qinersineq aamma sulinerat pillugu malittarisassanik Naalakkersuisut aalajangersaasinnaanernik aalajangersagaq piginnaatitsivoq. Tunngavimmi pineqarput qinereriaatsit, sinniisut sulinerat, pisinnaatitaaffii pisussaaffiilu pillugit malittarisassat. Siunertaq tassaavoq ingerlatsivinni ataasiakkaani ingerlatsinikkut aserfallatsaaliinikkullu pissutsit pillugit attartortut, aqutsisut piginnittullu akornanni oqaloqatigiinnissamut pisortatigoortumik sinaakkutissanik pilersitsinissaq.

Malittarisassat assersuutigalugu missingersuutit pillugit paasissutissanut periarfissaqarnermut, ataatsimiinnerni peqataanermut aamma ingerlatsivik pillugu ingerlatsinermi missingersuutit suliarinerini siunnersuisutut sulinnermut aamma aserfallatsaaliinissamut pilersaarutitut tunngasuusinnaapput.

§ 18-imut

Imm. 1-imut

Namminersorlutik Oqartussat kommunillu ingerlatsiviini ineqarnermut akiliutit aalajangersar-nissaat pillugu pingaarnertigut tunngavinnik aalajangersagaq aalajangersaavoq. Siunertaq tas-saavoq aningaasartuutit tunngavigalugit ineqarnermut akiliutinik aalaangersaanermi aqqis-suussinermik pilersitsinissaq, isertitat aningaasartuutillu akornanni oqimaaqatigiissitsinermik pilersitsisumik kiisalu ingerlatsivinni ataasiakkaani siunissamut ungasinnerusumut aningaas-aqarnikkut piujuartitsinissaq qulakkeerneqarluni taamaalillunilu Namminersorlutik Oqartussat kommunillu inissiaataanni attartortittakkani tamarmiusuni.

Namminersorlutik Oqartussat kommunillu inissiaataannik attartortittakkanik allaffissornikkut aqutsinermut aningaasartuutit maannamut ingerlatsinermut aningaasartuutit ilaattut ilaatin-neqartartut, erseqqissarneqarpoq. Taakkunani ilaatinneqarput Namminersorlutik Oqartussat kommunillu nammineerlutik allaffissornerat, taamatullu avataaneersumut allaffissornikkut aqutsisumut aningaasartuutaat.

Ineqarnermut akiliutip tamarmiusup inissiat attartortittakkat ingerlannerinut aningaasar-tuutitut matussutaasut aningaasat, aserfallatsaaliinermut immikkoortitat, aningaasaatitigut ilu-anaarutit aamma atuisunut akinut naleqqersuut qaangissanngilaat. Aalajangersagaq aala-jangersakkatut annerpaaffissatut ilusiligaavoq aamma ingerlatsivinni ataasiakkaani ineqarner-mut akiliutit tamarmiusut appasinnerusumik inissinneqarsinnaallutik aamma ima qaffasit-sigisumik isertitat aningaasartuutillu kiisalu siunissami ungasinnerusumi aningaasaqarnikkut piujuartitsinissat akornanni oqimaaqatigiinnginnermik pilersitsinani.

Taamaalilluni ilaatigut iluarsaassinikkut kinguaattoornerit aningaasalersornissaannut im-mikkoortitsinerit (ileqqaarnerit) pinngitsooratik ukiut arlallit ingerlaneranni pisariaqarnerat pingaartinneqarpoq taamaalillunilu aserfallatsaaliinermut immikkoortitsinerit taamaallaat an-nikitsukkuutaamik qaffanneqarsinnaallutik ingerlaavartumik aserfallatsaaliinissamut piler-saarutini pisariaqartitsinermut naapertuutilernissaasa tungaannut.

Imm. 2-mut

Ingerlatsivinni inissiani attartortittakkat ataasiakkaat akornanni ineqarnermut akiliutit pillugit agguaanissamut tunngavik imm. 2-mi aalajangersarneqarpoq. Agguaaaneq inissiap angissusaa malillugu naapertuuttumik pissaaq. Aalajangersagaq aqutsinermut aningaasartuutit annikillin-issaannut iluaqutaavoq ingerlatsivinnilu ataasiakkaani inissiat attartorneqartartut pillugit naat-sorsuinissamut tunngaviit assigiiaarnissaat qulakkeerlugu.

Ingerlatsiviup ineqarnermut akiliutaa tamarmiusoq inissiat angissusaaq malillugu ag-guarneqassaaq, inissiat attartortittakkat ataasiakkaat pisoqaassusaaq, qanoq issusaaq, aqqis-sugaanerat, teknikikkut atortulersugaanerat imaluunniit aserfallatsaaliinermut qanoq inissisi-manerat malillugit agguarneqassanani. Ingerlatsivik inissianik attartortittakkanik pisoqaassut-simikkut imaluunniit qanoq issusimikkut assigiinngitsunik imaqarpat, inissiat attartortittakkat

angissutsimikkut assigiiittut aallaaviatigut ineqarnermut akiliummik assingusumik akiliissap-put.

§ 20 naapertorlugu illumi atortulersuutit imaluunniit sanaartornikkut pissutsit aalajangersi-masut amigaataanerat pissutigalugu aningaasaatitigut iluanaarutit annikillisinneqarsinnaaner-at imm. 2 naapertorlugu agguaanermut tunngavimmik allanngortitsinngilaq. Annikilliliineq imm. 1 naapertorlugu ingerlatsiviup ineqarnermut akiliutaata tamarmiusup naatsor-sorneqarnerani ilanngunneqassaaq, tamatumalu kingorna ineqarnermut akiliut tamarmiusoq inissiat angissusaat malillugu agguarneqassalluni.

Imm. 3-mut

Ingerlatsinermut aningaasartuutit naatsorsornerini aningaasartuutit imm. 1 malillugu suut il-anngunneqassanersut pillugit malittarisassanik Naalakkersuisut aalajangersaasinnaapput. In-gerlatsivinni kommuninilu assigiiartumik suleriaaseqarnissaq tunngaviup qulakkeerpaa kiis-alu ineqarnermut akiliummi aningaasartuutini immikkoortut taamaallaat attuumassuteqartut ilanngunneqarsinnaaneri qulakkeerlugu.

§ 19-imut

Imm. 1-imut

Illunut attartortittakkanut tamarmiusunut illut attartortittakkat ataasiakkaat pilerseqqinnissaa-nut, allanngutsaaliornissaannut pilersaarutaasumik piffissakkaartumik aserfallatsaaliuinis-samut pilersaarut nutarterneqarsimasoq pigineqassasoq aalajangersakkami aalajangersarneqar-poq. Pilersaarut piffissamut ukiunut 20-nut atuutissaaq juunillu aallaqqaataani ukiut tamaasa ataasiarluni nutarterneqartassalluni. Siunertaq tassaavoq siunissamut ungasinnerusumut aaqqissugaasumillu aserfallatsaaliinerit pitsaassuseqarnissaasa qulakkeerneqarnissaa taamaa-lillunilu aserfallannerit naatsorsuutiginnngisamillu iluarsaassinissamik pisariaqartitsinerit pinngitsoorneqarlutik.

Imm. 2-mut

Pilersaarutaasumik piffissakkaartumik aserfallatsaaliuinissamut pilersaarut tunngavigalugu in-eqarnermut akiliummut ilaasinnaasut aserfallatsaaliuinerimut immikkoortitsinerit pisariaqar-tinneqartut naatsorsorneqarsinnaapput. Immikkoortinneqartut annertussusaat pilersaarummut uppernarsarneqarsimasumut naammaginartumik naapertuunnissaat aalajangersakkami aala-jangersarneqarpoq, taamaalilluni naapertuuttoqarnera attartortunullu paasiuminartuunera qulakkeerneqarluni.

Aserfallatsaaliinissamut pilersaarutit immikkut inissiat attartortittakkat pisoqaanerusut aserfal-latsaaliuinikkut kinguaattoorsimanerinek qulaajaassapput. Aserfallatsaaliinikkut kinguaattoor-utit aningaasalersornissaannut ileqqaarneq ingerlatsivinni ataasiakkaani ineqarnermut akili-utikkut pissaaq. Inatsimmi § 18-ip oqaasertalernerata kingunerisaanik ileqqaarneq ukiut arlal-lit ingerlaneranni pisinnaavoq taamaalillunilu ingerlaavartumik aserfallatsaaliinissamut piler-

saarutini pisariaqartitsinermut naapertuutilernissaasa tungaannut aserfallatsaaliinissamut immikkoortitsinerit qaffakkiartuaarsinnaallutik.

Imm. 3-mut

Aserfallatsaaliinissamut immikkoortitsinerit aamma ineqarnermut akiliutit ilaatut taakkununga akileeqqusinerit pillugit malittarisassanik malittarisassaliorsinnaanermut Naalakkersuisut piginnaatinneqarput. Agguaqatigiissitsilluni naatsorsuinerit tunngavigalugit immikkoortitsinerit ilanngullugit naatsorsornissaat pillugu malittarisassanik Naalakkersuisut aalajangersaanissaannut piginnaatinneqarput ineqarnermullu akiliummi piffissakkaartumik allanngortarnissaanut qulakkeerisoqarluni. Naatsorsueriaatsit, piffissakkaarineq naatsorsuutitigullu suliarinnineq pillugu najoqqutassianut sukumiisunut tunngavik periarfissiivoq.

§ 20-mut

Imm. 1-imut

Namminersorlutik Oqartussat kommunillu aningaasaliissutinit iluanaarutissaat illup sananeranut akiusup 1,5%-iannik annertussuseqassasoq aalajangersagaq aalajangersaavoq. Siunertaq tassaavoq ineqarnermut akiliutit qaffasissusiat aningaasartuutit tunngavigalugit sinaakkusiusat qaangernerinik kinguneqanngitsumik inissiani attartortittakkani aningaasaatitigut pituttuinnermut naapertuuttumik ilaatigut ingasanngitsumik assigiissaartumillu Namminersorlutik Oqartussat kommunillu iluanaaruteqartinneqarnissaat.

Imm. 2-mut

Sananeranut akiusoq pillugu taaguut imm. 2-mi nassuiarneqarpoq aamma kvadratmeterimut ataatsimut minnerpaamik annerpaamillu killiliussat aalajangersarneqarlutik. Pilersaarusiormut, nakkutilliinnermut nunagissaanermullu tunngasut aningaasartuutit tamarmik ilanngullugit naatsorsorneqassapput. Kvadratmeterimut ataatsimut 7.000 kr.-init aamma 15.000 kr.-inik killiliineq teknikikkut naatsorsueriaatsimi annertussuseq aalajangersarneqarpoq, illuni assigiinngitsuni naammaginarpoq assigiissaarinerlu qulakkeerneqarluni, sananeqarneranut aningaasartuutit piviusut apeqqutaatinnagit. Aammattaaq tamatuma kingunerisaanik aningaasaatigut iluanaarutini assigiinnginnerit inissiat attartortittakkat pisoqaanerusut nutaajunerusullu akornanni annertuallaalernani.

Imm. 3-mut

Illuni iluarsartuunneqarsimasuni iluarsartuussinerup naammassinerata kingorna illup sananeranut akiusoq teknikikkut aningaasaqarnikkullu naliliineq tunngavigalugu aalajangiiffigineqarpoq. Aalajangersagaq pissutigalugu aningaasaatitigut iluanaarutit annertuumik iluarsaassinerup kingorna illup maannakkut nalinganut suli naapertuutissapput.

Imm. 4-mut

Illuni pisarineqarsimasuni imaluunniit illuni pissarsiarineqarsimasuni pisinermi akia, kingusinnerusukku iluarsaassinerit tapiliullugit sananeranut akiusumut ilanngunneqarsinnaanerat

imm. 4-mi malittarisassaliorneqarpoq. Illuni akeqanngitsumik pissarsiarineqartuni illup teknikikkut- aningaasaqarnikkut naliliineq tunngavigalugu sananerani akiusinnaasoq aalajangersarneqassaaq. Illut tamarmik naatsorsuinikkut iluanaarutit tunngavigalugit aaqqis-suussinermut ilaasinnaaneri aalajangersakkami qulakkeerneqarpoq.

Imm. 5-imut

Illu ikkussugassanik aalajangersimasunik, illup inissiatut pitsaassusaanut ingerlatsinermilu aningaasaqarnermut annertuumik pingaaruteqartunik amigaatigineqarpat, sananerani akiusumi ilanngaateqarnissaaq aalajangersakkami aalajangersarneqarpoq. Ikkussugassanik amigaataasunut m²-imut ataatsimut ilanngaatit 1.000 kr.-inut aalajangersarneqarput. Taamaalluni atortutigit assigiinngissutinut kinaassusersiunngitsumik iluarsiinissaaq qulakkeerneqarpoq.

Ilanngaat taamaallaat illunut imm. 2 naapertorlugu sananeranut akiusoq m²-imut 7.000 kr.-inik minnerpaaffissatut aalajangersarneqarsimatillugu atorneqarsinnaavoq. Taamaattumik illuni sananeranut akiusoq m²-imut 7.000 kr.-init qaffasinnerusumik aalajangersarneqarsimatillugu ilanngaat atorneqarsinnaanngilaq, tassunga ilanngullugit sananeranut aningaasartuutit piviusut, teknikikkut-aningaasaqarnikkut naliliineq imaluunniit pisinermi akiusoq tunngavigalugit sananeranut akiusoq aalajangersarneqarsimappat.

Imm. 6-imut

Kiffiutissanut ilanngaatit pillugit teknikikkut nassuiaat imm. 6-imi aalajangersarneqarpoq aamma atortut allat atorneqarsimassappata kiffiutissamut piginnaasaq kiffiutissanut mineraludinit allannngortinneqassasoq erseqqissarneqarluni. Taamaalluni illut qanoq annertutigisumik kiffiutissaqarnerinik naliliinermi assigiissarneqarsimasumik assersuussisinnaaneq qulakkeerneqarpoq.

Imm. 7-imut

Naalakkersuisut teknikkikkut-aningaasaqarnikkut naliliineq imm. 3 aamma 4 malillugu pissaq pillugu malittarisassanik erseqqinnerusunik aalajangersaasinnaapput. Nuna tamakkerlugu assigiiaartumik naliliinissamut tunngaveqarnerup qulakkeerisunik allaffissornikkut suku-miisunik najoqqutaqalernissaaq tunngavikkut ajornarunnaarpoq.

Teknikikkut-aningaasaqarnikkut naliliinissaaq pillugu malittarisassat atuuttut Namminersornerullutik Oqartussat kommunillu inissiaataasa attartortittakkat teknikkikkut aningaasatigullu naliliivigineqartarnerat pillugu Namminersornerullutik Oqartussat nalunaarutaa nr. 25, 9. oktober 2008-meersumi aalajangersarneqarput.

§ 21-mut

Imm. 1-imut

Ineqarnermut akiliut atuisunut akinut naleqqersuummi allannguisoqarnerata kingorna ukiut tamaasa januarip aallaqqaataani aaqqinneqarsinnaasoq aalajangersakkami aalajangersarneqar-

poq. Aaqqiineq atuisunut akinut naleqqersuutip allanngornera tunngavigalugu pissaaq, 2026-mi januarip aallaqqaataani 100-tut siullermik 2027-mi januarip aallaqqaataani. Ineqarnermut akiliutip piffissap ingerlanerani piviusumik nalimi pigiinnarnissaanik qulakkeerisussamik ingerlaavartumik akitigut iluarsisarnissaq pillugu erseqqissumik siumullu natsorsuutigineqarsinnaasumik tunngavissamik aalajangersagaq pilersitsivoq.

Naatsorsuutigineqarpoq ineqarnermut akiliutit tamarmiusut ilaannut atuisunut akinut naleqqersuut kisiat tunngavigalugu aaqqiisoqartassasoq, akit ineriartornerini allannguinerit ingerlaavartumik iluarsisoqartarnani. Aserfallatsaaliinissamut pilersaarutit ingerlaavartumik nutarterisoqartarneratigut naatsorsuutigineqarpoq ukiumut immikkoortitsinerit naatsorsorneqarnissai sioqqullugu akitigut iluarsisoqartassasoq.

Aammattaaq naatsorsuutigineqarpoq Namminersorlutik Oqartussanut kommuninullu aningaasaatitigut iluanaarutini iluarsisoqartassanngitsaq. Aningaasaatitigut iluanaarutit inatsimmi aalajangersarneqarsimavoq taamaattumillu atuisunut akinut naleqqersuut tunngavigalugu immikkut iluarsineqarsinnaannatik.

§ 22-mut

Qaammatini pingasuni allakkatigut kalerriinikkut ineqarnermut akiliut attartortitsisumit qaffanneqarsinnaavoq, qaffaanermut pissutaasut aningaasartaalu pillugit paasissutissanik imaqtartassaq. Paasissutissat amigaataappata atortuutinneqarsinnaanngilaq. Ineqarnermut akiliummik appaaneq siumut nalunaaruteqaqqaarani pisinnaavoq. Attartortumut paasiuminartuunera siumullu naatsorsuutigineqarsinnaanera malittarisassakkut tapersersorneqarpoq aningaasaqarnikkullu artukkiinernut siunertaanngitsunut illersuilluni.

Aalajangersakkami ilaatinneqarput aammattaaq illuartitanik, aningaasaatinik iluanaarutit imaluunniit akigititanut naleqqersuummik iluarsinerup malitsigisaanik ineqarnermut akiliummik qaffaanerit.

§ 23-mut

Imm. 1-imut

Igaffimmik imaluunniit perusersartarfimmik uffarfimmillu attartortitsisup taarsiinissaanik Namminersorlutik Oqartussani kommuninilu inissiani attartortittakkani attartortoq aalajangersagaq malillugu qinnuteqarsinnaavoq. Taarsiinernut amerlanertigut ilaasarpit igaffimmi pequtit, natit, ilisiviit aalajangersimasut kiisalu nillartaatsiviit aamma eqqiluisarneq. Atortussanik toqqaanissamut, pilersaarusiornissamut suliarinissanut nakkutilliinissamut attartortitsisoq akisussaavoq. Qinnuteqaat kinaassusersiunngitsumik tunngavilersuuteqanngitsaq itigartinneqarsinnaanngilaq, aamma sanaartornermi naatsorsuutit nalinginnaasunik suliaqassalluni. Siunertaq tassaavoq nakkutigineqartunik attartortitsisumiillu aqunneqartunik pit-

sanngorsaaniikkut inissiap pitsaassusaata kivinneqarnissaanut attartortup peqataanissaata qulakkeerneqarnissaa.

Assersuutigalugu ineqarnermut akiliutip qaffanneqarnerata malitsigisaanik inissiap kingusinnerusukkut attartorteqqinneqarnissaa ajornartorsiutitaqassasoq naatsorsuutigineqartariaqarpat imaluunniit taarsersuinissaq kissaatigineqartoq illuutip imaluunniit inissiap iluarsaanneqarnissaanut aserfallatsaaliorneqarnissaanullu pilersaarutit imaluunniit allatigut attartortitsisup inisiamut attartortittakkamut imaluunniit illuummut attartortittakkamut pingaarnertigut pilersaarutit pioreersut killissaasa iluanni pisinnaangippat, attartortup taarsersuinissamik qinuiginninnera itigartinneqarsinnaavoq.

Taarsiinissaq aallartinneqartinnagu taarsiinissamut aningaasartuutissanut missingersuut kiisalu tamatumani ineqarnermut akiliummut tapiliussassaq pillugit attartortup allakkatigut akuerinera pissarsiarineqassaaq.

Imm. 2-mut

Taarsiinissaq taarsigassarsiat ernialersorneqarlutik aalajangersimasumillu assigiiartumillu akilersorneqartunik Namminersorlutik Oqartussat kommunillu taarsigassarsiaqarnerisigut akilersorneqassaaq. Qaammammut akiliutit ineqarnermut akiliummut tapitut inissiamik attartortittakkamik qaqugukkulluunniit attartortumut akileqquneqassapput. Ingerlatsivimmut naapertuutinngitsumik ingerlatsinermut missingersuutit artorsartinngikkaluarlugit ingerlaavartumik pitsannguutitut aningaasatigut sakkussamik aalajangersagaq periarfissiivoq.

Imm. 3-mut

Taarsiinissaq sioqqullugu taarsinissamut aningaasartuutissat pillugit takussutissiamik allakkatigut akuerineqarsimasumik attartortoq pissarsiniassaaq tamatumalu malitsigisaanik ineqarnermut akiliummut tapiliussassat.

Imm. 4-mut

Taarsigassarsineq, ernialersorneri akilersornerilu, allaffissornermut akiliut aamma taarsigassarsianik attartortut aalajangersimasumik akilersuineri pillugit malittarisassanik Naalakkersuisut aalajangersaassapput. Aaqquissuussineq pillugu nalinginnaasumik piumasaqaatinik ataatsimoorussanik aalajangersaanissamut tunngavik qulakkeerivoq.

§ 24-mut

Imm. 1-imut

Namminersortunik pigineqartuni inissiani attartortittakkani attartornermi pissutsini siunnersummi pineqartunut ilaasuni ineqarnermut akiliutip aalajangersarnissaanut pingaarnertigut malitassamik aalajangersagaq aalajangersaavoq. Attartorneq aningaasartuutitik tunngaveqassaaq aamma aningaasalersuineri aningaasartuutit ingerlatsinermilu aningaasartuutit uppernarsarneqarsimasut kiisalu illuutip nalingata naammaginnartumik erniortinneqarnera qaangersi-

masussaanagit. Taamaalilluni aningaasartuutit aamma ineqarnermut akiliut akornanni naammaginatsumik ataqatigiittoqarnera qulakkeerneqassaaq kiisalu ineqarnermut akiliutit naammaginangitsumik qaffasissuseqarnissaannut illersorneqarlutik.

Namminersortut inissiaataanni attartortittakkani ineqarnermut akiliutip aalajangersarneqarnerani illuutip teknikkikkut-aningaasaqarnikkut nalingata, Nationalbankip ernialiusaata affaanut naapertuuttumik, taamaattoq minnerpaamik 1,5 %-imik, erniortinnissaa ilanngunneqarsinnaavoq. Erniortinnissaanut minnerpaaffiliussaq taaneqartoq atorlugu, ernialiusaq assersuutigalugu 0 %-imut appasinnerusumulluunniit appartinneqarluni pisoqartillugu, amigartooruteqarluni suliaqarnerup ingerlannissaanik, inissianik attartortittakkanik namminersortunit pigineqartunik piginnittut inatsimmit peqquneqarlutik pisoqarnissaa pinngitsoorniarneqarpoq.

Annertussusissaliussaq Namminersorlutik Oqartussat kommunillu inissiaataanni attartortittakkani ineqarnermut akiliutip aalajangersarneqarnerani aningaasaliissutinit iluanaarutinit ilanngussinissamut atuuttup annertoqqatigaa. Tamatumunnga annertussusissaliussaq siunnersuummi § 20, imm. 1-imi illuutip sanaartorneqarnerani akiusup 1,5 %-ianut aalajangersarneqarpoq.

Ukiuni kingullerni 25-ni ernialiusap affaa 1,6 %-imi inissisimasimasoq naatsorsorneqarpoq. Taamaattumik illuutip sanaartorneqarnerani akiusup 1,5%-ianik annertussusiliinissaq pillugu siunnersuut naleqquttutut nalilerneqarpoq.

Erniortinnera taanna (aningaasartuut) aningaasalersuinermit aningaasartuutinit imaluunniit ingerlatsinermut aningaasartuutinit naapertuutinngilaq. Aningaasartuutissaq taanna, isummer-sornernut taamaaqataannut, nalikilliliinerit pillugit taaneqarsinnaasunik matussutissatut ator-neqartarpoq, peqatigisaanillu attartortitsisup akiliisinnaassuseqarneranut ator-neqartarluni.

Imm. 2-mut

Aningaasalersuinermit aningaasartuutinit suut ilaatinneqarsinnaanersut imm. 2-mi erseqqisarneqarpoq, tassunga ilanngullugit illup sananeranut imaluunniit pisiarineranut aningaasalersuinermit piffissami sivisuumi pigisanut aalaakkaasunut atugassanik nalinginnaasumik taarsigassarsinermut akiliutit. Taarsigassarsinikkut aningaasalersorneqanngitsup illup sananeranut imaluunniit pisiarineranut akiusup naammaginatup sinnerata ilaanut 14%-imik ernialersuineq assigiissarneqarsimasumik aningaasaatinit iluanaarutitut aalajangersarneqarsinnaavoq, qajannaatsumik sinaakkutilimmik inuinnaat attartortitsinissaannut kajumissaataasoq.

Naammaginatsumik pisinermit akiusup nalilernerani piffissami pisinermit niuerfimmi naliusoq pingartinneqassaaq. Inissiamik attartortitaareersumit imaluunniit illumik attartortitaareersumik pisinermit attartornermik isumaqatigiissutaareersut naapertorlugit pisisoq tunisisup immikkut pisinnaatitaaffianut pisussaaffianullu isissaaq. Aningaasalersuinermit aningaasartuutit namminerlu aningaasalersuinerup allanngornerinit innersuussilluni ineqarnermut akiliutit qaffannerini attartorneqareersunut kalerriisoqarsinnaanngilaq.

Avataaneersunik nammineerlu aningaasalersuineq tamarmiusoq, illuutip attartortittakkap san-aneqarnerani akianit/pisiarinerani akianit annertunerusinnaanngilaq. Illuut attartortittagaq tamatuma saniatigut qularnaveeqqusiullugu taarsigassarsisoqarsimappat, annertunerussutaanut aningaasalersuinnermut aningaasartuutit ineqarnermut akiliutip naatsorsorneqarnerani il-anngunneqarsinnaanngillat.

Sanaartornermut aningaasalersuinnermut aningaasartuutit, illuutip attartortittakkap san-aneqarnerani akiata/pisiarinerani akiata ilaatut ilanngunneqarsinnaapput aammalu avataaniit aningaasalersuutissanik imaluunniit attartortitsisup nammineq aningaasaataannit aningaasaler-sorneqassalluni. Illuliornerup aningaasalersorneqarneranut aningaasartuutit ataasiaannarluni, nalinginnaasumik illuliornermut naatsorsuutit ilaattut, attartornermut akigititap naatsor-sorneqarnerani ilaatinneqarsinnaapput. Illuliornerup aningaasalerneqarneranut aningaasar-tuutit illuliornermut naatsorsuutini ilaasimanngippata, taakkua avataaneersunik aningaasaler-suutit ilaattut (avataaneersut aningaasalersuutissat akilersorneqarnerannut ilanngullugit akiler-sorneqartuusinnaasut) imaluunniit attartortitsisup nammineq aningaasaataannik aningaasaler-suinerup ilaatut, ilaatinneqarsinnaapput.

Attartortitsisup aningaasalersuinnermut aningaasartuutai tassaapput avataaneersunik aningaa-salersuinnermi qularnaveeqqusiisinnaatitaaffilimmik taarsigassarsianut ernialiussat. § 24, imm. 2 malillugu taarsigassarsiat erniai kisimik ilanngunneqarsinnaapput. Aammattaaq akiliutit naatsorsuinnermi ilanngunneqarsinnaapput. Akiliutip annertussusaa ernianut sanilliunneqar-poq.

Avataaneersunik aningaasalersuinerup pilersinneqarneranut aningaasartuutit, avataaneersunik aningaasalersuinerup katillugu aningaasartaanni ilanngunneqarsinnaapput. Taamaassappat aningaasalersuinnermut aningaasartuutit uppersarneqartut naatsorsorneqarneranni taakkun-annga erniat naatsorsuinnermi ilanngunneqassapput.

Avataaneersunik aningaasalersuinerup pilersinneqarneranut aningaasartuutit attartortitsisumit akilerneqarsimappata, aningaasartuutit nammineq aningaasaatiminik attartortitsisup aningaa-salersuineranik naatsorsuinnermi ilanngunneqarsinnaapput. Illuliornermut akiligassarsinnermut aningaasartuutit illuliornermut aningaasartuutit isigineqarsinnaapput aammalu illuliornermut naatsorsuutini ilanngunneqassallutik.

§ 24-mi aallaaviatigut avataaneersunik aningaasalersuinerup aalajangersimasumik ernialer-lugu siviluumillu akilersugassatut realkredit-imit taarsigassarsiatut pinissaa aallaavigineqar-poq. Kisiannili avataaneersunik aningaasalersuineq nikerartumik ernialerlugu siviluumillu akilersugassatut realkredit-imit aningaaserivimmiillu taarsigassarsiatut aamma pininnaavoq. Attartortitsisoq taarsigassarsianik nikerartunik ernialersukkanik avataaneersunik aningaasaler-suisoq, erniaasa qaffanneranni attartornermut akiliutip qaffannissaa ilimasaarutigisinnaavaa, taamaaqataanik erniaasa apparneranni attartornermut akiliutip appartinnissaanut pisussaaf-

feqassalluni. Qanittumi aningaasat nalinginit iluanaaruteqarniarluni, qaffasinnerusumik ernianut aningaasartuutit akiliilluni, avataaneersunik aningaasalersuinerup allanngortinnerata kingunerisaanik, ernianut aningaasartuutit qaffanneranni attartornermut akiliutip qaffannissaa ilimasaarutigineqarsinnaanngilaq. Attartornermut akiliutip qaffanneranut, iluanaarniarluni aningaasat nalinginit iluanaaruteqarneranut akilernerqartussamut, attartortut attartortitsisup pisussaaffilersinnaanngilai. Taamaalillutik attartortut taarsigassarsiat allanngortinneqarneranut atatillugu, avataaneersunik aningaasalersueqqaarneq allannguuteqarani ingerlaannarneraniit, ajornerusumik inissitsinneqaqquusaanngillat.

Attartortitsisup nammineq aningaasaatiminik aningaasalersuinerani ernialiussaq naatsorsorneqartoq, attartortitsisup ineqarnermut akiliummi naatsorsuinermi ilanngussinnaavaa. Attartortitsisup nammineq aningaasaatiminik aningaasalersuutai, illuummi attartortittakkami aningaasalersuineq tunngavigalugu, illuutip sananeqarnerani/atorneqalernerani inissisimaneratuut, naatsorsorneqassaaq. Avataaneersunik aningaasalersuinerup kingusinnerusukkut akilernerqarnera, attartortitsisup nammineq aningaasaatiminik aningaasalersuineranik naatsorsuinermi, ilanngunneqarsinnaanngilaq. Siunnersuutigineqarpoq attartortitsisup nammineq aningaasaatiminik aningaasalersuinerani 14 %-it angullugit ernialerneqarsinnaasoq. Taakkunaannga 2,5 procentpointit nalikilliliinernut tapiliussaapput aammalu ukiuni 40-ni atuunnissaat aallaavigineqarluni.

Qularnaveeqqut attartortitsisup nammineerluni atorsinnaappagu, attartortup qularnaveeqqusiussaa attartortitsisup nammineq aningaasalersuineranik naatsorsuinermi ilanngaatineqassaaq. Attartortup qularnaveeqqusiussaa aningaasanngorlugu attartortitsisumut akilernerqartoq aammalu attartortitsisup taakkuninnga atuinnissaa killilersorneqanngippat, attartortitsisup nammineq aningaasaatiminik aningaasalersuinerata annikillisinneqarneranik tamanna kinguneqassaaq.

Attartortitsisoq ingerlatseqatigiiffiuppat aningaasaateqartoq ingerlatseqatigiiffinnik piginnittumit/ingerlatseqatigiiffiup qullersaqarfianit pigineqartoq, attartortitsisup nammineq aningaasalersuinerata naatsorsorneqarnerani attartortitsisup nammineq aningaasalersuutai ingerlatseqatigiiffinnik piginnittumit/ingerlatseqatigiiffiup qullersaqarfianit attartortitsisumut taarsigassarsianit aningaasalersukkanik aningaasaatinut aningaasaliinikkut pissarsiarineqarsimasut, ilanngaatineqassapput.

Imm. 3-mut

Ingerlatsinermut aningaasartuutit uppersarsarneqartut ilaatigut tassaapput pilersuinermut, eqqiluisaarnermut, ataavartumik aserfallatsaaliinermut, sillimasiinermut, allaffissornermut, aserfallatsaaliuinernullu aningaasartuutit aamma teknikikkut atortulersuutit nutarterinisamut immikkoortitat. Illup pitsaassusianut naleqqiullugu naammaginaruuneq pingaartinneqassaaq. Naatsorsuutitigut eqqortumik periuseqarnermut ammasumillu pissuseqarnermut aalajangersagaq tapersersuivoq.

Ingerlatsinermut aningaasartuutit uppersarsarneqartut, attartortitsisup pissusiviusuni akilersimasai imaluunniit akilertussaasai, kisimik naatsorsuineri ilanngunneqarsinnaapput. Ingerlatsinermut aningaasartuutit agguarneqarneranni kisitsisitigut paasissutissat atorneqarsinnaapput. Kisianni attartortitsisup aningaasartuutit pissusiviusuni akilernerqarsimasut kisitsisitigut paasissutissanut atorneqartunut naapertuuttut, uppersarsarsinnaassavaa.

Piffissakkaartumik pilersaarutaasumillu aserfallatsaaliinernut attartortitsisoq immikkoortitanik ilanngussisinnaavoq. Immikkoortitat uppersarsarneqassapput, assersuutigalugu illup attartortittakkap inissiallu attartortittakkat piffissakkaartumik pilersaarutaasumillu aserfallatsaaliornissai pillugit pilersaarut nutarterneqarsimasoq tunngavigalugu.

Piffissakkaartumik pilersaarutaasumillu aserfallatsaaliinissamut immikkoortitat attartortitsisumit ilanngunneqarpata piffissakkaartumik pilersaarutaasumillu aserfallatsaaliinissamut ilaasut aserfallatsaaliinissamut aningaasartuutit aalajangersimasut ingerlatsineri missingersuutitut attartortitsisumit ilanngunneqarsinnaanngillat taamaassappat aningaasartuutit arlaleri-arlutik ineqarnermut akiliummut ilaassammata.

Ingerlatsinermut aningaasartuutit naatsorsornerini naatsorsuutitigut akileraartarnikkulluunniit nalikilliliinerit attartortitsisumit ilanngunneqarsinnaanngillat.

Imm. 4-mut

Attartortitsisoq illumik imaluunniit attartorneqartumik pitsannguisimappat ineqarnermut akilutit qaffanneqarnissaanik attartortitsisoq piumasaqarsinnaavoq, piumasaqaat allakkatigut saqqummiunneqarsimappata aamma attartortunut pineqartunut qaammatinik pingasunik sioqqutsumik kalerriisoqarsimassalluni. Tunngavilersuuteqanngippat imaluunniit aningaasartai allanneqarsimanngippata ilisimatitsissut atortussaatinneqarsinnaanngilaq. Assigiiartumik suleriaaseqarnissaq attartortunullu inatsisitigut isumannaatsuunissaq aalajangersakkami qulakkeerneqarput.

Imm. 5-imut

Akit qaffannerisa, akigitat qaffannerisa malitsigisaannik attartornerup qaffannissaa pillugu piumasaqaammik saqqummiussinissamik attartortitsisoq pisinnaatitaaffeqarpoq. Taamaalluni attartortitsisup aningaasaqarnikkut oqimaaqatigiissitsineq ingerlatiinnarsinnaavaa, peqatigisaanillu tamanna kalerrinneqarnissamik uppersarsaasoqarnissaanillu attartortut qulakkeerneqarlutik.

Imm. 6-imut

Attartornerup qaffannissaanut attartortitsisup pisinnaatitaaffia aamma naleqqersuutitigut aaqqiineq tunngavigalugu attartornerup qaffannissaanut attartortitsisup pisinnaatitaaffia pillugu malittarisassanik Naalakkersuisut aalajangersaasinnaapput. Tunngaviup aningaasaqarnikkut ineriartornermut aqqissuussinerit tulluarsarnissaannut aamma uppersarsaatit naatsorsuinermilu tunngaviit pillugit assigiiartumik najoqqutassaqarnerup aalajangersarnissaanut eqaassuseqarneq qulakkeerpaa.

*§ 25-mut**Imm. 1-imut*

Ineeqqanik najugaqarfissanik attartortitsineq, ilanngullugu attartortitsisup nammineq illuani najugaqartussanut attartortitsineq pillugu malittarisassanik aalajangersagaq aalajangersaavoq. Ineqarnermut akiliutit annerpaamik inissiami ineqarnermut imaluunniit akilersuutitut akiliutitut, kiassarnermut, innaallagissamut, imermut il.il. aningaasartuutaasunut, ineeqqat amerlassusaannut naatsorsorneqartunut naapertuuttumik annertussusilerneqassapput. Aningaasartuutit agguarnerini akuerisaasumik najugaqarfittut atorneqartut ineeqqat kisimik ilaatinneqarsinnaapput.

Illumut attartortinneqartumut imaluunniit inissiamut Sanaartornermi malittarisassanut atuutunut innersuussisoqarpoq. Inissiat nutaatut sananeqarsimasut, ilaneqarsimasut annertuutigulluunniit 2007-mi januarip aallaqqaataata kingorna allanngortinneqarsimasut 2006-imi Kalaallit Nunaanni Sanaartornermi malittarisassani init najugaqarfiusut igaffiillu pillugit imm. 4.3.2-imut ilaatinneqarput.

Sippulimmik akeqartitsinissaq aalajangersakkami pinngitsoortinniarneqarpoq aamma aningaasartuutit naammaginartumik agguarsimanissaat qulakkiissallugu.

Imm. 2-mut

Ineqarnermut akiliutip qaffanneqarnera attartortitsisup nammineq illuata ilaani ineeqqat eqqarsaatigalugit qaammammik ataatsimik sioqqullugu kalleriisoqassaaq aamma ineeqqat allat kalleriineri qaammatit pingasut sioqqullugit. Kalleriineq allakkatigut saqqummiunneqassaaq. Aalajangersagaq erseqqissumik suleriaatsini malittarisassaqaarneq qulakkeerpaa attartortullu piffissaq eqqorlugu ineqarnermut akiliutip allanngornera pillugu ilisimatinneqassallutik.

*§ 26-imut**Imm. 1-imut*

Attartornermik isumaqatigiissuteqarnermi attartortut qularnaveeqqutinik aningaasanngorlugit attartortitsisumut akiliissaaq annerpaamik qaammatini tallimani ineqarnermut akiliummut naapertuunnissaa aalajangersakkami aalajangersarneqarpoq. Siumoortumik akiligaq ineqarnermut akiliut qaammatitut arfinilinnut ineqarnermut akiliutit aningaasartaannit anner-tunerussanngilaq. Siunertaq tassaavoq pisussaaffinnik eqquutitsinnginnermut iluarsaassinis-samullu aningaasartuutitut matussutissanik attartortitsisumut qulakkeerinissaaq, peqatigisaanillu iserternermi attartortup aningaasaqarnikkut pisussaaffeqarneranut qummut killilius-saq aalajangersarneqarluni. Killiliussaq illuatungeriit soqutigisaasa akornanni naammaginartu-mik oqimaaqatigiittoqarneranik iluaqutaavoq.

Attartortitsisoq aninnermut atatillugu attartortumut piumasaqaatit tamakkiisumik ilaannakuusumilluunniit matussusernissaannut qularnaveeqqutit atorsinnaavai. Qularnaveeqqutit attartornermut atatillugu attartortitsisup attartortumut aningaasatigut piumasaqaataasinnaasaanut tamanut matussutissanut atorneqarsinnaapput.

Aalajangersagaq malillugu qularnaveeqqutip akilernissaa annerpaamillu allanneqarsimasumit annikinnerusumik siumoortumik attartornermut akiliinissaq pillugu attartortitsisoq attartortullu isumaqatigiissuteqarsinnaapput. Namminersorlutik Oqartussat kommunillu inissiaataanni attartortittakkani annikitsumik qularnaveeqqusiinermi akiliisarneq eqqunneqarsimapat ingerlatsinermi inatsisitigut naligiimmik tunngaveqarnissaq nalinginnaasooq atorneqassaaq.

Imm. 2-mut

Namminersorlutik Oqartussat kommunillu inissiaataannut attartortittakkanut qularnaveeqqusiineq pillugu malittarisassanik aalajangersaanissamut Naalakkersuisut piginnaatinneqarput. Tunngavimmut ilaatigut ilaapput akileeriaatsit, naafferartumik akilersuinissamut periarfissaq, akilersuinermik aaqqissuussinermi akiliutit, naafferartumik akilersuinissamik isumaqatigiissummik eqquutitsinnginneq aamma attartortitsisup qularnaveeqqusissummik atuinera pillugu malittarisassat. Siunertaq tassaavoq assigiiaartumik aqutsinissap qulakkeerneqarnissaa aamma inuuniarnikkut oqimaaqatigiissumik aaqqissuussinernut periarfissiinissaq, tassunga ilanngulugit attartortunut killegartumik akiliisinnaassuseqartunut naafferaalluni akiliisarnissaq.

Namminersortut inissiaataanni attartortittakkani qularnaveeqqutip naafferartumik akilersornissaa tassanilu piumasaqaatit pillugit isumaqatigiissuteqarsinnaapput. Isumaqatigiissutit taamatut ittut nalinginnaasumik isumaqatigiissuteqarnissamut inatsisini malittarisassat malillugit malittarisassaqartinneqarput.

§ 27-mut

Imm. 1-imut

Attartortoq ineqarnermut akiliummik, qularnaveeqqusiissummik naafferartumik akiliutininik, imermut kiassarnermullu akiliutininik kiisalu najugaqartup akiligassaanik aamma aningaasartuutininik allanik attartorneq pillugu isumaqatigiissut naapertorlugu akileqquneqartunik, attartorneq pillugu isumaqatigiissummi imaluunniit tamatumunnga atasumik akileeqqusinermi aalajangersarneqartuni piffissani akiliinissamut pisussaaffeqarpoq. Piffissaq eqqorlugu akiliineq attartornermi pisussaaffinni qitiulluinnartoq malittarisassami aalajangersarneqarpoq.

Najugaqartup akiligassai tassaapput immikkut akileeqqusissutit attartornermut pissutsinit aamma attartortup attartornermut isumaqatigiissut, Inatsisartut inatsisaat imaluunniit taanna naapertorlugu malittarisassat malillugit pisussaaffiinit aallaaveqartut, kisianni ineqarnermut akiliutitut, qularnaveeqqusiissummut naafferartumik akiliutitut, imermut imaluunniit kiassarnermut akiliutitut akileqquneqanngitsut. Najugaqartup akiligassaanut assersuutigalugu ilaasinnaapput attartortup eqquutitsinnginnerata, inissiamik imaluunniit illuummik ajoqusiin-

erata, aserorterinerata, akisussaassuseqanngitsumik atuinerata, immikkut ittumik eqqiaanermut, ileqqorissaanermut, matuersaatinik imaluunniit parnaartunik taarsersuinnermut, matunik, igalaanik imaluunniit pequtunik iluarsaassinnermut imaluunniit taarsersuinnermut kiisalu pigisanik attartortup inissiami pisinnaatitaanani qimaannarsimasaanik imaluunniit inissiamit igissimasaanik piiaanermut atatillugu attartortitsisup aningaasartuutai uppersarsarneqartut.

Taaguummot assersuutigalugu ilaapput attartortup matunik, igalaanik, ikkussukkanik imaluunniit ataatsimoorussanik atornerqartunik ajoqusiinerani, imaluunniit attartortup pequtunik, mobiliartunik imaluunniit pigisanik allanik inissiamit igitsinerani, taamaalilluni torersaanermut, iluarsaassinnermut imaluunniit pissusiatut ilerseqqinnermut attartortitsisoq aningaasartuuteqartariaqarluni.

Taaguutip nammineq attartortitsisoq attartornermut isumaqatigiissut, Inatsisartut inatsisaat imaluunniit taanna naapertorlugu malittarisassat malillugit tunngavissaqanngitsunik aningaasartuutunik akileeqqusisinnaalersinngilaa.

Imm. 2-mut

Alla isumaqatigiissutigineqarsimanngippat akiliineq qaammat akiliinnermut tunngasuusioq sioqqullugu qaammammi aningaaserivimmi ulloq kingulliusumi kingusinnerpaamik akilerneqarsimassaaq. Ineqarnermut akiliut akiliinerit allat akileqquneqartut qaammat akiliinnermut tunngasuusioq sioqqullugu qaammammi aningaaserivimmi ulloq kingulliusumi kingusinnerpaamik akilerneqassaaq. Piffissaq eqqorlugu akiliineq aallaaviatigut tassaavoq aningaasat kingusinnerpaamik ullormi akiliiffissami kingullermi tiguneqarsimappata.

Aningaaserivimmi nuussinermi attartortup taamaattumik sissuissavaa aningaasanik nuussineq aningaaserivimmi ullormi ataatsimik kinguaattoortumik pisinnaammat, attartortitsisoq attartortorlu assigiimmik aningaaserivimmut atassuteqanngippata akiliinnermi ingerlaannartumik akiliinertut naammassineqarsinnaanngippat. Attartortitsisoq IF-mi akiliinnermi allagartani atuippat aningaaserivimmi allakkerivimmiluunniit ullormi akiliiffissami akiliinnermi IF-mi akiliinnermi allagartami piffissaq eqqorlugu kingullermi akiliinnermi piffissaq eqqorlugu akiliinertut isigineqassaaq. Aalajangersagaq assigiiaartumik akiliisarnernik pilersitsivoq, pisortanut inuinnarnullu attartortitsisunut allaffissornermik oqinnerulersitsisoq.

Imm. 3-mut

Attartortitsisoq akiliiffissamik akileriaatsimillu innersuussissaaq. Aningaaserivimmut imaluunniit allakkerivimmut akiliineq sumiiffimmi akiliiffissatut innersuunneqartumi akiliinertut isigineqassaaq. Akiliiffissamut innersuussisoqarsimanngippat akiliutissaq attartortitsisup niuernerimik ingerlatsivianut imaluunniit attartortitsisup avataani aqutsisutut ingerlatsiviani akilerneqassaaq, taamatut ittoq inissiap attartukkap sumiiffigisaani sulisorineqarpat. Aningaaserivimmi allakkerivimmiluunniit akiliinissamut innersuussinnginnermi attartortitsisup angerlarsimaffittut inissiaata avataani niuertarfimmi tassani ineqarnermut akiliut il.il. akileqqullugit attartortoq takkuteqqusinnaanngilaa imaluunniit attartortup niuerfianut

anigaasanik nassiusseqqullugu. Aalajangersakkami illuatungeriit pisussaaffii erseqqis-sarneqarput aamma akiliiffissaq kingullermillu akiliiffissaq pillugu nalornisoqarnissaa pit-saaliorlugu.

§ 28-mut

Imm. 1-imut

Attartornermut taamaatitsinermi imaluunniit piffissamut aalajangersimasumut attartornerup naanerani piffissamut attartorfiusumut akiliinissamut attartortoq pisussaaffeqartoq aalajanger-sakkami aalajangersarneqarpoq, taamaatitsineq imaluunniit piffissamut killeqartumut pineqarnersoq apeqqutaatinagu. Taamaalilluni piffissami taamaatitsiffiusumi tamarmi im-aluunniit attartornermik isumaqatigiissutip naanissaata tungaanut attartortitsisup attartorner-mut isertitaqarnissaa qulakkeerneqarpoq. Malittarisassaq inatsimmi §§ 52–53-imut inner-suussivoq, taamaatitsineq pillugu piumasaqaatinik erseqqinnerusunik aalajangersaasut. Aala-jangersakkami attartortup akiliinissamut pisussaaffii piffissap atorunnaarsitsinissatut isumaqa-tigiissutaasup tungaanut atasut erseqqissarneqarpoq.

§ 29-mut

Imm. 1-imut

Attartortitsisoq kiassarnermik imermillu attartortumut pilersuippat attartortup kiassarnermik imermillu atuineranut kiisalu ininut ataatsimoorfiusunut kiassarnermut imermillu aningaasar-tuutininut attartortup akiligassaanut aningaasartuutiminut attartortitsisoq akileeqqusisinnaasoq aalajangersakkami aalajangersarneqarpoq. Aningaasartuutit immikkut ukiumoortumik kias-sarnermut naatsorsuutini attartortitsisumit suliarineqarsimasuni naatsorsorneqassapput. Attar-tortitsisoq immikkut suliaqassaaq, tassani aningaasartuutinit tamarmiusunit attartortup akili-gassai takuneqarsinnaallutik, taamaalilluni taakku attartortup akiliigallarsimaneranut asser-suuneqarsinnaallutik. Ukiumut naatsorsuutit qaammatisiutit malippaat. Atuinermut akiliineq ineqarnermut akiliutivimmiit aalajangersakkami immikkoortinneqarput naatsorsuinermi am-masumik pissuseqarneq qulakkeerneqarluni.

Imm. 2-mut

Aningaasartuutininut attartortut akiligassaannut matussutissatut attartortuni qaammammut akiliigallarnissamut attartortitsisoq akileeqqusisoqarsinnaavoq. Attartortut akiliutaat attar-tornermi aningaasatigut akiliutissaapput ineqarnermullu akiliut peqatigalugu akileqqun-eqartussaallutik. Attartortup aningaasartuutaanik ingerlaavartumik aningaasalersuineq malit-tarisassami qulakkeerneqarpoq peqatigisaanillu atuinermut ingerlaavartumik attartortut akiliisarnerat qulakkeerneqarluni.

Imm. 3-mut

Kiassarnermut naatsorsuutit naammassineqarnerininut allaffissornikkut akiliutissamik attartor-toq akileeqquneqarsinnaavoq. Siunertaq tassaavoq allaffissornikkut aningaasartuutit uppern-arsarneqarsimasut matussusernissaat, tassunga ilanngullugit suliarineri naatsorsuutillu ag-guarneri.

Imm. 4-mut

Kiassarnermut naatsorsuusiorneq pillugu, tassunga ilanngullugit allaffissornermut akiliutissaq, attartortut kiassarnermilu sullinneqartut allat akornanni aningaasartuutit agguarneqarneri, akiliinissaq aamma kiassarnermut akiliutissat kingornatigut aaqqiiffigineqarneri pillugit malittarisassanik Naalakkersuisut aalajangersaasinnaanerat aalajangersakkami piginnaatinneqarput. Pisortanut inuinnaallu attartortitsisartut assigiiaartumik suleriaaseqarnissaannik aalajangersaasoqarsinnaanera tunngavimmi qulakkeerneqarpoq.

§ 30-mut

Imm. 1-imut

Kiassarnermut naatsorsuutini ukiumi kiassarnermut naatsorsuusiorfiusumi attartortitsisup sumiiffimmi toqqagaani kingusinnerpaamik aprilip 30-ani tamanut ammasumik attartortitsisoq saqqummiussissasoq aalajangersakkami attartortitsisoq pisussaaffilerneqarpoq. Ammasumik pisoqarnissaa attartortunullu nakkutilliinissamut periarfissaqarnissaq malittarisassami qulakkeerneqarpoq.

Piviusumik saqqummiussineq attartortitsisup niuerneramik ingerlatsiviani, assersuutigalugu INI A/S-ip immikkoortortaqaarfiani kommunillu allaffiini. Saqqummiussineq assersuutigalugu attartortitsisup nittartagaani, sumiiffinni allagarsiivinni imaluunniit nuna tamakkerlugu aviisini imaluunniit illoqarfinni aviisini allagarsiinikkut saqqummiunneqarsinnaavoq.

Imm. 2-mut

Imm. 1-imi aalajangersarneqartumi ullormi naatsorsuutit saqqummiunneqanngippata akiliigallartarnerup saniatigut immikkut akiliinissamut piumasaqarnissamut attartortitsisup pisinnaaffini annaassavaa. Attartortitsisup piffissaq eqqorlugu naatsorsuinissanut aalajangersagaq kajumissaarivoq attartortullu inatsisitigut inissisimanerat pitsaanerulersillugu.

Imm. 3-mut

Naatsorsuutit kingusinnerpaamik juunip 30-ani saqqummiunneqarsimanngippata attartortoq akiliisoqarnissaata tungaanut juunip 15-aniit pissarsiassami ernialersortinnissaannut pisinnaatitaavoq. Aningaaserivimmi aningaaserivimmiitanut qaqugukkulluunniit qaffasinnerpaamik ernialersorneqartut malillugit erniat aalajangersarneqarput. Aningaasanik utertitsinissap pillugu allakkatigut nalunaaruteqarnissaq attartortumut ullormi tassani nassiunneqartussaanera kinguaattoortoqarneranilu attartortup annaasaqarsinnaaneranut malittarisassaq iluaqutaavoq.

Imm. 4-mut

Immikkut akiliut imaluunniit utertitsilluni akiliinissaq pillugu allakkatigut nalunaarut attartortumut juunip 15-iani kingusinnerpaamik nassiunneqarsimasussaavoq. Nalunaarut imm. 6 malillugu akerliliinissamut attartortut pisinnaatitaaffeqarnerat pillugu paasisutissanik imaqas-

saaq. Naatsorsuutit inernerit pillugit piffissaq eqqorlugu attartortut ilisimatinneqarnissaat aalajangersakkami qulakkeerneqarpoq.

Aalajangersakkap oqaasertalernerata kingunerisaanik attartortitsisoq attartortunut nalunaarummik nassiussisimappat piffissaliussat eqqortinneqassapput. Attartortup nalunaarummi paasissutissap tiguneqarnissaanut akissuteqarnissamut piffissaliussat piffissaq nassiussiffi-
usoq toqqarneqarpoq, tassa allakkatigut nassiussinerit misilittakkat malillugit allanngorarsinnaammata.

Imm. 5-imut

Imm. 4 malillugu piffissaliussaq nallertinnagu attartortitsisoq nalunaarummik nassiussinngipat, attartortitsisup immikkut akiliisoqarnissaa piumasaqaatigisinnaajunnaassaavaa. Piffissaliussap qaangerneqarnerani erseqqissumik inatsisitigut sunniteqarnera aalajangersakkami aalajangersarneqarpoq.

Imm. 6-imut

Naatsorsuutitut attartortup akerliliinera allakkatigut attartortitsisumut kingusinnerpaamik agustip aallaqqaataani nassiunneqassaaq. Naatsorsuutini immikkoortut suut akuerineqarsinnaannginneri pillugit paasissutissanik akerliliineq imaqassaaq. Siunertaq tassaavoq naatsorsuutit pillugit isumaqatigiinnginnerit sukkasuumik aalajangersimasumillu suliarisarnissaasa qulakkeerneqarnissaa. Naatsorsuutini immikkoortut akerlilersorneqartut pillugit uppersaattissanik saqqummiusseqqullugu attartortitsisoq qinnuigineqarsinnaavoq.

§ 31-mut

Imm. 1-imut

Kiassarnermut naatsorsuutitut naammassineqarsimasunut tunngasunik pilersuisunit avataan-eersuniit naatsorsuutiginniganik naatsorsuinerit tigusaqarsimanerit tunngasunik aalajangersagaq malittarisassaqartitsivoq. Taakku tassaasinnaapput utertitsilluni akiliinerit kingor-natigullu akiliinerit.

Attartortitsisup qaqutigoortumik naatsorsuinerit taamatut ittut ukiumut naatsorsuusiortif-
usumut tullittumut nuussinnaavai, taakku piffissamut naammassisumut tunngasuuppata. Aalajangersagaq piviusumik eqaallisitsivoq aamma aningaasartuutit piviusut naammassillugit naatsorsorneqarnissaat qulakkeerlugu. Naatsorsuutigineqarpoq assersuutigalugu qaammatitut pingasunut naatsorsuutini kukkusumik piffissanut agguarsimaneq kisimi pineqanngitsoq, akerlianilli naatsorsuinerit naatsorsuutiginnigisat siumullu naatsorsuutiginnigisat pineqarlutik.

Imm. 2-mut

Aningaasartuutit agguarsimanerit kukkunerit allakkatigut attartortunut pineqartunut sapinngisamik sukkarnerpaamik nalunaarutiginerisigut attartortitsisup iluarsissavai. Ag-

guarnerini kukkunerit paasineqarnerini sukkasuumik iluarsiiisoqarnissaanut pisussaaffik malittarisassami erseqqissarneqarpoq.

Imm. 3-mut

Attartortoq annikippallaartumik akiliigallarsimappat attartortup nalunaarfigineqarnerminiit siusinnerpaamik attartornermut akiliinermi siullermi qaammatip tulliuttumi akilerneqartusami ilassutitut akileeqqusisinnaavoq. Tapiliussatut akiliuteqarneq qaammatini pingasuni akiliigallarsimaneq sinnersimappagu, qaammatini pingasuni assigiiaartumik naafferarlugit akilersuinissamut agguarneqarsinnaavoq. Tassanngaannartumik kingornatigut akiligassat pinissaannut aalajangersagaq attartortumut illersuivoq.

Imm. 4-mut

Attartortoq annertuallaamik akiliigallarsimappat, akiliivallaarutit aningaasannorlugit attartortumut utertinneqassapput imaluunniit tamatuminnga nalunaaruteqarnermit attartornermut akiliinermi tullermi ilanngaatigineqassallutik. Nikingassutaasut sukkasuumik iluarsinissaanut illuatungeriillu akornanni naapertuuttumik naatsorsuisoqarnissaa malittarisassami qulakkeerneqarpoq.

§ 32-mut

Imm. 1-imut

Imerk pilersuisoq attartortunut toqqaannartumik pilersuisimanerani pisunut aalajangersagaq tunngasuvoq. Taamatut pisoqartillugu akileeqqusineq naatsorsuinerlu pilersuisup nalinginnaasumik piumasaqaatai malillugit pilersuisup attartortullu akornanni pissaaq. Pisuni taakkunani naatsorsuinerni pisuni attartortitsisup peqataannginnera malittarisassami erseqqissarneqarpoq.

Imm. 2-mut

Attartortitsisoq imermik attartortumut pilersuippat tamatumunnga aningaasartuutiminut matussusiinissamut attartortumut qaammatikkaartumik akiliigallartitsinikkut piumasaqaateqarsinnaavoq. Kiassarnermut akiliinerit pillugit malittarisassanut aalajangersagaq naapertuuppoq aamma attartortitsisup pilersuinermit aningaasartuutai ingerlaavartumik matussuserneqartarneri qulakkeerlugit peqatigisaanillu ingerlaavartumik atuinermit attartortut akiliisarlutik.

Imm. 3-mut

Illu ataasiakkaanut naatsorsuinernut uuttuutunik pilersorneqarsimanngippat illumi imermik atuneq tamarmiusoq inissiat angissusai malillugit attartukkanut ataasiakkaanut agguarneqassaaq. Imeq pillugu naatsorsuutit suliarinerinut attartortunut ataasiakkaanut akiliummik attartortitsisoq akileeqqusisinnaavoq. Uuttuteqanngitsuni pisariittumik agguariaaseqarnissaaq aalajangersakkami aalajangersarneqarpoq.

Imm. 4-mut

Uuttuutiniq pilersuisoqarsimappat atuaaneq ukiumut ataasiarluni kiisalu iserternermi aninermilu pisassaaq. Akileeqqusinermit ilaapput piviusumik atuinerit nalinginnaasumik tapit, atuaanermut akiliutit uuttuutinillu attartorneq ilanngullugit. Piviusumik atuneq tunngavigalugu eqqortumik naatsorsuisarnissaq aalajangersakkami qulakkeerneqarpoq.

Imm. 5-imut

Attartortitsisoq isumaqatigiissuteqarfigalugu imermut uuttuummik attartortoq atuaappat inernalu attartortitsisumut nalunaarutigalugu attartortitsisoq atuaanerup allaffissornikkut suliarineqarneranut akiliummik akileeqqusisinnaavoq. Annertuallaamik akiliigallartoqarsimanerit attartortumut utertinneqassapput annikippallaamillu akiliigallartoqarsimappat ilassutitut akiliinissamik attartortoq akileeqquneqassaaq. Aalajangersakkap eqaassuseqarneq eqqortumillu naatsorsuisarnissat ikorfartorpai.

Attartortup nammineq uuttuummik atuaasimaneranut akiliut tunnganngilaq, kisianni attartortup nalunaarutigisaanik attartortitsisup allaffissornikkut suliarinninneranut, tassunga ilanngullugit nalunaarsuineq, nakkutilliineq, naatsorsuina, naatsorsuutiniq naligiissaarineq kiisalu imermut naatsorsuutit pillugit akileeqqusineq imaluunniit utertitsineq.

Imm. 6-imut

Annertuallaamik akiliigallartoqarsimanerit attartortumut utertinneqassapput. Annikippallaamik akiliigallartoqarsimappat ilassutitut akiliinissamik attartortoq akileeqquneqarsinnaavoq. Ilassutitut akiliutissaq qaammatini pingasuni akiliigallarnermut annertuneruppat, annerpaamik pingasoriarluni naafferartumik akilersorneqarsinnaavoq. Aalajangersakkap eqaassuseqarneq eqqortumillu naatsorsuisarnissat ikorfartorpai.

Imm. 7-imut

Imerk atuneq pillugu atuaaneq akileeqqusinerlu pillugit malittarisassanik kiisalu imermut naatsorsuusiornissaq ilanngullugulu akiliutit uuttuummillu attartorneq pillugu malittarisassanik Naalakkersuisut aalajangersaasinaapput. Inuinnaat pisortallu inissiaataat attartortitakkat pillugit sukumiisumik assigiiaartumillu inissianullu assigiinngitsunut malittarisassaqartitsineq tunngavimmi ajornarunnaarpoq.

§ 33-mut

Imm. 1-imut

Najugaqarfissatut tulluurtumik isigineqassaaq inissiaq tulluarsagaq, isumannaatsoq najugaqarfissatut tulluuttoq. Inissiaq inunnit najugaqarfissatut isumannaatsumik atugassaajunnaarpat, assersuutigalugu annertuumik imermik ajoquserneqarsimalluni, ikuallassimalluni imaluunniit nakkaannissaa navianaateqarluni imaluunniit pissutsit peqqinnissamut navianarlutik (assersuutigalugu annertuumik oqoqarluni), najugaqarfissatut naleqqutinngitsutut isigineqarsinnaavoq. Namminersorlutik Oqartussat kommunillu inissiaataanni attartortittakkani illut attartortit-

allu najugaqarfissatut tulluartaunissaasa isumagineqarnissaa isumagineqarnissaa attartortit-sisup pisussaaffigigaa aalajangersakkami aalajangersarneqarpoq. Pisussaaffik piffissami attar-torfiusumi tamarmi ingerlaavartumik atuuppoq tassaniillutillu silataatigut aserfallatsaaliineq kiisalu ikkussukkani ataatsimoorussani illullu immikkoortuini. Siunertaq tassaavoq attartortut qaqugukkulluunniit najugaqarfissatut tulluartaumik inissiamik atuisinnaanissaannik qulakkeer-inissaq.

Piffissanut aalajangersimasunut aserfallatsaaliinissanut aalajangersimasunut suliaqarnissamut attartortitsisoq pisussaaffeqanngilaq, attartortitsisorlu inissiap najugaqarfissatut tulluartaunis-saanut pisariaqartunik sulianik suliaqartussaalluni. Tamanna qanoq akulikitsigisumik pisa-sanersoq attartortitsisup aalajangersimasunik naliliineranik tunngaveqassaaq.

Imm. 2-mut

Namminersorlutik Oqartussat kommunillu attartortitsisutut pisussaaffigaat aserfallatsaaliineq, tamatumani pineqarlutik, teknikikkut atortut, kiassarneq, kallerup innera, gas aamma imeq kiisalu illumut ilaasut, soorlu ikkuffiit iikkat, kiassaatit pisattallu. Nungullarnerit pisoqaliner-illu kingunerisaannik taarsiinerit pisassapput inissiap najugaqarfissatut tulluarnissaanut tamanna pisariaqartinneqaleraangat. Inissiaq najugaqarfigineqarsinnaajunnaarsitsisunik im-aluunniit peqqinnissamut ajoqutaasunik pitsaassuseqassanngilaq. Imermut kuuffinnullu ator-tut atorneqarsinnaassapput. Innaallagissamut ikkussukkat isumannaatsuussapput atorneqarsin-naallutillu. Kiassarnermut atortut inissiamik kissatsitsisinnaassapput. Aserfallatsaaliinermut pisariaqartutigit iluarsaassinerit kisimi pineqannginnerinik aalajangersagaq erseqqissaavoq, kisianni aamma inissiap najugaqarfissatut tulluarnissaa siunertaralugu nutarterinerit ilaallutik.

Imm. 3-mut

Piffissami attartorfiusumi attartortup inissiami qilaat qalipallugit qaqorsarnissaat, iikkat qalipannissaat imaluunniit ungalitserorneqarnissaat kiisalu natit lakkernissaat akisussaaffigaa taakkunungalu aningaasartuutit akilissallugit. Aningaasartuut attartortumit akilernerqassaaq. Attartortitsisup attartortullu aserfallatsaaliinissamut pisussaaffii aalajangersakkami kil-lilernerqarput ileqquusumillu kalaallit nunaanni aaqquissuussinerni sulinerit agguarneri malillu-git.

Attartortoq piffissami attartorfiusumi inissiami aserfallatsaaliinissamut pisussaaffimminik isumaginninnissamut pisussaaffeqarpoq taamaalilluni nalinginnaasumik nungullarnerit pisoqalinerillu malitsigisaannik taanna ajornerulissanani.

§ 34-mut

Namminersortut inissianik attartortitsineranni attartortoq attartortitsisorlu allanik isumaqati-giissuteqarsimannippata § 33-mi allassimasut atorneqassasut aalajangersakkami aala-jangersarneqarpoq. Taamaalilluni illup inissiallu najugaqarfissatut tulluarnissaanut attartortit-sisup pingaarnertut akisussaana pillugu tunngavik ingerlateqqinneqarpoq, peqatigisaanillu pegataasut tamanna erseqqissumik allanneqarsimappat allatut agguaasoqarnissaa isumaqati-

giissutigisinnaallugu. Namminersortuni attartortitsisarnermi nammineq isumaqatigiissuteqarnissamut eqaassuseq periarfissarlu malittarisassami pilersinneqarpoq.

§ 35-mut

Imm. 1-imut

Attartortitsisup attartorneqartoq attartornerup aallartinnissaanut piffissamit isumaqatigiissutigineqartumit pitsaasumik isumannaatsumillu pitsaassuseqartillugu attartortumut atugasannngortissavaa. Inissiaq najugaqarfissatut tulluurtuussaaq igalaat, matut ilivitsuullutik ikkusukkallu atorneqarsinnaallutik. Iserternermi pitsaassutsimut minnerpaamik piumasaqaateqarnissamut aalajangersakkami aalajangersarneqarpoq attartortullu pitsannngorsaalluni suli-aqaqqaarnani inissiamik atuilersinnaanera qulakkeerlugu. Iserternermut atatillugu immikkut aserfallatsaaliinermik suliaqartoqarsimanissaanut attartortoq piumasaqarsinnaanngilaq.

Imm. 2-mut

Iserternermi attartortitsisoq attartortoq ilagalugu ini misissussavaat aamma isertilernermi nalunaarusiamik sanallutik, inissiap pitsaassusianik amigaataasinnaasunillu allaaserinnittoq. Nalunaarusiaq attartortumut tunniunneqassaaq. Siunertaq tassaavoq isserternermi inissiap pitsaassusaanut uppersaateqarnissaq aninermilu isumaqatigiinnginnerit pinngitsoortinnissaat.

Imm. 3-mut

Amigaatit allat, attartortup inissiamut isserternermi kingorna tigusinermut atatillugu paasisimasai inissiamut isserternermiit sapaatit akunneri marluk qaangiutsinnagit allakkatigut attartortitsisumut nalunaarutigineqassapput. Amigaatilli nalinginnaasumik misissuineri takuneqarsinnaasimanngippata imaluunniit attartortitsisoq peqquserlussimappat tamanna piffissaliussamut ilaatinneqassanngilaq. Attartortoq qisuariarnissamut naammaginartumik aalajangersakkami periarfissinneqarpoq, peqatigisaanilli inissiap pitsaassusianut tunngasut pissutsit sukkasuumik paasineqarnissaat qulakkeerlugu.

Imm. 4-imut

Inissiamut isserternissamut atatillugu misissuinissamut aningaasartuutissat annertuallaarpata, inissiamut isserternissamut atatillugu takuniaaneq pinngitsoorneqarsinnaavoq. Isumalluutiniq eqqarsaatiginninneq aalajangiisuulluni pinngitsoortitsinissamut aalajangersagaq periarfissiivoq.

§ 36-mut

Imm. 1-imut

Attartortup attartorneqartoq illersorneqarsinnaasumik paarissavaa, ajoqusikkanullu attartortup nammineq, attartortup inoqutaasa allalluunniit attartortup attartorneqartumut isertissimasaasa illersorneqarsinnaanngitsumik pissusilersornerisigut ajoqusersimasaannut taarsiinissamut attartortoq akisussaavoq. Attartorneqartumi ajoqusernerit attartortitsisup isummerfigisariaqagai

imaluunniit iluarsartariaqagai pillugit attartortoq pisariaqanngitsumik kinguarsaanani attartortitsisumut nalunaaruteqassaaq. Misissuinermit paarsinerluttoqarsimasooq paasineqarpat, attartortitsisup tamanna piumasarippagu attartortup ingerlaannartumik ajoqusikkat iluarsaatis-savai.

Attartorneqartup ilaanik attartortitsisup aserfallatsaaliugassaasa aamma attartorneqartup ilaanik attartortumit aserfallatsaaliorneqartussat ajoqusiinerit akornanni immikkoortitsisoqarpoq. Attartortitsisup akisussaaffigisaata ilaani ajoqusiisoqarpat tamanna pillugu attartortoq ilisimatitsissaaq, taamaalilluni ajoqusiinermut kina akisussaannersooq ajoqusiinerlu qanoq pitsaanerulersinneqarsinnaannersooq pillugu isummersornissamut attartortitsisoq periarfissaqarluni.

Attartortitsisoq allakkatigut akuersiteqqaarnagu attartorneqartumi pujortartoqaqqusaannginera pujortarsunnimik saliinermut attartortitsisup attartortullu annertuumik aningaasartuuteqarsinnaaneranut suliniutit ilaattut isigineqassaaq aamma inissiap attartortinneqartup iluata silaannaata attartortunngortussamut peqqinnartuunissaa qulakkeerneqarluni. Pujortarnerup inerteqqutigineqarnera unioqqutinneqarpat, tamanna siunnersuummi § 49, nr. 4 naapertorlugu taamaatitsinissamut tunngavissaliisinnaavoq,

Imm. 2-mut

Attartortup attartortitsisoq akuersiseqqaarnagu inissiaq isumaqatigiissutigineqartumit allaanerumik atussanngilaa. Taamaalilluni inissiamiit inuussutissarsiummik ingerlatsisoqarsinnaanngilaq. Siunertaq tassaavoq inissiap attartornermut atorneqarnissaa naapertorlugu illullu inissiatut atorneqartuarnissaata qulakkeerneqarnissaa. Inuussutissarsiutitigut atorneqarnerata amerlanertigut kingunerisaanik illumi inissiamilu nungullariartorneq anner-tunerussarpoq.

Imm. 3-mut

Attartortup inoqutigisami saniatigut attartorneqartoq aallaaviatigut allanut atugassanngortissinnaanngilaa. Inissiami attartortinneqartumi ineeqqanik ataasiakkaanik inisimasunut inuit allattorsimaffianni aalajangersimasumik najugaqartussanut attartortitsinissamut immikkut periarfissap inissiap eqaatsumik atorneqarnissaanut killeqartumik periarfissaqarnertut isigineqassaaq.

Aalajangersakkap kingunerisaanik ileqquusumik siniffittut ullaakkorsiorfittullu imaluunniit hotellimi, motellimi vandrehjemmimilu piumasaqaatit malillugit inissiami attartorneqartumi ineeqqamik attartortitsineq attartortitsisumiit siumoortumik allakkatigut akuersinissamik pisariaqartitsivoq. Paarlattuanik taamatut attartorneq attartornermik isumaqatigiissummik eqquutitsinnginneruvoq.

Aalajangersagaq nalinginnaasumik pulaartoqartarnermut akornutaanngilaq imaluunniit attartortup piffissami sivikitsumi akeqanngitsumik qanigisaminik imaluunniit inummik allamik inissiami najugaqartitsineranut, attartorneqartup nalinginnaasumik atorneqarneranut atatillugu,

assersuutigalugu ferieqarnerup, uumasuutiniik paarsinerup, naasunik imerterinerup imaluunniit assingusup nalaani. Aalajangiisuussaaq inissiamik atuisinnaatitaaneq piviusumik inummut allamut tunniunneqarnerusoq.

Naliliinermi ilaatigut najugaqarnerup sivilissusia, attartortup inissiaq sulii atorsinnaaneraa, akiliuteqartoqarnerusoq, pineqartup nammineerluni inissiamik atuisinnaanera kiisalu najugaqarneq aalajangersimasumik najugaqarnerunersoq, attartortitseqqinnerunersoq, inuusutissarsiutigalugu attartortitsinerunersoq imaluunniit attartorneqartup allatigut nammineerluni atornerunersoq pingaartinneqarsinnaapput.

Imm. 4-mut

Ineeqqanik attartortut attartortitsisoq akuersiteqqaarnagu ineeqqamik atuineramik allanut tunniussinnaanngilaat. Inissiap attartortittakkap ilaani attartornermik nakkutilliisoqarnera malittarisassami ikorfartorneqarpoq.

Imm. 5-imut

Aalajangersakkap kingunerisaanik attartortoq attartornerup naannginnerani inissiamit ataavartumik nuuppat, pisariaqanngitsumik kinguarsaanani tamanna attartortitsisumut nalunaarutigisavaa aammalu inissiap tunniunneqarnissaa pillugu qanoq ingerlasoqarnissaa attartortitsisoq isumaqatigiissuteqarfigissallugu.

Siunertaq tassaavoq inissiap qanoq issusaa, nakkutilliinissamik pisariaqartitsineq kiisalu inissiamut imaluunniit illuummut ajoqusernit pinngitsoortinniarlugit iliuusissat pillugit attartortitsisup isummernissaanut periarfissaqarnissaa. Tamanna assersuutigalugu pingaaruteqarsinnaavoq inissiaq piffissami aalajangersimasumi ulluinnarni nakkutiginneqannginnera pissutigalugu issinnerup, imermik ajoqusernerup, aserorterinerup imaluunniit ajoqusernit allat piffissaq eqqorlugu paasineqanngitsut aarlerinaateqarpata.

§ 37-mut

Imm. 1-imut

Attartortup pissutissaqavinnikkuni attartortitsisoq inissiap qanoq issusianik paasiniaalluni, iluarsaassisoqassatillugu imaluunniit allanut attartortitsisoqassatillugu inissiamik misissuinarpat inissiamut isernissaanik itigartissinnaanngilaa.

Attartortup attartortitsisup inissiamut isernissaanik itigartitsinissamut pissutissaqarnerusoq aalajangersimasumik naliliinikkut aalajangerneqassaaq. Naliliinermi attartortitsisup inissiamut isernissamik pisariaqartitsinera aamma attartortup inissiamini eqqissisimasumik najugaqarnissanut soqutigisai pingaartinneqassapput. Attartortoq taamaallaat misissuisoqarnissaa kissaatiginnginnamiuk, suliami allami attartortitsisumik isumaqatigiinnginnamiuk imaluunniit inissiaq takutinneqassanngitsosq misissorneqassanngitsorluunniit kissaatigigamiuk isernissamut itigartitsinissaanngilaq.

Pissutsit naapertorlugit isernissaq piffissami naleqqutinngitsumi, piffissamik sivikippallaartumik siumut nalunaaruteqarluni, isernissamut siunertaq paasissutissiissutigineqarnagu imaluunniit pissutissaqanngitsumik arlaleriarluni piumasarineqarpat, attartortoq itigartitsinisamut pissutissaqarsinnaavoq. Aamma attartortup napparsimanera, peqannginnera imaluunniit pissutsit immikkut ittut allat pissutigalugit isernissap piffissami allami pinissaanut pissutisaqarnersoq naliliinermi ilanngunneqarsinnaavoq.

Attartortitsisoq aallaaviatigut inissiamik misissuinissaq imaluunniit allatigut inissiamut isernissaq piffissaq naammaginarloq sioqqullugu nalunaarutigissavaa, isernissamullu siunertaq paasissutissiissutigalugu. Piffissaq sioqqullugu nalunaaruteqartoqarsimannginnera imaluunniit nalunaarutigineqartoq naammaginangippat, pissutsit naapertorlugit attartortoq piffissami nalunaarutigineqartumi isernissamut itigartitsinissamut pissutissaqarsinnaavoq, taamaattorli aalajangersakkami piumasaqaatit naammassineqarsinappata attartortitsisup inissiamut isernissaa nalinginnaasumik itigartissinnaanagu.

Assersuutigalugu imermik ajoqusiisoqarpat, ikkussukkani ajortoqarpat, ikumasoqarpat allatigulluunniit illumut najugaqartunulluunniit aarlerinartoqarpat illup pitsaassusianut ingerlanneqarneranullu akisussaaffimminik attartortitsisup isumagininnissinnaanera aalajangersakkami qulakkeerneqarpoq. Sulineq attartortumut najugaqartunullu allanut sapinngisamik annikinnerpaamik akornusiisumik suliarineqassaaq kinguarsarneqanngitsumillu naammassineqassalluni.

Imm. 2-mut

Attartortitsisoq sapaatit akunnerinik marlunnik siumut ilisimatitserneermigut attartukkami suliaassanik aallartitsisinnaavoq, suliat ingerlanneqarnissaat attartortumut annertuumik akornutaassanngippata. Tamanna sulineq assersuutigalugu tassaasinnaavoq ullup suliffiusup ataatsip-marluk ingerlaneranni ingerlanneqarsinnaasoq imaluunniit sanasut nalinginnaasumik suliffiata avataani attartorneqartoq attartortumit atorneqarsinnaalluni.

Suliani anginerusuni attartortoq qaammammik ataatsimik affarmillu siumut ilisimatinneqareertussaavoq. Taamaattorli attartortitsisoq suliaassanik kinguartinneqarsinnaanngitsunik siumut ilisimatitseqqaarani iluarsaassisinnaavoq.

Imm. 3-mut

Suliat suugaluartulluunniit attartortitsisumit aallartinneqartut unitsinneqaratik attartortumullu sapinngisamik annertunerpaamik mianerinnilluni suliarineqartassapput. Attartortitsisoq ingerlaannartumik suliat malitsigisaanik iluarsaassissaaq. Aserfallatsaaliinerit nalaanni akornusersuinerit killeqartinnissaannut attartortitsisup pisussaaffeqarnera aalajangersakkami erseqqissarneqarpoq.

§ 38-mut

Imm. 1-imut

Attartortup taassumalu inoqutaasa kiisalu inuit attartortumit attartorneqartumut isersinnaatit-aasut ileqqoreqqusat maleruassavaat. Maleruagassat illumi eqqissisimasumik torersumik pisoqarnissaanik qulakkeerisuupput. Maleruagassat illup silataaniittullu illersorneqarsinnaasumik atornerannut iluaqutaapput. Maleruagassanut assersuutigalugu ilaasinnaapput inisiap iluani atisanik panersaanissamut inerteqqussut aamma ulluni piffissaniluunniit aalajangersimasuni sakkunik atuinissamut inerteqqussut.

Imm. 2-mut

Namminersortut inissiaataanni attartortittakkani uumasuuteqarnissaq pillugu attartortitsisoq aalajangiisussaavoq taamaattoqassappallu piumasaqaatit suut atorneqassanersut.

Namminersorlutik Oqartussat kommunillu inissiaataanni uumasuuteqarnissaq akuerisaavoq, imm. 3-6 malillugit allat malinneqanngippata. Malittarisassami uumasuuteqarnerup nalinginnaasuunera eqqarsaatigineqarpoq pisortanilu attartortorpassuit akornanni tamanna kissaataalluni, peqqinnissarli, aserfallatsaaliineq sanilillu eqqarsaatigalugit killilerneqarsinnaalluni.

Imm. 3-mut

Uumasuuteqarnek illuni aalajangersimasuni uumasutitut aalajangersimasunut imaluunniit inissianut aalajangersimasunut akuerisaassanngitsoq attartortitsisoq aalajangiisinnaavoq. Illup pissusaa ingerlatsinermilu pissutsit eqqarsaatigalugit sumiiffinni malittarisassanik aalajangersaanissamut aalajangersagaq eqaatsumik periarfissiivoq. Aalajangiineq aalajangersagaq manna malillugu taamaallaat siumut atuutissaaq. Aalajangiinerup nammineerluni kingunerisanngilaa attartortut, inatsisit malillugit uumasuuteqareersut, uumasuuteqarunnaassasut. Attartortulli uumasuuteqarnek pillugu uumasuuteqarnek pillugu ileqqoreqqusanik suli malinnissapput, attartortitsisorlu akuliussinnaavoq uumasuuteqarnek akornusersuineramik, ajoqusiinermik imaluunniit ileqqoreqqusanik allatigut unioqutitsinermik kinguneqarpat.

Imm. 4-mut

Uumasuuteqarnek pillugu ileqqoreqqusani piumasaqaatit sukkulluunniit naammassineqarsimassapput. Uumasuuteqarnerup akornusersuineramik ajoqusernerrillu kinguneqannginnissaninik ingerlaavartumik qulakkeerinissamut attartortoq aalajangersakkami pisussaaffilerneqarpoq.

Imm. 5-imut

Uumasuuteqalernermit attartortoq qaammatini pingasuni ineqarnermut akiliutip anner-toqataanik immikkut qularnaveeqqusiissaaq. Aningaasat aningaasanngorlugit akilerneqassapput uumasutiniillu ajoqusiinernut matussutaassallutik. Attartortitsisup aningaasaqarnikkut isumannaatsuuneranik attartortullu akisussaaffeqarneranik aalajangersagaq eqqussivoq.

Uumasuutigineqartoq toquppat imaluunniit attartortoq allatut uumasuuteqarunnaarpat, attartortitsisoq illuutip aamma attartorneqartup misissoreernerani aalajangersinnaavoq attartortup

qularnaveeqqusiussaasa uninngatinnissaannut piumasaqaatit atuukkunnaassasut aamma aningaasat tamakkiisumik ilaannaasumilluunniit utertillugit tunniullugit.

Imm. 6-imut

Qularnaveeqqusiussatut akiliutigineqartut, ajoqusiinernut uumasuuteqarnermit pilersinneqartunut matussutissatut attartortitsisup atorsinnaavai. Tassunga assersuutigalugu ilaapput iikkat, matserfiit matullu qimminit qitsunnilluunniit kigartorneqarlutik ajoquserneqarsimasut. Taakkununga aamma ilaapput aalisakkanut uumatitsiveqarnerup malitsigisaanik imermik ajoqusernerit. Aammattaaq natini, sikaavinni allallu qaavini uumasuutit anarnerisa quinerisalu malitsigisaanik tipiliortitsisoqarsinnaallunilu simerneqalersinnaanerit.

§ 39-mut

Namminersorlutik Oqartussat kommunillu inissiaataanni attartortittakkani attartortoq attartorneqartumi allanngueqqusaanngilaq imaluunniit attartorneqartup iluani silataanilu aqqissuussinernik atortunilluunniit allanik inisseeqqusaannginnera tamanna attartorneqartup imaluunniit illuutip qanoq issusianik, aqqissugaanerani, teknikikkut atortulersugaanerani, sananeqaataanik, silataanik imaluunniit ininik ataatsimoorfiusunik allanngortitsippat, aalajangersakkami aalajangersarneqarpoq. Siunertaq tassaavoq illut assigiiaartumik pitsaasuseqartuarnissaat, ingerlatsinikkut patajaatsuunissaasa qulakkeerneqarnissaa illullu sananeqaataani ajoqusernerit allanngornerillu pinngitsoortinnissaat.

Aalajangersagaq nalinginnaasumik pequsersuinermit inissiamillu nalinginnaasumik atuiner-mut akornutaanngilaq. Taamaattumik pequtit nuunneqarsinnaasut, pisattat nalinginnaasullu aalajangersakkami pineqartunut ilaanngillat.

Allaffissornermut, aserfallatsaaliinermit, isumannaatsuunermit illullu nalinganut sunniuteqarsinnaasunik attartortup suliaqarsinnaanera aalajangersakkami pinngitsoortinniarnearpoq. Allanguutit ingerlaavartumik aserfallatsaaliinerup inissianillu attartortittakkanik ilu-arsaassinerup ilaatut pissasut Namminersorlutik Oqartussat kommunilluunniit aalajangiisinaallutik.

§ 40-mut

Namminersorlutik Oqartussat kommunillu inissiaataanni attartortittakkani attartortoq attartorneqartup iluani silataaniluunniit suliaqaqqusaananilu pitsanngorsaaqqusaanngilaq. Aalajangersagaq illumi allannguiner-nut teknikikkullu ikkussukkanut tunngasuvoq. Siunertaq tassaavoq illup pitsaassusiata pigiinnarnissaa sulinerillu aserfallatsaaliuinermit iluarsaassiner-mulluunniit atasumik attartortitsisumit taamaallaat ingerlanneqarnissaasa qulakkeerneqarnissaa.

§ 33 malillugu illup iluani attartortup aserfallatsaaliuinissamut pisussaaffeqarnera erseqqis-sarneqarpoq, suli attartortumit isumagineqartussaasoq. Malittarisassap kingunerisaanik teknikikkut atortut assigiiaarnissaat qulakkeerneqarpoq kukkusumillu suliarineqarsinnaaneri kingornalu ajoqusiisinnaanerat killeqartinneqarluni.

§ 41-mut

Imm. 1-imut

Namminersorlutik Oqartussat kommunillu inissiaataanni attartortittakkani attartortoq attartortitsisumit siumut allaganngorlugu akuersissummik pissarsereerluni isumaginninnermi inatsimmi aalajangersakkat malillugit ikiuutinik ikkussuisinnaatitaasoq aalajangersakkami aalajangersarneqarpoq. Attartortut ataasiakkaat pisariaqartitaannut eqqarsaatiginninneq illullu attartorneqartullu pitsaassusaanik eqqarsaatiginninnerup akornanni aalajangersagaq oqimaaqatigiisitsivoq.

Akuersissuteqarnermi piumasaqaatitut qimatsinermi inissiap pissusiatut pilersitseqqinnissaa aamma inissiap pissusaatut pilersitseqqinnermut aningaasartuutit akilerneqarnissaannut kommunalbestyrelsip qularnaveeqqusiinissaa attartortitsisup piumasaqaatigissavaa. Ikkussukkat, ataavartumik allannguinerunngitsut, attartortitsisumut aningaasartuutaanngitsumik peerneqarsinnaaneri, ikiuutillu aningaasaliiffigineqarsimappata isumaginninnermilu inatsisit malillugit ikkunneqarpata kommuni aningaasaqarnikkut akisussaassasoq qulakkeerneqarpoq. Pilersitseqqinnermut aningaasartuutit ingerlatsivinnut ataasiakkaanut artukkiissanngillat taamaalillunilu aamma ingerlatsivimmi attartortunut ataasiakkaanut.

Aalajangersakkamut assersuutigalugu ilaapput inuit innarluutillit, isumaginninnermi inatsit malillugu, inissiami teknikikkut ikiuutinik ikkussinissamut aningaasaliiffigineqartut, taamaalilluni attartortoq innarluuteqaraluarluni attartorneqartumi najugaqaannarsinnaalluni.

Sulinerup ataqatigiissarneqarnissaa teknikikkullu suliutigullu illersorneqarsinnaanera qulakkeerniarlugu ikkussugassat naammassineqarnissaannut kingusinnerpaamik sapaatip akunneri sisamat sioqqullugu attartortup attartortitsisoq nalunaarfigissavaa.

§ 42-mut

Namminersortut inissianik attartortitsineranni attartortoq attartortitsisorlu allanik allakkatigut isumaqatigiissuteqarsimanngippata §§ 39-41-mi allassimasut atorneqassasut aalajangersakkami aalajangersarneqarpoq.

Taamatut isumaqatigiissut atuutissaguni allanneqarsimassaaq, tamatumalu attartorneqartumi allannguinerne erseqqissuunissap uppenarsaanissallu pingaaruteqarnera erseqqissarlugu.

Siunertaq tassaavoq pisortani namminersortunilu attartortitsisartunut malittarisassat akornanni naapertuuttoqarnissaa, peqatigisaanilli namminersortut attartortitsisarnermi nammineq isumaqatigiissusiorsinnaaneq allanngortinneqarnani.

§ 43-mut

Imm. 1-imut

Attartortup atuisinnaatitaanera attartortitsisumit siumut allaganngorlugu akuersissummik peqqaarnani inummut imaluunniit suliffeqarfimmut allamut tunniunneqarsinnaanngitsoq aalajangersakkami aalajangersarneqarpoq. Akuerisaanngitsumik tunniussinernut malittarisassaq attartortitsisumut illersuivoq attartorneqartumilu najugaqartup imaluunniit atuisup isumaqatigiissummi piumasaqaatit naapertorlugit attartortutut akuerisaanera qulakkeerneqarluni. Siunertaq tassaavoq kiap attartorneqartumut atuisinnaanerani attartortitsisup nakkutiginnissinnaanerata allanngunnginnissaa, aamma inissiani attartortinneqartartuni atornerluineq, iluanaarniutigalugu allanut attartortitsineq pinngitsoortinniarneqarlutik. Akuersissut inatsisitigut sunniteqassappat aamma isumaqatigiinngitsoqassappallu uppersaanissaq qulakkeerniarlugu allanneqarsimassaaq.

Imm. 2-mut

Atuisinnaatitaanerup nuunneqarnera tamatumunngalu piumasaqaatit pillugit malittarisassanik aalajangersaasinnaaneranumt Naalakkersuisut piginnaatinneqarput. Tassunga assersuutigalugu ilaapput toqusoqarnerani, averusernermi, aappariinnerup atorunnaarsinnerani, inooqatigiinnerup atorunnaarsinnerani imaluunniit allamut attartortitsinnermi attartornermut isumaqatigiissutit tunniunneqarnera.

Aalajangersagaq assigiiaartumik isumaginninnermilu oqimaaqatigiissunik malittarisassaqarnissamut periarfissiivoq, ilaqutariinnikkut inuttullu pissutsinut sillimatitsisoq, pisut malillugit attartorneqartup atorunnaarsinneqarnera naammaginartuusinnaanani.

Imm. 3-mut

Imm. 2 malillugu malittarisassanik aalajangersaanermi meeqqat inersimanngitsut eqqarsaatigineqarnissaat pingaartinneqassaaq. Tamatuma saniatigut pingaartinneqassaaq inooqatigiinnerup atorunnaarsinneqarnera persuttaanermik, ilanngullugu tarnikkut persuttaanermik, imaluunniit pinerluttulerinnermut inatsimmut ilaasunik allanik saassussinernik pissuteqarnersoq. Aalajangersakkap siunertaraa immikkut mianernartumik inissisimasut, pingaartumik meeqqat persuttaanermillu eqqugaasut, attartornermi pisinnaatitaaffimmik nuutsitsinnermi naleqquttumik illersorneqarnissaat.

§ 44-mut

Imm. 1-imut

Namminersorlutik Oqartussani kommuniniluunniit atorfeqarnermut atasumik sulisoq inis-

siamut attartortittakkamut innersuunneqarsimappat attartukkamik allamut attartortitsigallartoqarsinnaanngitsoq aalajangersakkami aalajangersarneqarpoq. Siunertaq tassaavoq aallaqqaataaniit siunertamut inissiat taakku atorineqarnissaat, tassa sulisunut inissiamut pisinnaatitaaffeqarlutik atorfinitsinneqartunut najugaqarfiunissaat. Aamma siunertaavoq sulisunut inissiat aningaasarsiutigalugu atorineqarnissaasa pitsaaliornissaat.

Imm. 2-mut

Taamaattorli attartukkamik allamut attartortitsigallarsinnaaneq eqqunneqarpoq, atorfeqartoq taassumaluunniit inoqutigiivini katsorsarneqartumik napparsimanerup malitsigisaanik angerlarsimaffiup avataani aalajangersimasumik utaqqiisaasumik najugaqalernissaq pisariaqalersimappat.

Allamut attartortitsigallarnek inummut namminiisumut pisinnaavoq.

Attartortup inoqutaanut naatsorsuunneqarput aappaasoq, inooqataasoq, qitornat angerlarsimaffimmi najugaqartut inuillu allat, attartortumut inooqatigiinnertut ittumik attuumanngikkaluarlutik inoqutigiinnut ilaasut. Tamatuma nalilersornerani ilaatigut sulisunut inissiami inuit allattorsimaffianni aalajangersimasumik najugaqartutut kina nalunaarsorsimangersoq pingaartinneqassaaq. Inissiani attartortittakkani ineeqqanik attartorneq pillugu inattissimmi § 25-mut aamma § 36, imm. 3-mut innersuussisoqarpoq.

Taamatut pisoqarnerani attartukkamik attartortitseqqinneq attartortup qinnuteqarneratigut qaammatit aqqaneq marluk tikillugit akuerisaavoq aamma atorfinitsitsinermi oqartussanit allakkatigut akuersisoqarsimassalluni. Aalajangersakkami inuuniarnikkut peqqinnissakkullu eqqarsaatigisassat akuerineqarput sulisunut inissiap tunngaviatigut pissusaa allanngortinnngikkaluarlugu.

Imm. 3-mut

Attartukkamik attartortitseqqinnermut isumaqatigiissut attartortitsisumiit akuerineqassaaq. Attartorallarnarup akiliutaata annertussusia sulisup attartortitsisumut ineqarnermut akiliutaatut annertunerpaamik annertussuseqarsinnaavoq. Attartukkamik attartortitseqqinnermi isumaqatigiissummi pequtit ilaappata ineqarnermut akiliutip annerpaamik 10 %-ianik naapertuuttumik taakkununga akileeqqusisoqarsinnaavoq.

Siunertaq tassaavoq attartukkamik attartortitseqqinnermi iluanaaruteqarnerup anguneqarsinnaanerata pinngitsoortinnissaa peqatigisaanillu utaqqiisaasumik attartortitsinermi aningaasartuutitut naammaginartumik taarsiisoqarnissaa akuerineqarluni. Aalajangersagaq ammasumik pissuseqarnissamik pilersitsivoq attartornerullu aalajangersarnerani naapertuuttoqarnissaa qulakkeerneqarluni.

§ 45-mut

Imm. 1-imut

Attartortup inissiamik attartornermut isumaqatigiissutip taamaatinnisnaanut periarfissaqarnera aalajangersakkami aalajangersarneqarpoq. Taamaatitsineq allakkatigut pissaaq aamma § 52, imm. 2-mi allassimasut atorlugit kalerriisoqassalluni. Allanneqarsimanissaa pillugu piumasaqaatip piffissap taamaatitsiffiusup erseqqissuunissaa imarisaalu qulakkiissavaa.

Attartortup aapparisanik akuersiteqqaarnagu ilaqutariit inigisaannik attartorneq imaluunniit aappariit aapparissalluunniit suliffeqarfianut atatillugu attartorneq taamaatissinnaanngilaa. Aalajangersakkap inoqutigiit illersorpai aamma aappaasup kisimiilluni ilaqutariinni ineqarnermut pissutsinik ajornartorsiortitsisinnaalernera pinngitsoortinniarlugu.

*§ 46-mut**Imm. 1-imut*

Sulisunut inissiamik attartorneq atorfeqarnerup unitsinneqarnerani atorunnaassaaq. Atorfilik inissiamik attartornini allakkatigut taamaatissallugu pisussaavoq, taamaatitsinissamut si-umoortumik nalunaarfissap naanissaata tungaanut attartornermut allatigullu ingerlaavartumik akiliutitut akisussaalluni. Sulisunut inissiap suliffimmiit peqqusissut tunuliaqutaralugu atorfeqartumut innersuunneqarsimanera isumaqanngilaq suliffiusoq attartornermik taamaatitsisuussasoq.

Sulisunut inissiamut pisinnaatitaaffeqarnermut atorfeqarnermik pissuteqarnera taannalu peqatigalugu atorunnaarnissaa aalajangersakkami erseqqissarneqarpoq. Siunertaq tassaaq sulisunut inissiat sulisunut inissiamik innersuunneqarnissamut pisussaaffilinnut atorneqartu-arsinnaanerit pisariaqanngitsumillu kinguarsarneqanngitsumik attartorteqqinneqarsinnaalutik.

Imm. 2-mut

Sulisunut inissiaq pillugu attartugaq taamaatitsinissamut siumoortumik nalunaarfissap naanissaa kingusinnerpaamik ullut 15-it sioqqullugit qimareerneqarsimassaaq. Attartortitsisoq ilu-arsaassinissamut attartortitseqqinnissamullu malittarisassami piffissalernerneqarpoq, taamaalil-luni inissiaq inissiamut innersuunneqarsinnaasunut sulisunut nutaanut sukkanerpaamik at-orneqarsinnaasunngorlugu. § 59, imm. 1, oqaaseqatigiit siullermut innersuussisoqarpoq anin-issaaq aamma aninermi iluarsaassinissaaq pillugu malittarisassat nalinginnaasut pissutigalugit.

*§ 47-mut**Imm. 1-imut*

Aalajangersakkap kingunerisaanik attartortitsisup nammineq inissiaataani ineeqqanut ataasiakkaanut attartornerit nalinginnaasumik taamaatitsinermi kalerriinikkut taamaatissin-naavai. Aammattaaq illumik marloqiusamik piginnittoq, piginnittoq nammineq inissiap aap-paani najugaqarluni, illumi marloqiusami allami inissiamiittoq attartortoq nalinginnaasumik

kallerriilluni taamaatissinnaavaa. Taamaatitsineq tunngavilersuuteqarnissamik pisariaqartitsinnngilaq.

Siunertaq tassaavoq nammineq inissiami ilaanik attartortitsisut inuinnaat eqaatsumik periarfissaqarnissaannik qulakkeerinissaq taamatullu attartornerit ajornanngitsumik taamaatinneqarsinnaallutik.

Imm. 2-mut

Aalajangersakkap aalajangerpaa attartortitsisup taamaatitsinera imm. 1 malillugu allakkatigut pissasoq. Allakkatigut pinissaanut erseqqissaaneruvoq taamaatitsineq imarisaa, piffissaq taamaatitsiffiusoq aamma taamaatitsinerup peqqutaata ersarissuunissaa kiisalu isumaqatigiinngittoqarnissaanut pinaveersaartitsineq.

Allakkatigut ingerlatsinissamik piumasaqarneq imarivaa takussutissaqarnissaq. Taamaatitsineq nalinginnaasumik allakkatigut pisinnaavoq imaluunniit elektroniskimik ass. e-mail, allakkap apuussimanera uppersarneqarnissaa pillugu.

Allakkatigut piumasaqaammik naammassinninnginneq, atorunnaarsitsinerup atortussaannginneranik kinguneqassaaq.

§ 48-mut

Imm. 1-imut

Aalajangersakkamut ilaapput attartorneqartoq Namminersorlutik Oqartussanit, kommunimit imaluunniit ingerlatseqatigiiffimmit Namminersorlutik Oqartussanit imaluunniit kommuniniit aalajangiisumik sunnuteqarfigineqartumi inissiatileqatigiiffimmi attartorneqarsimappat kingornalu inummut attartortumut attartortitseqqinneqarsimappat.

Pisortanik imaluunniit pisortat inissiatileqatigiiffiannik attartornermik isumaqatigiisummik attartortitsisoq taamaatitsippat pisariaqassaaq pisortat imaluunniit pisortani inissiatileqatigiiffik taamaaqataanik nalinginnaasumik kallerriilluni inummut attartortumut attartortitseqqinnermut isumaqatigiisummik taamaatitsisinnaassasoq.

Aalajangersagaq malillugu taamaatitsinermut piumasaqaataavoq attartortitsisup tamatuma peqatigisaanik illoqarfimmi nunaqarfimmiluunniit tassani tulluurtumik allamik attartugasamik innersuussinera. Pisortat imaluunniit pisortani inissiatileqatigiiffiit inissianik attartorneqartunik piginnittumik isumaqatigiissuteqarnerinik pissuteqartunik attartorneqartunik taamaatitsinernut attartortumut aalajangersagaq illersuivoq.

Attartugassamut allamut innersuussineq malittarisassat qaqugukkulluunniit atuuttut malillugit pissaaq, takuuk § 10. Attartortoq assersuutigalugu taamaaqataanik ineqarnermut akiliutip, anertussusaanik, pisoqaassusaanik pitsaassusaanillu imaluunniit taamaaqataanik inissisi-

masumik isikkiveqartumillu inissiamik allamik attartornissamut piumasaqaateqarsinnaanngilaq.

Imm. 2-mut

Aalajangersakkami imm. 1 naapertorlugu taamaatitsineq allakkatigut pissasoq aammalu qaammatip naaneranut sivikinnerpaamik qaammatinik pingasunik siumut ilisimatitse-reernikkut pissasoq aalajangersarneqarpoq.

§ 49-mut

Imm. 1-imut

§§ 47-48-mi taaneqartut saniatigut attartornerni allani attartortitsisoq taamaallaat taamaatitsinnaavoq piumasaqaatit tulluuttut naammassineqarpata. Aalajangersagaq tamakkiisuvoq.

Nr. 1-imut

Attartortitsisup taassumalu inoqutigisai attartorneqartumi nammineerluni najugaqalivinni-arluni nalunaarutigippagu attartornerup taamaatinnissaannut attartortitsisumut aalajangersagaq periarfissiivoq. Imaassinnaavoq attartortitsisup piffissami sivisuumi nunami allamiinnini unit-sittariaqalersimagaa, namminerlu uteruni inissiami najugaqarnissani pisariaqartilerlugu. Ataavartumik najugaqarnissaq pillugu piumasaqaatip kingunerisaanik nammineq attartorneqartumik atuinnissani pissutigalugu attartorneqartoq taamaatissinnaanngilaa kingun-inngualu inissiaq attartoqqitsillugu.

Attartortitsisoq namminersortuuppat, assersuutigalugu ingerlatseqatigiffik imaluunniit pisortani oqartussat, attartortitsisup nammineq attartorneqartumi ataavartumik najugaqartussaani pissutigalugu taanna attartorneqartumik taamatitsinnaanngilaq. Taamaattorli attartortitsisup attartornermik taamaatitsinissamik pisariaqartitsisinnaaneranut immikkut tunngavissaqarluartunillu allanik peqquteqarsinnaavoq. Imaassinnaavoq pisortatigoortunik inuussutissarsiutigulluunniit annertuunik eqqarsaatigisassanik peqartoq, assersuutigalugu attartortitsisup illuut tunerussinnaavaa, attartornerlu ataqqineqassappat tamatuma pisinnaanera ajornarluni.

Nr. 2-mut

Illumi attartortittakkami iluarsaassinissaq isaterinissarlunniit pillugu aalajangiinermi attartornerit taamaatinneqarsinnaapput. Taamaatitsinermut pissutaasoq uppersarsarneqartariaqarpoq assersuutigalugu illup pineqartup iluarsaanneqarnissaanut isaterneqarnissaanulluunniit pisortat missingersuutaanni aningaasaliineq imaluunniit illup isaternissaanut pisortani oqartussanit akuersissuteqarnikkut aamma nunaminertap siunissami atorneqarnissaanut akuersissuteqarnikkut.

Nr. 3-mut

Attartortoq illup ingerlanneqarnerani suliaqartutut atorfeqartitaasimappat, tassa sulisunut inissiaq pineqarluni, attartortup suliffimmit soraarneranut atasumik nalinginnaasumik kallerri-

inikkut attartorneq attartortitsisumit taamaatinneqarsinnaavoq. Taamaatitsinermut piumas-aqaataavoq illumi atorfeqartumut nutaamut sulisumut inissiatut inissiap attartorteqqinneqas-sasoq.

Nr. 4-mut

Attartortoq tupamik pujortarnissap inerteqqutigineqarnera unioqqutippagu, ileqqoreqqusanik malinninngippat, pissutsilli attartornermik isumaqatigiissutip atorunnaarsinneqarnissaanut tunngavissatut naammattumik annertussuseqanngikkaluarpata, attartortitsisup attartorneq aamma taamaatissinnaavaa. Arlaleriarluni nipiliortoqarsimappat imaluunniit ineqartunut allanut malersuisimappat allatigulluunniit annertuumik akornutaasimappat attartornermik taamaatitsinissamut attartortitsisoq periarfissinniarlugu aalajangersagaq ikkunneqarpoq, naak pissutsit ataasiakkaat kisimiillutik attartornermik isumaqatigiisummik atorunnaarsitsinissamut attartortitsisumut tunngavissinngikkaluartut.

Nipiliornermut, akornusersuinermit imaluunniit annertuunik ajoqutaasunut uppersarsaatitut assersuutigalugu saqqummiunneqarsinnaapput politiit nalunaarusiaannit tigusat, isumannaal-lisaanermut suliffeqarfimmit, inissiamik aqutsisumit, illuummi sulisumit nalunaarusiat im-aluunniit illuummi attartortittakkami najugaqartumit ataatsimit arlalinniilluunniit nalunaarutit/naammagittaalliutit. Aammattaaq pisunit aalajangersimasunit nipit assillu immi-ussat saqqummiunneqarsinnaapput.

Tupamik pujortarnermut uppersarsaatitut assersuutigalugu saqqummiunneqarsinnaapput eqqi-aanermut suliffeqarfimmit attuumassutilimmit nalunaarut, inissiamik aqutsisumit, illuummi sulisunit nalunaarut imaluunniit illuummi attartortittakkami najugaqartumit ataatsimit arlalinniilluunniit nalunaarutit/naammagittaalliutit.

Attartortoq allakkatigut mianersoqqussutsinik inassutinilluunniit pingasunik qaammatit tullerit aqqaneq marluk iluanni tigusisimanissaa attartorneq pillugu isumaqatigiissutip taamaatinneqarnissaanut piumasaqaataavoq.

§ 50-imut

Namminersorlutik Oqartussat imaluunniit kommunip inissiamik attartukkamik nutarterinissaq isaterinissarlunniit pissutigalugu attartorneq taamaatissappagu, takuuk § 49, nr. 2, attartortoq inissiamik taartissamik innersuussivigineqassaaq. Inissianik attartortinneqartunik ilu-arsaassinermi isaterinermiluunniit attartortut inatsisitigut inissisimanerat aalajangersakkami illersorneqarpoq. Inissiamik taartissamik innersuussisussaataaneq taamaallaat atuutissaaq, attartortup Namminersorlutik Oqartussat imaluunniit kommunip attartornermik taamaatitsin-erata nalaani attartornermut isumaqatigiissut taamaatinneqartoq eqqortissimappagu.

Imm. 1-imut

Iluarsaassineq isaterinerluunniit pissutigalugu attartorneqartoq qimanneqartussaatiillugu Nam-

minersorlutik Oqartussat imaluunniit kommuni inissiamik taartissamik innersuussisussaasut aalajangersakkami aalajangersarneqarpoq. Attartormik isumaqatigiisummik eqqortitsisimasumut attartortumut inissiap taartissaanik attartortitsisoq innersuussissaaq.

Imm. 2-mut

Attartortut illumi iluarsaanneqarsimasumi inissiamut imaluunniit inissiaqarfimmi tassani illunut isaterneqartunut taarsiullugit sananeqartuni inissianut nutaanut uteqqinnissamut salliu-tinneqartussaataapput. Siunertaq tassaavoq najugaqartut katitigaanerisa sumiiffimmullu atassuteqarnerisa allanngortinneqannginnissaa. Inissianut attartortinneqartunut isaterneqarsi-masunut taartaasunik inissianik attartortittakkanik nutaanik sanaartortoqanngippat inissiamik nutaamik innersuunneqarnissamut attartortoq piumasaqaateqarsinnaanngilaq.

Imm. 3-mut

Salliutinneqartussaataaneq taamaallaat atuutissaaq attartortup inissiami taartissatut inner-suussivigineqartumi attartormut isumaqatigiissut eqqortissimappagu, aammalu attartortup inissiamik innersuussivigineqarnissamut piumasaqaatit allat naammassisimappagit, asser-suutigalugu inoqutigiit amerlassusaat inissiamut innersuunneqartumut naapertuutissalluni.

Namminersorlutik Oqartussat kommunillu pissutsit annertuumik pingaaruteqanngitsut pissu-tiginiarsinnaanngilaat. Pissutsit pineqartut attartortup inissiamut uteqqinnissamik neqeroor-uteqarfigineqarnerata nalaani aqqinneqareersimappata, Namminersorlutik Oqartussat kom-munilluunniit pissutsit taakku pissutiginiarsinnaanngilaat.

Imm. 4-mut

Inissiamut taartaasumut nutsernermi attartortitsisoq attartortumut aningaasanik taarsiis-suteqassaaq. Attartortitsisup attartortoq iluarsaassinerup naammassinerani inigisaminut uter-pat imaluunniit isaterinerup kingorna nutaamik sanaqqinnermi illumi nutaami inissiamik at-tartulerpat taamatorpiaq taarsiissuteqarfigissavaa. Aningaasat aalajangersarneqarsimasut sin-nerlugit taarsiisoqarsinnaanngilaq piviusumik aningaasartuutaasimasut attartortup aningaasar-tuutai sinnersimagaluarpagilluunniit.

Imm. 5-imut

Aningaasanut taarsiissutaasunut Namminersorlutik Oqartussat kommunillu aningaasartuutaat illumi iluarsaassinissamut isaterinissamulluunniit aamma inissiat isaterneqarsimasut sumiiffi-gisaanni inissiaqarfinni inissiat nutaat sananeqarnerinut aningaasaliissutit aqqutigalugit akilerneqassapput. Taarsiineq taamaalilluni ingerlatsiviit ataasiakkaat aningaasaqarnerannut artukkiissanngilaq.

§ 51-imut

Imm. 1-imut

Attartortitsisup taamaatitsinera allakkatigut nalunaarutigineqassaaq, taamaatitsinermut

pissutaasoq nalunaarutigineqassalluni, aammalu attartortup akerliliissuteqarsinnaaneranut paasissutissanik imaqqassalluni. Allanneqarsimanissaanut pissutissamik nalunaaruteqarnissarlup pillugit piumasaqaatip ammasumik pissuseqarneq uppersaateqarnissarlup qulakkiis-savaat.

Imm. 2-mut

Attartortoq taamaatitsinermik nalunaarutip tiguneraniit sapaatit akunneri arfinillit qaangiutsinnagit allakkatigut akerliliissuteqassaaq. Attartortitsisup taamaatitsineq atuutsiinnarniarlugu kissaatigiguniuk, attartortitsisoq sapaatit akunneri arfinillit qaangiutsinnagit eqqartuussivinnut suliaassanngortitsissaaq. Piffissaliussaq taamaatitsinerup piffissami attartortumut apuunneranit naatsorsorneqassaaq. Attartortitsisoq eqqartuussivikkut suliaassanngortitsinngippat taamaatitsineq atorunnaartutut isigineqassaaq. Sukkasuumik paasisaqarnissaaq inatsisitigullu isuman-naatsuunissaaq malittarisassami qulakkeerneqarput.

Namminersorlutik Oqartussani kommunilluunniit inissiaataanni attartortittakkani attartorneqartumik iluarsaassinerup imaluunniit isaterinerup kingunerisaanik taamaatitsinermut akerliliineq kinguatitsisumik sunniuteqassanngilaq. Taamaatitsineq taamaattumik eqqartuussivinni suliaq inernissaa utaqqinagu naammassineqarsinnaassaaq. Namminersorlutik Oqartussat kommunilluunniit taamaalillutik iluarsaassinermik isaterinermilluunniit pilersaarut ingerlatiinnarsinnaavaat.

Illummi ingerlatsinermi sulisumik nutaamik atorfinitsitsisoqarnerata kingunerisaanik sulisunut inissiatut innersuunneqartup attartorneranik taamaatitsinermut akerliliineq taamaaqataanik kinguatitsisumik sunniuteqassanngilaq. Taamaatitsineq taamaattumik eqqartuussivinni suliaq inernissaa utaqqinagu naammassineqarsinnaassaaq. Tamatuma kingorna attartortitsisoq illummi ingerlatsinermi sulisumik nutaamik atorfinitsitsisinnaavoq tassungalu sulisumut inissiaq innersuullugu.

§ 52-imut

Imm. 1-imut

Attartortitsisumit taamaatitsineq qaammatip naaneranut sivikinnerpaamik qaammatinik pingasunik siumut ilisimatitsernekkut pissaaq. Attartortitsisup inissiaani ineeqqamik attartorneq § 47, nr. 1 naapertorlugu qaammammik ataatsimik siumut ilisimatitsernekkut taamaatinneqarsinnaavoq. Malittarisassaaq illuatungeriinnut marluusunut piffissaliussanik aalajangersimasunik siumullu naatsorsorneqarsinnaasunik pilersitsivoq.

Imm. 2-mut

Attartortup tungaaniit taamaatitsiniarneq allakkatigut sivikinnerpaamik qaammatinik marlun-nik siumut ilisimatitsernekkut, qaammatip naanerani atuuttussamik pissaaq.

Namminersortumik inissiamik attartortitsinermi qaammatip naaneranut sivikinnerpaamik qaammatinik pingasunik allakkatigut kalleriinissaaq isumaqatigiissutigineqarsinnaavoq. Piu-

masaqaat atuutissappat attartorneq pillugu isumaqatigiissummi immikkut erseqqissarneqarsimassaaq. Tamanna aamma § 7, imm. 1-imik malinnippoq. Inissianik attartortittakkanik inuinaat attartortitsisartut attartortup taamaatitsinissamut sivilisunerusumik kalerriinissamut periarfissaqarnissaanut tunuliaqutaasoq, pisortani attartortitsisartut paarlattuanik, tassaavoq Namminersorlutik Oqartussat kommunillu assigalugit aqqissugaasumik pilersaaruserluni attartortitsisarnermik ingerlatsinissamut namminersorlutik attartortitsisartut annertutiginninnerat taamaalillunilu attartortumik nutaamik nassaarnissamut sivilisunerusumik piffissaqarnermikkut annertunerusunik annaasaqarsinnaallutik.

Ineqqamik attartortitsineq aalajangersakkamut ilaangilaq. Ineqqamik namminersortoq attartortitsisoq taamaalilluni qaammammit ataatsimiit qaammatit pingasut tikillugit attartortup taamaatitsinissamut kalerriinissamik attartortumik isumaqatigiissuteqarsinnaangilaq

Attartorneqartoq attartornermut isumaqatigiissutip atorunnaarnissaa kingusinnerpaamik ullut 15-it sioqqullugit qimanneqarsimassaaq misissorneqarsimassallunilu. Tamanna attartortitsisumut attartortumulluunniit attartornerup naanissaa sioqqullugu inissiamik iluarsaassinissamut piffissaliivoq. Peqatigisaanillu attartorneqartup naanerata kinguinnguutigut amerlanertigut inissiap attartorteqqinneqarsinnaanera qulakkeerneqarluni. Attartortup aninerani nalinginnaasumik iluarsaassineq pillugu inatsimmi kapitali 12-imut innersuussisoqarpoq.

Imm. 3-mut

Attartortoq piffissaq ilisimatitsissutaasoq suli naanngitsoq inissiamiit nuuppat, attartortitsisup attartukkap allamut attartorteqqinnissaa anguniassavaa. Attartortitseqqinnermi attartornermi isertitat attartortitsisup attartortumut piumasaqaateqarnerani ilanngaatineqassapput.

Attartornermut atasunik akiliutissanik attartornerup naanissaata tungaanut attartortoq akiliissaaq isumaqatigiissullu inatsillu malillugit attartugaq pitsaassuseqartillugu tunniutissallugu. Taamaatitsinermik kalerriinerup naanissaa sioqqullugu attartorneqartumiit attartortoq anissappat attartorneqarsimasorlu iluarsaanneqarsimalluni, attartortup aningaasartuutai killeqartinniarlugit attartorneqartup attartorteqqinnissaa attartortitsisumit anguniarneqassaaq.

Ineqarnermut akiliut, piffissami taamaatitsinissamik ilimasaarinerup naanissaa sioqqullugu attartortitseqqinnikkut attartornikkut isertitat nuuttumut piumasaqaataanit ilanngaatineqassapput. Piffissami taamaatitsiffiusumi inissiaq attartortitsisumit attartorteqqinneqarsimanngippat, inissiarlu attartorteqqittariaqarlugu, attartornikkut isertitassatut missiliorneqartoq attartortitsisup attartortumut piumasaqaataaniit ilanngaatineqassaaq.

Piffissami taamaatitsiffiusumi inissiamik attartortitsisup attartortitsisinnaneq pillugu nalinginnaasumik inatsisitigut isumatuumik peqqissaartumik akisussaassuseqartumillu pissuseqartumik isiginninnertut pissaaq. Illunik tuniniaasartoq aqqutigalugu illumik attartortitseqqinniarneq assersuutigalugu attartortitseqqinniaanertut naammaginartumik isigineqassaaq.

*§ 53-imut**Imm. 1-imut*

Attartornermut isumaqatigiissut piffissamut aalajangersimasumut atuuttussanngortitaasimapat, piffissap attartornissamut isumaqatigiissuteqarfiusup naanerani siumut ilisimatitsinertaqanngitsumik attartorneq unitsinneqassasoq aalajangersakkami malittarisassaliorneqarpoq. Isumaqatigiissutit taamatut ittut piffissami attartorfiusumi taamaatinneqarsinnaanngillat, taamaatitsinissamut periarfissaqarnissaq erseqqissumik isumaqatigiissutigineqarsimanngippat. Illuatungeriinnut marlunnut siumut naatsorsuutigisaqarsinnaaneq malittarisassami qulakkeerneqarpoq.

Imm. 2-mut

Atorunnaarsitsinermi malittarisassat nalinginnaasut allanngortinneqarnatik atorneqassasut erseqqissarneqarpoq. Piffissami attartorfiusumi taamaatitsisinnaannginnermik isumaqatigiisutaasimasut apeqqutaatinnagit attartortitsisup attartornissamut isumaqatigiissut kapitali 11-mi aalajangersakkat malillugit atorunnaarsissinnaavaa.

Imm. 3-mut

Aalajangersakkap kingunerisaanik attartortup attartortitsisup ilisimasaanik attartortitsisorlu akerliliinngippat attartornerup piffissamut aalajangersimasumut atuuttussanngortitaasup naareernerani attartukkani atuinnarpagu, attartorneq attartornermut nalinginnaasumut piffissamut aalajangigaanngitsumut ingerlaannartumik nuussasoq, inatsisitigut sunniutissai tassunga attuumassutillit aamma atuutsilersinneqassapput. Attartortitsisup akerliliinera allakkatigut atuutsinneqarnissaa pillugu piumasaqaateqanngilaq, piviusumilli akerliliisoqarsimaneranik attartortitsisumit uppersarneqartariaqassalluni.

*§ 54-imut**Imm. 1-mut*

Siunnersuutigineqarpoq attartortitsisoq pigisat qimatat toqqortarinissaannut pisussaaf-feqanngitsoq aammalu attartortitsisup pigisat qimatat attartortup akiligassaanik annaasaqaatigisinnaasaanillu igissinnaagai erseqqissumik aalajangersarneqassasoq.

Imm. 2-mut

Attartornermik taamaatitsineq attartortumillu anisitsineq tassungalu ilanngullugu attartortup pequtaanik sivisunerpaamik qaammatit pingasut tikillugit toqqortarineqarnissaat attartortullu pequtaanik igitsineq pillugu malittarisassanik Naalakkersuisut aalajangersaasinnaanissamut piginnaatinneqarput, taamaalilluni anisitsiniarnermi suleriaatsit pillugit malittarisassat ataatsimoortilernissaat pisattallu qimanneqartut iluamik isumagineqartarnissaat. Pequtinik qimanneqarsimasunik passussineq pillugu malittarisassat immikkut pingaaruteqarsinnaapput Namminersorlutik Oqartussat kommunillu inissiaataanni attartortittakkani aamma tamakkiisumik

ilaannakuusumilluunniit Namminersorlutik Oqartussanit kommuniniilluunniit pigineqartuni inissiaatileqatigiiffinni immikkut maannakkut atuuttarput.

Anisuminngaanniit aamma attartortut anisinneqartut pisataat attartortitsisumit nutserneqartut, toqqorneqartut, tuniniarneqartut imaluunniit iginneqartut taakkunungalu atasumik aningaas-artuutit pillugit malittarisassanik Naalakkersuisut aalajangersaasinnaapput. Sullinneqarnermut akiliummik akiliuteqarluni pequtit tamakkiisumik ilaannakuusumilluunniit tigusinnaanis-saannut attartortut periarfissaqarnerat pillugu malittarisassanik aalajangersaasoqarsinnaavoq.

Anisitsineq pillugu malittarisassat pisariaqartumik annertussuseqartumik Kalaallit Nunaanni Politiit peqatigalugit oqaloqatigiissutigineqassapput, Kalaallit Nunaanni eqqartuussisarneq pillugu inatsit malillugu attartortunik anisitsinermut atatillugu ikiuussinnaasut.

§ 55-imut

Imm. 1-imut

Namminersorlutik Oqartussat kommunillu inissiaataanni attartortittakkani qularnaveeqqusiis-summik, ineqarnermut akiliummik, imermut kiassarnermullu akiliutinik kiisalu najugaqartup akiligassaanik aamma aningaasartuutinik allanik attartornermut isumaqatigiissut naaper-torlugu akileqquneqartunik piffissaq eqqorlugu akilerneqannginnerisa kingunerisaanik attar-torneq pillugu isumaqatigiissummik attartortitsisoq atorunnaarsitsissasoq aalajangersakkami aalajangersarneqarpoq.

Namminersortut inissiaataanni attartortittakkani attartortitsisoq taamatut pisoqartillugu attar-torneq pillugu isumaqatigiissummik atorunnaarsitsisinnaavoq, pisussaaffeqarnanili.

Namminersorlutik Oqartussat kommunillu inissiaataanni attartortittakkani akiliinissamut pisussaaffiup atuutsinneqarnissaata qulakkeerneqarnissaa malittarisassami qulakkeerneqar-poq, naligiimmik pinninneq ingerlatsinermilu aningaasaqarnikkut piujuartitsineq pingaarner-tut eqqarsaatigineqarlutik.

Najugaqartup akiligassai tassaapput immikkut akileeqqusissutit attartornermut pissutsinit aamma attartortup attartornermut isumaqatigiissut, Inatsisartut inatsisaat imaluunniit taanna naapertorlugu malittarisassat malillugit pisussaaffiinit aallaaveqartut, kisianni ineqarnermut akiliutitut, qularnaveeqqusiissutitut, imermut imaluunniit kiassarnermut akiliutitut akileqqun-eqanngitsut.

Najugaqartup akiligassaanut assersuutigalugu ilaasinnaapput attartortup pisussaaffimmik eqquutitsinnginnera, inissiamik imaluunniit illuummik ajoqusiinerata, aserorterinerata, akisus-saassuseqanngitsumik atuinerata, immikkut ittumik eqqiaanermut, torersaanermut, matuer-saatinik imaluunniit parnaartunik taarsersuinermut, matunik, igalaanik imaluunniit pequtitik iluarsaassinermut imaluunniit taarsersuinermut kiisalu pigisanik attartortup inissiami pisin-

naatitaanani qimaannarsimasaanik, inissisimasaanik imaluunniit inissiamit igissimasaanik pii-aanermut atatillugu attartortitsisup aningaasartuutai uppersarsarneqartut.

Najugaqartup akiligassaanik akiliinnginneq aalajangersagaq naapertorlugu attartornermik isumaqatigiissutip atorunnaarsinneqarnissanut aatsaat tunngaviusinnaavoq aningaasat piviusuuppata, uppersarsarneqarsimappata, akiligassanngorsimappata aammalu attartornermut isumaqatigiissut, Inatsisartut inatsisaat imaluunniit taanna naapertorlugu malittarisassat malilugit akileqquneqarsimappata. Taaguutip nammeneq attartortitsisoq tunngavissaqanngitsunik aningaasartuutunik akileeqqusisinnaalersinngilaa.

Ineqarnermut akiliummik, imermut, kiassarnermut qularnaveeqqusiinermulluunniit akiliinnginneq attartornermik isumaqatigiisummik eqqutitsinnginnertut annertuutut isigineqassaaq, tassa ingerlatsivimmi attartortut allat attartortut ataasiakkaat akiliinnginnerisigut aningaasartuuteqartussanngussammata, taamaattumillu Namminersorlutik Oqartussat kommunillu attartornermik isumaqatigiissutip atorunnaarsinnissanut attartortullu allat aningaasartuutaasa killeqartinnissannut pisussaaffeqarlutik.

Tamanna attartortitsisoq namminersortuuppat atuutinngilaq. Attartortitsisoq namminersortoq akiliisoqarsimannginnerup kingunerisaanik attartornermik isumaqatigiisummik atorunnaarsitsinissamut pisussaaffeqanngilaq, attartortitsisorli sulii attartornermik isumaqatigiisummik atorunnaarsitsinissamut periarfissaqarpoq.

Imm. 2-mut

Inissiaq unioqqutitsisumik atorneqarpat, inissiaq piffissaanngitsukkut qimanneqarpat, attartortitsisoq unioqqutitsisumik inissiamut iseqquneqanngippat, malittarisassat unioqqutinneqarpata attartorneq pillugu isumaqatigiisummik atorunnaarsitsisinnaavoq. Atorunnaarsitsinermut pissutaasinnaasut eqqutitsinnginnertut pissutaasinnaasut tamakkiisumik aalajangersakkami tamakkerlugit allattorneqarput. Illup ingerlanneqarneranut aserfallatsaaliorneqarneranullu imaluunniit sanilit atugarissaarnerinut pingaaruteqartunik annertuumik unioqqutitsisoqartillugu attartortitsisut iliuuseqarnissamut periarfissaqarneri malittarisassami erseqqissarneqarpoq.

Imm. 3-mut

Attartortitsisup attartorneq pillugu isumaqatigiissut taamaallaat atorunnaarsissinnaavaa pissuseq attartortumut pisuutinneqartoq annertuumik pingaaruteqarpata. Aalajangersakkami naapertuuttumik tunngaveqarnissaq eqqunneqarpoq pissutsinilu soqutaanngitsuni atorunnaarsitsisinnaaneq pisinnaajunnaartillugu. Imm. 1-mi akiliinissamut pisussaaffiit pineqartut akilerneqannginnerat pisussaaffimmik annertuumik eqqortitsinnginnertut isigineqassaaq. Imm. 2-mi pissutsit pineqartut eqqarsaatigalugit pisussaaffimmik eqqortitsinnginneq annertuumik pingaaruteqarneris aalajangersimasumik naliliinikkut aalajangerneqassaaq.

Imm. 4-mut

Atorunnaarsitsinissap nalunaarutiginiissaa sioqqullugu pissutsit iluarsineqarsimappata attartorteqartoq attartortitsisumiit atorunnaarsinneqarsinnaanngilaq. Iluarsaassinikkut imaluunniit akiliinikkut eqqartuussivikkut sunniutaasut pinngitsoortinnissaannut attartortup periarfissaqarnera tamatuma erseqqissarpaa.

Imm. 5-imut

Attartortitsisup pissutsini eqqaaneqartuni attartornermik atorunnaarsitsinnginnerani attartortitsisup pissutsit aaqeqqullugit attartortoq peqqussuteqarfigissavaa. Unioqqutitsinerup iluarsineqarnissaanut attartortup piviusumik periarfissineqarnissaanik aalajangersagaq qulakkeerinippoq atorunnaarsitsinerlu periarfissatut kingullertut aatsaat atorneqarsinnaalluni.

Imm. 6-imut

Attartortoq attartukkaminit anisinneqarpat, attartortitsisup kommunimi inunnik isumaginnittoqarfik tamanna pillugu allakkatigut ilisimatissavaa. Siunertaq tassaavoq siusissukkut isumaginninnikkut suliniuteqarnissap angerlarsimaffeerunnissallu pitsaalioneqarnissaata pisinnaanissaa. Attartortup anisinneqarnissaanik piunasaqarnerup assilineqarnerata Kalaallit Nunaanni Politiinut kommunimullu nassiunneqarneratigut pisussaaffik naammassineqarpoq. Attartukkap atorunnaarnerani attartortoq namminerisamik anippat attartortitsisoq isumaginninnermi ingerlatsivimmut nalunaaruteqarnissamut pisussaaffeqassanngilaq.

§ 56-imut

Imm. 1-imut

Namminersorlutik Oqartussat kommunillu inissiaataanni attartortittakkani akiliinngitsoortoqartillugu attartornermik isumaqatigiissut attartortitsisup atorunnaarsissavaa, attartortup akiliinngitsuukkat allakkatigut akileeqqusissutip tigungeraniit kingusinnerpaamik ulluinnaat qulit qaangiutsinnagit akilersimanngippagit aammalu piffissaliussap naanissaa sioqqullugu imm. 4 aamma 5 naapertorlugit naafferartumik akilersuinissamik isumaqatigiissuteqarsimanngippat.

Attartortitsisup akileeqqusissutaa ulloq piffissaq eqqorlugu akiliiffissap kingulliup kinguinngua tunniunneqassaaq, tassanilu paatsuugassaanngitsumik allassimassaaq, attartornermut akiliutissanut kinguaattoorutit piffissaliussap naannginnerani akilerneqanngippata attartortitsineq atorunnaarsinneqassasoq. Erseqqissumik assigiiaartunillu suleriaaseqarnek malit-tarisassami erseqqissarneqarpoq attartortumullu inatsisitigut isumannaatsuuneq ikorfar-torneqarluni.

Imm. 2-mut

Namminersortut attartortitsisunut sivikinnerusumik ulluinnaat pingasut akileeqqusinissamut atuupput. Nikingassutaasoq Namminersorlutik Oqartussat kommunillu pisortani attartortitsis-

artutut inuiaqatigiinni amerlanerusunut akisussaanerannut naapertuuppoq, namminersortullu attartortitsisartut pisussaaffinnik eqquutitsinnginnermi sukkannerusumik qisuariartariaqarlutik.

Imm. 3-mut

Namminersorlutik Oqartussat kommunillu inissiaataanni attartortittakkani piumasaqaat pil-lugu akiliummik aamma atorunnaarsitsinerup atorunnaarsinneranut akiliummik attartortitsisoq akileeqqusisinnaavoq. Akiliut allaffissornikkut aningaasartuutitut matussutaavoq piffissarlu eqqorlugu akiliisarnissamut kajumissaataalluni.

Imm. 4-mut

Attartortoq ineqarnermut, imermut kiassarnermulluunniit akilinngitsuukkaminik akiitsoqartoq akilersuinissamut nammineq piumassutsiminik pisortanut attartortitsisunut isumaqatigiis-suteqarsinnaatitaavoq pisortanut attartortitsisunut Namminersorlutik Oqartussanut kiisalu kommuninut, naafferartumik akilersuinissamut isumaqatigiissuteqarnissamut, naafferarluni akilersuinissaq annerpaamik qaammatini sisamani ingerlasinnaavoq.

Imm. 5-imut

Aaqqissuussineq kajumissutsimik isumaqatigiilernertut pilersinneqarpoq piumasaqaatillu ti-guneraniit kingusinnerpaamik ullut arfilinnit qaangiutsinnagit isumaqatigiissutigineqarsimas-salluni. Aalajangersakkami aamma aningaasanngorlugu akilernerqartussamik pilersitsinermut akiliuteqarnissaq qaammatikkaartumillu aqunneqartussaq aalajangersarneqarpoq. Anisitsiner-mik pitsaaliuisinnaasumik aaqqissuussinermik aaqqissugaasumik ammasumillu pissuseqarfi-usumik malittarisassaq pilersitsivoq.

Imm. 6-imut

Siusinnerusukkut aaqqissuussinernik arlaleriarlutik eqquutitsisimangitsut imaluunniit akiler-sukkanik ingerlatereersunut attartortut naafferaallutik aaqqissuussinernut pisinnaatitaaf-feqarnerat imm. 5-imi killilerneqarpoq. Aammattaaq pisortaniit ikiorsiissutinik pisinnaatitaaf-feqartut imaluunniit aningaasaqarnikkut akisussaassuseqanngitsumik iliuuseqarnerup kingu-nerisaanik imaluunniit allatut nammineq pisuussutigisamik akilernerqanngitsunik akiitsoqaler-simasut attartortut ilaatinneqarnatik.

Aaqqissuussinerup attartortunut piviusumik, akiliisinnaassuseqarallartunullu siunnerfeqarnera aalajangersakkami qulakkeerneqarpoq atornerluinissarlu illuatungilerlugu.

Imm. 7-imut

Akiliutit pillugit akiliutillu angissusii pillugit malittarisassanik Naalakkersuisut aalajanger-saasinnaapput. Akit ineriartorneri allaffissornikkullu aningaasartuutit naapertorlugit inger-laavartumik aaqqiisarnissanut eqaassusermillu tunngavik qulakkeerinnippoq.

Imm. 8-mut

Namminersorlutik Oqartussat kommunillu inissiaataanni attartortittakkani attartortitsisut naat-sorsuutitut tunngasumik naatsorsuutini immikkoortuni kontomik ataatsimoorussamik pilersit-

sisinnaapput. Inigisap annertussusaani kvadratmeterimut ukiumut 25 kroninik ikinnerusin-naangitsut ukiumut immikkoortitsinernik konto aningaasalersorneqassaaq.

Inissianik aqutsisoqarfinni aningaasaqarnikkut patajaassuseqarnermut aalajangersagaq ikorfartuivoq aamma ingerlatsivinni ataasiakkaani ataasiaannarluni annaasaqarnerit sunniutaat anikillisillugit. Namminersorlutik Oqartussat kommunillu inissiaataanni attartortittakkani qularnaveeqqusiinerit, ineqarnermut akiliutit, imermut kiassarnermullu akiligassamik attartortut akiliinnginnerini ingerlatsiviit annaasaannik akiliinissamut ataatsimoorlutik attartortut akileeqataanissaannik tamanna kinguneqarpoq.

§ 57-imut

Imm. 1-imut

Attartortitsisup erngerluni atuutilersussamik attartortitsineq atorunnaarsissinnaavaa, attartortoq illumut, attartortitsisumut, taassuma atorfeqartitaannut, illumi attartortunut allanut inatsisit malillugit eqqortumik illumiittunut annertuumik ajoqutaasumik pissusilersorpat. Aalajangersakkamut assersuutigalugu inissiani attartortittakkani eqqaaniluunniit sulianik ingerlataqartusatut attartortunit sulisorineqartut aamma ilaapput.

Pissusilersornerit annertuumik akornusiisinnaasut assersuutigalugu tassaapput nakuusernerit, siorasaarinerit imaluunniit inummut illumullu navianartorsiortitsinermik kinguneqartut.

Aalajangersakkami ilaatigut pineqarput attartortup inuit pineqartut timikkut imaluunniit tarnikkut nakuuserfigippagit imaluunniit timikkut nakuusernissamik siorasaarippagit. Aamma attartortup pissusilersornera illuummut imaluunniit inunmut pineqartunut navianartorsiortitsisinnaappat aalajangersagaq atorineqarsinnaavoq, tassunga ilanngullugu sakkunik atuineq imaluunniit atortunik navianartunik attartukkami toqqortarinninneq.

Nakuuserluni imaluunniit navianartumik pissusilersornernut akuersaanngilluinnarnermut aalajangersagaq aalajangersaavoq aamma illut, attartortitsisut taassumalu atorfilittai, attartortut allat allallu akuerisaasumik suliassaqartut illersorneqarlutik.

Timikkut tarnikkullu nakuuserneq aalajangersakkami attartornermut inatsisitigut paasineqassaaq. Taamaattumik attartornermik isumaqatigiissutip atorunnaarsinneqarnissaanut piumasaqaataanngilaq pissutsit politiinut nalunaarutigineqarsimanissaat imaluunniit pinerluttulernermi aalajangiisoqarsimanissaa.

Imm. 2-mut

Innarliisumik pissusilersornerit attartortumit namminermit, attartortup inoqutaanit allanilluunnit attartortup attartukkamut imaluunniit illuummut allatigut isertitaanit piliarineqarnersut apeqqutaatinnagu aalajangersagaq atuutissaaq. Attartortup inoqutigiinnut tamanut pulaartullu pissusilersornerinut akisussaanera aalajangersakkami aalajangersarneqarpoq. Inoqutigiit pu-

laartullu iliuuseqarnerinut attartortup nammineq iliuuserisimasaatut attartortoq kinaassusersi-orfiunngitsumik akisussaavoq.

Attartortitsisoq taamaalilluni attartornermik isumaqatigiisummik atorunnaarsitsisinnaavoq attartortup inoqutaasa imaluunniit pulaartaasa imm. 1-imi pineqartumik pissusilersornerat pissutigalugu, naak attartortoq nammineq taamatut pissusilersorsimanngikkaluartoq. Tamanna aamma atuuppoq pissusilersorneq illup ataatsimoorussamik atorneqartuinit imaluunniit illup immikkoortuinit allanut attartortoq aqutigalugu pineqartup iserfigisinnaasaanut tunngappat.

§ 58-immut

Imm. 1-immut

Pissutsit §§ 55-57-imi taaneqartut pissutaallutik attartorneq atorunnaarsinneqarpat, attartortoq pisussaavoq erngerluni attartukkaminit anissalluni, aammalu ineqarnermut akiliut, aammalu attartortup inissiamiit nuunnissaanut siumut nalunaarfissap nalinginnaasup naanissaata tungaanut attartukkamut akiligassat allat akilissallugit. Attartorneqartup attartortumiit atorunnaarsinneqarnissaata tungaanut ineqarnermut akiliutit akilernerqarnissaannut kiisalu pisussaaffinnik eqquutitsinnginnerup kingunerisaanik attartortitsisup annaasai taarsissallugit tassungalu ilanngullugu attartukkamit anisitsinermut atasut aningaasartuutit taarsernissaannut attartortitsisup piumasaqarsinnaanera aalajangersakkami attanneqarpoq.

Imm. 2-mut

Attartortitsisup attartukkap sapinngisamik piaarnerpaamut allamut attartorteqqinnissaa anguniassavaa. Attartortitseqqinnermi attartornermi isertitat attartortitsisup attartortumut piumasaqaateqarnerani ilanngaatineqassapput.

Attartorneqartup nalinginnaasumik atorunnaarsinneqarnissaata tungaanut attartornermut atasut akiligassat attartortumit akilernerqassapput aamma isumaqatigiissut inatsillu malillugu attartugaq pitsaassuseqartillugu tunniutissallugu. Attartortup aningaasartuutai killeqartinniarlugit attartorneqartup attartorteqqinneqarnissaa attartortitsisumit anguniarneqassaaq. Ineqarnermut akiliut, piffissami taamaatitsinissamik ilimasaarinerup naanissaa sioqqullugu attartortitseqqinnikkut attartornikkut attartortitsisup isertitai attartortitsisup attartortumit piumasaqaataanit ilanngaatineqassapput. Piffissami taamaatitsiffiusumi inissiaq attartortitsisumit attartorteqqinneqarsimanngippat, inissiarlu attartorteqqittariaqarlugu, attartornikkut isertitasatut missiliorneqartoq attartortitsisup attartortumut piumasaqaataaniit ilanngaatineqassaaq.

Piffissami taamaatitsiffiusumi inissiamik attartortitsisup attartoqqitsitsisinnaaneq pillugu naliliineq nalinginnaasumik inatsisitigut isumatuumik peqqissaartumik akisussaassuseqartumillu pissuseqartumik isiginninnertut pissaaq. Illunik tuniniaasartoq aqutigalugu illumik attartortitseqqinniarneq assersuutigalugu attartortitseqqinniaanertut naammaginnartumik isigineqassaaq.

Imm. 3-mut

Attartornermik atorunnaarsitsineq attartortumillu anisitsineq tassungalu ilanngullugu attartor-

tup pisattanik sivisunerpaamik qaammatit pingasut tikillugit toqqortarinissai attartortullu pequtaanik igitsinissaq pillugu malittarisassanik Naalakkersuisut aalajangersaasinnaanissamut piginnaatinneqarput. Siunertaq tassaavoq anisitsiniarnermi suleriaatsit pillugit malittarisassat ataatsimoortilernissaat pisattallu qimanneqartut iluamik isumagineqartarnissaat. Pequtit qimanneqartut passunneqarneri pillugit malittarisassat immikkut maannakkut Namminersorlutik Oqartussat kommunillu attartortitsinikkut inissiaataanni inissiaateqarfinnilu Namminersorlutik Oqartussanit imaluunniit kommuninit tamakkiisumik ilaannakuusumilluunniit pigineqartuni atuupput.

Anisuminngaanniit aamma attartortut anisinneqartut pisataat attartortitsisumit nutserneqartut, toqqorneqartut, tuniniarneqartut imaluunniit iginneqartut taakkunungalu atasumik aningaasartuutit pillugit malittarisassanik Naalakkersuisut aalajangersaasinnaapput. Sullinneqarnermut akiliummik akiliuteqarluni pequtit tamakkiisumik ilaannakuusumilluunniit inissisimanissannut attartortut periarfissaqarnerat pillugu malittarisassanik aalajangersaasoqarsinnaavoq.

Pequtit qimanneqarsimasut passunnissaannut inissiat attartortinneqartartut killeqartumik amerlassusillit pisussaaffeqarnissaannut inuinnaat attartortitsisartut ilaatinnaqit malittarisassanik aalajangersaasoqarsinnaavoq.

Attartornermik isumaqatigiissutip atorunnaarsinnerata malitisigisaanik Namminersorlutik Oqartussat kommunillu inissiaataannit attartortittakkanit anisinneqartut Namminersorlutik Oqartussat kommunillu attartortunik illusimatitseqqinnissaq pillugu malittarisassanik Naalakkersuisut aamma aalajangersaasinnaapput.

Anisitsineq pillugu malittarisassat pisariaqartumik annertussuseqartumik Kalaallit Nunaanni Politiit peqatigalugit eqqartorneqassapput, Kalaallit Nunaanni eqqartuussisarneq pillugu inatsit malillugu attartortunik anisitsinermut atatillugu ikiuussinnaasut.

§ 59-imut

Imm. 1-imut

Piffissaq aniffiusoq nalinginnaasumillu nuunnermi iluarsaassineq pillugu pingaarnertigut malitassamik aalajangersagaq aalajangersaavoq.

Inissiaq taamaatitsinissamut kallerriinerup naanissaa kingusinnerpaamik ullut 15-it sioqqullugit qimanneqarsimassaaq. Inissiamit anisoqarnerani inissiaq nalinginnaasumik iluarsaanneqassaaq, tassanilu pineqarput qilaat qaqorsarlugit qalipaaneq, iikkanik qalipaaneq aamma/imaluunniit ungalitseruineq kiisalu eqqiaaneq. Natit nutaamik lakkersimasutut isikkoqassapput.

Attartukkap naanerani inissiap sukanerpaamik attartorteqqinnissannut pitsaassuseqarnissaata qulakkeerneqarnissaa siunertaavoq.

Imm. 2-mut

Attartortup nammineerluni nuunnerminut atatillugu nalinginnaasumik iluarsaassinissaq isumagisinnaavaa. Iluarsaassineq assassornermik ilinniagaqarsimasutut illersorneqarsinnaasumik pitsaassuseqartillugu suliarineqassaaq attartortup aninissaa sioqqullugu misissuinsarlu sioqqullugu naammassineqarsimassalluni. Attartortup aningaasartuutaasa annikillisinneqarnissaannut malittarisassaq periarfissiivoq, peqatigisaanilli suliap pitsaassuseqarnissaa qulakkeerneqarluni.

Attartortoq nalinginnaasumik iluarsaassinissaq nammineq isumagerusuppagu sulineq inissiap takuniarneqarnissaa sioqqullugu kingusinnerpaamillu attartortup aninerani naammassereersimassaaq. Taamaatitsinissamut kalerriussinerup naanissaa ullunik 15-inik sioqqunneranit siusinnerusukkat attartortitsisup attartortullu misissuinerat naammassineqassappat misissuinsisaaq sioqqullugu nalinginnaasumik iluarsaassinissamik attartortoq suliaqartariaqassaaq.

Imm. 3-mut

Inissiamut iserternermi inissiaq nalinginnaasumik iluarsaanneqarsimanngippat, inissiaq iserternermi isikkuatut iluseqartillugu tunniunneqassaaq. Nalinginnaasumik kingullermik iluarsaassisoqarneraniit qaammatinit pingasunit sivikinnerusoq ingerlasimappat atuisimanerit takussaasut kisiisa iluarsaanneqarnissaat pillugu attartortitsisoq akuersisinnaavoq. Tamanna attartortitsisup naliliineranik tunngaveqassaaq aamma nalinginnaasumik ileqquusumik iluarsaassisoqassanersoq imaluunniit atuinnermiit takussaasunik taamaallaat iluarsaassisoqassanersoq pillugu aalajangiisoqassalluni.

Imm. 4-mut

Attartortitsisup imm. 1-imi aamma 2-mi aalajangersakkat sanioqqussinnaavai, attartornerit marluk akornanni inissiap iluarsaanneqarnissaa annertuunik ajornartorsiutitaqarpat. Nalinginnaasumik iluarsaassisoqarnissaanut annertuumik aningaasartuuteqarfiusussani najugaqarfinni atorineqartussatut malittarisassaq eqqarsaataavoq. Assersuutigalugu sikorsuaqartillugu najugaqarfimmut atortussanik assartuinissaaq attartortitsisumut ajornartorsiutaasinnaavoq. Attartortitsisoq aamma najugaqarfimmut sanasutigut piukkunnartunik ikiortissanik pissarsinsamik ajornartorsiuteqarsinnaavoq.

Imm. 1-ip aamma imm. 2-p saneqqunneqarnissai attartortitsisumit aalajangerneqarpat tamatuma kingunerisinnaavaa attartukkamik nalinginnaasumik attartortoq iluarsaassisinnaanngitsooq. Attartornerup atorunnaarnerani tamatumunnga taarsiullugu attartortoq inissiamik attartornerup nalaani nungullarnernut naleqquttumik annertussusilinnik akiliuteqassaaq. Attartortitsisup nalinginnaasumik iluarsaassinermut aningaasartuutit attartortup inissiamik tiguseraniit qaammatit 100-t ingerlanerini tigujartuaassavai.

Imm. 5-imut

Inissiamit aninermi nalinginnaasumik iluarsaassisarneq aamma attartortup tamatumunnga atatillugu aningaasartuutigisaanut ajunngitsorsiasaqartarneq pillugu Naalakkersuisut maleru-

agassiorsinnaapput. Tassunga ilanngullugu teknikikkut atortussat, atortussanik toqqaaneq aamma suliap suliarinissaanut piumasaqaatit pillugit Naalakkersuisut malittarisassanik aalajangersaasinnaapput.

Nalinginnaasumik iluarsaassineq pillugu malittarisassat qitiusumit aalajangersarneqarsinnaaneri sulinernullu tulluarsarsinnaanerit tunngavimmi qulakkeerneqarpoq.

§ 60-imut

Imm. 1-imut

Attartortitsisup nalinginnaasumik iluarsaassinermut aningaasartuutit attartortup inissiamik tiguserananiit qaammatit 100-t ingerlanerini tiguartuaarneqassasut aalajangersakkami aalajangersarneqarpoq. Piffissaliussatut aalajangiunneqartup naannginnerani inissiamit anisoqarnerani attartortup taamaallaat aningaasat piffissami tassani attartortitsinerup atorunnaarfigisaani attartortitsisumit akilernerqartussanngorsimanngitsut akilissavai. Nungullarnernut aserfallatsaaliinernullu akisussaaffiup agguarneqarnera ilusimi piffissap attartorfiusup sivissusaanut naapertuuppoq aamma piffissap ingerlanerani aserfallatsaaliinissamut attartortitsisup pisussaaffeqalernissaanut naapertuulluni.

Imm. 2-mut

Piffissami attartorfiusimasumi tupanik allanilluunniit pujortartoqarsimappat inissiap pujorsuninnermik tipaarsaanermut aningaasartuutit inaarutaasumik tamarmiusut imm. 1 malillugu anikillineqarsinnaanngitsut akilernissaannut attartortoq akisussaavoq. Inissiani pujortarfiusimasuni pujorsunninnerup peerneqarnissaanut attartortitsisumut ingerlatsiviillu immikkut aningaasartuuteqarsinnaanerit aalajangersakkami pinngitsoortinniarneqarpoq aamma inissiat pujortarfiumnginnissaat pillugu anguniakkamut tapersersuilluni.

Inissiamik pujortarfigineqarsimasumik pujuiaalluni saliineq nalinginnaasoq annertuumik ingerlanneqartarpoq, nikotinip, orsuutip tipeqartuaannarneratalu, illup iluanilersimasup peernissai siunertaalluni. Suliarinerata ingerlanerani ilaatinneqartarput motoorilinnik atuilluni eqqiaaneq aammalu akuutissanik atuilluni suliarinninneq, pisuni amerlasuuni tipaarutsivinnissaanut qalipallugu suliarinissaa pisariaqartarluni.

Sukumiisumik asannera (Nikotinik saliineq)

Ikkat qilaallu: Sungaartumik/kajortumik qallinissimasut piiarniarlugit aalaakkaasunik qaallit tamarmik nikotiniaatinik immikkuullarissunik imaluunniit sukumiisumik saligutininik (asser-suutigalugu Hydrosol) asanneqassapput. Qisuttai atortulersuutillu aalaakkaasut: Matut, mattserfiit, iikkiussat, sikaaviit matui igaffimmilu ikkussukkat sukumiisumik asanneqassapput.

Silaannarissaaneq nipaarutsinnissaalu

Silaannarissaaneq: Inissiaq piffissami sivisunerusumi silaannarissarluarneqassaaq.

Ozoninik suliarinninneq: Inuussutissarsiutigalugu suliffeqarfiit amerlanertigut ozongeneratorit atortarpaat. Ozoni nutinnerni quppanilu sitsertarpoq aammalu nipit molekylili eqqiaanermi anguneqarsinnaanngitsut arortittarlugit.

Aktivt kul/tipinik milluaaneq: Silaannaap tipeqarnera sinneruttoq milluartinniarlugu aktivt kul-imik imaluunniit eddike-mik imallit inissinneqarsinnaapput.

Illup iluata suliarinera (Qalipaaneq)

Asserlugu qalipaaneq/Nikotinimik assiisartut: Ikkat qilaallu asalluarneqareerneranni qalipaammik assiisartumik (primer), nikotinit sinneruttut ataaniittut qalipanneranik pitaasinnaanissaannik pinngitsoortitsisartumik, qalipanneqassapput. Naggataatigut nalinginnaasumik nammineq toqqakkamik qalipaatilimmik qallerneqassaaq.

Eqqiaaneq aamma annoraamineq/pequtinik nuunneqarsinnaasunik taarsersuineq

Annoraamernit: Saagut, tippit allallu annoraamernit kissartorujussuarmik errorneqassapput imaluunniit taarserneqassapput.

Pequtit: Pequtit salinneqarsinnaapput, kisianni sakkortuumik pujortartoqarsimatillugu peerneqarnissaat pisariaqarsinnaavoq, tassami nikotin itisuumut pitaasarmat.

Natit: Tippit salinneqassapput imaluunniit peerneqassapput, natit manngertut saligummik asanneqassallutik.

Silaannarissaaneq sorujuaanerlu

Sorujuaatinik taarsersuineq: Silaannarissarfinni aalamillu milluaasuni sorujuaatit taarsersorneqassapput, tassami taakkua nikotinimik ulikkaassammata.

Taarsersuinerit

Pisuni ingasattorujussuarni tapet-it peernissaat imaluunniit gipsit pladit/igaffimmi ikkussukkat peernissaat pisariaqarsinnaavoq.

§ 61-imut

Imm. 1-imut

Attartorneq atorunnaarsinneqartussanngorsimappat imaluunniit taamaatinneqarpat inissiamik misissuisoqarnissaa pillugu naapinnissaq isumaqatigiissusiorfigineqassaaq.

Attartortitsisup attartortoq misissuinnermut peqataaqqullugu sivikinnerpaamik ullunik arfineq marlunnik allakkatigut siumut nalunaarfigissavaa. Misissuineq attartornermut isumaqatigiisutip atorunnaarnissaa aammalu attartortup aninissaa kingusinnerpaamik ullunik 15-inik sioqqullugu pissaaq. Misissuinissamut aggersaaneq attartortup aninerata imaluunniit anisitaanerata kinguinngua pissaaq. Attartortoq imaluunnit attartortumut sinniisoq misissuinnermut peqataanissamut pisinnaatitaavoq.

Imm. 2-mut

Misissuinnermi attartortitsisoq misissuisimanermut nalunaarusiussaaq, tassanilu amigaataasin-

naasut paarinerlutallu allassimassapput. Attartortoq taakkununga isumaqataanngippat, tamanna attartortup isumai nalunaarusiami allanneqassapput. Nalunaarusiaq misissuinermut atatillugu illuatungeriinnit atsiorneqassaaq. Attartortoq taannaluunniit sinnerlugu takkuttoq misissuinermut nalunaarusiap assinganik tunineqassaaq, attartortoq piumasaqarpat suliassat attartortitsisup isumaa malillugu attartortumit akilernerqartussaasut aningaasartuutissaannik missingersuummik allakkatigut tunineqassaaq. Attartortitsisup isumaa malillugu attartortup akiligassaanik. Nalunaarusiap ilusissaanut piumasaqaateqanngilaq. Assersuutigalugu misissuinerimi immersugassiaq naqinneqareersimasoq atorneqarsinnaavoq soorlu aamma A4 pappi-araq nalinginnaasoq atorneqarsinnaasoq.

Piffissami attartorfiusumi attartortoq illup iluani pisariaqartutigut aserfallatsaaliuisimanngippat, takuuk inatsimmi § 33, imm. 3, taamaalillunilu nalinginnaasumik iluarsaassinissamut attartortitsisumut immikkut aningasartuuteqartitsippat tamanna attartortup akisussaaffigisaatut amigaatitut isigineqarsinnaavoq.

Imm. 3-mut

Attartortoq nuunnissaq kingusinnerpaamik ullut arfineq pingasut sioqqullugit nalunaarutit nassiunnissaannut atugassamik allakkerivikkut imaluunniit mailikkut najukkani nassiussiffiususaaq tunniutissavaa. Pisussaaffik attartortoq imaluunniit attartortitsisoq Pisortani Digitalimik Allakkerinnermut ilaatinneqanngippat atuuppoq. Attartornerup naammassineranut atatillugu allaqatigiinnerit aamma attartornerup naanerani akiligassatigut naatsorsuinerit eqqortumik pisinnaaneri malittarisassami qulakkeerneqarpoq taamaalillunilu attartortitsisup attartortullu soqutigisaminnik isumaginninnissamut periarfissaqarlutik.

§ 62-imut

Imm. 1-imut

Attartortoq taassumaluunniit piginnaatitaa misissuinermut takkutinngippat, attartortitsisoq pisinnaatitaavoq nalunaarusiaq tunngavigissallugu attartortullu qularnaveeqqusiissutaasa nalinginnaasumik iluarsaassinermut aningaasartuutissanut, matussutissatut aamma attartornermik isumaqatigiissut naapertorlugu attartortup pisussaaffiitut matussutigineqarnissannut atusallugit. Attartortoq takkutinngikkaluartoq aninnermut atasut sulinerit naammassineqarsinnaaneri aalajangersakkami qulakkeerneqarpoq.

Imm. 2-mut

Attartortitsisup amigaatit misissuinerup nalaanni pissusissaatut malugineqarsinnaasimagaluit piumasaqaatigisinnaanngilai, tamatumani attartortoq peqquserlulluni iliuuseqarsimanngippat. Attartortoq pillugu inatsisitigut isumannaatsuunermik aalajangersagaq pilersitsivoq piumasaqaataasinnaasullu piffissaq eqqorlugu saqqummiunneqarsinnaaneri qulakkeerlugu.

Imm. 3-mut

Attartortitsisoq inissiami qimanneqartumi paarsinerluttoqarsimaneranik aserorterisoqarsiman-

eranilluunniit uparuaasimappat, pissutsit annertussusiilu immikkoortillugit uppern-arsaaserneqassapput. Immikkut ittut ajoqusernerit pillugit uppernarsaanissamut attartortit-sisumut malittarisassaq pisussaaffiliivoq attartortumullu naammaginangitsumik piumas-aqaateqarsinnaaneq pitsaaliorlugu. Immikkut ittumik uppernarsaaneq assersuutigalugu tas-saasinnaavoq uppernarsaasut, assilisat imaluunniit videomik immiussisimanerit.

§ 63-imut

Imm. 1-imut

Namminersorlutik Oqartussat kommuniluunniit inissianik allaffissornikkut aqutsisussamik avataaniit pissarsisimappata, inatsit manna aamma aalajangersakkat inatsit manna naaper-torlugu atulersinneqartut imaluunniit ingerlatiinnarneqartut naapertorlugit suliarinerai inissi-anik allaffissornikkut aqutsisup nalunaaruteqarsimanera pillugu Naalakkersuisut imaluunniit kommunalbestyrelsi nakkutiginnissapput.

Aalajangersakkami eqqaaneqarsinnaasut tamarmik ilaapput aamma inissiamik aqutsisumik avataaneersumik Namminersorlutik Oqartussat kommunilluunniit nakkutilliinissamut pisus-saaffeqarnerat malittarisassaliorneqarluni. Taamaattorli attartortunut naleqqiullugu aqutsisup avataaneersup kukkussuteqarsinnaaneranut eqquutitsinnginneranut Namminersorlutik Oqartussat kommunilluunniit akisussaanerat tassani peerneqanngilaq.

Ilassutitut nalunaarusiorsinnaaneq pillugu inissiamik aqutsisumik avataaneersumik Nam-minersorlutik Oqartussat kommunillu isumaqatigiissusiorsinnaapput. Inatsisartut inatsisaat manna taannalu naapertorlugu malittarisassat atulersinneqartut naapertorlugit Namminer-sorlutik Oqartussat kommunillu inissiaataanni attartortittakkanik aqutsinermut inissianik aqut-sisoq avataaneersaq isumaginninngippat eqqortumik aqutsinissap qulakkeernissaanut kukkus-sutaasinnaasullu iluarseqqinnissaannut malinnaanissamut Naalakkersuisut kommuniluunniit pisussaaffeqarput. Isumaqatigiissutitigut eqquutitsinnginnermi pisussaaffiit pisariaqartutigut Namminersorlutik Oqartussaniit kommunimiillu atuutsinneqassapput.

Imm. 2-mut

Kommuni nammineerluni inissiaatiminik allaffissornikkut aqutsinermik isumaginnippat, inat-sit manna aamma malittarisassat inatsit manna naapertorlugu atulersinneqartut imaluunniit in-gerlatiinnarneqartut naapertorlugit aqutsineq ingerlanersaq pillugu nammineq kukkuner-siuisuni ukiumoortumik nalunaaruteqartissavaa.

Kommunip missingersuutaanut, naatsorsuutaanut kukkunersiuineranullu piumasaqaatinut nalinginnaasumik atuuttunut aalajangersagaq ilassutaavoq.

Imm. 3-mut

Aalajangersakkami Naalakkersuisut Namminersorlutik Oqartussat kommunillu illuutininik at-tartortittakkanik ingerlatsiviinnillu allaffissornikkut aqutsinerannik nakkutilliineq pillugu maleruagassanik aalajangersaanissamut piginnaatinneqarput.

Piginnaatitsineq ilaatigut nakkutilliinerup aaqqissuunnissaa ingerlanneqarneralu pillugit maleruagassanik aalajangersaanissamut atorneqarsinnaavoq, matumani ilanngullugit paasisstissat suut Namminersorlutik Oqartussanit, kommuninit, attartortitsisumit imaluunniit allaffis-sornikkut aqutsisumit avataaneersumit tunniunneqassanersut, kiisalu nakkutilliinerup nalun-aarusiorfigineqarnera malitseqartinneqarneralu pillugit maleruagassat.

Aalajangersakkap siunertaraa illuutit attartortittakkat ingerlatsiviillu allaffissornikkut aqun-neqarnerisa Inatsisartut inatsisaat manna aamma maleruagassat Inatsisartut inatsisaat manna naapertorlugu aalajangersarneqartut naapertorlugit ingerlanneqarnerisa qulakkeerneqarnissaa.

§ 64-imut

Imm. 1-imut

Namminersortoq attartortitsisoq inissianik attartortittakkanik tallimanik amerlanerusunilluun-niit, inatsit manna naapertorlugu attartorneqartunut, pigisalik kukkunersuiusumik nalunaarsor-simasumik imaluunniit naalagaaffimmiit akuerisaasumik sullissisoqassasoq aalajanger-sakkami aalajangersarneqarpoq. Inissiat attartortinneqarnerat inatsit manna aamma malittar-isassat inatsit manna naapertorlugu atulersinneqartut imaluunniit ingerlatiinnarneqartut naapertorlugit ingerlanneqarnerasoq pillugu kukkunersuiusoq nalunaarummik suliaqassaaq.

Imm. 2-mut

Kukkunersuiusup nalunaarutaata assilinera attartortumut tunniunneqassaaq. Attartortitsinerup malittarisassat atuuttut malillugit ingerlanneranik attartortup paasinnissimanissaa malittarisas-sami qulakkeerneqarpoq aamma attartortup attartortitsisullu akornanni tatigeqatigiinneq nukittorsarlugu.

§ 65-imut

Imm. 1-imut

Inissiani attartortittakkani attartortup attartortitsisullu akornanni isumaqatigiinngissutit suliar-ineqartarnissaannut Ineqarneq pillugu Maalaaruteqartarfimmik pilersitsisinnaanermut Naalak-kersuisut piginnaatinneqarput. Maalaarutaruteqartarfik siulittaasoqarpoq sisamanillu ilaas-ortaqaarluni. Siunertaq tassaavoq attartornermi inatsisitigut suliaassanik eqqartuussiviinnilu suliaassanngortitsinani sukkasuumik aaqqiisinnaasunik allaffissornikkut oqartussanik attaviit-sunik pilersitsinissaaq.

Imm. 2-mut

Siulittaasoq sinniisualu Naalaakkersuisunit toqqarneqartarput. Siulittaasoq sinniisualu inat-sisilerituutut kandidatitut angusini kuussapput, ineqarnermullu tunngassutilinnik immikkut ilisimasaqartuussallutik. Ilaasortat sinneri inissiaatileqatigiiffiit, kommunit kattuffiillu inas-suteqarsinnaatitaasut inassuteqarnerisigut toqqarneqartassapput. Maalaaruteqartarfimmi amer-

lasuuniit sinniisoqarnissaq suliutigullu oqimaaqatigiittoqarnissaa malittarisassami qulak-keerneqarpoq. SIK, IMAK aamma PPK ataatsimoorlutik imaluunniit immikkoorlutik inunnik ilaasortassanik sinniisussanillu inassuteqarsinnaapput. Naalakkersuisut inuit inassutigineqartut akornanni toqqaassapput.

Imm. 3-mut

Siulittaasumik, ilaasortanik taakkunungalu sinniisunik toqqaaneq annerpaamik ukiunut sis-amanut atuuttussatut pissaaq. Aalajangersagaq maalaaruteqartarfiup katitigaanerani patajaas-susermik ataqatigiissitsinermillu pilersitsivoq aamma ataatsimoortumik ataasiakkaatigullu mi-silittakkat ineriartortinnissaannut tunngavissiilluni.

Imm. 4-mut

Siulittaasooq taassumaluunniit sinniisua piginnittuunermut, inissianut imaluunniit attartorner-mut kattuffinnut immikkut attuumassuteqartuussanngilaq imaluunniit inissianik tuniniaas-arnermi inuussutissarsiateqarnikkut akulerusimasuussanngilaq. Siulittaasup attaviitsuunissaa allanullu attuumassuteqannginnissaa aalajangersakkami qulakkeerneqarpoq.

Imm. 5-imut

Ilaasortat sinniisussallu piffissaalluartillugu ataatsimiigiaqqusaareernermi kingorna ataatsimii-giarnissaminut pisussaaffeqarput. Naalakkersuisut ineqarneq pillugu maalaaruteqartarfimmi ataatsimiinnissamut takkutinngitsoornerup kingunerisassai pillugit sukumiinerusunik maleru-agassiorsinnaapput.

§ 66-imut

Maalaaruteqartarfik aalajangersimasumik najugaqarfissatut inissiamik attartorneq imaluunniit attartortitseqqinneq pillugu isumaqatigiisummit aallaaveqartunik isumaqatigiinnngissutinik suliarinissinnaavoq, attartortoq inuttut namminiussuseqarpat. Maleruagassami maa-laaruteqartarfiup piginnaatitaanera attartornermut tunngasunut, attartortoq inuttut nammini-ussuseqartoq, killeqartinneqarpoq, aammalu inuussutissarsiuutigalugu attartortitsinermut taamaallaat tunngasut suliati ilaatinneqanngillat.

Maalaaruteqartarfik aalajangersimasumik najugaqarfissatut inissiamik attartorneq imaluunniit attartortitseqqinneq pillugu isumaqatigiisummit aallaaveqartunik isumaqatigiinnngissutinik suliarinissinnaanngilaq, attartortoq suliffeqarfiuppat. Tamatumani pingaartinneqarpoq maa-laaruteqartarfiup suliassaraa inuit ataasiakkaat attartorneq pillugu inatsisitigut suliati aala-jangersimasut sukkasuumik aaqqinneqarnissaannut periarfissaqarnissaannik qulakkeerinninn-issaq.

Tamanna atuutinngilaq, attartorneq pillugu isumaqatigiissut suliffeqarfimmik attartortutut isumaqatigiissutigineqarsimappat. Tassani pineqarpoq niuernikkut isumaqatigiinnngissut nalinginnaasooq, nalinginnaasumik periuseq malillugu aaqqinneqartussaq.

*§ 67-imut**Imm. 1-2-mut*

Naalakkersuisut maalaaruteqartarfiup atortussatut pisariaqartitaannik atugassiissapput, aam-malu pisariaqartitsinikkut allaffeqarfimmiit ikiorneqarnissaat isumagissallugu. Maalaaruteqar-tarfiup allaffissornikkut suliatigullu ingerlasinnaanera malittarisassami qulakkeerneqarpoq. Ineqarneq pillugu Maalaaruteqartarfiup sulineranut Inatsisartunut ukiukkaartumik aningaasat pillugit inatsisaanni aningaasaliissutit ilanngunneqassapput.

Maalaaruteqartarfiup sulineranut aningaasartuutit Naalakkersuisunit akilernerqartassapput, tas-sunga ilanngullugit akissarsiat, ullormusiat ilaasortallu angalanerini aningaasartuutit. Inatsis-artunut, Naalakkersuisunut il.il. ilaasortat akissarsiaqartitaanerat pillugu Inatsisartut inat-sisaanni maleruagassat naapertorlugit akissarsiaqartitsisoqassaaq. Aningaasartuutit aningaasa-nut inatsimmi ukiumut aningaasaliissutit iluini akilernerqartassapput.

Imm. 3-mut

Ineqarneq pillugu maalaaruteqartarfik ukiumoortumik nalunaarummik saqqummiussisassaaq, kisitsisitigut takussutissanik, kiisalu aalajangiisarnert ataasiakkaat inernerinik naatsunngorlu-git saqqummiunneqarnerinik imaqartunik. Siunertaq tassaavoq maalaaruteqartarfiup sulinerni ineriartornermik malinnaanissamut kikkut tamarmik paasisaqarnissaasa malinnaanissamullu periarfissaqarnissaasa qulakkeerneqarnissaa.

Ukiumoortumik nalunaarut qarasaasiatigut tamanut saqqummiunneqarsinnaavoq, tassunga il-anngullugu Ineqarneq pillugu Maalaaruteqartarfiup imaluunniit Naalakkersuisut nit-tartagaanni.

Maalaaruteqartarfiup aalajangiineri aamma inatsimmi aalajangersakkanik nassuiaaneri aamma suliassaqarfimmik Naalakkersuisut isumaginninnerannut attuumassuteqartussaapput aamma inatsisip atuuttup allanngortittariaqarneranik imaluunniit nutarterneqartariaqarneranik naliliin-issamut.

Imm. 4-mut

Inatsisartut ukiumoortumik aningaasanut inatsisaanni Ineqarneq pillugu Maalaaruteqartarfiup sulineranut Naalakkersuisut aningaasartuuteqarnerinut tamakkiisumik ilaannakuusumilluun-niit attartortut aningaasaleeqataanissaannut attartortut aalajangersimasut akileeqquneqarnis-saat pillugu aalajangersakkanik aalajangersaasoqarsinnaalluni.

Inissianik tallimanik amerlanernilluunniit attartortitsisartunut inatsit manna naapertorlugu at-tartorneqartunut ineqarnermut akiliutikkut ukiumut akiliummik attartortut akileeqquneqarnis-saannik Naalakkersuisut nalunaaruteqarsinnaapput. Akiliut kingusinnerpaamik januaarip 31-iani Naalakkersuisunut akilernerqarsimassaaq.

Akiliinngitsoortoqarnerani aningaasat attartortitsisumi Naalakkersuisut pissarsiassaanni il-
anngaatigineqarsinnaapput.

Attartortitsisoq taamaalilluni akiliummik akileeqqusisussaataavoq, aalajangersakkalli nam-
mineq kingunerinngilaa attartortitsisoq Ineqarneq pillugu Maalaaruteqartarfiup sulineranut
immikkut nammineq akiliuteqassasoq. Akiliutip akileqquneqarneranut atatillugu allaffis-
sornikkut aningaasartuutit attartortitsisup allaffissornikkut aqutsinermut aningaasartuutai pil-
lugit malittarisassat nalinginnaasut naapertorlugit suliarineqassapput.

Imm. 5-imut

Naalakkersuisut maalaaruteqartarfiup suliai, matumani ilanngullugit ataatsimiittarnerit akut-
tussusissaat suleriaasissarlu maalaaruteqarnermut akiliuteqartarfiup pillugit sukumiinerusunik
maleruagassiorsinnaapput. Suleriaatsit akiliutillu allaffissornikkut pisariaqartitsinermut tullu-
arsarnejarsinnaaneri tunngavimmi qulakkeerneqarpoq.

Imm. 6-imut

Maalaaruteqartarfiup nammineq suleriaasissamik aalajangersaassaaq. Maalaaruteqartarfiup at-
taviitsuunera sulineratalu aaqqissuunnissaanut periarfissaqarnera tamatuma erseqqissarpaa.

§ 68-imut

Imm. 1-imut

Maalaaruteqartarfiup suliassat suut suliarisassagai aalajangersakkami aalajangersarneqarpoq.
Taakkununga ilaapput inissiani attartortittakkani namminersortunit pigineqartuni ineqarner-
mut akiliutit naatsorsorneri, ineqarnermut akiliutinik qaffaanissamik siumoortumik ilisimatit-
sisarneq, aserfallatsaaliuineq iluarsaassinerlu, inissiap iserterfigineqarnerani qimanneqarner-
anilu qanoq issusia kiisalu ileqqoreqqusat unioqqutitsinerit pillugit maalaarutit.

Allattorneqarsinnaasut tamakkerneqarput maalaartaruteqartarfiullu piginnaasaanik erseqqis-
sumik killiliisoqarluni. Ineqarnermi inatsisitigut suliassat aalajangersimasut pillugit maa-
laaruteqartarfiup immikkut ilisimasalittut maalaaruteqartarfittut sulinera malittarisassami
qulakkeerneqarpoq.

Imm. 2-mut

Imm. 1-imi eqqaaneqartuni pissutsinut tunngasut maalaarutit pisortat ingerlatsiviinut allanut
suliassanngortinneqarsinnaanngillat. Maalaaruteqartarfiup inaarutaasumik allaffissornikkut pi-
ginnaatitaanera aalajangersakkami aalajangersarneqarpoq.

§ 69-imut

Imm. 1-imut

Maalaarut allakkatigut tunniunneqassaaq, suullu maalaarutigineqarnersut erseqqissumik allan-

neqarsimassallutik. Maalaarut attartortitsisumi maalaarut pillugu suliap naammassineraniit kingusinnerpaamik sapaatit akunneri sisamat qaangiutsinnagit suliassanngortinneqassaaq kingusinnerpaamilli attartukkap atorunnaarsinneraniit kingusinnerpaamik qaammatit aqqaneq marluk qaangiutsinnagit.

Aalajangersakkami sukkasuumik kinguneqarluartumillu akerleriinnerit aaqqinneqarnissaat siunniunneqarpoq kiisalu suliat pisoqaavallaartut suliassanngortinneqarnissaat ajornarsisillugu.

Imm. 2-mut

Maalaarutip suliarineranut attartortoq akiliummik akiliuteqassaaq. Akiliut inatsimmi § 67, imm. 5 malillugu nalunaarummi Naalakkersuisunit aalajangersarneqassaaq. Attartortoq maalaarutigisamini ilaannakortumik imaluunniit tamakkiisumik ajugaaguni, imaluunniit suliaq suliassaanngitsutut nalilernerqarpat akiliut utertinneqassaaq. Akiliummik aaqqissuussinerup tunngavissaqanngitsunik maalaaruteqartarnerit pinngitsoortinniassavai, kisiannili suliat pisinnaatitaaffiusut Ineqarneq pillugu maalaaruteqartarfimmut maalaarutigineqarsinnaaneri allanngortinnagu.

Imm. 3-mut

Suliaq eqqartuussivinnut suliakkiissutigineqareersoq maalaaruteqartarfimmut suliakkiissutigineqarnissaa kissaatigineqarpat, maalaaruteqartarfik maalaarutip suliarinissaanut itigartississaaq. Tamatuma marloqiusamik suliarinninnissaaq pinngitsoortissavaa aamma attartortup maalaarutaanik allaffissornikkut misilinneqarnerata aamma eqqartuussivinni misilinneqarnerata akornanni erseqqissumik killiliisoqarnera qulakkeerlugu.

§ 70-imut

Imm. 1-imut

Maalaarut kingusinaartumik tunniunneqarpat imaluunniit maalaaruteqartarfimmi suliarinissaa tulluanngippat maalaaruteqartoq itigartinneqassaaq. Suliap maalaaruteqartarfimmi suliarineqarnissaanut naleqqunnersoq Ineqarneq pillugu maalaaruteqartarfimmi aalajangersimasumik naliliisoqarneranik tunngaveqassaaq.

Ineqarneq pillugu maalaaruteqartarfik allakkatigut saqqummiussisoqarnera tunngavigalugu aalajangiissaaq aamma illuatungeriit inatsisitigut inissisimaneranik sukkasuumik paasisaqarnissaaq siunertaralugu. Ineqarneq pillugu Maalaaruteqartarfik naliliippat suliaq pisariusuusooq allakkatigullu tunngaviusut sukkasuumik eqqortumillu aalajangiinissamut aalajangersimasumik tunngavissiiingippata suliarinissaata itigartinnissaa isumaliutigineqartariaqarpoq. Taamaaqataanik piviusutigut inatsisilerinikkulluunniit iluseqartut tunngaviusumik suliat itigartinneqarnissai isumaliutigineqartariaqarlutik eqqartuussivinnilu suliarineqarnissai siunertarineqarluni.

Maalaarutit misissorneqartariaqartut missiliorneqartariaqartullu imaluunniit illuatungerisat imaluunniit takunnissimasut nassuiaanissaat pisariaqarluni eqqartuussivinni suliarineqassap-

put.

Ineqarneq pillugu maalaaruteqartarfiup taamaallaat allakkatigut ilisimatitsissutigineqartunik sulianillu uppersarneqarsimasunik suliaqartarnissaa aalajangersakkami qulakkeerneqarpoq.

Imm. 2-mut

Maalaaruteqartarfiup maalaarut attartortup taparserneqarnissaa ilimanaateqanngitsutut isigisariaqartoq suliariumanngissinnaavaa. Maalaarutit tunngavissaqanngitsut allaffis-sornikkut immikkoortinnissaannut malittarisassaq periarfissiivoq.

Imm. 3-mut

Maalaaruteqartarfiup imm. 1-imi 2-milu aalajangigassanik taaneqartunik aalajangiinissamut allattoqarfik pinsinnaatissinnaavaa. Taamaalluni sulianik suliarinnittarneq pisariillis-arneqarluni. Piginnaatitsineq Ineqarneq pillugu maalaaruteqartarfiup tamarmiusumit nalun-aarutigineqassaaq aamma sulianik itigartinneqarsinnaasunik naammattumik allaaserinninneq aamma maalaarutit tiguneqartut misissornerisigut eqqarsaatigisassat suut isigineqassanersut tunngavigalugit.

Imm. 4-mut

Suliamik piareersaanermik siulittaasoq aqutsissaaq aamma illuatungerisaniit, oqartussaniit inuinnarnilluunniit paasissutissanik piumasaqarsinnaalluni. Siulittaasup ataatsimiititaliamut suliaassat innersuussutitalerlugit saqqummiutissavai. Piukkunnaateqartumik piareersarnissaq inatsisitigullu isumannaatsuunissaaq malittarisassami qulakkeerneqarpoq.

Imm. 5-imut

Suliap suliarisassanngortinneqarluni ilanngunneqarneraniit kingusinnerpaamik sapaatit akun-neri marluk qaangiunnerini maalaaruteqartarfiup allattoqarfiata suliapi illuatungiliuttoq suliaqartarnissaa pillugu ilisimatissavaa. Attartortitsisoq sapaatit akunneri pingasut qaangiutsinnagit tusarniaanermi akissuteqarnissamut periarfissaqarpoq. Maalaaruteqartar-fimmi suliarinninnermi tunngavilersuutit uppersaatillu ilisimanissaannik tunngaveqarneq aalajangersakkami qulakkeerneqarpoq.

Imm. 6-imut

Allattoqarfik siulittaasup apequtigisaanut illuatungerisat akissuteqarnissaannut sapaatit akun-neri pingasut tikillugit periarfissaqarnermik aalajangersaasinnaavoq. Immikkut pissutsit atuutsillugit piffissaliussa sivitorneqarsinnaavoq.

Allaffissornikkut suliarinninnermi pisariaqartutigut eqaassuseqarnissamik aalajangersagaq periarfissiivoq.

Imm. 7-imut

Siulittaasup nammineq inissiaq maalaarutigineqartoq arlaannaannulluunniit attuumas-suteqanngitsumik takuniarlugu misissuisinnaanissani noqqaassutigisinnaavaa. Illuatungeriit sivikinnerpaamik sapaatit akunneri marluk sioqqullugit aggersarneqartussaapput. Aningaas-

artuut Naalakkersuisunit akilerneqassapput. Piviusuni isumaqatigiinnginnerni kinaassuser-siunngitsumik uppersaasoqarnissaa malittarisassami qulakkeerneqarpoq. Kinaassuser-siunngitsumik misissuineq Ineqarneq pillugu Maalaaruteqartarfiup Siulittaasuanit isuma-gineqassaaq. Misissuineq pissutsinik piviusunik teknikikkulluunniit isumaqatigiinngis-sutaasunik aalajangersaanerunngilaq. Pissutsit taamatut ittut takusaqarnikkut missiliuinikkullu attartortitsisup attartortullu akornanni imaluunniit eqqartuussivimmiit nalunaarutigineqartunit aalajangiiffigineqassapput.

Imm. 8-mut

Suliami pineqarlutik ilaasut takkunnerminni maalaaruteqartarfimmut oqaaseqarlutik nas-suaateqarsinnaanngillat. Siunertaq tassaavoq maalaaruteqartarfimmi suliarinninneq allakka-tigut, allaffissornikkut suliarineratigut sukkasuumik eqqortumillu attartornermi inatsisitigut suliassanik assigiinngitsunik arlalinnik aaqqiinissap aalajangiussimanissaa.

§ 71-imut

Imm. 1-imut

Suliami paasissutissiinerit naammassineqarneriniit kingusinnerpaamik sapaatit akunneri sis-amat kingorna allattoqarfik suliami inatsisilerinikkut tunngavii piviusullu pillugit nas-suaasumik suliap saqqummiunnissaanut missingiummik suliaqassaaq kiisalu suliap aala-jangiiffiginissaanut siunnersuuteqarluni. Missingiut illuatungeriinnut tusarniutigalugu nas-siunneqassaaq tusarniaanermillu akissuteqarnissamut ullunik 14-inik periarfissiisoqarluni. Suliap suliarinissaanut piffissaliussanik erseqqissunik aalajangersagaq aalajangersaavoq am-masumillu pissuseqarnissaq qulakkeerneqarluni.

Imm. 2-mut

Illuatungerisaaq ataaseq piffissaaq eqqorlugu akissuteqanngippat, illuatungerisap suliamik saqqummiussinera maalaartarfimmit tunngavittut saqqummiunneqarsinnaavoq. Pisariittumik suliamik suliarinninnermut pisariaqanngitsumillu kinguarsaanerit pitsaaliornernut aala-jangersagaq ikorfartuivoq.

Imm. 3-mut

Nalinginnaasumik amerlanerussuteqarnissaaq maalaaruteqartarfik aalajangiissaaq. Taasiner-mi amerlaqatigiittoqartillugu siulittaasup taasinera aalajangiisuussaaq. Siulittaasoq sinniisus-saaluunniit kiisalu ikinnerpaamik ilaasortat marluk najuuppata maalaaruteqartarfik aala-jangiisinnaassuseqarpoq.

Imm. 4-mut

Aalajangiinerit allattaavinnut allanneqassapput akerliusoqanngitsumillu aalajangiisoqarsima-pat taasisimaneq allanneqassalluni. Ineqarneq pillugu maalaaruteqartarfimmi ilaasortat ataasiakkaat qanoq taasisimanerat allattaavimmut allanneqassapput. Maalaaruteqartarfimmi aalajangiinerit tumisiornissaat malittarisassami qulakkeerneqarpoq.

Imm. 5-imut

Aalajangiineq tunngavilersorneqarluni illuatungeriinnut allakkatigut nalunaarutigineqassaaq. Aalajangiineq tamarmiusunit akuerineqanngippat, isumaqatigiinnginnermut tunngavilersuut aamma taasinnermi qanoq agguataartoqarsimanersoq aalajangiinnermi allanneqassapput. Tam-atuma ammasumik pissuseqarneq inatsisitigullu isumannaatsuuneq pitsaanerulersippaa.

Imm. 6-imut

Aalajangiinerit attartortitsisumut aqutsisumullu avataaneersumut pituttuisutut sunniuteqarput. Aalajangiinerup inatsisitigut sunniuteqarnera atortussaalerteralu aalajangersakkami aalajangersarneqarpoq.

Imm. 7-imut

Aalajangiinerit illuatungeriinnut nalunaarutigineqarnerannit kingusinnerpaamik sapaatit akunneri arfinillit qaangiutsinnagit eqqartuussivinnut suliaakkiissutigineqarsinnaapput. Tunngaviumik inatsisitigut isumannaatsuunissamut tunngaviit naapertorlugit eqqartuussivinni misili-inissamut periarfissaqarneq aalajangersakkami qulakkeerneqarpoq. Eqqartuussivinnut suliaassanngortitsineq kinguartitsisinnaanngilaq aamma Ineqarneq pillugu Maalaaruteqartarfiup aalajangiinera atortuutinneqarsinnaalluni.

*§ 72-imut***Imm. 1-imut**

Inatsisartut inatsisaat 2027-imi januaarip aallaqqaataani atuutilerpoq. Pisortani inuinnarnilu attartortitsisartut inatsimmut nutaamut allaffeqarfistik, missingersuutitik isumaqatigiis-suteqarnikkullu pissutsit il.il. naammattumik piffissaqarlutik tulluarsaatinniarlugit piffissaq toqqarneqarpoq.

Imm. 2-mut

Inatsisip atulersinnerani Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq atorunnaarsinneqarpoq.

Imm. 3-mut

Ininik attartorneq pillugu Inatsisartut peqqussutaat atorunnaarsinneqartoq malillugu najoqqutassiat atulersinneqartut atuutiinnassapput Inatsisartut inatsisaat manna naapertorlugu malittarisassatigut allanngortinneqarnissaasa imaluunniit atorunnaarsinneqarnissaasa tungaanut.

Aalajangersakkami inatsisitigut ataqatigiinneq qulakkeerneqarpoq aamma malittarisassat pisoqqat nutaallu akornanni ikaarsaarnermi malittarisassaliornikkut atuuttoqannginnissaa pinngitsoortinneqarluni.

Atuutsitsilernerup nanginnerani inatsimmi oqartussaanermut aalajangersakkat naapertorlugit allaffissornikkut aalajangersakkat nutaat Naalakkersuisunit suliarineqassapput.

§ 73-imut

Imm. 1-imut

Attartortoq inuttut namminiussuseqarpat, attartorneq pillugu isumaqatigiissutit atuuttut Inatsisartut inatsisaat manna malillugu allannguutit ilanngullugit ingerlatiinnarneqassasut aalajangersakkami qulakkeerneqarpoq. Tamanna isumaqarpoq isumaqatigiissutit atuuttut isumaqatiginninniutigeqqinneqartariaqanngitsut.

Imm. 2-mut

Pujortarnerup inerteqqutaanera pillugu aalajangersakkat (§ 36, imm. 1, oqaaseqatigiit kingulliit) aamma pujorsuninnerup salinneqarnissaa (§ 60, imm. 2) Inatsisartut inatsisaata atutilernerata kingorna attartorneq pillugu isumaqatigiissutitut isumaqatigiissutigineqartunut taamaallaat atuutissapput.

Ilanngussaq 1**Tusarniaaneq pillugu allakkiaq**

1. Uunga siunnersuut Inissianik attartorneq pillugu Inatsisartut inatsisaat, tamanut ammasumik saqqummiunneqarpoq tusarniaanermut quppernermi, kalaallisut qallunaatullu, 6. marts 2026, apriliip 3-ani 2026-mi nal. 12:00 kingusinnerpaamik akissuteqarfissalerlugu.

Siunnersuut mail-ikkut 6. marsi 2026-mi ammasumik tusarniaassuutigineqarluni nassiussuunneqarpoq, tusarniaanermi akissuteqarnissamut 3. aprili 2026 nal. 12:00-imut piffissalerlugu, ukununngalu nassiunneqarpoq:

Nassitsivigineqartut:

Naalakkersuisut Siulittaasuata Naalakkersuisoqarfia (govsec@nanoq.gl)

Aningaasaqarnermut Akileraartarnermullu Naalakkersuisoqarfik (oed@nanoq.gl)

Inuussutissarsiornermut, Aatsitassanut, Nukissitunut, Inatsisit Atuutsinneqarnerannut Nali-giissitaanermullu Naalakkersuisoqarfik (isiin@nanoq.gl & asn@nanoq.gl)

Nunanut Allanut Ilisimatusarnermullu Naalakkersuisoqarfik (nap@nanoq.gl)

Ilinniartitaanermut, Kulturemut, Timersornermut Ilageeqarnermullu Naalakkersuisoqarfik (ikin@nanoq.gl)

Aalisarnermut, Piniarnermut, Nunalerinnermut Imminut Pilersornermullu Naalakkersuisoqarfik (apn@nanoq.gl)

Meeqqanut, Inuusuttunut Ilaqutariinnullu Naalakkersuisoqarfik (iian@nanoq.gl)

Isumaginninnermut, Suliffeqarnermut Nunamullu Namminermut Naalakkersuisoqarfik (isn@nanoq.gl)

Pinngortitamut, Avatangiisinullu Naalakkersuisoqarfik (pan@nanoq.gl)

Peqqissutsimut inunnullu Innarluutilinnut Naalakkersuisoqarfik (pn@nanoq.gl)

Avannaata Kommunia (avannaata@avannaata.gl)

Kommune Qeqertalik (qeqertalik@qeqertalik.gl)

Qeqqata Kommunia (qeqqata@qeqqata.gl)

Kommuneqarfik Sermersooq (kommuneqarfik@sermersooq.gl)

Kommune Kujalleq (kommune@kujalleq.gl)

Kalaallit Nunaanni naalagaaffiup sinniisua (ro@gl.stm.dk)

Ineqarneq pillugu Maalaaruteqartarfik – Atuisartoqarnermut

Unammilleqatigiinnermullu Aqutsisoqarfik (aua@nanoq.gl)

Nukissiorfiit (kundeservice@nukissiorfiit.gl)

Nusuka (nusuka2004@gmail.com)

Sulisitsisut (ga@ga.gl)

Kalaallit Nunaanni Politiit (grl-politi@politi.dk aamma grl-lesek@politi.dk)

SIK (sik@sik.gl)

PK-mi siulittaasoq (formanden@pk.gl)

Greenland Airports (info@airports.gl)

Asiaq (asiaq@asiaq.gl)
AK (aknuuk@ak.gl)
IMAK (imak@imak.gl)
NPK (info@npk.gl)
ASG (asg@asg.gl)
KANUNUPE (kanunupe@gmail.com)
INI A/S (ini@ini.gl)
Illuut A/S (info@illuut.gl)
Iserit A/S (iserit@iserit.gl)
GrønlandsBANKEN (banken@banken.gl)
Bankivik (nuuk@bankivik.gl)
Kalaallit Nunaanni Eqqartuussiviit (post@landsret.gl)
Lynges.gl (lynges@lynges.gl)
Igdlo.gl (info@igdlo.gl)
Netbolig.gl (kontakt@netbolig.gl)
Nykredit Realkredit A/S og Totalkredit A/S (sbry@nykredit.dk)
DLR Kredit (beb@dlr.dk)
Finanstilsynet (kah@ftnet.dk & cbmo@ftnet.dk)

2. Tusarniaanermut killigititap naanerani uku siunnersuummut oqaaseqaatissaqaratik nalu-naarput: Isumaginninnermut, Suliffeqarnermut Nunamullu Namminermut Naalakkersuisoqarfik, Nukissiorfiit kiisalu Finanstilsynet.

Piffissap tusarniaaffiusup naanerani Greenland Airports A/S, Iserit A/S, INI A/S, IMAK, Inu:IT Bolig A/S, Hotel Hans Egede A/S, SIK, Qarsoq Tegnastue ApS, Grønlandsbanken, Avannaata Kommunia, Sulisitsisut, TK-Group A/S, Grønlands Politi kiisalu BDO akissuteqaataat tiguneqarput.

Tulliuttuni tusarniaanermut akissuteqaatit sinneri issuarneqarput, taakkununga oqaaseqaateqartoqarluni. Tusarniaanermi akissuteqaatit Ineqarnermut, Attaveqaasersuutitut Isorliunerusunullu Naalakkersuisoqarfiup akissuteqaatai uingasumik allassimapput.

Greenland Airports A/S

Greenland Airports-ip inissianik attartortitsisarneq pillugu Inatsisartut inatsisissaattut siunnersuutip tusarniaassutigineqarnera, akissuteqarnissamut 3. aprili 2026-mut killilerneqartoq tiguaa. Greenland Airports-ip najoqqutassat misissorpai imaattunillu oqaaseqaatissaqarluni.

Greenland Airports-imiit maleruagassat atuuttut katersorneqarnissaat, aammalu Inatsisartut inatsisaannut ataatsinoortillugit nutarterneqarnissaat iluarisimaarneqarpoq. Inatsisit paasinarnerusut piffissamullu naleqqunnerusut attartortunut attartortitsisunullu ersarinnerulersitsinissamut iluaqutaassapput.

Tamatumunnga atatillugu Greenland Airports-imiit pissutsit pingasut ersarissaaffigineqarusupput.

1. Sulisunut inissiat inissianillu niueruteqarnerup ineriartornera

Kalaallit Nunaanni ullumikkut sulisussarsiortarnermi sulisunut inissiat pingaarutilimmik inissisimapput, pingaartumik pisortat immikkoortortaqaarfiini aamma suliffeqarfinni Namminersorlutik Oqartussanit pigineqartuni. Suliffeqarfippassuarnut inissiamik pissarsisinnaaneq sulisussanik, suminngaanneeraluarpataluunniit pissarsiornermi pisariaqartinneqarpoq.

Kisiannili taamatut najoqqutassaqaarnerup kingunerisaanik suliffeqarfiit inissianik attartortitsisutut annertuumik atuuttariaqarput. Tamanna pigisanut aningaasanik allaffissornikkullu isumalluutunut, suliffeqarfiit suliaasa pingaarnerit avataaniittunut pituttuiffiuvoq. Tamatuma peqatigisaanik sulisunut inissiat sulisitsisut akornanni unammillerfittut inississinnaapput.

Taamaattumik Greenland Airports isumaqarpoq, siunissami inissianik pilersuineq inissianik niueruteqarnerit allat aqqutigalugit annertunerusumik ingerlanneqarnissaat eqqarsaatigineqartariaqartoq, sulisitsisunik tunngaveqartumik inissianik aaqqiissutissat atornagit, tassungalu ilanngullugu immaqa namminersortut aqqutigineqarsinnaapput.

Taamatut ineriartortitsinerit iluaqutaasinnaapput:

- suliffeqarnermi nuttarsinnaanerup annertunerulerneranut
- pisortani namminersortunilu sulisitsisut akornanni unammilleqatigiinnerup naligiinnerulernerinut
- kiisalu Namminersorlutik Oqartussat suliffeqarfiini aningaasaatinik isumalluutinillu naleqqunnerusumik atuilernissamut

Taamaattumik Greenland Airports-imiit siunnersuutigineqarpoq, Naalakkersuisut siunissami ineqarnerup niuermik tunngaveqarnerulernissaa anguniarlugu sulisunut inissiat sulisitsisunik tunngaveqartut ikiliartuaartinnissaannut periarfissat misissoqqissaassagaat, soorlu nunami sumiiffinni illoqarfinnut tunngatillugu killilersuinikkut. Greenland Airports-imiit sumiiffiit ilaanni sulisunut inissiat suli pisariaqartinneqarsinnaammata eqqumaffigineqarpoq, tamatumali peqatigisaanik naliliisoqarpoq, najoqqutassamik, inissiat atorfeqarnermut atasarnerisa annikillisinneqarfiannik sulissuteqarnissaq naapertuutissasoq.

2. Utaqqiisaasumik inissiisarnerit

Inatsisissatut siunnersuummi siunnersuutigineqarpoq, sulisut utaqqiisaasumik inissinneqartarnerat allatulluunniit inissikkallarneqartarnerat Inatsisartut inatsisaannut ilaatinneqassanngitsut.

Greenland Airports-imiit taamatut killiliinissaq naapertuuttutut isumaqarfigineqarpoq, Kalaallit Nunaanni sulisussarsiormi nuttarnermilu utaqqiisaasumik inissiisarnerit akuttunngitsumik pisariaqartinneqartarmata.

Kisiannili oqaaseq “utaqqiisaasumik inissiisarneq”, taamatullu inissiinerup sivilissusissaannut tunngasut ersarinnerusumik erseqqissarneqarpata naleqqunnerpaassaaq. Tunngaviummik utaqqiisaasumik inissiineq assersuutigalugu suliassanut atorfinitsitsinernut, paarlakaaffiusumik aqqiissuussinernut imaluunniit nutaanik atorfinitsitsinermut atatinneqarsinnaapput, tassani piffissami sivikinnerusumi sivilissusissumiluunniit inissiamik ataavartumik najugaqarfissamik nassaartoqarnissaata tungaanut pisariaqartitsisinnaammat. Ersarinnerusumik killiliineq inatsisitigut inissisimanermut annerusumut allaffissornermilu ersarissutsimut iluaqutaasinnaavoq.

3. Pilersaarutaasumik aserfallatsaaliuineq

Inatsisissatut siunnersuut pisortat inissiaataanni pilersaarutaasumik piffissalikkamik aserfallatsaaliuinissamut aalajangersakkanik imaqarpoq.

Greenland Airports-imiit inissianik tulleriiaarnerusumik aserfallatsaaliuinissap sulissutigineqarnera ataatsimut isigalugu iluarisimaarneqarpoq. Tamatuma peqatigisaanik maleruagassat inissianut sulisitsisunik tunngaveqartunut imaluunniit utaqqiisaasumik inissiisarnermi aqqiissutissanut tunngatillugu allaffissornermut naleqqutinningsunik piimasaqaateqarnermik kinguneqannginnissaasa qulakkeerneqarnissaa naapertuutissaaq. Suliffeqarfinnut, inissianik aqutsinermik pingaarnertut suliaqanngitsunut pingaaruteqarpoq, maleruagassani aqqiissutissanik eqaatsunik sulinermilu atorsinnaasunik atuisinnaanermut periarfissaqarnerup ingerlannarnissaa.

Inaarutaasumik oqaaseqaatit

Ataatsimut isigalugu Greenland Airports isumaqarpoq, inatsisissatut siunnersuut Kalaallit Nunaanni attartortitsisarnermut inatsisinik nutarterinermi erseqqissaanermilu iluaqutaasussaasoq.

Matuma siuliani oqaaseqaatigineqartut tunngavigalugit Greenland Airports inatsisissatut siunnersuummut allanik oqaaseqaatissaqanngilaq.

Akissut:

Naalakkersuisoqarfiup oqaatigaa siunnersuummi § 5-imi Naalagaaffimmi, Namminersorlutik Oqartussani kommuninilu sulisunut utaqqiisaasumik inissiisarneq aammalu allatut utaqqiisaasumik inissiisarneq pineqartunut ilaatinneqartut. Allatigut inissiisarneq aallaaviatigut Inatsisartut inatsisaanni pineqartunut ilaavoq.

Tusarniaanermut akissuteqatip kingunerisaanik § 5-imut nassuiaatit erseqqissarneqarput, taamaalilluni ilaatitsinnginnermi Naalagaaffimmi, Namminersorlutik Oqartussani kommuninilu sulisunik utaqqiisaasumik inissiisarneq allatigullu utaqqiisaasumik ilusilimmik

inissiisarneq kisimik pineqartunut ilaasut aammalu allatigut inissiisarneq aallaaviatigut Inatsisartut inatsisaanni pineqartunut ilaasoq, erseqqissarneqarlutik.

Pilersaarutaasumik aserfallatsaaliuineq pillugu oqaaseqaatinut tunngatillugu oqaatigineqarpoq, inissianut Namminersorlutik Oqartussanit kommuniniillu pigineqartunut aammalu Inatsisartut inatsisaanni pineqartunut ilaasunut, siunnersuut sammitinneqartoq. Tusarniaanermut akissuteqaat inatsisissamut siunnersuummi allanngortitsinissamut pissutissaqalersitsinngilaq.

Iserit A/S

Inissianik attartorneq pillugu Inatsisartut inatsisissaattut siunnersuutip tusarniutigineqarnerani akissuteqarnissamut periarfissinneqarnerminut Iserit A/S qujavooq.

Inissianik attartorneq pillugu Inatsisartut inatsisissaattut (attartornermut inatsit nutaaq) siunnersuut, inissianik attartortitsisarnermi malittarisassanik nutarterinissamik aamma pisariillisaanissamik siunertaqarpoq, tamannalu attartortunut aamma attartortitsisunut iluaqutaassalluni. Taassuma saniatigut attartortunut, attartortitsisunut, inuiaqatigiinnullu iluaqutaasussamik inissiani aningaasaqarnermut, aserfallatsaaliuinnermilu pitsaassutsimut nukittorsaataasinnaasussanik imaqapoq.

Iserit A/S-ip siunnersuutit siornatigut nassiunnikuusaat, siunnersuummi ilaapput. Erseqqissumik ilaatigut § 26 pissutsinik marlunnik eqquisoq tikkuarneqarsinnaavoq: Qularnaveeqqusiissummik qaffaanikkut attartortut inissiap qimannerani aningaasartuutit qularnaveeqqusiissummit matussusersinnaalernerulissavaat. Taamaalilluni attartortut (inissiaq qimallugu nuuttut) artukkiisumik akiitsoqaratik ingerlariaqqissinnaassapput, soorluttaaq najugaqarfiit akiitsunik annaasaqarnissaat pinngitsoortinneqassasoq, taamaalillunilu aningaasat amerlanerusut aserfallatsaaliuinissamut immikkoortissinnaallugit.

Kiisalu § 59, inissiaq attartortittagaq attartortinneqarani uninngaannarnissaa pinagu inissiaq attartortittagaq piaarnerusumik attartorteqqissinnaatillugu, inissiap qimannissaani piffissap attartorfiusup naanerani iluarsartuussinerup pinissaanik anguniagaqartoq, taamaaliornikkullu minnerunngitsumik sumiiffinni inissianik amigaateqarfiusuni inissiat amerlariinngitsigisut pitsaannerusumik atorneqarnissaat qulakkeerneqassalluni. Attartortikkap inoqannginnerani annaasat ikilinerat, najugaqarfiit aningaasartuutaannut aamma annikillisitsissaaq, aningaasallu amerlanerusut aserfallatsaaliuinissamut atorneqarnissaat qulakkiissallugu.

Pingaartumik aamma pujortarneq pillugu § 36-mi aamma pujorsunninnermik tipaarsaanermut aningaasartuutit pillugit § 60-imi aalajangersakkat pissutsitigut (siunissami ungasinnerusumi inuit peqqissusaannut) aamma inissiat qimanneqarnerini aningaasartuutitut atatillugu najugaqarfiit aningaasaqarnerinut iluaqutaasussamik aningaasatigut pitsaasumik kinguneqarsinnaasut.

Ataatsimut isigalugu inatsisissatut siunnersuut – siunertarineqartutut – inissianik aaqqissuusseqqinnerup naammassineqarnissaanut, Kalaallit Nunaannilu attartortitsinermi inatsisitigut tunngaviup paasiuminernerunissaanut, ullutsinnut naleqqunnerunissaanut, ataqatigiinnerulernissaanullu qitiusutut isigineqarsinnaavoq.

Akissut:

Tusarniaanermut akissuteqaat siunnersuummi allanngortitsinissamut pissutissaqalersitsinnngilaq.

INI A/S

INI A/S naliliivoq, inatsisissatut siunnersuut ataatsimut isigalugu naleqquttoq, aammalu siunissamut pisariaqartoq, kisiannili immikkoortuni qitiusuni arlalinni paasiuminassuseq, innuttaasut naligiissumik pineqarnissaat allaffissornerullu assigiiaarnerusumik ingerlanneqarnissaa qulakkeerniarlugu ersarinnerusumik killiliinissaq taaguusiinissarlu pisariaqartoq.

INI A/S-ip paasisai malillugit matuma kinguliani oqaaseqaatit tunngaviusut inatsisissatut siunnersuummi sammineqarnissaat pingaarnarpaapput, aammalu inatsisiliornepup ingerlaqqinnerani siusissukkut inissittariaqarput, innuttaasut inatsisitigut inissisimanerannut ingerlatsiviullu eqqortumik pitsaasumillu atuutsitsilersinnaaneranut isumaqartussaammata.

- Taaguutit pillugit paragrafimik ilanngussisoqarnissaa inassutigaarput:

Inatsimmi taaguutit atorineqartut imatut isumaqarput:

- PISORTAT INISSIAATAAT tassaapput inissiat illuutiniittut, tamakkiisumik ilaannaasumilluunniit, toqqaannartumik toqqaannanngitsumilluunniit Namminersorlutik Oqartussanit kommuninilluunniit, imaluunniit inissiaatileqatigiiffinnit pigineqartut imaluunniit attartorneqartut, Namminersorlutik Oqartussat kommunilluunniit piginnittoqarneq apeqqutaatinnagu aalajangiisumik sunniuteqarfigisaat
- PISORTANIT ATTARTORTITSISOQ tassaavoq inissianik pisortat pigisaannik attartortitsisoq
- ILAQUTARIINNUT ARLALINNUT ILLUT tassaapput illut quleriinnik inissiatallit, illut uiguleriit illullu uigulukuttut, inissianik immikkoortunik ataqatigiinngorlugit sananeqartunik minnerpaamik pingasunik inissiatallit, teknikkikkut atortulersuutunik pingaarnernik ataatsimoortitsiffiusut

Inatsimmi oqaaseq “Namminersorlutik Oqartussat kommunillu inissiaataat attartortittakkat” atornagu oqaaseq toqqaannarnerusoq “Pisortat inissiaataat” atorineqassasoq, tassungalu

ilaatitsinnginnermi pisariaqartillugu, soorlu “Pisortat inissiaataat aningaasaatileqatigiiffimmit pigineqanngitsut” atorneqassaaq. Taamatuttaaq “Namminersorlutik Oqartussat kommunillu” “Pisortanit attartortitsisoq”-mik taarserneqassaaq. Taamaalilluni inatsit pingaarnertut pisortat inissiaataannut tamanut atuuttusoq, aammalu taamaallaat allassimasoqartillugu ilaatitsinnginneq atuutinngitsoq ersarissitinneqassaaq.

§ 2-mut, 9-mut aamma 10-mut oqaaseqaatini allassimavoq, inissianut Namminersorlutik Oqartussat/kommunit kisimiillutik pigisaannut innersuussinissamut maleruagassani assigiinngisitsisoqarsinnaasoq. Aamma inissiat soorlu Illuut-mit, Iserit-mit kommunilluunniit inissiaatileqatigiiffiit allanit pigineqartut taamaassapput. Tamatuma kingunerisaanik kikkulluunniit inissianik pisortat inissiaataannik naligiimmik pissarsisinaanannik eqqarsaateqarneq annikillisinneqartussaavoq, naligiimmillu pinninnissamik tunngaveqarneq piviusumik sanngiillisinneqartussaalluni. Tamannarpiaq inatsimmi siunertaava? Inissianut pisortat aningaasaliisimatillugit, tamanna unammillernartussaasutut isumaqarfiginarpoq.

Naalakkersuisut inatsimmik atuutsitsilernissami pingaarutilittut inissisimasussaapput, nassuiaanerit annertuut nalunaarutitigut malitseqartinneqartussaammata. Tamanna pitsaasusutut isumaqarfiginarpoq, suleriaatsit inatsimmik allannguinnissamut naleqqiullugu pisariinnerusumik atulertussaammata. Suliassaqarfimmi ingerlatsisut suliamut tassunga akuutinneqarnissaat INI-miit pingaartinneqarpoq, taamaalilluni nalunaarutini aqutsisut ulluinnarni atugassaannik eqqarsaatiginninneq qulakkeerneqartussaammat.

Qanoq ililluni najugaqartut oqartussaaqataanneranik qulakkeerisoqarniarnersoq itiliisoqarnissaa amigaatigaarput. Nalunaarummut malittaasussamut innersuussisoqarpoq, kisiannili siunertat periarfissallu allaaserineqarpata iluaqutaasinnaavoq. INI-miit meeqqat oqartussaaqataannerannut suliniutitsinnit misilittakkagut atorlugit tapiliussisinnaavugut.

Attartortut pequtunut sillimmasiisarnissaat inatsisitigut pisussaaffinngortinneqassasoq inassutigaaarput. Tamanna pinngippat inissiaatileqatigiiffik attartortut sinnerlugit matussutissat minnerpaaffissaannut sillimmasiisnaavoq, aningaasartuutillu ineqarnermut akiliutit aqutugalugit akilersinneqarsinnaallutik. Annertuumik ajoqusertoqartillugu inissiaatileqatigiiffiit sillimmasiissutaallu artorsartinneqarujussuutarput, taamatullu kommunit attartortut eqqugaasut inisseqqinniarnernut aningaasartuutit ilaannut matussusiisussaapput.

INI-p oqaaseqaatai inissianik attartortitsisarneq inatsisip nutaap tusarniaassutigineqarneranut, aningaasaqarnikkut aamma systeminut tunngasutigut kingunerisassai.

Inatsisissatut siunnersuut aalajangersakkanik arlalinnik, allaffissornikkut aqutsisunut aningaasaqarnikkut aamma systeminut tunngatillugu, taamaalillunilu inatsit naapertorlugu suliassanik atulersitsinermut annertuunik kinguneqarsinnaasunik imaqarpoq.

Matuma kinguliani oqaaseqaatini kingunerisassat taamaattut ersarissarneqarnissaat, taamaalillutillu inatsisissatut siunnersuutip, nalunaarutillu tassunga atasut suliarineqarnerisa ingerlateqqinneqarnerannut ilanngunneqarsinnaanissaat siunertarineqarpoq.

Aallarniutigalugu erseqqissaatigineqassaaq, akitsuutit akillu allat nalunaarutit aqqutigalugit maleruagassiuunneqartarnissaannut suleriaaseq nutaaq iluarisimaarneqarmat. Taamaalilluni taakku aningaasartuutitigut killiffiit malillugit ingerlaavartumik iluarsineqarsinnaassapput, tamanna aamma piviusunngortinneqarsinnaanersoq apeqqutaassalluni.

Matuma kinguliani oqaaseqaatit inatsisiliornermut teknikkimut tunngasumik allakkiami uteqqinneqarput, kisiannili allakkiami matumani paasinarsaanissaq eqqarsaatigalugu eqikkarneqarlutik.

Immikkoortuni eqqumaffigisassat, ineqarnermut suliassaqaarfimmi ingerlatsisunut attuumas-suteqartunut oqallisigineqartariaqartut ukuupput. Matumani taamaallaat inissianik aqutsinermut tunngasut pineqarput, inissiaqarfiit pineqaratik:

- Inissiaqarfinni kukkunersuiisoqarnissaanik piumasaqaat. Ingerlatsinermi immikkoortut missingersuutaannik suliaqartoqassaaq, kisiannili piginnittumut ataatsimoortumik naatsorsuutit suliarineqassallutik. Tamanna ataqatigiittutut isumaqarfigineqanngilaq, aammalu allaffissornikkut nammagassanik annertuunik nassataqartussaavoq. Maannarpiaq immikkoortortaqaarfinni naatsorsuutit kingumut qiviarluni misissorneqartarput, kukkunersuiinerpiaq suliarineqartarani. (§ 14). Allaffissornermi nammagassat annertusissutaat inissiaqarfinnit piginnittumiilluunniit akilernerqartussaapput. Siusinnerusukkut pisortani allaffissornerup annikinnerulernissaa politikikkut kissaateqartoqartoq saqqummiussisoqarsimavoq, tamannali siunnersuummi matumani malinneqarpasinngilaq.
- Allaffissornermut akiliutit ineqarnermut akiliutinut immikkoortutut ilaasussaapput, tamanna kingusinnerusukkut nalunaarut aqqutigalugu aalajangersaaffigineqarsinnaagaluarpalluunniit. Akiliutit ingerlaavartumik P/L-imut siumut naatsorsuinikkut, imaluunniit ukiumoortumik procenti aalajangersimasooq aqqutigalugu ingerlaavartumik iluarsineqartartussaapput. Pitsanngorsaaniarluni ingerlaavartumik suliniuteqaraluartoq, killissat minnerpaaffissaannik atuutsitsisoqarpoq. Aamma attartortut aqutsisullu akornanni nammineerluni ornigul-luni attaveqarsinnaanissamut periarfissaqartitsisoqarnissaa. (§18).
- Inissiamik piginnittup taarsigassarsisitsineratigut attartortitsisup igaffimmi uffarfimmiluunniit taarsersorneqarnissaanik piumasaqarsinnaanera pillugu siunnersuut atuutilissappat, tamanna aqutsisup allaffissornermut isumalluutaanik annertuunik

atuinermik kinguneqassaaq. Tamanna pissappat isumalluutit taarsigassarsianik aqutsisunut immikkut ittunik akiliuteqartitsinikkut matussuserneqartariaqarput. (§ 23).

- Qaammammi ullormi aningaaseriviup ammaffiani kingullermi ineqarnermut akiliutip akilernerqartarnera. Siusinnerusukkut inatsisissamik siunnersuuteqarnermut atatillugu uagutsinniinnaangitsoq, aammali aningaaserivinnit tamatuma allanngortinneqarsinnaanera ajornartoq allanneqarpoq. PBS aqutugalugu akiligassiisarneq unammillerfiusussaavoq, ulloq akiliiffissaq qaammatinik marlunnik sioqqutsilluni akiligassanngortitsisoqartarmat. Unammilligassap taassuma ilaa aamma attartortup aningaaseriviullu akornanniippoq.

Systeminut tunngatillugu aamma qaammatit marluk sioqqullugit akiligassanngortitsisarnissaq unammillerfiusussaavoq. Aamma attartortut attartorunnaarniarlutik kalerriisarnarat eqqarsaatigalugu ineqarnermut akiliutinut akiligassat nassiunneqareersut atorunnaarsinneqartartussaapput. Taamaalluni naatsorsuuserinermi nalunaarsuutit nassiunneqareersut assaannarmik utertinneqartartussaapput. Tamanna allaffissornermi suliatigut nammagassanngussaaq annertoq.

Siunnerfigineqartutut taamatut naleqqussaanermi ERP-systemit inatsimmut immikkut ittunik naleqqussarneqarneri ikinngitsunik aningaasartuuteqarfiusussaavoq. (§ 27).

Naggasiutigalugu INI A/S-imiit erseqqissaatigineqassaaq, pissutsit allaaserineqartut – naapertuuttumik iluarsineqanngikkunik – naggataagut aqutsinermut aningaasartuutinut, ineqarnermut akiliutit qaffasissusaannut aamma pisortaniit tapiiffigineqarnissamut pisariaqartitsinermut sunniuteqartussaammata. Tamanna pissutigalugu INI A/S naliliivoq, pissutsit taamaattut inatsisissap nalunaarutillu suliarineqarnerisa ingerlaqqinnerini ilanngunneqartariaqarput.

Akissut:

Nalinginnaasumik nassuiaassutinut aalajangersakkamik ikkussinissaq pillugu siunnersuummut tunngatillugu oqaatigineqarpoq, siunnersuut inatsisiliortaatsimi suleriaatsimut nalinginnaasumut naapertuuttumik aaqqissugaasoq, tassani taaguutit sapinngisamik aalajangersakkanut ataasiakkaanut atatillugu aalajangersarneqartarlutik.

Taaguutit "Namminersorlutik Oqartussat kommunillu inissiaataat attartortittakkat" taaguutillu taamaaqataasa atornerqarneranni suliassa qarfiimmi maleruagassiineq atuuttoq pissusiviusunilu aaqqissuussineq takuneqarsinnaapput. Siunnersuummi § 1, imm. 3-mi Inatsisartut inatsisaata atuuffia erseqqissarneqarpoq, Namminersorlutik Oqartussat kommunillu inissiaataat attartortittakkat nassuiarneqarnerisigut. Attartorneq pillugu inatsit malillugu Namminersorlutik Oqartussat kommunillu inissiaataattut attartortittakkatut paasineqassapput inissiat attartortittakkat

Namminersorlutik Oqartussanit imaluunniit kommunimit toqqaannartumik pigineqartut. Inissiat attartortittakkat assersuutigalugu Ejendomsaktieselskabet Illuut A/S-imit, Iserit A/S-imit aamma Avannaa Development A/S-imit pigineqartut attartorneq pillugu inatsit malillugu namminersortunit pigineqartutut inissiatut attartortittakkatut isigineqarput.

Innersuussisarnermut maleruagassat naligiissitsinerlu pillugit oqaaseqaatinut tunngatillugu oqaatigineqarpoq, inissiat attartortittakkat assigiinngitsunik piginnittoqarsinnaanerit ingerlanneqarsinnaanerallu inatsisissamut siunnersuummi takuneqarsinnaasoq. Tamanna tunngavigalugu siunnersuut ilaatigut Namminersorlutik Oqartussat kommunillu inissiaataannut attartortittakkanut innersuussisarneq pillugu aalajangersakkanik immikkoortunik imaqarpoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Naalakkersuisut piginnaatitaaneri aamma nalunaarutini atuutilersitsisarnerat pillugit oqaaseqaatinut tunngatillugu oqaatigineqarpoq, suliaasaqarfimmi eqaatsumik allaffissornikkullu naleqquttumik maleruagassiinissap qulakkeerneqarnissaa, piginnaatitsissutini siunertaasoq. Taamaassappat erseqqinnerusumik atorneqarnera nalunaarummi pisussaavoq. Nalunaarutit tamarmik tusarniaassutigineqartarput, taamatullu nalunaarutit allaffissornikkut aquneqarnissaat pillugu suliaasaqarfimmi ingerlatsisut oqaloqatigineqartarlutik. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Najugaqartut oqartussaaqataanerat pillugu oqaaseqaatit pillugit oqaatigineqarpoq, tamanna pillugu maleruagassanik erseqqinnerusumik aalajangersaanissamut inatsimmi tunngavissamik aalajangersaasoqareermat. Erseqqinnerusumik atorneqarnissaa nalunaarummi pisussaavoq. Oqaaseqaat siunnersuummi allanngortitsinissamut pissutissaqalersitsinngilaq.

Pequtitut sillimmasiisussaataaannissaq pillugu siunnersuummut tunngatillugu oqaatigineqarpoq, tamanna siunnersuummi maleruagassiivigineqartussat avataanniittoq. Attartortitsisup aamma attartortup illumut ikualattoornissamullu sillimmasiissutaa attartortup pequtaannut akisussaaffimmut tunngassuteqaanngilaq. Oqaaseqaat siunnersuummi allanngortitsinissamut pissutissaqalersitsinngilaq.

Inissianik allaffissornikkut aqutsisunut aningaasaqarnikkut periaatsitigullu sunniutaasussat pillugit oqaaseqaatinut allassimasunut tunngatillugu oqaatigineqarpoq, siunnersuummi attartornermut tunngasunut pingaarnertigut inatsisitigut sinaakkutissat aalajangersarneqartut. Allaffissornermut ingerlatsinermullu tunngasut erseqqinnerusut, ilanngullugit allaffissornikkut aqutsinerup aqqissuunneqarnera, periaatsinik tunngavissiineq isumalluutinillu atuineq, sinaakkutissiisutigineqartut iluanni attartortitsisup allaffissornikkullu aqutsisup akisussaaffiisa ataaniipput. Ataasiakkaatigut siunnersuummi

aralinnik allannhortitsisoqarpoq, iluarsisoqarpoq erseqqissaasoqarlunilu. Tusarniaanermut akissuteqaat allatigut siunnersuummi allannhortitsinissamut pissutissaqalersitsinngilaq.

Missingersuutit, naatsorsuutit kukkunersiuinerlu pillugit oqaaseqaatit pillugit oqaatigineqarpoq, siunnersuut allannhortinneqartoq, taamaalilluni Namminersorlutik Oqartussat kommunillu inissiaataannut attartortittakkanut ukiumoortumik nalunaarusiaq tamarmiusoq Namminersorlutik Oqartussat kommunillu kukkunersuiisuanit avataaneersumit misissorneqartassalluni (review). Namminersorlutik Oqartussat kommunillu inissiaataannik attartortittakkannik attartortitsineq il.il. allaffissornikkut aqutsisumit avataaneersumit isumagineqarsimappat, allaffissornikkut aqutsisup kukkunersuiisuata kukkunersuineq suliarisussaavaa. Naalakkersuisut aningaasaatit aqutsiviginissaat, missingersuutit, naatsorsuutit ukiumoortumillu nalunaarusiap aaqqissuunnissaat kiisalu kukkunersuiisup avataaneersup kukkunersuiisarnera pillugit maleruagassanik aalajangersaanissamut Naalakkersuisunut piginnaatitsissut, siunnersuummi § 15-imi imm. 3-tut ilanngunneqarpoq.

Allaffissornermut akiliut pillugu oqaaseqaammut tunngatillugu oqaatigineqarpoq, inissiani attartortittakkanik ingerlatsinermut aningaasartuutit ineqarnermut akiliummit matussuserneqarsinnaasut aammalu aningaasartuutit sorliit ingerlatsinermut aningaasartuutit naatsorsorneranni ilanngunneqarsinnaanersut pillugu maleruagassanik erseqqinnerusunik Naalakkersuisut aalajangersaasinnaasut, siunnersuummi aalajangersarneqartoq. Allaffissornermut akiliut ingerlatsinermut aningaasartuutit ilaattut ilaatinneqartoq, siunnersuummi § 18, imm. 1-imi tassungalu nassuiaatini erseqqissarneqarpoq. Ingerlatsinermut aningaasartuutit erseqqinnerusumik killissalernerneqarnerat pillugu apeqquut allatigut siunnersuutip atuutsinneqarnissaanik suliaqarnerup ingerlaqqinneranut ilaatinneqassaaq.

§ 23 pillugu oqaaseqaatit pillugit oqaatigineqarpoq, aaqqissuussinermut pingaarnertigut killissaliussat inatsisissamut siunnersuummi aalajangersarneqartut, ilanngullugu missinersuutip ineqarnermullu akiliummut tapiliussap attartortumit allaganngorlugu akuersissuteqarfigineqarnissaa piniarneqassasoq aammalu taarsigassarsiat, ernialersuineq, akilersuineq attartortullu akiliutai pillugit maleruagassanik erseqqinnerusunik Naalakkersuisut aalajangersaassasut. Naalakkersuisut taarsigassarsiat piffissami akilersorneqarfissaanni allaffissornermut akiliut pillugu maleruagassanik aalajangersaasinnaasut, siunnersuummi § 23, imm. 4-mi tassungalu nassuiaatini erseqqissarneqarpoq. Tusarniaanermut akissuteqaat allatigut siunnersuummi allannhortitsinissamut pissutissaqalersitsinngilaq.

Siunnersuummi § 27-mi piffissaq akiliiffiusussaq pillugu oqaaseqaatinut tunngatillugu oqaatigineqarpoq, ineqarnermut akiliut, imeqarnek kiassarnerlu qaammatip akiliinermi pineqartup siuliani qaammammi aningaaseriviup ammaffia ulloq kingulleq akilernerneqassasut pillugu inatsisit atuuttut aalajangersakkami ingerlateqqinneqartut. Allatut piffissamik akiliiffissamik isumaqatigiissuteqarnissamut attartornissamut isumaqatigiissummi

periarfissaqalersillugu, siunnersuummi § 27 allatigut ilusilersorneqarpoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Inatsisartut inatsisaanni suliffeqarfiit attartortutut pineqartunut ilaanagerat pillugu oqaaseqaatinut tunngatillugu oqaatigineqarpoq, tusarniaanermut akissuteqaatit tiguneqartut ataatsimoortumik nalilersorneqarnerat tunngavigalugu inatsisissanut siunnersuut allanngortinneqartoq. Siunnersuut allanngortinneqarpoq, taamaalillunilu nammineq inissiaatit attartortittakkat pillugit isumaqatigiissutit, attartortuulluni pisinnaatitaasoq pisussaataitaasorlu (nalinginnaasumik inuussutissarsiornermut attartornissamut isumaqatigiissutit), maannamut pisartutut nalinginnaasumik siunnersuummi pineqartunut ilaatinneqaratik.

Qarasaasiatigut attaveqaqatigiinneq pillugu oqaaseqaatinut tunngatillugu oqaatigineqarpoq, Pisortani Digitalimik Allakkerineq pillugu maleruagassanut naapertuuttumik nalunaarutit qarasaasiatigut nassiunneqarsinnaasut, peqatigisaanillu inuit pisussaaqjunnaarsinneqarsimasut qarasaasiatigut attaveqaqatigiinnissamik pisussaaqfilarneqarsinnaanatik. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

IMAK

Inatsisissatut siunnersuut nalinginnaasunik nassuiaatitalik IMAK-ip misissorpaa, aallarniutigalugulu oqaatigiumallugu ataatsimut isigalugu malittarisassat atuuttut nutarterneqarnissaannik, ataatsimoortinneqarnissaannillu pisariaqartitsineq siunnersuutip kingunerimmagu.

Inatsisip paasiuminarsarneqarnera, ullutsinnullu naleqqussarneqarnera pitsaavoq, tamannalu attartortunut, attartortitsisunullu paasiuminarnerunissaanut aamma siumut nalunangereernerunissaanut tapersiisinnaalluni. Taassuma saniatigut inissiaatit pilersaarutaasumik aserfallatsaalineqartarnissaannut ersarissunik sinaakkutissiisoqarnera pitsaasutut nalilerneqarpoq. Tamanna inissiat pitsaassusaannut, ataatsimullu isigalugu inissiat qanoq issusaannut siunissami ungasinnerusumi iluaqutaasinnaavoq.

Pilersaarutaasumik aserfallatsaaliunissamik aaqqiissut sunniuteqarluartutut nalilerneqaraluartoq, ilaasortatsinnut kingunissai eqqarsaatigalugit inatsisissatut siunnersuut ilaatigut ernumalersitsivoq.

Siullertut ineqarnermut akiliutinik iluarsiiinissamut periarfissat annertusineri kiisalu ineqarnermut akiliutit aqutigalugit aserfallatsaaliuinissap aningaasalersorneqarnissaa attartortut ineqarnermut aningaasartuutaannut annertusaataasinnaapput. Tamanna inoqutigiinnut pingaartumik aningaasaatikitsinut sunniuteqarsinnaavoq. Kalaallit Nunaanni inuuniarnek akisummat, ilaasortarpassuagut aningaasatigut unammillernartumik

inissisimareerput. Tamanna pillugu attartortunut pitsaanerusumik atugassaqartitsinissamik qulakkeerisumik, ulluinnaallu aningaasaqarnikkut oqinnerulersillugit naleqqussaasoqartariaqarpoq.

Taassuma saniatigut attartortut nutarterisoqarnissaanik noqqaasinnaassasut anguniarneqarpoq, aningaasartuutilli ineqarnermut akiliutitut tapernikkut aningaasalersorneqassallutik. Pisortat inissiaataasa nutarterneqarneritut aningaasartuutit tamaasa attartortut namminneerlutik matussusiinissaat IMAK-ip apeqquuserpaa, ilutigisaanillu inissiani attartortittakkani ineqarnermut akiliutit qaffaanissaq pillugu § 37 naapertorlugu apeqquummut 2025-222-mut Isumaginninnermut, Suliffeqarnermut, Ineqarnermut, Attaveqaasersuutitut, Isorliunerusunullu Naalakkersuisup Aqqaluaq B. Egedep 2026-mi januaarip 19-iani akissutaa naapertorlugu, ukiut 15-it ingerlanerini ineqarnermut akiliutit ukiumut 3,8 %-it missaannik naleqqussaasarnissaq pilersaarutigineqarluni. Qaavatigut akiliutit taakkua allaffissornermut, Namminersorlutik Oqartussanut imaluunniit siunertanut allanut atorineqassanersut erseqqissumik allassimanngilaq.

Aappaattut atorfeqarunnaarnermi atorfimmut atatillugu inissiap atorunnaartarnissaa pillugu malittarisassat atorfilinnut, atorfimminnut atatillugu inissiamik pisariaqartitsisunut nalornilersitsisinnaapput. Tamanna inuiaqatigiinnut, sulilersitsinissanullu kinguneqarsinnaavoq.

Tamanna tunuliaqutaralugu taamatut pisoqartillugu toqqissisimanerunissap anguniarneqartariaqarnera ersarisassallugu pingaartutut isigaarput, matumani atorfimmut atatillugu inissianut ersarinnerusunik, patajaannerusunillu sinaakkuteqartitsinissap qulakkeerneratigut.

Inaarutaasumik nalilernerqarpoq, inatsisissatut siunnersuutip nutarterneqarnera aamma malittarisassat atuuttut ataatsimoortinneqarnerat siunissami ungasinnerusumi inissiat pitsaassusaannut, ataatsimullu isigalugu qanoq issusaannut iluaqutaasinnaasoq. Taamaakkaluartoq unammillernartut taaneqartut eqqarsaatigineqarnissaat pingaaruteqarpoq, taamaalilluni nutarterinerup aamma attartortut eqqarsaatigineqarnerisa oqimaqatigiissinneqarnerat atatiinnarneqarniassammat.

Akissut:

Ineqarnermut akiliutit iluarsisarneq aserfallatsaaliuinerullu aningaasalersorneqarnera pillugit oqaaseqaatinut tunngatillugu oqaatigineqarpoq, inatsisissamut siunnersuummi Namminersorlutik Oqartussat kommunillu inissiaataanni attartortittakkani ineqarnermut akiliutit aalajangersarnissaanut pingaarnertigut killissaliussat aalajangersarneqartut. Inatsisissamut siunnersuummi § 18 naapertorlugu ingerlatsinermi immikkoortumi inissianut attartortittakkanut ineqarnermut akiliut tamarmiuseq, inissianik attartortittakkanik ingerlatsinermut aningaasartuutitut, aserfallatsaaliuinermut illuartitsinernut, aningaasaliissutitut iluanaarutitut kiisalu atuisartunut akigititanut naleqqersuut atorlugu iluarsiinernut matussusiinnaasumik aningaasartaqartinneranit annertuneroqqusaanngitsoq.

UKA 2026/242

IAIUN - Suliap nr. 2025-5614

Aammattaaq § 19 naapertorlugu inissiaatini attartortakkani tamani pilersaarutaasumik piffissakkaartumik aserfallatsaaliuinissamut pilersaarut nutartigaq pigineqartussaavoq, aammalu aserfallatsaaliuineranut ingerlaavartumik illuartitat tamanna tunngavigalugu naatsorsorneqartussaallutik.

Aammattaaq oqaatigineqarpoq, siunnersuut ineqarnermut suliassaqaarfimmi aaqqissuusseqqinnissaq pillugu politikikkut isumaqatigiisummi ilaasunut ilaammat. Tassani allassimavoq, pisortat inissiaataanni attartortittakkani ineqarnermut akiliut aammalu qularnaveeqqut ingerlatsineranut aserfallatsaaliuinerumullu pissusiviusuni aningaasartuutitut naapertuutissasut, ineqarnermut akiliutip pisariaqartumik naleqqussarnerqarneri arriitsumik atuutsikkiartuaartinneqassasut, taamaalilluni attartortut aningaasaqarnerat pillugu toqqissisimatitsisoqassalluni aammalu innuttaasut atorsinnaasaminnik aningaasaatikitsut ineqarnermut tapiissutitut aaqqissuussinerup naleqqussarneratigut ikiorserneqassasut.

Attartortup igaffimmik, perusersartarfimmik uffarfimmillu taarsersuinissamik qinnuiginninnissamut periarfissaqarnera pillugu oqaaseqaatinut tunngatillugu oqaatigineqarpoq, attartortut pisortat inissiaataasa nalinginnaasumik aserfallatsaaliorneqarnissaannut ataatsimut isigalugu aningaasartuuteqartinneqarnissaannik § 23-mi aaqqissuussineq kinguneqartussaannigisoq. Kisiannili aalajangersagaq aaqqissuussaavoq immikkut ittoq, tassani attartortup illup sannai taaneqartut taarsersorneqassasut piumasarisinnaallugu, aammalu attartortup aningaasartuutissanut missingersuut, taassumalu malitsigisaanik ineqarnermut akiliummut tapiliussassaq, sioqqutsisumik allaganngorlugu akuerisimassagaa tunngavissaatinneqarluni.

Taamaalilluni siunnersuut malillugu inissiaatit nalinginnaasumik pilersaarutaasumik aserfallatsaaliorneqartarnerat aammalu attartortup aalajangersimasunik taarsersuinissamik piumasaqarsinnaanera, aaqqissuussinerit assigiinngillat aammalu ilusiliaq assigiit malillugu aningaasalersorneqartaratik.

Sulisunut inissiat pillugit oqaaseqaatinut tunngatillugu oqaatigineqarpoq, Namminersorlutik Oqartussani kommuninilu sulisunut inissianik inniminniisarneq, innersuussisarneq atorunnaarsitsisarnerlu pillugit maleruagassanik kiisalu sulisunut inissiap innersuunneqartup inissiatut attartortittakkatut nalinginnaasutut tiguneqarnissaanut periarfissaqarneq atugassarititaasullu pillugit maleruagassanik Naalakkersuisut aalajangersaasinnaasut, takuuk § 11.

Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Hotel Hans Egede

Matumuuna illuutileqatigiiffiit Nuummi ingerlataqartut sinnerlugit inissianik attartortitsisarneq pillugu Inatsisartut inatsisaannut siunnersuut pillugu tusarniaanermut

UKA 2026/242

IAIUN - Suliap nr. 2025-5614

akissuteqarpugut. Ingerlatseqatigiiffiit inuussutissarsiornermi illuutini ineriartortitsisarput, sanaartortarput attartortitsisarlutillu aammalu namminersorluni inissiamik pilersuineri annertuumik ilaallutik.

Attartortitsisarnermut inatsisip nutarterneqarnissaa ataatsimoortunngortinneqarnissaalu pillugit siunertaasut akueraagut tapersorsorlugillu. Inissianut niuerfiup ingerlalluarnissaanut ersarissunik paasiuminartunillu maleruagassaqarnissaq pisariaqarpoq. Kisianni naliliinerput malillugu inatsisissamut siunnersuut maannakkut ilusimisut iluseqarluni tunngaviusumik aaqqissugaanikkut anigorniagassanik arlalinnik imaqarpoq, aningaasaliinernut, inissianik neqeroorutitut niuerfiullu ingerlanneqarneranut annertuumik sunniuteqarnerluttussanik.

Matumani pingaarnert saqqummiutissavagut.

1. Inissiat illersorneqarnerat inuussutissarsiuuteqarnerullu akuleriitsinneqarnerat

Inatsisissamut siunnersuummi atuuffissaa aamma suliffeqarfiit attartortutut ilaativerlugit annertusitinneqarpoq. Taamaaliornermi inuussutissarsiuutigalugu ingerlatsisut akornanni isumaqatigiissutit inissianut attartortittakkanut nalinginnaasunut maleruagassat assinginik maleruagassaqartinneqalerput.

Tamanna naliliinerput malillugu tunngaviusumik periaatsimi kukkuneruvoq.

Attartortitsisarnermut inatsimmi siunertaavoq sanngiinnerusunik – attartortumik inuinnarmik – illersuinissaq. Mianerisassaq taanna inuussutissarsiuutigalugu ingerlatsisut akornanni isumaqatigiissuteqarnermi atuutinngilaq.

Kingunerluutigisinnasai:

- Suliffeqarfiit attartortutut attartortunut inuinnarnut sanilliunneqarnissaat pillugu aalajangersakkat peerneqartariaqaralarput.
- Inuussutissarsiornermi attartornermut tunngasut naapertuutinngitsumik maleruagassiivigineqarput
- Aaqqiissutissat niuerfimmi aallaaveqartut, ilanngullugit sulisunut inissiat, ajornakusoornerulissapput imaluunniit ajornarsivissallutik

Inassuteqaat:

- Suliffeqarfiit attartortutut attartortunut inuinnarnut sanilliunneqarnissaat pillugu aalajangersakkat peerneqartariaqaralarput
- Taamaanngippat inuussutissarsiornermi attartortitsisarnermut immikkut maleruagassanik atuutsitsilertoqartariaqaralarpoq

2. Erniortitsineriut ilusiliaq aamma ineqarneriut akiliummut aalajangersaasarneq (§ 24)

Attartornermut akiliummut aningaasartuutinit aalajangigaasumut ilusiliaq
siunnersuutigineqartoq annertuunik aaqqissuussaannikkut sanngiiffinnik imaqarpoq

Ilusiliaq:

- oqaluttuarisaanermi annertussutsit aallaavigineqarput, tassunga ilanngullugit pisinermi akigititaq aammalu aningaasalersueqqaarneq
- piffissap ingerlanerani allannguutit sillimaffigineqanngillat
- nassuiaanerani annertuunik nalorninartoqarpoq

Tamassuma malitsigissavai:

- ineqarnermut akiliut pigisap pissusiviusuni nalinganut naapertuutinngitsoq
- inissiani assingusuni aningaasalersuinerup ilusiligaanera apeqqutaalluni ineqarnermut akiliut assigiinngitsorujussuusinnaasoq
- aningaasaliisut aningaasanik erniortitsinissaq takorloorsinnaanngikkaat, taamaalillutillu isumatusaartumik aningaasaliinissanut aalajangiisinaanatik

Innersuunneqarpoq:

- § 24 annertuumik iluarsineqartariaqaraluarpoq
- Taamaanngippat aalajangersagaq inuussutissarsiornermi attartortitsisarnermut tunngasuni atuutinngitsinneqartariaqaraluarpoq
- Ilusiliamik atuutsitsilertoqartariaqaraluarpoq makkuninnga aallaaveqartumik:
 - o Maannakkut nalinga
 - o Maannakkut aningaasalersuinerup tunngasut
 - o Erniortitsinermut tunngaviusoq ersarissoq takorlooruminartorlu

3. Maleruagassiinerup ineriartortuartussaannginnera

Inatsisissamut siunnersuummi illuummi aningaasaliinerni aningaasaqarnikkut pissusiviusut sillimaffigineqanngillat, tassani tunngavigisat qitiusut ingerlaavartumik allanngortarput:

- erniat aamma aningaasalersuinerup aningaasartuutit
- akilersuinerup ilusiligaanera namminerlu aningaasaatit
- aningaasat naleerukkiartornerat aamma illuliornerup aningaasartuutit
- pissarsiareqqinnerani nalinga

Tamatuma kingunerisaanik suliassami aningaasaqarneq oqaluttuarisaaneq tunngavigalugu maleruagassiinerup pissusiviusuni nikeriarsinnaajunnaarsinneqarpoq.

Sunniutaasussat:

- Erniortitsineq piffissap ingerlanerani sanngiillisinneqassaaq
- Aningaasaliisup annaasaqarsinnaanera malunnaatilimmik annertusitinneqassaaq
- Suliassanut nutaanut aningaasalersuineq ajornakusuulersinneqassaaq

Inassuteqaat:

- Maannakkut pissutsit tunngavigalugit attartornermut akiliutip ingerlaavartumik naatsor-soqqittarnissaa inatsimmi periarfissiisutigineqartariaqaraluarpoq
- Taamaangippat maleruagassiineq manna inuussutissarsiornermut tunngasuni atuutsinneqartariaqanngikkaluarpoq

4. Nalikilliliinerit piffissarlu atuuffissaat

Inatsississamut siunnersuummi nalikilliliinerit Kalaallit Nunaanni pissusiviusuni pissutsit tak-uneqarsinnaalerlugit iliuuseqarfigineqanngillat.

Kalaallit Nunaanni illut ukiuni 30-50-ini atorneqarsinnaanerit nalinginnaasuvoq.

Pivusorsiorlumik nalikilliliinissamut periarfissaqanngippat:

- aningaasaleeqqinnissamut naammattunik aningaasaatinik katersisoqartanngilaq
- nutaanik illuliornissamut kajumissuseqarneq ajornerulersinneqarpoq
- aningaasaqarnermi nammagassat attartortitsisumut tutsinneqarput

Inassuteqaat:

- Nalikilliliinerit ineqarnermut akiliutip aalajangersarneqarnerani qitiusunut ilaasussatut akuerineqartariaqaraluarput
- Taamaangippat maleruagassiineri taakkua naatsorsuineri ilaatinnessaannut periarfissaq killilerneqartariaqanngikkaluarpoq

5. Atorunnaarsitsisinnaanerp maleruagassiinerullu killeqarnerat

Inatsississamut siunnersuutip kingunerisaanik attartornermik atorunnaarsitsinissamut maleruagassiinissamullu periarfissat killeqartorujussuupput. Tamanna pingaartumik makkunani ajornartorsiutaavoq:

- inuussutissarsiornermi attartortitsineq
- sulisunut inissiat
- suliassat ineriartortitassat

Sunniutaasussat:

- Attartortitsisut naapertuutinngitsumik annaasaqarsinnaanermik pisussaaffeqalissapput
- Niuerfimmi eqaatsuutitsineq annikillisinneqassaaq
- Aningaasaatit naapertuutinngitsumik attartukkami pituttorneqassapput

Inassuteqaat:

- Atorunnaarsitsinissamut killilersuinerit pillugit maleruagassat inuussutissarsiornermut tunngasuni atuuttariaqanngikkaluarput
- Taamaangippat inuussutissarsiutigalugu ingerlatsisut akornanni isumaqatigiissuteqarnermi kiffaanngissuseqarneq atuutsinneqalertariaqaraluarpoq

6. Suleqatigiit pingasuutillugit inatsisini ersarinngitsut

UKA 2026/242

IAIUN - Suliap nr. 2025-5614

Inatsisissamut siunnersuummi pisut makkua naammattumik erseqqissarneqanngillat:

- attartortitsisup suliffeqarfimmut attartortitsinerani
- suliffeqarfiup sulisumut inissiamik atugassiinerani

Tamanna inatsisini aaqqissuussaanermi paasiuminaallisitsivoq.

Sunniutaasussat:

- Najugaqartup isumaqatigiissuteqarani pisinnaatitaaffeqalernissaa aarlerinaateqarpoq
- Atorunnaarsitsinissaq atugassiisarnertu pillugit nalorninartoqarnera
- Isumaqatigiinngilersinnaanerit

Inassuteqaat:

- Pisinnaatitaaffinni attartornermut tunngasut isumaqatigiissutigineqartut malinneqassasut erseqqissarneqartariaqaraluarpoq
- Taamaangippat pissutsit taamaattut attartortitsisarnermut inatsimmi ilaatinneqanngittariaqaraluarput

7. Inuiaqatigiit aningaasaqarnerannut sunniutaasussat

Inatsisissamut siunnersuummi ataatsimut isigalugu aarlerinaataapput:

- inissialiornermut namminersortut aningaasaliinerisa annikillinissaat
- aningaasalersuinerup ajornakusuulersinneqarnissaa
- inissiani neqeroorutigineqartuni eqaatsuutitsinnginnerulernissaq
- pisortat inissiaataanni tatisimanninnerulernissaq

Tamanna pingaartumik ajornartorsiutaavoq inissaaleqinerup atuuttup inissisimanerani aammalu inuussutissarsiutinik ineriartortitsinerup attaveqaasersuutinullu suliassat malitsigisaannik pisariaqartitsinerup annertusiartornerani.

Inassuteqaatit ataatsimoortut

Attartortunik illersuinerup aningaasaliinermullu atugassarititaasut oqimaqatigiinnissaat qulakkeerniarlugu inatsisissamut siunnersuut annertuumik iluarsineqartariaqaraluarpoq.

Pingaartumik inassutigineqarput:

- Suliffeqarfiit attartortutut ilaatinneqarnissaat pillugu aalajangersakkat peerneqassasut imaluunniit annertuumik killilerneqassasut
- § 24 tunngaviusumik iluarsineqassasoq imaluunniit inuussutissarsiornermut tunngasut ilaatinneqassanngitsut
- Inissianik inuussutissarsiornermilu attartortitsinerup akornanni ersarissumik assigiinngisitaartitsinissaq qulakkeerneqassasoq
- Ineqarnermut akiliutip aalajangersarneqartarneranut killissaliussat ineriartortuurtussat takorlooruminartullu atuutinneqalissasut

- Inuussutissarsiutigalugu ingerlatsisut akornanni isumaqatigiissuteqarnissamut kiffaanngissuseqarnissaq qulakkeerneqassasoq

Taakkuninnga allanngortitsisoqanngippat naliliivugut, inatsisissamut siunnersuut siunertaasut paarlattuannik sunniuteqassasoq aammalu inissianik neqeroorutaasussanik ikilisitseqataasasoq.

Akissut:

Suliffeqarfiit attartortutut pillugit oqaaseqaatinut tunngatillugu oqaatigineqarpoq, tusarniaanermut akissuteqaatit tiguneqartut ataatsimoortumik nalilersorneqarnerat tunngavigalugu siunnersuut allanngortinneqartoq. Siunnersuut allanngortinneqarpoq, taamaalilluni Inatsisartut inatsisaat attartornermut, attartortitseqqinneq ilanngullugu, illumik inimillu aalajangersimasumik najugaqarfissatut attartortitsinermit taamaallaat atuutissalluni, attartortoq inuttut namminiussuseqarpat.

Tamanna isumaqarpoq attartornermut isumaqatigiissutit, attartortoq suliffeqarfiuppat, aallaaviatigut Inatsisartut inatsisaanni pineqartunut ilaatinneqanngitsut. Taamatut isumaqatigiissuteqarnermi inatsisit nalinginnaasut atuutissapput.

Atorunnaarsitsisinnaaneq, isumaqatigiissuteqarnissamut kiffaanngissuseqarneq suleqatigiinnullu pingasunut tunngasut pillugit oqaaseqaatit siunnersuutip atuuffiata allanngortinneqarneratigut annertuutigut naammassineqarput.

Aningaasartuutit tunngavigalugit ineqarnermut akiliut aamma § 24 pillugit oqaaseqaatinut tunngatillugu oqaatigineqarpoq, namminersortut inissiaataanni attartortittakkani, attartornermut tunngasoq Inatsisartut inatsisaanni pineqartunut ilaappat, ineqarnermut akiliutip aalajangersarneqarnissaanut pingaarnertigut killissaliussat siunnersuummi aalajangersarneqartut. Aalajangersakkat inissianik aalajangersimasumik najugaqarfissatut attartortitsinermit ataatsimoortumik maleruagassiinerup ilagai, attartortut, attartortitsisut ineqarnermullu niuerfiup patajaatsumik ineriartornissaata mianerineqarnerannik oqimaaqatigiissitsinermit tunngaveqarlutik. Tusarniaanermut akissuteqaat suliffeqarfiit attartortutut siunnersuummi pineqartunut ilaatinneqarnerat pillugu siunnersuummi allanngortitsinissamut pissutissaqalersitsivoq.

Inu:IT Bolig A/S

Pingaartumik § 1, imm. 1-imi immikkoortup aappaanut oqaaseqaatit pineqarput, tak. ilanngussami qupp. 5-imi sungaartumik ilisarnaasigaq, tassani suliffeqarfiit inatsisitigut pisinnaatitaallutillu pisussaataasutut naligiisinneqarlutik.

Inu:IT Bolig A/S ineqarneq pillugu suliamut ilaanikuuvoq, ingerlatseqatigiiffinnilu kisiartaalluni tunngavik ”Aningaasartuutit tunngavigalugit ineqarnermut akiliutit” malillugu ineqarnermut akiliutit naatsorsoqqillugit suliaq naammassinikuullugu. Ingerlatseqatigiiffiup

ukiunik 30-nik pisoqaatiginera, imminut akilersinnaanera, ingerlatseqatigiiffimmilu nammineq aningaasalersuutissaqarluarnera pisuulluinnarput.

Imaappoq, inatsit nutaaq Inu:IT Bolig-ip attartortitsinermi akigititaannut sunniteqassanngitsoq, KISIANNILI inuppassuarnut/ingerlatseqatigiiffippassuarnut annertuumik kinguneqassaaq:

Inuinnaat inissiaatiminnik suliffeqarfinnut attartortitserusuttut, ineqarnermut akiliutit naatsorsorneqarnerinut ilaatinneqassapput. Inuinnaallu ikitsuinnaat namminneerlutik annertuumik aningaasalersuutissaqarmata, inissiamut taarsigassarsiami akilersornissaanut ineqarnermut akiliutit naammannaviannngillat.

Niuerfimmi suliniutit nutaat annertuumik nammineq aningaasalersugassaassanngillat, taamaalillunilu suliffeqarfinnut (inuinnarnullu massakkut inatsit malillugu taamaareersunut) attartortitsinissaq soqutiginaassanngilaq.

Taarsiullugu suliniutini nutaani sivikitsuinnarmik attartortitsinissaq (akunnittarfeqarneq) ukkatarineqalissaaq, tassani akiliutissat aamma piumasaqaatit nammineerluni aalajangerneqarsinnaassammata (inuiaqatigiinni pisortat inissiaataanni initaarniarnermi ukiuni 20-ni utaqqisoqartarnerani, taassuma kingunissaa soqutiginarunanngilaq)

Isumaqatigiissusiorsinnaanermut kiffaanngissuseqarunnaarneq – suliffeqarfiit akornanni attartortitsinissaq pillugu isumaqatigiissusiortoqarsinnaajunnaarpat, niuerfimmi ingerlatsisut suulluunniit atorunnaassapput. (uani attartukkamik taamaatitsinissamut, piffissaligaasumillu attartortitsinissamut periarfissat il.il. eqqarsaatigaakka)

Inatsisilerituujunnginnama isummakka ataatsimiititaliamut itisilissallugit kissaatigaara, matumani aamma aningaasartuutit tunngavigalugit ineqarnermut akiliutit, inuinnarnik eqquisussat eqqarsaatigalugit naatsorsuinerit assigiinngitsut aamma takutikkusuppakka.

Akissut:

Suliffeqarfiit attartortutut, aningaasartuutit tunngavigalugit ineqarnermut akiliut, isumaqatigiissuteqarnissamut kiffaanngissuseqarneq, atorunnaarsitsineq piffissamullu killilersuineq pillugit oqaaseqaatit annertuutigit Hotel Hans Egede A/S-ip tusarniaanermut akissuteqaataani oqaatigineqartunut assingupput. Taakkununga akissutigineqartut innersuussutigineqarput.

Siunnersuut allanngortinneqarpoq, taamaalilluni Inatsisartut inatsisaat attartornermut tunngasunut taamaallaat atuutissalluni, attartortoq inuttut namminiussuseqarpat. Tusarniaanermut akissuteqaat immikkoortumi tassani siunnersuummi allanngortitsinissamut pissutissaqalersitsivoq.

SIK

SIK sinnerlugu tusarniaanermut makkuninnga oqaaseqaatissaqarpugut.

- § 5, imm. 1, utaqqiisaasumik illusimatitsinermut, attartornermut tunngassuteqartanngitsumut, kisianni atorfeqarnermut atatinneqartumut, atuuppoq, inissianik taaneqartunik taakkuninnga ingerlatsinissaq allaffissornerlu pillugit maleruagassanik aalajangersaasoqarnera, ataatsimoorluni sulisartunut isumaqatigiissutini utaqqiisaasumik illusimatitsinissaq pillugu isumaqatigiissutitut, tamanna pillugu maleruagassanik aalajangersaasoqarnera.
- Pisortani Digitalimik Allakkerineq pillugu SIK-ip tikkuarusuppaa attaveqaasersuutit Kalaallit Nunaat tamakkerlugu pitsanngorsarneqassasut, pingaartumik nunaqarfinni isorliunerusunilu internet-imut attaveqarneq ilaannikkut arriippallaartarmat ilaannikkullu attaveeruttarluni, assersuutigalugu allakkanik nassiussisarnerup sulii attatiinnarneqarnissaa.
- Attartornermut isumaqatigiissut assigiissaagaq ataaseq kalaallisut danskisullu oqaasertalerneqassaaq, tassami attartortorpassuit sulii kalaallisut oqaaseqartuummata.
- Naalakkersuisut aammattaaq sulisunut inissiap inissiatut attartortittakkatut nalinginnaasutut tiguneqarsinnaaneranut maleruagassanik aalajangersaasinnaasut, § 11, imm. 2 SIK-ip taperserpaa.
- Ineqarnermut akiliut tamarmiisoq aningaasat ingerlatsinermut aningaasartuutitut matussutaasussat sinnerlugit annertussuseqassanngilaq, SIK-ip inassutigaa sulisartut akissaatikinnerusut eqqarsaatigineqassasut, taamaalillutik ilaqutariit sulisartut sulii ineqarnermut akiliummut akiliisinnaassallutik.
- Illuutitut attartortittakkanut tamanut pilersaarutaasumik piffissakkaartumik aserfallatsaaliuineranut pilersaarut (PPV) nutartigaasutut isikkoqassasoq, SIK-ip inassutigaa, tassami nuna tamakkerlugu iluarsaassinissamut kinguaattooruteqartoq SIK-ip ilisimavaa.
- § 24, imm. 4, attartortitsisoq illuummi pitsanngorsaasimappat, qaammatinik 3-nik ilimasaarinikkut attartortitsisoq attartornermut akiliutit qaffanneqarnissaa pillugu piimasaqaammik saqqummiussisinnatitaasoq, taamaattumik SIK-ip inassutigaa qularnaveeqqut qaammatini 3-ni ineqarnermut akiliutitut annertussuseqartoq (tassami annerpaamik qaammatini 5-ini 6-inilu qularnaveeqqusiinissaq siunnersuummi siunnerfigineqarmat).
- § 26, imm. 1, SIK-ip inassutigaa attartornissamut isumaqatigiissuteqarnermi annerpaamik qaammatini 3-ni ineqarnermut akiliutitut annertussusilimmik qularnaveeqqummut attartortoq aningaasanngorlugu akiliissasoq (siunnersuummiippoq qaammatit 5) kiisalu attartortunut killilimmik akiliisinnaassuseqartunut akilersuinissamik aaqqiissuussineq sulii atorineqassasoq.
- § 35, imm. 1, attartortitsisup attartornerup aallartinnerani attartorneqartussat atorsinnaatillugu eqqiarneqarsimatillugulu atugassiissutigissagaa, taamaalilluni inissiaq najugaqarfissatut naleqquttuussalluni.

- Attartukkami attartortitsisoq allaganngorlugu akuersisimangippat pujortarnissap inerteqqutigineqarnera malinneqassaaq.
- § 37, imm. 2, attartortitsisup inissiami suliaqarnissaq minnerpaamik sapaatip akunnerinik marlunnik ilimasaarutigissavaa, taamaalilluni tamanna attartortumut annertuunik ajoqutissartaqarnermik malitseqassanani.
- Suliaqarnerni annertunerusuni attartortoq qaammatip aappaa avillugu ilimasaarneqarnissamik pisinnaatitaavoq.
- Sulisunut inissiat atorfeqarnermut ilaatillugu atugassiissutigineqartut, allamut attartortinneqarsinnaanngitsut, tamakkiisumik ilaannaasumilluunniit, SIK-ip taperserpaa.
- §46, imm. 1, sulisunut inissiap attartorneqarnera atorfeqarnerup uninnerani atorunnaassasoq, SIK-ip taperserpaa.
- Allagannguinnissamut piumasaqaat, atorunnaarsitsineq uppersarneqarsinnaasutut ilusilimmi tunniunneqarsimassaaq. Atorunnaarsitsineq allakkatigut nalinginnaasutigut imaluunniit qarasaasiatigoortumik nassiunneqarsinnaavoq.
- §55 imm.1, namminersortut attartortittagaanni attartortitsisoq akiliisoqarsimanginnerata malitsigisaanik pisuni taamaaqataanni attartornissamut isumaqatigiissutip atorunnaarsinnissaanut pisinnaatitaavoq, kisianni pisussaafeqarani, kisianni attartortitsisup attartornissamut isumaqatigiissutip atorunnaarsinnissaanut suli periarfissaqarpoq.
- §55 imm. 6, attartortoq attartukkaminiik anisitaasussanngorpat, angerlarsimaffeqannginnissaq pitsaaliorniarlugu, attartortitsisup kommunimi isumaginnittoqarfik nalunaarfigissavaa.
- § 56, imm. 4, Attartortut arlaannik pissuteqarlutik akiligassaminnik akilinngitsuugaqalersut, qaammatit sisamat angullugit akilersuinnermut aaqquissuussinissamut pisinnaatitaapput.
- § 57, imm. 1, attartortitsisup attartorneq ingerlaannaq atorunnaarsissinnaavaa, tassami attartortitsisumut taassumalu sulisuinut nakuuserluni imaluunniit navianartumik pissusilersorneq akuersarneqanngilluinnartoq tassani aalajangersarneqarmat.
- § 59, imm. 1, Atorunnaarsitsinissamut ilimasaarinerup naanissaa kingusinnerpaamik ullunik 15-inik sioqqullugu inissiaq qimanneqassaaq, taamaalilluni nalinginnaasumik iluarsaassineq aallartinneqarsinnaalissalluni.
- § 64, imm. 1, inissianik attartortittakkanik tallimanik arlaqarnerusunilluunniit attartortittakkanik inissiaqartunik attartortitsisoq namminersortoq kukkunersiuisumik nalunaarsorsimasumik imaluunniit naalagaaffimmit akuerisaasumik sulilersitsissaaq. Tamatumani attartortitsinerup maleruagassat atuuttut malillugit ingerlanerata attartortumit paasisimaarineqarnissaa qulakkeerneqarpoq.
- § 65, imm. 6, IPK ilaasortassamik toqqaanngippat, ilaasortassamik inassuteqarsinnaatitaaneq SIK-imut, IMAK-imut aamma PPK-imut paarlakaaffiusussanngortinneqassaaq, taamaalilluni isummernissamut tunngavissiamut tapersiilluni.

Inissianik attartorneq pillugu Inatsisartut inatsisaannut siunnersuut SIK-ip taperserpaa, tusarniaanermut akissuteqaammi matumani inatsisip oqaasertaanni iluarsinissanut siunnersuutit allassimasut ilaatillugit – aammalu atuutilerfissaa 1. januar 2027 aallarnerfigalugu atuunnissaa inassutigalugu.

Akissut:

Utaqqiisaasumik inissiisarneq pillugu oqaaseqaatinut tunngatillugu oqaatigineqarpoq, Naalagaaffimmi, Namminersorlutik Oqartussani kommuninilu sulisunik utaqqiisaasumik inissiisarnermut allatullu utaqqiisaasumik ilusilimmik inissiisarnermut Inatsisartut inatsisaat atuutinnitsoq, aammalu taakkuninnga ingerlatsineq allaffissornikkullu aqutsineq pillugit maleruagassanik erseqqinnerusunik Naalakkersuisut aalajangersaasinnaasut.

Tassunga atatillugu oqaatigineqarpoq, utaqqiisaasumik inissiisarneq allatullu utaqqiisaasutut ilusilimmik inissiisarneq pillugit ersarissunik maleruagassaqaarnissamut pisariaqartitsineq suliaqarnermi pilersinnaasooq, ilanngullugu inatsisitigut isumannaatsuutitsinissaq, paasiuminartuutitsinissaq avaqqutaarinissallu pitsaaliortinnissaa eqqarsaatigalugit. Inissiiffissaq atorfeqarnermut atugassarititani ilaatillugu atugassiissutigineqarluni aammalu sulisoq sulisitsisuminut pinngitsuisinnaanngitsutut inissisimalluni pisoqartillugu, tamanna pingaartumik atuuppoq. Tamanna tunngavigalugu ingerlatsineq, allaffissorneq, akiliisarneq atorunnaarsitsisarnerlu pillugit maleruagassanik erseqqinnerusunik Naalakkersuisut aalajangersaasinnaanissaat naapertuussorineqarpoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Qarasaasiatigut attaveqaqatigiinneq oqaatsillu pillugit oqaaseqaatinut tunngatillugu oqaatigineqarpoq, nalunaarutit qarasaasiatigut nassiuunneqarsinnaasut, kisianni inunnut Pisortani Digitalimik Allakkerinermut pisussaataaannngitsunut qarasaasiatigut attaveqaqatigiinnissaq piumasaqaatigineqarsinnaanngitsoq, inatsisissamut siunnersuummi aalajangersarneqartoq. Aammattaaq inatsisissamut siunnersuummi allassimavoq, attartornissamut isumaqatigiissutit kalaallisut danskisullu immersugassani akuerisaasuni isumaqatigiissutigineqassasut. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Sulisunut inissiat inissiatut attartortittakkatut nalinginnaasutut tiguneqarnissaat pillugu oqaaseqaammut tunngatillugu oqaatigineqarpoq, sulisunut inissiap innersuunneqarsimasup inissiatut attartortittakkatut nalinginnaasutut tiguneqarnissaanut periarfissaqarneq atugassarititaasullu pillugit maleruagassanik Naalakkersuisut § 11, imm. 2 malillugu aalajangersaasinnaasut. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Ineqarnermut akiliut, aserfallatsaaliuineq aammalu attartortut akiliisinnaassuseqarnerisa mianerineqarnissaa pillugu oqaaseqaatinut tunngatillugu oqaatigineqarpoq, Namminersorlutik Oqartussat kommunillu inissiaataanni attartortittakkani ineqarnermut akiliutip aalajangersarneqarnissaanut pingaarnertigut killissaliussat inatsisissamut siunnersuummi aalajangersarneqartut, ilanngullugit ingerlatsinermut aningaasartuutit, aserfallatsaaliuinermut illuartitat, aningaasaliissutinit iluanaarutit aamma atuisartunut akigititanut naleqqersuut atorlugu iluarsisarneq pillugit maleruagassat. Aammattaaq inatsisissamut siunnersuummi allassimavoq inissiar-suarnut attartortittakkanut tamanut pilersaarutaasumik piffissakkaartumik aserfallatsaaliuinissamut pilersaarummik nutartikkamik peqassasoq.

Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Qularnaveeqqut pillugu oqaaseqaatinut tunngatillugu oqaatigineqarpoq, qularnaveeqqut attartornissamut isumaqatigiissuteqarnermi annerpaamik qaammatini 5-ini ineqarnermut akiliutitut annertussuseqarsinnaasoq aammalu qularnaveeqqut attartornermullu akiliut siumoortumik akilerneqartoq katillugit qaammatini 6-ini attartornermut akiliummut naapertuuttumik aningaasartaqartinneraniit annertuneroqqusaanngitsoq, inatsisissamut siunnersuummi aalajangersarneqartoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Atorsinnaasumik pitsaassuseqarnissaa, pujortarnerup inerteqqutaanera, attartorneqartuni suliassat ilimasaarutigineqartarnerat, sulisunut inissiat allamut attartortinnissaasa inerteqqutigineqarnera, atorfeqarnerup uninnerani sulisunut inissiat atorunnaartarnerat, atorunnaarsitsinermi allagannguisarnissaaq, akiliutissanik pisussaaffimmik eqquutitsinnginermi atorunnaarsitsisarneq, kommunip isumaginnittoqarfianut nalunaarutiginnittarneq, akilersuinissamut aaqqissuussineq, nakuuserluni imaluunniit navianartumik pissusilersornermi atorunnaarsitsisarneq kiisalu inissiaq qimallugu nuuttarneq nalinginnaasumillu iluarsaassisarneq pillugit oqaaseqaatinut tunngatillugu oqaatigineqarpoq, inatsisissamut siunnersuut tamanna pillugu maleruagassanik imaqartoq. Inatsisissamut siunnersuummi ilaatigut allassimavoq, attartortoq attartukkamiit anisinneqarnissaa nalunaarutigineqarpat, kommunip isumaginnittoqarfia attartortitsisup nalunaarfigissagaa, aammalu Namminersorlutik Oqartussani kommuninilu attartortut qaammatit sisamat angullugit akilersuinissamut aaqqissuussinermik isumaqatigiissuteqarnissamut pisinnaatitaasut. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

§ 64-mut oqaaseqaatit pillugit oqaatigineqarpoq, namminersorluni attartortitsisoq 5-inik amerlanerusunilluunniit attartortittakkanik inissiaateqartoq, kukkunersuiisunik nalunaarsorsimasumik imaluunniit naalagaaffimmit akuerisamik kukkunersuiisoqassasoq, inatsisissamut siunnersuummi aalajangersarneqartoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

§ 65, imm. 2-mut oqaaseqaatit pillugit oqaatigineqarpoq, Ineqarnej pillugu Maalaaruteqartarfimmut ilaasortanik toqqaasarneq pillugu maleruagassanik siunnersuummi aalajangersaasoqartoq. Aalajangersagaq malillugu SIK, IMAK aamma PPK inassuteqarnerisigut ilaasortaq ataaseq taassumalu sinniisussaa Naalakkersuisunit toqqarneqassapput. Tusarniaanermut akissuteqaat immikkoortumi tassani siunnersuummi allanngortitsinissamut pissutissaqalersitsivoq.

Inatsisartut inatsisaata atuutilerfissaa pillugu oqaaseqaat pillugu oqaatigineqarpoq, inatsisissamut siunnersuummi atuutilerfissaanut piffissaq aalajangersarneqartoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Qarsoq Tegneste

Qarsoq Tegneste inissianik attartorneq pillugu Inatsisartut inatsisaannut siunnersuummut oqaaseqaateqarnissamut periarfissinneqarnerminut qujavoq.

Titartaasarfittut siunnersuisartut Kalaallit Nunaanni illuliornerni pilersaarusiornermik sanaartugassamullu pilersaarusiornermik misilittagalittut ingerlaavartumik pisortani namminersortunilu inissialiassanik suliaqartarpugut. Taamaattumik attartortitsisarnermut inatsisip ataatsimoortunngorlugu nutarterneqarnissaanut aaqqissuunneqarnissaanullu suliniuteqarneq qujarupparput. Maleruagassat ataatsimoortut paasiuminartut ullutsinnullu naleqquttut attartortunut, attartortitsisunut oqartussanullu paasiuminarnerulersitsisinnaapput.

Peqatigisaanik inatsisini Kalaallit Nunaanni inissiat nutaat ineriartornissaannut tunngavissiiinissaq pingaaruteqarpoq. Inissaaleqisut nunatsinni sumiiffippassuarni sulii amerlasoorujussuupput, aammalu misilittakkagut malillugit ukiuni kingullerni inissianik porsaanerup annertunersaa namminersortut aningaasaliinerisigut ingerlanneqarpoq. Taamaattumik killissaliussanut atugassarititaasut aaqqissuunneqartariaqaraluarput, attartortut naleqquttumik illersorneqarnissaat qulakkeerlugu, peqatigisaanillu inissianik attartortittakkanik sanaartornissamut ingerlatsinissamullu takorloorneqarsinnaasunik piujuartussanillu atugassaqaartitsilernissaq qulakkeerlugit.

Tamatuma saniatigut Kalaallit Nunaanni ineqarnermut niuerfik sumiiffinnit sumiiffinnut assigiinngitsorujussuuvuq. Nuummi illoqarfinnilu anginerusuni ataasiakkaani namminersortut inissianik niuerfiat pilerinaateqarpoq, illoqarfinni minnerusuni nunaqarfinnilu amerlasuuni inissiamik pilersuineq annertunerusumik pisortanit sunnersimaneqarluni. Taamaattumik inatsisini eqaatsumik oqimaqatigiissaakkamillu maleruagassiineq, niuerfinni atugassarititaasut assigiinngitsut tunngavigalugit ingerlanneqarsinnaasoq, tunngavissinneqartariaqaraluarpoq.

Tamanna tunngavigalugu Qarsoq Tegneste-p pissutsit makkua, isumarput malillugu inatsisissamut siunnersuummik nukittorsaasinnaasut, erseqqissarusuppai.

1. Inussutissarsiornermi attartortitsisarnermut tunngasut killissalersorneqarnerat imaluunniit immikkut maleruagassiivigineqarnissaat

Inatsisissatut siunnersuummi atuuffissaa aamma suliffeqarfiit attartortutut pineqartunut ilaatilerlugit, annertusitinneqarpoq. Tamanna inuussutissarsiuutigalugu ingerlatsisut akornanni isumaqatigiissuteqarnermut tunngasunut arlalinnut sunniuteqarsinnaavoq, assersuutigalugu suliffeqarfiit sulisuminnut attartortitseqqinnissaq (sulisunut inissiat) siunertaralugu inissianik attartortillugit.

Inuussutissarsiornermi attartornermut tunngasut taamaattut immikkut maleruagassiivigineqartariaqaraluarnersut imaluunniit inuussutissarsiuutigalugu ingerlatsisut akornanni isumaqatigiissuteqarnermi kiffaanngissuseqarnerulersitsinissaq periarfissiissutigineqartariaqaraluarnersoq isumaliutersuutigineqarsinnaavoq. Attartornermut inatsimmut siunertaavoq attartortunik nalinginnaasunik, isumaqatigiissuteqarnermut tunngasuni sannginnerusunik, annertunerusumik illersuinissaq. Attartortoq aamma attartortitsisoq inuussutissarsiuutigalugu ingerlatsisuutillugit, isumaqatigiissummut atugassarititaasut eqaannerutinnissaat pisariaqartinneqarsinnaavoq.

2. Namminersortut illuutaanni attartortittakkani ineqarnermut akiliutip aningaasartuutit aallaavigalugit aalajangersarneqartarnera pillugu maleruagassanik erseqqissaaneq

Ineqarnermut akiliutip aningaasartuutinit aalajangigaanissaa pillugu aalajangersakkat namminersortut inissiaataannut attartortittakkanut qitiupput. Naliliinerput malillugu naatsorsuinermi tunngavissat piffissap ingerlanerani qanoq aalajangersarneqartarnissaat annertunerusumik erseqqissassallugu naleqquttussaavoq.

Assersuutigalugu erseqqissassallugit naleqqussinnaapput:

- illummi aningaasalersuinerup allanngortinneqarnera (allatut pingaarnersuineq, akilersuineq il.il.)
- qanoq ineqarnermut akiliutip aalajangersarneqarneranut sunniissanersoq pisinermi akigititaq imaluunniit sanaartornermut aningaasartuutit piginnittut nikinneranni qanoq aalajangersarneqarnerisut nalinganik pitsanngorsaanerit imaluunniit iluarsaassinerit annertunerusut qanoq naatsorsuinermi ilaatinneqarnerisut.

Ersarissumik paasiuminartumillu maleruagassiineq attartortumut, attartortitsisumut sullissivimmullu aningaasalersuisumut pingaaruteqartussaavoq aammalu inissialiornermi aningaasaliinermi takorlooruminartitseqataasinnaalluni.

3. Inissianik attartortittakkanik nutaanik sanaartornissamut kajumissuseqalersitsinissap qulakkeernissaa

Inatsimmi inissianik attartortittakkanik nutaanik sanaartornissamut siunertaanngitsumik kajumissuseqannginnerulersitsinnginnissaq pingaaruteqarpoq. Kalaallit Nunaannit isigalugu, illuliornermut aningaasalersuinemullu aningaasartuutit qaffasinnerusarmata, illuutini attartortittakkani ingerlatsinermut erniortitsinermullu tunngatillugu naammattumik qularnaarinissaq takorlooruminartitsinissarluni aalajangiisuulluinnartumik pingaaruteqarput.

Taamaattumik inatsimmi annertunerusumik qulakkeerneqartariaqaraluarnersut isumaliutersuutigineqarsinnaavoq:

- piffissap ingerlanerani attartortitsinermut akinut maleruagassiinermut killissaliussat ersarissut
- inissianik sananeqarlaanik attartortitsinermi atugassarititaasut takorlooruminartut
- inissiaq tunineqarani attartortikkallarneqarluni pisoqartillugu eqaatsumik aaqqiissutissaqarnissamut periarfissaqarneq.

Pissutsit taamaattut namminersorlutik suliaqartut inissialiassani nutaani aningaasaliiniarlutik toqqaanissaannut pingaaruteqarsinnaapput.

Naggasiutaasumik oqaaseqaatit

Attartortitsinermut inatsimmi inuit atugaasa eqqarsaatiginissaannut inissianillu nutaanik ineriartortitsinissamut tunngavissiiinissaq Qarsoq Tegnestue-p pingaartippaa. Pisortat inissiamik pilersuinerat kisimi Kalaallit Nunaanni siunissami inissiamik pisariaqartitsinermut naammassinnissinnaanaviannigilaq, aammalu namminersortut aningaasaliisarneri sulii pingaarutilimmik inissisimasussaallutik.

Taamaattumik inassutigaaqput inatsisissamut siunnersuut, attartortunik pilersuinerup inissialiornernullu killissaliussanut atugassarititaasut qanoq oqimaaqatigiinnerisa pitsaanerpaamik attatiinnarneqarsinnaanera, suliarinninnerup ingerlaqqinnerani nalilersorneqassasoq.

Kalaallit Nunaanni inissialiornermut inissianillu pilersuinerup killissaliussanik ineriartortitsinissaq pillugu oqaloqatigiinnerit ingerlaqqinneranni Qarsoq Tegnestue peqataarusuppoq.

Akissut:

Suliffeqarfii attartortutut siunnersuummi pineqartunut ilaatinneqarnerat pillugu oqaaseqaatinut tunngatillugu oqaatigineqarpoq, tusarniaanermut akissuteqaatit tiguneqartut ataatsimoortumik nalilersorneqarnerat tunngavigalugu siunnersuut allanngortinneqartoq. Siunnersuut allanngortinneqarpoq, taamaalilluni Inatsisartut inatsisaat attartornermut tunngasunut taamaallaat atuutissalluni, attartortoq inuttut namminiussuseqarpat.

Ineqarnermut akiliut aningaasartuutinit aalajangigaasoq aammalu namminersortut inissiaataannut attartortittakkanut naatsorsuinermit tunngavissat pillugit oqaaseqaatinut tunngatillugu oqaatigineqarpoq, namminersortut inissiaataanni attartortittakkani ineqarnermut akiliutip aalajangersarneqarnissaanut pingaarnertigut killissaliussat siunnersuummi aalajangersarneqartut. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Inissianik attartortittakkanik nutaanik sanaartornissamut aningaasaliinernut atugassarititaasut, takorlooruminartitsinissaq kajumissaarutillu pillugit oqaaseqaatit pillugit oqaatigineqarpoq, siunnersuutip atuuffia allanngortinneqartoq, taamaalilluni attartornermut isumaqatigiissutit, attartortoq suliffeqarfiuppat, aallaaviatigut Inatsisartut inatsisaanni pineqartunut ilaatinneqanngitsut. Tusarniaanermut akissuteqaat suliffeqarfiit attartortutut siunnersuummi pineqartunut ilaatinneqarnerat pillugu siunnersuummi allanngortitsinissamut pissutissaqalersitsivoq.

Grønlandsbanken

Ineqarnermut Attaveqaasersuutinit Isorliunerusunullu Naalakkersuisoqarfiup inissianik attartorneq pillugu Inatsisartut inatsisaannut siunnersuut najoqqutassani nassiunneqartuni tusarniaassutigalugu nassiuppaa.

Inatsisissatut siunnersuummut kajumissuseqalersitsisoq tassaavoq, attartortitsisarnermut inatsisip ataatsimoortunngorlugit allanneqarnissaat nutarterneqarnissaallu. Tassunga atatillugu peqqussummi atuuttumi tunngaviusumik tunngaviusut ingerlateqqinneqartut allassimammat, tamanna soqutiginarpoq, ilanngullugu pisortat inissiaataasa attartortittakkat aamma namminersortut illuutaasa attartortittakkat akornanni immikkoortitsineq. Tamanna inatsisissamut siunnersuummut oqaaseqaatiminut isornartorsiuisunut siullernut aningaaserivik inissitsippaa. Maannakkut attartortitsisarnermut inatsimmi § 1 malillugu:

*§ 1. Peqqussutip atuuffigisaa tassaavoq illunik illunilu ineeqqanik inigisassanik attartortitsineq, attartukkanik attartortitseqqinneq ilanngullugu, tamatumani aningaasaanik allaanerusunik akiliuteqartarnersoq aamma inissiap ilaa inissiatuunngitsoq attartortinneqarnersoq apeqqutaatinnagu, taamaattorli tak. imm. 2.
Imm. 2. Peqqussut taamaallaat attartornermi pissutsinut atuuppoq, attartortoq inuttut namminiussuseqarpat.*

Inatsisissatut siunnersuummi nassiunneqartumi inatsimmi § 1 imatut oqaasertaligaavoq:

§ 1. Inatsisartut inatsisaat attartukkanik attartortitseqqinneq ilanngullugu, illunik illunilu ineeqqanik inigisassanik attartortitsisarnermut atuuppoq, **attartortoq inuunersoq imaluunniit suliffeqarfiunersoq apeqqutaatinnagu.**

Imm. 2. Aningaasaanik imaluunnit allaanerusunik akiliuteqartarnersoq sulineq ilanngullugu, aamma inissiap ilaa inissiatuunngitsoq attartortinneqarnersoq apeqqutaatinnagu Inatsisartut inatsisaat atuuppoq.

Inatsisissamut siunnersuut nassiunneqartoq taamaalilluni, allassimasutut, attartornermut tunngasuinnaat pineqartunut ilaallutik, tassani inuk attartortuulluni inatsisip atuuffissaa, aamma pisinnaatitaallunilu pisussaataaasoq attartortuulluni pineqartunut ilaaiterlugu, annertusitinneqarpoq. Tamanna pingaartumik Kalaallit Nunaanni suliffeqarfippassuarnut, sulisuminnut sulisunut inissianik attartortartunut, immikkut attuumassuteqarpoq.

GrønlandsBANKEN isumaqarpoq, allannguut taanna oqaatsitigut erseqqissaanerinnarmiit annertunerujussuusoq aammalu inatsimmi najoqqutassatigut allannguutit annertuut pissusiviusuni pineqarmata, inatsisissamut siunnersuutip oqaatsitigut erseqqissaanernik imaqtartut saqqummiunneqarnera, inatsisilioriaatsimut pitsaasumut akerliusoq isumaqarluni. Attartortitsisarnermut inatsisip immikkoortumi tassani allanngortinneqarnera, ingerlatseqatigiiffiit namminersortuni attartortutut atuisartunik illersuinerup assinganik illersorneqalernerannik, malitseqartussaavoq, tamatumanilu ilaatigut pineqartunut ilaapput:

- Attartornermut akiliut aningaasartuutinit aalajangigaasoq (§ 24)
- Ingerlaannartumik ineqarnermut akiliutip iluarsineqartannginnera (§ 24, imm. 6)
- Attartortitsisup attartugaq atorunnaarsissinnaanngikkaa (§ 49)
- Isumaqtatigiissuteqarnissamut kiffaanngissuseqartoqanngitsoq
- Ineqarnermut akiliutip nakkutigineqarnera

Attartortitsisarnermut inatsimmi atuuffissaa sooq taama annertutigisumik annertusitinneqarnersoq, ersarinngitsumik allassimavoq. Attartortoq nammineq, assersuutigalugu ingerlatseqatigiiffimmi sulisoq, inissiamik attartortittakkamik attartorsimasoq, inatsimmi maleruagassanit sulii illersugaasinnaavoq.

Naalakkersuisut illuinnarsiortumik nammineerluni isumaqtatigiissuteqartarnermut tunngasut, arlalinnik killilersuinerneq malinniffiusussanngorlugit, allanngortimmasigit ajornartorsiutitaqarpoq. Assersuutigalugu attartortitsisup attartukkamik atorunnaarsitsiniarnera ajornakusuulertussaavoq. Aningaaserivik isumaqarpoq inatsisissamut siunnersuut allanngortinneqassasoq, taamaalillutik inuussutissarsiutigalugu suliaqtartut inuussutissarsiortunut allanut isumaqtatigiissutaat inissianik attartortitsisarneq pillugu inatsisip avataaniitinneqalissallutik.

Tamatumunnga nangissutigalugu aningaaserivik isumaqarpoq attartortitsisarnermut inatsimmi § 24-mi ineqarnermut akiliutip aalajangersarneqarnerani assigiinngitsorujussuutitsisoqarsinnaalersoq. Attartortitsisoq 100 %-imik nammineq aningaasalersukkaminik illuummik sanaartortoq, attartortitsisumit illuut 100 %-imik akiitsorluni aningaasalersuisumit, qaffasinnerujussuarmik ineqarnermut akiliuteqartitsilluni attartortitsisinnaassaaq. Aningaasalersuinerup ilusaa aammalu illuutip nalinga piffissap

ingerlanerani allanngorsinnaammata, maannakkut nalilernerqarnera aningaasalersorneqarneratalu ilusiligaanera aallaavigalugit § 24 oqaasertalerneqarpat tamanna paasiuminarnerulertussaavoq.

Eqqartuussissuserisup nassuiaataa ”Inuussutissarsiornermi attartortitsinermut isumaqatigiissutit – inissialiortiternermut aningaasalersuinermit taarsigassarsiat” 4. marts 2024-meersoq eqqartuussissuserisumit Niels Hansen Damm-imit suliarineqartoq, kiisalu Kalaallit Nunaanni illuutini inissiatut attartortittakkani namminersortunit pigineqartuni attartornermut akiliut aningasartuutinit aalajangigaasoq pillugu Koch/Christensen-ip allakkiaa, tunngavigalugit oqaatigineqarsinnaavoq, maleruagassat qanorluunniit paatsuugassaangitsumik allassimanngitsut aammalu nassuiarnissaat annertuumik nalorninartortaartoq, attartornermut akiliut piumasarineqarsinnaasoq annertoorujussuarmik assigiinngissuteqarsinnaalerluni.

Taamaattumik inissianik attartortitsisarneq pillugu inatsisissamut nutaamut siunnersuummik saqqummiussinermut atatillugu, inatsit iluarsineqarsinnaanersoq isumaliutersuutigissallugu naleqqutissaaq. Attartortitsisarnermut inatsit immaqa inissialiortiternermut aningaasalersuinermit inatsimmut ilanngullugu eqqarsaatigineqartariaqaraluarpoq.

Akissut:

GrønlandsBANKEN-ip eqqortumik oqaatigaa siunnersuut tusarniaassutigineqartoq immikkoortumi tassani inatsisinut atuuttunut sanilliullugu najoqqutassatigut allannguutaasoq, tassami siunnersuummi attartornermut tunngasut, attartortoq suliffeqarfiuppat, aamma pineqartunut ilaatinneqarmata.

Tusarniaanermut akissuteqaatit tiguneqartut ataatsimoortumik nalilersorneqarnerat tunngavigalugu siunnersuutip atuuffia allanngortinneqarpoq. Siunnersuut allanngortinneqarpoq, taamaalilluni Inatsisartut inatsisaat attartornermut, attartortitseqqinneq ilanngullugu, illumik inimillu aalajangersimasumik najugaqarfissatut attartortitsinermut taamaallaat atuutissalluni, attartortoq inuttut namminiussuseqarpat.

Tamanna isumaqarpoq attartornermut isumaqatigiissutit, attartortoq suliffeqarfiuppat, aallaaviatigut siunnersuummi pineqartunut ilaatinneqanngitsut. Taamatut isumaqatigiissuteqarnermi inatsisit nalinginnaasut atuutissapput.

Aningaasartuutit tunngavigalugit ineqarnermut akiliut, isumaqatigiissuteqarnissamut kiffaanngissuseqarneq, atorunnaarsitsineq aamma ineqarnermut akiliutip aalajangersarneqartarnera pillugit oqaaseqaatinut tunngatillugu oqaatigineqarpoq, siunnersuummi inissianik aalajangersimasumik najugaqarfissatut attartortitsinermut tunngasunut pingaarnertigut killissaliussat aalajangersarneqartut, attartornermut tunngasoq siunnersuummi pineqartunut ilaappat.

Tusarniaanermut akissuteqaat suliffeqarfiit attartortutut siunnersuummi pineqartunut ilaatinneqarnerat pillugu siunnersuummi allanngortitsinissamut pissutissaqalersitsivoq.

Avannaata Kommunia

Avannaata Kommunia siunnersuummut tulluuttunik oqaaseqaatissaqarpoq:

- Nalunaarummi maleruagassanik aalajangersaanissamut Naalakkersuisunut piginnaatitsineq.

Inatsisissatut siunnersuummi Naalakkersuisut piginnaatinneqarput nalunaarummi maleruagassanik aalajangersaanissamut, inatsisissatut siunnersuummi immikkoortunut ataasiakkaanut ilassutaasussanik. Avannaata Kommunia isumaqataasinnaavoq, inissianik attartortitsisarneq pillugu maleruagassat ataatsimut isigalugu naleqqussarneqarsinnaanerannut eqaallisarneqarsinnaanerannullu tunngavissiisoqarmat.

Siunnersuutigineqarpoq inatsisissatut siunnersuummi aamma/imaluunniit nassuiaatini erseqqissarneqassasoq, Naalakkersuisut nalunaarummi maleruagassanik aalajangersaasinnaasut, sumiiffimmut ataatsimut imaluunniit sumiiffinnut arlalinnut toqqarneqartunut atuuttussanik, assersuutigalugu kommunimut ataatsimut, illoqarfimmut ataatsimut imaluunniit illoqarfinnut nunaqarfinnulluunniit arlalinnut.

Assersuutigalugu inatsisissatut siunnersuutip §§ 10-11-at malillugit maleruagassanik aalajangersaanermi najukkani immikkut pissutsit eqqarsaatigineqartariaqarsinnaapput. Tamatumani kommunalbestyrelsit ataasiakkaat inissianik attartortittakkanik inoqanngitsunik qanoq innersuussisoqartassanersoq pillugu assigiinngitsumik isumaqarsinnaanerata, kiisalu sulisunut inissianik pisariaqartitsineq kommuninit kommuninut assigiinngissinnaanera ilanngullugit eqqarsaatigineqarsinnaapput.

- Aserfallatsaaliuineq, iluarsartuussineq, atuinerlu, tak. § 36

Namminersorlutik Oqartussat aamma kommunit inissiaataanni attartortittakkani attartortup attartugaq piffissami sivilisunerusumi najugaqarfigisimappagu, assersuutigalugu ukiut marlukkaarlugit attartukkamik misissuisoqartassasoq siunnersuutigineqarpoq. Misissuinermi qulaajarneqassaaq, attartortup attartugaq isumannaatsumik paarsisimaneraa il.il., aammalu attartugaq isumaqatigiissutigineqartumit allaanerusumik atornerarnersoq, tak. § 36.

Attartortup attartukkani isumannaatsumik paarisimanngippagu, ajoqusersimappagu imaluunniit paarilluarsimanngippagu, tak. § 36, attartortup pisariaqanngitsumik kinguarsaanertaqanngitsumik ajoqusernerit iluarsissallugit pisussaaffigissavaa.

Tamanna attartortut attartukkamik atuinerata annertunerusumik ukkatarineqarnissaa qulakkiissavaa, aammalu pisortat inissiaataanni attartortittakkat nalinginnaasumik pitsaaneruseqarsumik paarineqarnissaannut tapertaassalluni. Ilutigisaanik tamanna attartortut

attartukkamit kingusinnerusukkut nuunnerini amigaatit iluarsineqarnissaannut pisussaaffigisinnaasaasa killeqartinneqarnissaannut tapertaasinnaassaaq.

- Torsuutitsinissamik maleruagassanik unioqutitsinermi atorunnaarsitsineq, tak. § 49, nr. 4, tak. § 52, imm. 1

Avannaata Kommunia isumaqarpoq, attartortut sinneri annerusumik eqqarsaatigineqassasut. Attartortut sinneri toqqissisimasumik, eqqissisimasumillu avatangiiseqarlutik najugaqarsinnaanerit aalajangiisuvoq. Attartortut torsuutitsinissamik maleruagassanik atuuttunik malinnissinnaanngitsut imaluunniit malinnikkusunngitsut, attartortut sinneri eqqarsaatigalugit inissiami attartukkaminni najugaqaannarsinnaannginnertik akuerisariaqarpaat.

Taamaattumik Avannaata Kommunia isumaqarpoq, torsuutitsinissamik maleruagassanik unioqutitsinerup kingunerisaanik taamaatitsineq, atorunnaarsitsinissamut tunngavissaqanngikkaluartoq, qaammatit aqqaneq-marluk malittuunnaat iluini marloriarluni allakkatigut mianersoqqusereernermi, qaammammillu ataasiinnarmik taamaatitsinissamik ilimasaaruteqarnikkut pisinnaassasoq.

4) Annertuumik ajoqutaasumik pissusilersornermi il.il. pissutigalugu atorunnaarsitsineq, tak. § 57.

§ 57 ima ilusilersugaavoq, attartortitsisoq attartorneq pillugu isumaqatigiisummik atorunnaarsitsisinnaalluni. Taamaalilluni attartorneq pillugu isumaqatigiissut atorunnaarsinneqassanersoq imaluunniit atorunnaarsinneqassannginnersoq attartortitsisup aalajangigassaraa.

Avannaata Kommunia isumaqarpoq, attartortut sinneri annerusumik eqqarsaatigineqassasut. Attartortut sinneri toqqissisimasumik, eqqissisimasumillu avatangiiseqarlutik najugaqarsinnaanerit aalajangiisuvoq. Attartortut (taassumallu inoqutai il.il.) annertuumik ajoqutaasumik pissusilersortut il.il., attartortut sinneri eqqarsaatigalugit inissiami attartukkaminni najugaqaannarsinnaannginnertik akuerisariaqarpaat.

Avannaata Kommunia isumaqarpoq, Namminersorlutik Oqartussat aamma kommunit inissiaataanni attartortittakkani attartortoq, imaluunniit taassuma inoqutai il.il., annertuumik ajoqutaasumik pissusilersorpata il.il., attartortitsisut attartorneq pillugu isumaqatigiisummik atorunnaarsitsinissamut pisussaaffilerneqassasut.

Akissut:

Nalunaarummi maleruagassanik aalajangersaanissamut piginnaatitsissut pillugu oqaatigineqarpoq, inatsisissamut siunnersuummi piginnaatitsissutinut aalajangersakkani siunertaasoq, suliaasaqarfimmi eqaatsumik allaffissornikkullu naleqquttumik

maleruagassiinissap qulakkeernissaa. Inatsisissamut siunnersuummi piginnaatitsissutit nalunaarutinit nunami sumiiffinni assigiinngisitaartunik mattussinngillat. Nalunaarummik immikkut nunami sumiiffimmi killilerneqartumik atuuffeqartussamik immikkut pisariaqartitsisoqalissagaluarpas, kommunip pineqartup maleruagassiinermi akuutinnissaa pissusissamisoortussaavoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Attartortinneqartup ingerlaavartumik takusartarnissaa pillugu siunnersuut pillugu oqaatigineqarpoq, attartortup attartukkamik atuinera, aserfallatsaaliuineq, pisussaaffimmik eqquutitsinnginneq inissiarlu qimallugu nuunneq pillugit maleruagassanik inatsisissamut siunnersuut imaqartoq. Attartukkat najugaqarfigneqartut pisussaaffittut piffissakkaartumik nakkutigineqarnissaat pillugu maleruagassanik siunnersuut imaqqanngilaq. Aammattaaq maannakkut naliliisoqarpoq, taamatut aqqissuussineq allaffissornikkut aningaasartuuteqarnermik malitseqartussaasoq aammalu attartortitsisunut imaluunniit attartortunut annertuunik aningaasaqarnikkut pitsanngorsaanernik angusaqarfiusussaannngitsoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Ileqqorissaarnissamut maleruagassat unioqqutinneqarnerisa malitsigisaanik atorunnaarsitsisarnissamut tunngatillugu oqaatigineqarpoq, atorunnaarsitsisarneq atuukkunnaarsitsisarnerlu pillugit maleruagassanik inatsisissamut siunnersuut imaqartoq, ilanngullugit pisussaaffimmik eqqortitsinnginnermi, ileqqoreqqusat unioqqutinneqarneranni aammalu najugaqartunut allanut ajoqutaasumik pissusilersornermi. Inatsisissamut siunnersuut najugaqartut allat mianerineqarnissaannik aammalu attartortup inatsisitigut inissisimanerata mianerineqarnissaanik nalilersuinerneq tunngaveqarpoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Annertuunik ajoqusiisoqartillugu il.il. atorunnaarsitsisarnissaq pillugu oqaatigineqarpoq, attartortitsisup pisuni § 57-imi pineqartunut ilaasuni attartortitsineq atorunnaarsissinnaagaa, inatsisissamut siunnersuummi aalajangersarneqartoq. Taamatut pisoqartillugu attartortitsisumi ataasiakkaatigut nalilersuineq tunngavigineqartussaasoq, inatsisissamut siunnersuummi allanngortinneqanngilaq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

Sulisitsisut

Attartortitsisarneq pillugu paasiuminarnerusunik, nutaaliaanerunillu malittarisassaqaarnissaanik kissaateqarneq Sulisitsisut tapersersorpaat. Inissiani attartortittakkani inuit, suliffeqarfiilluunniit aningaasaliinissaannut sinaakkutitut inatsisissap nutaap nukittorsaanissaa, minnerpaatulluunniit ajorseriartitsinnginissaa, taamaalillunilu inissianik nutaanik sanaartornermut tapersiinissaa pingaaruteqarpoq.

Kalaallit Nunaanni inissianik pilersuineq aallaavittut nammineq isumagisassaavoq, taassumallu kingorna pisortat suliassaralugu. Innuttaasut tamarmik inissiamik pilersorneqarnissaanni nammineq, pisortallu inissiaataat naammanngillat.

Sulisut pigiinnarumallugit, sulilersitsiumallunilu sulisitsisut sulisut ilaannut ineqartitsisariaqartarput. Tamanna pillugu suliffeqarfiup sulisuminut attartortitseqqittagaanik (sulisunut inissianik) suliffeqarfippaaluit pigisaqanngikkunik attartortarput. Sulisitsisut ilaannaat sulisunut inissiaatitik namminneerlutik pigisarpaat. Sulisitsisut sinneri sulisunut attartorteqqitassaminnik sulisunut inissianik attartortarput.

Namminersortut inissiaataat aallaavittut attartortitsinermi inatsimmi malittarisassat malillugit attartortinneqartalissasut, inatsisissatut siunnersuummi anguniarneqarpoq – attartortoq inuinnaanersoq imaluunniit suliffeqarfiunersoq apeqqutaatinnagu. Suliffeqarfiit (sulisitsisut), inuussutissarsiutigalugulu attartortitsisartut akornanni massakkut isumaqatigiissusiortariaasiinut tamanna allannguissaaq.

Sulisitsisut isumaqarput, inatsisissatut siunnersuut akuerineqassappat namminersortut inissianik niuerfiup ineriartornera annertuumik killeqalissasoq.

Inissianik attartorneq pillugu siunnersuummi pingaarnertut ajornartorsiutaavoq inuussutissarsiornikkut isumaqatigiissutit attartortitsinermut inatsimmut nuunneqarmata, naak inatsit taanna nalinginnaasunik attartortunik, tassa isumaqatigiissummi illuatungeriinni sanngiinnerusunik, illersuisussatut ilusiligaagaluartoq. Imaappoq, inatsit atuisunik illersuiffiusussatut ilusiligaavoq. Massakkut peqqussutaasoq attartortunut inuttut namminiussuseqartunut killeqarpoq, § 1-imili massakkut siunnersuutigineqartumi suliffeqarfiit aamma ilaatinneqarlutik. Sulisitsisut sulisunut attartortitseqqitassanik inissianik attartortut nassuiaatini ersarissumik taaneqarput.

Ajornartorsiutaasoq tassaavoq suliffeqarfinnut attartortitsineq inuinnarnut attartortitsinermut nalogiissinneqarmat. Taamaalilluni innuttaasut assigalugit suliffeqarfiit (attartortut) attartortutut innuttaasunut namminersortunut assingusumik atuisutut illersorneqalissapput, aammalu attartortumut illersuutit arlallit suliffeqarfinnut atuutilissallutik, soorlu ilaatigut:

- Aningaasartuutit tunngavigalugit ineqarnermut akiliutit (§ 24)
- Ineqarnermut akiliutinik nalinginnaasumik ingerlaavartumik imminik iluarsiiisoqartassannginnera (§ 24, imm. 6 – taamaakkaluartoq akiusunut iluarsiiissutit pillugit Naalakkersuisut malittarisassanik aalajangersaasinnaapput)
- Attartortitsisup isumaqatigiissummik taamaatitsinissamut periarfissaasa killeqarnerat (§ 49)
- Isumaqatigiissusiornissamut killilimmik kiffaanngissuseqarneq (matumani nalinginnaasumik isumaqatigiissut akuerisaq aamma, malittarisassallu saneqqunneqarsinnaanngitsut ilanngullugit)

Oqaatigineqareersutut Kalaallit Nunaanni inissianik pilersuinerup annersaa sulisunut inissiatigut pivoq. Sulisunut inissiat sulisitsisunit pigineqanngikkajuttarput, inuussutissarsiutigaluguli attartortitsisartunit attartorneqartarlutik (imaappoq, inissiami nammineq najugaqanngitsumit). Sulisitsisoq sulisunut inissiassanut annertuumik aningaasaliiumanani, sulisoqarnermilu pissutsit, taamaalillunilu sulisunut inissianik pisariaqartitsineq apeqqutaallutik inissiat attartukkat amerlisinnaaqullugit, ikilisinnaaqullugillu amerlanertigut pingajuusumit inissianik attartortarpoq.

Inuussutissarsiutigalugu attartortitsisoq tassaakkajuppoq illuutiniq ingerlatseqatigiiffik, sanaartugassanik suliassinneqartartoq imaluunniit inissianik tuniniagassanik, attartortitassanilluunniit arlalinnik ineriartortitsisimasoq sanaartortitsisimasorlu.

Sanaartugassanik suliassinneqartartoq aamma tuniniagassanik, attartortitassanilluunniit inissialiortartoq inissianik sanaartornissamut marloqiusamik aallaavilimmik periusissiaqakkajuttarput. Inissiat tuniniarneqartarput, niuerfimmili pissutsit patsisaallutik tunineqarsinnaanngippata attartortinneqartarlutik.

Attartortitsinermut inatsisip nutaap kingunerisaanik, attartornermi isumaqatigiisummik piffissaligaanngitsumik, taamaallaat killilimmik naleqqussarneqarsinnaasumik attartortitsisoq pituttorsimaleratarsinnaavoq.

Ineqarnermut akiliutit ataavartumik naleqqussarneqarnissaannut killilimmik periarfissaqarpoq, isumaqatigiisummillu taamaatitsinissamut killilimmik periarfissaqarnerup kingunerisaanik assersuutigalugu sanaartugassanik suliassinneqartarput imaluunniit tuniniagassanik, attartortitassanilluunniit inissialiortarput inissianik naatsorsuutigisaraluamit tunineqarsimanngitsunik attartortitsinissaminut tunuarsimaalersinnaapput. Tamanna pillugu inissialiornissamik pilersaaruteqarnermi inissianik attartortinneqanngitsunik uninngasuuteqaleratarsinnaaneq imaluunniit piffissaligaanngitsumik attartortitseratarsinnaaneq patsisaallutik inissialiornissamut aningaasaliissutissanik pissarsiniarniarneq ajornakusuulersinnaavoq – siullertut inissiat tunineqarnissaannik, tullertullu (periarfissatut pilersaarutitut) inissiat tunineqarsinnaalernissaasa tungaannut piffissap ilaani attartortinneqarnissaannik pilersaarutaaqqaartup killuanik.

Sulisitsisut nalilerpaat, inissianik massakkut niuerfimmut aamma sanaartortunut, taamaalillunilu inuiaqatigiinni pingaarutilimmik inissianik pilersuinermut inatsit annertuumik kingunerlussinnaasoq. Uani oqaatigineqarsinnaavoq, ukiut tallimat kingulliit ingerlanerini Nuummi inissialiornarit amerlanersaat namminersortunit sanaartortitsisunit sanaartorneqarsimammata. Soorunami pisortat inissiaataanni inissaminnik utaqqisut annertuumik amerliartussapput.

Sulisitsisut sakkortuumik innersuussutigaaq, Attartortitsinermut inatsit nutaaq siunnersuutigineqaraluartutut suliffeqarfinnut atuutissanngitsoq, taamaattumillu § 1 allanngortinneqassasoq.

Inuinnarnit pigineqartuni inissiani attartortittakkanut massakkut peqqussummi aaqqiissut, aningaasartuutit tunngavigalugit ineqarnermut akiliuteqartitsisarnermut inatsisissatut siunnersuummi § 24-mi allanngortinneqarpoq, tassani piffissami sivisuumi pigisanut aalaakkaasunut atugassanik nalinginnaasumik taarsigassarsinermut akiliutit, taassumallu saniatigut taarsigassarsinikkut aningaasalersorneqanngitsup inissiap pisiarineranut akiusup naammaginatup sinnerata ilaanut 14%-imik ernialersuineq ilanngunneqarsinnaallutik.

Akit nikerarnerisa kingunerisaanik illup nalinga piffissap ingerlanerani allanngortarpoq, soorluttaaq illuummut qularnaveeqquusiussaq assersuutigalugu taarsigassarsianik allanngortitsinikkut, ataavartumik akilersuinikkut, immikkut ittumik akiliinikkut il.il. allanngorsinnaasoq. Aningaasalersuineri aningaasartuutit allanngornerat aamma nammineq aningaasaliinerit innersuussutigalugit nassuiaatit malillugit attartortittakkat pioreersut naleqqussarneqarsinnaannginnerat Sulisitsisut ajornartorsiutitut isigaat, naak illuummi aningaasatigut tunngavii piffissap ingerlanerani annertuumik allanngorsinnaagaluartut. Taassuma kingunerisaanik aningaasatigut aarlerinarsinnaasoq annertuutigut attartortitsisumut inissinneqarpoq. Tulliuttumi assersuutit tamakkiisuunngillat:

- Piginnittup aningaasaliinerini allannguutit, matumani taarsigassarsianik allanngortitsineq, ataavartumik akilersuinerit, immikkut ittumik akiliutit imaluunniit taarsigassarsiat tamakkerlugit akilernerqarneri ilanngullugit attartortitani piusuni akiliutinut sunniuteqarsinnaanngippata tamanna ajornartorsiutitut Sulisitsisut isigaat.
- Taarsigassarsiat tamakkerlugit akilernerisigut, attartortitat piusut ernialersorneqarnerat 14 %-inngortinneqarsinnaannginnerat Sulisitsisut ajornartorsiutitut isigaat.
- Taassuma saniatigut § 24 malillugu aningaasartuutit tunngavigalugit ineqarnermut akiliutit suut tunngavigalugit naatsorsorneqassanersut nalornissutigineqarpoq, matumani aamma illup pissarsiarineqarnera, attartornermi isumaqatigiissusiordermi imaluunniit naatsorsuinissami nutaanik tunngavissaqalernermi naatsorsuineri aallaavigineqassanersut ilanngullugit.
- Akit nikerarnerisa kingunerisaanik illup nalinga piffissap ingerlanerani allanngortarpoq. Assersuutigalugu illu ukiunik 20-nik pisoqaassuseqarpat, naak illup aningaasalersorneqarnera, nalinga, aningaasatigullu tunngavissat allat pisiarineraniilli annertuumik allanngorsimasinnaagaluartut, attartortitsinerit piusut naleqqussarneqarsinnaannginneri Sulisitsisut ajornartorsiutitut isigaat.
- Taassuma saniatigut sanaartornermi imaluunniit pisineri aki suna naleqqunnersoq kiap aalajangersassaneraa nalornissutigineqarpoq.
- Illu attartortitaq piginnittumut nutaamut tunniunneqarpat, piginnittorlu nutaaq attartortitani piusuni attartornermi akiliutinik naleqqussaasinnaanani attartornermi isumaqatigiissutinik nangitsippat, pisineri aki nutaaq aamma nutaamik

anigaasaliineq aatsaat attartortut nikinnerini sunniuteqarsinnaanerit Sulisitsisut ajornartorsiutitut isigaat.

Siuliani § 24-mi naleqqussaanerit pippata, illunut namminersortunit pigineqartunut ineqarnermut akiliutitut qaffasissusissamik naatsorsuineq § 24, imm. 1, 2 aamma 3 malillugit pisinnaassaaq. Kisiannili inuussutissarsiutigalugu attartortitsisartunut inuussutissarsiornikkut attartortumut iluaqutaasumik atuisunik illersuisarnermut tunngasunik illuinnaasiortumik killiliinerit peerneqartariaqarput.

Periarfissatut aamma isumaliutigineqarsinnaavoq ineqarnermut akiliutip aalajangersarneqarnissaa tamakkiisumik kiffaanngissuseqartinneqassasoq, taamaalilluni inunnut inuttut namminiussuseqartunut aamma suliffeqarfinnut attartortitsinerit namminersorlutik suliasaqarfinni allani “tamangajanni” neqeroorutit piumasaqaatillu naapertorlugit aqunneqarlutik.

Sulisitsisut isumaqarput, § 64 namminersorlutik attartortitsisunut anigaasartuutaasorujussussasoq. Attartortitsineq inatsit malillugu pinersaq kukkunersiuisup nalunaarsorsimasup imaluunniit naalagaaffimmiit akuerisaasup ilumut nalilissaneraa ilutigisaanik nalorninarpoq, tamanna inatsisitigut naliligassaammat – tamanna pillugu Sulisitsisut innersuussutigaat, aalajangersagaq peerneqassasoq.

Inaarutaasumik oqaaseqaatit: Sulisitsisut oqaatigissavaat, inissianik nammineq pigineqartunik, ilutigisaanillu atorfeqarnermut tunngasut isumaqatigiisummut ilaatinneqaratik inuinnarnut toqqaannartumik attartortitsisarnerit ullumikkut killeqarmata.

Sulisitsisut innersuussutigaat, inissianut attartortitassanut anigaasaliinissaq pilinarnerulersinnissaa siunertaralugu, namminersorluni attartortitsinernut piumasaqaatit nalilersorneqassasut. Sulisitsisut isumaat malillugu, niuernikkut tunngaveqartumik attartortitsinissamut periarfissaq ajorseriarpat, inissianik attartortitassanik sanaartornissamut kajumissuseqarnerup sanngiillineranik inatsisissatut siunnersuut kinguneqassaaq.

Sulisitsisut naliliinerat malillugu innuttaasut ineqarnikkut periarfissaannut pitsaanerulersitsissanngilaq, killuanilli inissiat neqeroorutigineqartut ikinnerulissallutik, inissianillu pilersuineq eqqarsaatigalugu pisortat artukkerneqarnerussallutik.

Inissianik pilersuinermit pisortat nammagaat annikinnerulersinnaaniassammat, attartortitassanik namminersorluni inissialiortitsinermut atugassarititaasunut sinaakkusiussat qanoq pitsanngorsarneqarsinnaanerit pillugu Sulisitsisut oqaloqateqarnissaminnut ammapput.

Akissut:

Inatsisartut inatsisaata suliffeqarfiit attartortuutillugit atuunnissaa pillugu oqaaseqaatit, ilanngullugit business-to-business-imi attartortitsineq, isumaqatigiisuteqarnissamut

kiffaanngissuseqarneq atorunnaarsitsisinnaanerlu pillugit, annertuutigut Hotel Hans Egede A/S-ip aamma GrønlandsBANKEN-ip tusarniaanermut akissuteqaataanni allassimasunut assingupput. Taakkununga akissutigineqartut innersuussutigineqartut.

Siunnersuut allanngortinneqarpoq, taamaalilluni Inatsisartut inatsisaat attartornermut tunngasunut taamaallaat atuutissalluni, attartortoq inuttut namminiussuseqarpat. Tusarniaanermut akissuteqaat immikkoortumi tassani siunnersuummi allanngortitsinissamut pissutissaqalersitsivoq.

Aningaasartuutinit aalajangigaasumik attartortitsinermut akigititaq, § 24, ineqarnermut akiliutip aalajangersarneqartarnera, aningaasalersuinermit tunngavigisat aammalu attartortittakkanik pioreersunik maleruagassiineq pillugu oqaaseqaatit, pingaarnertigut Hotel Hans Egede A/S-ip, Qarsoq Tegneste-p aamma GrønlandsBANKEN-ip tusarniaanermut akissuteqaataanni allassimasunut assingupput. Taakkununga akissuteqaat innersuussutigineqarpoq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

§ 64-mut oqaaseqaatit pillugit oqaatigineqarpoq, namminersorluni attartortitsisoq 5-inik amerlanerusunilluunniit attartortittakkanik inissiaateqartoq, Inatsisartut inatsisaanni pineqartunut ilaasumik attartornermut tunngasumik attartortinneqartunik, kukkunersuiisunik nalunaarsorsimasumik imaluunniit naalagaaffimmit akuerisamik kukkunersuiisoqassasoq, inatsisissamut siunnersuummi aalajangersarneqartoq. aalajangersakkami siunertaavoq attartortitsinerup inatsimmi maleruagassanut naapertuuttumik pinissaata nakkutigineqarnissanut tunngavissiiinissaq. Tusarniaanermut akissuteqaat siunnersuummi allanngortitsinissamut pissutissaqalersitsinngilaq.

TK-Group

Inissianik attartorneq pillugu inatsisip misissorneqartariaqarneranut maanngaanniit akerliunngilagut. Nunami inatsisit ukialunnik akuttussusilimmik taamatut misissorneqartariaqarput. Kisiannili siunnersuut saqqummiunneqartoq manna annertuunik kinguneqarsinnaavoq. Assersuutigalugu ineqarnermut pissutsit nalinginnaasut, inuussutissarsiorfissatullu attartornerit inatsimmi akulerunneqarput. Tamanna inissianik nutaanik attartortitassanik sanaartornissamut nutaamik aningaasaliinissatsinnut periarfissaarutsitsissagunarpoq. Taassuma aamma kingunerisaanik massakkut inissiat attartortittagaatitta ilaat immaqa aamma tunisariaqalissavagut. Inuussutissarsiuutillit akornanni attartornissamik isumaqatigiissutinut, inissianut inatsisip nutaap sunniuteqarnissaa uagutsinnut paasiuminaappoq. Siunnersuut manna saqqummiunneqarnermisut tulluuttunik kinguneqassaaq:

1. Kalaallit Nunaanni inissiat attartortittakkat neqeroorutigineqartut ikilinerat (inissiat tunineqassammata, ukioq sinnerlugu attartornerit pillugit isumaqatigiissutit

atorunnaarnerini isumaqatigiissutit atorunnaarsinneqassasut
naatsorsuutigineqartariaqarpoq)

2. Namminersortut nutaanik inissialiornernaarnerat. (aningaasaliinissaq ajornakusuulissaaq)
3. Ingerlatseqatigiiffinit akileraarutitigut isertitat ikilinerat.
4. Siunissami sanaartornerit tamarmik kommuninit, Namminersorlutik Oqartussanit, piginneqatigiillunilu inissiaatilinnit sanaartorneqalissapput.
5. Sulisunut inissiat pillugit aaqqiissut unammillerneqassaaq.

Inatsisissatut siunnersuut manna eqqarsaatigineqarluassasoq, pisariillisarneqassasorlu innersuussutigilluinnarparput. Kiisalu Pisortat/namminersortut attartornissamik isumaqatigiissuteqartarnerat aamma inuussutissarsiutillit akornanni isumaqatigiissusiortarnerit attartortitsinermut inatsimmi immikkoortinneqassasut.

Akissut:

Inatsisartut inatsisaata suliffeqarfiit attartortuutillugit atuunnissaa pillugu oqaaseqaatit, ilanngullugit inuussutissarsiortut aamma sulisunut inissiat akornanni isumaqatigiissutit pillugit, annertunerpaatigut Hotel Hans Egede A/S-ip, Sulisitsisut aamma GrønlandsBANKEN-ip tusarniaanermut akissuteqaataanni allassimasunut assingupput. Taakkununga akissuteqaat innersuussutigineqarpoq.

Siunnersuut allanngortinneqarpoq, taamaalilluni Inatsisartut inatsisaat attartornermut tunngasunut taamaallaat atuutissalluni, attartortoq inuttut namminiussuseqarpat. Tusarniaanermut akissuteqaat immikkoortumi tassani siunnersuummi allanngortitsinissamut pissutissaqalersitsivoq.

Grønlands Politi

Inissianik attartortitsisarneq pillugu Inatsisartut peqqussutaata, kingusinnerusukkut allannguuteqarluni atuuttup § 4-mi utaqqiisaagallartumik inigitinneqartut malittarisassiuunneqarput. Taamaalilluni peqqussutimi § 4 malillugu utaqqiisaagallartumik inigitinneqartunut peqqussut atuutinngilaq.

Inissianik attartorneq pillugu inatsisartut inatsisissaattut siunnersuummi, utaqqiisaagallartumik inigitinneqartut § 5-imi malittarisassiuunneqarput. Inatsisartut inatsisissaattut siunnersuutip § 5-ia malillugu, utaqqiisaagallartumik inigitinneqartut aamma Namminersorlutik Oqartussani kommuninilu atorfeqartunut utaqqiisaasumik allatut illusimatinneqartunut inatsisartut inatsisaat atuutinngilaq.

Utaqqiisaagallartumik inigitinneqartunut atuutsitsinnginneq, politiit ilanngullugit naalagaaffiup suliffeqarfiinut atuutussaajunnaarsillugu, oqaasertaliussaq nutaaq inatsimmik atuuttumik killiliinertut Kalaallit Nunaanni Politiit paasivaat.

Kalaallit Nunaanni Politiit oqaatigissavaat, Ineqarnermut, Attaveqaasersuutitut Isorliunerusunullu Naalakkersuisoqarfiup oqarasuaatikkut attaviginerata kingorna politiit imak paasimmassuk, naalagaaffimmi oqartussaasut utaqqiisaagallartumik inigitinneqartunik, allatullu inigititanik atueriaasiat allannguiffigineqarani, inuit ilaasa akuerineqarsinnaanngitsumik utaqqiisaagallartumik inigitinneqartunut mikivallaanut inissinneqartut pitsaannerusunik pisinnaatitaaffeqarnissaasa qulakkeerneqarnissaa killiliinermi siunertaasoq. Kalaallit Nunaanni Politiit isumaqarput, matumani politiit ilanngullugit naalagaaffimmi oqartussat, Namminersorlutik Oqartussat aamma kommunit assigilluinnarlugit inissiat utaqqiisaagallartumik inigitinneqartutut atorineqarsinnaasut pillugit sulisumaqatigiissusiarsinnaanissaat qulakkiissallugu pingaaruteqartoq.

Tamanna tunuliaqutaralugu Kalaallit Nunaanni Politiit Ineqarnermut, Attaveqaasersuutitut Isorliunerusunullu Naalakkersuisoqarfimmut siunnersuutigissavaat, atuutsitsinnginnermut tassunga Naalagaaffik aamma ilaasussanngorlugu inatsisartut inatsisaata § 5-ia allanngorteqqullugu.

Akissut:

Siunnersuummi § 5 malillugu Naalagaaffimmi, Namminersorlutik Oqartussani kommuninilu sulisunik utaqqiisaasumik inissiisarneq allatullu utaqqiisaasumik ilusilimmik inissiisarneq Inatsisartut inatsisaata atuuffissaanni ilaatinneqanngilaq. Erseqqissarneqarpoq allatut utaqqiisaasumik ilusilimmik inissiisarnernup ilaatinneqannginnerani Naalagaaffimmi sulisut aamma pineqartunut ilaasut. Tusarniaanermut akissuteqaat immikkoortumi tassani siunnersuummi allanngortitsinissamut pissutissaqalersitsivoq.

Siunnersuummi § 5-imi naalagaaffimmi oqartussat inissianik utaqqiisaasumik inissiinermut aammalu suliaqarnerminnut ilaatillugu allatut utaqqiisaasutut ilusilimmik inissiinermut atuisinnaaneratt allanngortinneqanngilaq.

Naalagaaffimmi oqartussat inissianik atugassinneqarsinnaanerannut, aaqqissuussinerup atuuttup killissaasa iluanni Naalakkersuisunut isumaqatigiissuteqarneq sulisut tunngavigineqarpoq.

BDO

Naatsorsuuserinermut aaqqissuussineq

Inatsisissatut siunnersuummi naatsorsuutiniq saqqummiisarnernup inissianik piginnittunut naleqqussarneqarnissaanik, kiisalu ineqarfiit maannamut naatsorsuutaasa siunissami aqutsissutitut isigineqarnissaanik tunngaveqarpoq.

Tamatuma ukiumoortumik naatsorsuusiortarnermut inatsimmi aalajangersakkat naapertorlugit naatsorsuutiniq saqqummiussisarnermut nuunneqarneratigut isumagineqartarnissaa siunnersuutigineqarpoq.

Naliliinerput malillugu ukiumoortumik naatsorsuusiortarnermut inatsimmi aalajangersakkat naapertorlugit saqqummiussisarneq ersarinnerulersitsinikkut pinngitsoorani iluaqutissartaqartussaavoq, kisiannili aamma paarlattuanik unammilligassanik arlalinnik pilersitsisussaavoq, taakkunungalu piffissaq ikaarsaarfik, ammaanermi iluutit nalingisa, taamatullu ileqqaakkat illuartitallu nalinginik oqimaaqatigiissitsinernik suliaqarfiususaaq ilaavoq.

Ammaanermi oqimaaqatigiissitsinermi naliusut naatsorsornerini illup pisiarineqarnermini akia, piffissap naliliiffiusup tungaanut nalikilliliinernik ilanngarneqartoq tunngavigineqarsinnaavoq. Taakkunangaanniit aserfallatsaaliuinnermi kinguaattoorutit ilanngaatigineqassapput, tassungalu ilanngullugu kinguaattoorutit illup atasinnaassusianik, taamaalillunilu piffissap nalikilliliiffiusussap sivisussusianik naliliisoqartussaavoq.

Tamatuma saniatigut nalikilliliinermik misiliinertut taasamik suliaqartoqartussaavoq. Tassalu illu siunissami akilikkat ingerlaarnissaanni akuerineqarsinnaasunit qaffasinnerusumik nalilerneqarsinnaanngilaq.

Tamanna piviusunngortitsinerup nalinga ilanngaasereerlugu naliliinikkut pisussaavoq. Piviusunngortitsinerup nalinga ilanngaaseriigaq tassaavoq naliusoq, ineqarnermut akiliummit ernialerneqarsinnaasooq nalikilliliissutaasinnaasorlu – imaluunniit illup niuerfimmi pituttorsimanngitsumi tunineqarnerani naligisinnaasaa (taamaattumik taasamik peqartoqarneranik oqartoqarsinnaappat).

Maanna ineqarnermut akiliutaasartut pingaartumik Namminersorlutik Oqartussani kommuninilu Teknikkimut Aningaasaqarnermut Naliusunit appasinnerungaatsiarsinnaapput, maanna ineqarnermut akiliutaasartut atorlugit ingerlatsinermut (aserfallatsaaliuinnermullu), nalikilliliinernut illullu aningaasalersorneqarnerinut naammanngimmata.

Tamatuma saniatigut ukiumoortumik naatsorsuusiortarneq pillugu inatsit aallaavigalugu siunissami aningaasartuutissanut illuartsinissap naatsorsorneqarnissaa periarfissinneqanngilaq (taamaattumik tunngaviusumik nammineerluni aningaasaatinut ilaatinneqaannartarput).

Ukiumoortumik naatsorsuusiortarneq pillugu inatsimmi aalajangersakkat malinneqassappata, aamma pitsanngorsaarnernik (nutarterinernik) ingerlaavartumik aallartitsisoqartartussaavoq, taakkunungalu tamatumunnga atatillugu aallaqqaammut naliusumiit nalikilliliinissamik pisariaqartitsineq ilaatinneqarpoq.

Kissaatigineqarpat kommuni inissiaatileqatigiiffiit naliliinerit pillugit nassuiaatinik naatsorsuutinillu pissarsiniartoqarsinnaavoq, ukiumoortumik naatsorsuusiortarnermut inatsimmi aalajangersakkanut ikaarsaarnermi kingunerisassat takuniarlugit.

Kukkunersiuisoqarnek

Ineqarfiit ataasiakkaat uteqqiinnissamut pisussaaffeqarnerinik atorunnaarsitsisoqarnissaa, tamatumunngalu taarsiullugu inissianik piginnittup inissiat pillugit suliassaqartuani kukkunersiuisoqarnermik atuutsitsisoqalernissaa siunnersuutigineqarpoq.

Tamanna pingaarnerusuni isumannaannerulersitsissaaq, kisiannili aamma ineqarfinni isumannaassutsimik annikillisitsissalluni.

Kisiannili allassimanngilaq:

- inissiamik piginnittup kukkunersiuisua (maannatut) kukkunersiuinermik ingerlatsisuussanersoq
- pisortani kukkunersiuinermut tunngaviusut malillugit kukkunersiuisarneq kissaatigineqarnersoq – tassalu tassani aamma ingerlatsinermik kukkunersiuiineq aamma inatsisit malillugit isornartorsiuiiffiusumik, Namminersorlutik Oqartussat kommunillu ingerlatsiviini allani atorneqartoq ilaatinneqassanersut
- siunissami kukkunersiuinermut ingerlanneqartumut atatillugu kukkunersiuinermi allattaavinnik immikkoortunik atuilernissamik kissaateqartoqarnersoq.

Attartornermut akiliutininik aalajangersaasarneq – nalikilliliinerit

Ataatsimut isigalugu naliliinerput malillugu nalikilliliinerit, attartornermut akiliutininut qummut killiliussanik taaneqarsinnaasumik aalajangersaanermut ilanngullugit naatsorsorneqarsinnaanersut/naatsorsorneqassanersut naammattumik ersarissusilimmik allassimanngilaq. Attartornermut akiliutininut qummut killiliussat tassaapput ineqarnermut akiliutit, maleruagassat naapertorlugit akiligassanngortinneqarsinnaasut – attartornermut akiliutininut qummut killiliisarneq ullumikkut Namminersorlutik Oqartussat kommunillu inissiaataanni tamakkiisumik atorneqarpasinnngilaq.

Nalikilliliinerit naatsorsuinermut ilanngunneqanngippata, ineqarnermut akiliutit illup pisiarineqarneranut akiusumut (aamma/imaluunniit illup sananeqarnerani akiusumik avataaniit aningaasalersuisoqarsimappat kiffartuussinermut) matussusiisinnaanngillat.

Namminersorlutik Oqartussanut kommuninullu tunngatillugu tamanna illup pisiarineranut akiusumut akileraarutitigut tamakkiisumik aningaasalersuinermik nassataqartussaavoq (atuisut akiliutaat matussusiisinnaanngimmata).

Kommunit inissiaatileqatigiiffiitut tunngatillugu tamanna illut nutaat annertunerpaamik taamaallaat kommuninit piginnittunit tamakkiisumik ilaannaasumilluunniit aningaasaliiffigineqarsinnaapput (ineqarnermut akiliutit atorlugit avataaniit aningaasalersuutitut akileraanissaq nammanneqarsinnaanngimmat).

Ineqarnermut akiliutininik aalajangersaasarneq – ernialersuineq

Ernialersuineq akuttunngitsumik iluanaarfittut taaneqartarpoq, tamannali pissappat illup pisiarineqarnerani nammineerluni tamakkiisumik aningaasaliisimanissaq pisariaqarpoq. Taamaanngippat imminut akilersinnaassutsimut erniarititat erniat avataaniit aningaasalersuutigineqartunut akiligassat akilerneqarnissaannut ilanngunneqassapput).

Ingerlatsinermut aningaasartuutit, PPV-nut kiisalu (immaqa) nalikilliliinernut aningaasartuutitik ilaqartinneqartut aaqqissuussaaneq qanorluunniit ittuugaluarpas assigiimmata, ernialersuinerlutik tunngassutillit kisimik ineqarnerlutik akiliutit, pisortanut maleruagassat aamma namminersortunut maleruagassat akornanni assigiinngissutaapput. Allassimavoq, Namminersorlutik Oqartussat kommunillu taamaallaat suli Teknikkimut Aningaasaqarnermullu Naliusup 1,5 pct.-iinut ernialiillutik ilanngussisinnaasut – taamaattorli kvm-imut minnerpaamik 7.000 koruuninik aammalu annerpaamik 15.000 koruuninik.

Illut ullumikkut kvm-imut 25.000 koruunit missaannik (amerlanerusunillu) naleqartinneqarlutik sananeqartarmata, tamanna 1,5 pct.-nik, minnerpaamik 10.000 koruuninik ernialiinnginnermik kinguneqartarpoq. Kisiannili tamanna kissaatigineqarnersoq kissaatigineqannginnerlorluunniit soorunami politikkikkut toqqarneqartussaavoq.

Aamma tamanna Namminersorlutik Oqartussat kommunillu inissiaatiminnut namminneerlutik aningaasalersuinnissaasa naatsorsuutigineqarneranik isumaqarpoq (tassalu akileraarutit aqqutigalugit akiliinikkut aningaasalersuinnermik. Oqaatigineqareersutut kommunit inissiaatileqatigiiffii taamaallaat illunut nutaanut aningaasaliisinnaapput, kommunit piginnittut aningaasaliissuteqarpata.

Illunut namminersortunit pigineqartunut tunngatillugu 14 pct.-nik ernialiinissaq siunnerfigineqarpoq, tamannalu aamma soorunami politikkikkut aalajangerneqartussaavoq.

Piviusorsiorlumilli isigalugu 14 pct.-it maanna erniarititaasut eqqarsaatigalugit erniatut qaffasingaatsiartutut isumaqarfigineqarsinnaapput. Tamatuma saniatigut misilittakkani takutinneqarpoq, erniarititaasut nikerarnerini akigititaviusussat unammillertitsilersinnaasut. Assersuutigalugu erniarititaasunik diskonto-nik taaneqartartunik, ernianilluunniit akuerisaasunik allanik paarnaarsineq ernianut atuuttunut ingerlaavartumik naleqqussaasarnissamik nassataqartussaavoq.

Aalajangersakkanut ataasiakkaanut oqaaseqaatit immikkut ittut

Tamanna inatsisissamut nutaamut siunnersuummi, 1. Januaari 2027-mi atuutilersussami allassimavoq, tamatumalu peqatigisaanik inissianik attartortitsisarneq pillugu Inatsisartut peqqussutaat nr. 2, 12. maaji 2005-meersoq atorunnaassaaq.

Nalunaarummi nr. 12-imi, 23. apriili 2008-meersumi allassimavoq:

- §80 Ukiumoortumik nalunaarusiaq nalunaarummut ilanngussaq 4 aamma 5 naapertorlugit ilusilerneqassaaq.
- §82 Inissiamik piginnittup kukkunersiuisuata ineqarfiup ukiumoortumik nalunaarusiaa kukkunersiuisut ileqqorissaarnissaat naapertorlugu pereersut pillugit misissussavaa.
- §83 Kukkunersiuisup pereersunik misissuinermini ilanngussaq 6-imi pereersunik misissuinissamut ilitersuut malissavaa, aammalu kukkunersiuisoq ukiumoortumik nalunaarusiap kukkunersiuisut ileqqorissaarnissaat naapertorlugu pereersut pillugit misissorneqarsimaneranut nalunaarummik ilanngussissaaq.
- §83, imm. 3 Kukkunersiuisoq kukkunersiuinermi allattaavinnut allattuissaaq.

Ataatsimut isigalugu inatsisissami nutaami paasissutissat taakku amigaataarpasipput, taakkunungalugu ilaapput:

- Tassani allassimavoq kukkunersiuisoqartussaasoq, kisiannili kikkut kukkunersiuisinnaanersut allassimangilaq. Inissianik piginnittup kukkunersiuisua kukkunersiuisava?
- Malugaarput kukkunersiuisoqarnissaa piumasaqaatigineqartoq, tamannalu maannamut piumasaqaataasartunut naleqqiullugu allaffissornermut nammagassanik annertuumik sukannernerulersitsisussaavoq (ineqarfinni naatsorsuutini pereersunik misissuinissamut piumasaqaateqartoqartillugu)
- Maleruagassat suut malillugit kukkunersiuiineq ingerlanneqassava? DK-mi ineqarfinnut naatsorsuutit nalinginnaasut nalinginnaasumik SOR (pisortani kukkunersiuinermi malitassat) naapertorlugu suliarineqartarput – taamaattorli aamma aningaasalersuineq pillugu kukkunersiuiinerit eqqarsaatigalugit kukkunersiuisunit annertusineqangaatsiarsinnaapput, kukkunersiuinermi ingerlatsinermit inatsisitigullu pinngitsoorneqarsinnaanngitsunut kukkunersiuiinerit ilanngunneqartarmata.
- Tassunga ilassutitut: kukkunersiuinermi allattaaviit suliarineqassappat? Kukkunersiuisarnermi nunani tamalaani malitassat naapertorlugit tamanna piumasaqaataanngilaq, kisiannili inissianik piginnittut kukkunersiuinermi kukkunersiuisup suliaanik paasisaanillu, nalunaarummi allassimasunit annertunerusumik takunniffigisinnaavaat.
- § 15 naapertorlugu naatsorsuutit ukiumoortumik naatsorsuusiortarnermut inatsit malillugu saqqummiunneqartussaapput. Taamaalilluni apeqquutit arlallit ammaanneqartarput, maanna naatsorsuutit NAL 12-imi, 23. aprili 2008-meersumi ilanngussaq 4 + 5, ineqarfinnut naleqqussagaasut naapertorlugit suliarineqartarmata.
 - Ukiumoortumik naatsorsuutitut inatsit malillugu assersuutigalugu illuutit nalingi, inatsit manna naapertorlugu naatsorsuutitut siullernut naliusunut aallarniutitut naatsorsorneqartussat naatsorsorneqartarput.
 - Illuutit qanoq iliorluni naatsorsuutitut ilanngunneqarnissaat naliusullu aalajangerneqarnissaat eqqarsaatigineqarpa?

- Kiisalu tamatuma kingorna naliusunik aalajangiineq (nalinik appartitsinissamut misiligut).
- Ukiumoortumik naatsorsuutitut inatsimmi tunngaviumik siunissami aningaasartuutissanut illuartitsinissaq akuerisaanngilaq, taamaattumillu PPV-mut illuartitsinissaq inerteqqutaavoq.
- Illut ataasiakkaarlugit aserfallatsaaliuinnermut pilersaarusiortoqartussaavoq. Pilersaarutit taakku suliarineqarsimanersut, aammalu tamanna pillugu nalunaarusiortoqarsimanersooq kukkunersuiisup nakkutigissavaa?
- Aamma imermut kiassarnermullu naatsorsuutit suliarineqartussaapput. Taakku naatsorsuutitut tamarmiusunut, inissianik piginnittup ukiut tamaasa suliaasaanut ilaatinneqassanersut, imaluunniit immikkoortillugit suliarineqassanersut allassimanngilaq. Tassungalu ilanngullugu aamma taakku kukkunersiorneqassanersut.
- Inatsisissaq nutaaq 1. Januaari 2027-mi atuutilissappat, 2026-mut naatsorsuutit misissorneqartussaassappat, aamma maleruagassat 31/12-2026 ilanngullugu atuuttussat malinneqassappat? Aamma apeqqut matuma siulianiittoq naapertorlugu naatsorsuutini nutaani qanoq iliorluni ukiup aallartinnerani oqimaatigiissitsineq suliarineqassava?

Akissut:

Naatsorsuuseriaaseq

Siunnersuut allanngortinneqarpoq, taamaalilluni Namminersorlutik Oqartussat inissiaataannut attartortittakkanut kiisalu kommunit ataasiakkaat inissiaataannut attartortittakkanut ukiumoortumik nalunaarusiat ataatsimoortut, attartortitsisup kukkunersuiisuanit avataaneersumit misissorneqartalissalluni (review). Namminersorlutik Oqartussat kommunillu inissiaataannik attartortittakkanik attartortitsineq il.il. allaffissornikkut aqutsisumit avataaneersumit isumagineqarsimappat, allaffissornikkut aqutsisup kukkunersuiisua avataaneersooq misissuisussaavoq. Aningaasaatinik aqutsineq, missingersuutitik, naatsorsuutitik ukiumoortumillu nalunaarusianik aqqissuussineq suliarinninnerlu kiisalu kukkunersuiisup avataaneersup misissuisarnera (review) pillugit maleruagassanik aalajangersaanissamut Naalakkersuisunut piginnaatitsissut siunnersuummi § 15-imi imm. 3-tut ilanngunneqarpoq.

Attartornermut akiliutip aalajangersarneqartarnera – nalikilliliinerit ernialersuinerlu
Namminersorlutik Oqartussat kommunillu inissiaataanni attartortittakkani ineqarnermut akiliutip aalajangersarneqartarneranut tunngaviusut pingaarnerit Inatsisissamut siunnersuummi §§ 18 – 23-mi aalajangersarneqarput. Nalinginnaasumik tunngavissaatinneqarpoq, pisortat inissianik attartortittakkanik sanaartornerat ukiumoortumik aningaasanut inatsisini kommunini pineqartuni missingersuutitigut aningaasalersorneqassasoq. Ineqarnermut akiliutip aalajangersarneqarnerani

anigaasaqarnermut tunngasut suut ilaatinneqarsinnaanersut pillugu apeqquummut, inatsimmi aalajangersakkat apeqqutaapput, aammalu immikkut inatsimmi tunngavissaqarani allaffissornikkut aalajangersarneqarsinnaanani.

Oqaatigineqarpoq kommunini inissiaatileqatigiiffiit ingerlatseqatigiiffittut aningaasaatilittut nalinginnaasumik aaqqissuunneqartartut, immikkoorlutik inatsisitigut immikkoortortaammata. Kommunini inissiaatileqatigiiffiit pisortat ingerlatsineranni ilaatinneqanngillat. Kommunini inissiaatileqatigiiffik Namminersorlutik Oqartussat kommunillu inissiaataat attartortittakkat pillugit siunnersuummi aalajangersakkanit maleruagassiivigineqanngilaq. Kommunini inissiaatileqatigiiffiit attartortitsisarnermut inatsisip paasineqartarnerani attartortitsisuupput namminersortut. Kommunini inissiaatileqatigiiffiit namminersortut inissiaataannut attartortittakkanut maleruagassat malillugit ineqarnermut akiliut aalajangersarsinnaavaat.

Ilaatigut namminersortut inissiaataanni attartortittakkani ineqarnermut akiliutip aalajangersarneqartarnera pillugu inatsisissamut siunnersuummut tusarniaanermut akissuteqaatit allat innersuussutigineqarput.

Tusarniaanermut akissuteqaat allatigut inatsisissamut siunnersuummi allannngortitsinissamut pissutissaqalersitsinngilaq.